

مُصْطَفَى الْأَمِير

الأعمال الكاملة

المجلد الثالث

المنشأة العامة للنشر والتوزيع والإعلان
طرابلس - الجماهيرية العربية الليبية الشعبية الاشتراكية

عبدالله بن مسعود بن النخعي

الأمم الكائنات

المجلد الثالث

مُصطفي الأُمير

مُصطفي الأُمير

الأعمال الكاملة

المجلد الثالث

كلام بني وبنيك

حلم الجعاني «الجزء الأول»

حلم الجعاني «الجزء الثاني»

المنشأة العامة للنشر والتوزيع والإعلان
طرابلس - الجماهيرية العربية الليبية الشعبية الاشتراكية

الطبعة الأولى
1395 و. ر - 1985 م

الكمية المطبوعة : 3000 نسخة

المنتشرة العامة للنشر والتوزيع والإعلان
طرابلس - الجماهيرية العربية الليبية الشعبية الاشتراكية

حقوق الطبع
والإقتباس والترجمة
محفوظة للناشر

ص.ب 959 مبرق 20235 "نيليبيا"

مجلس المؤلفين العرب

كلام بينى وبينك..

..مسرحية إجتماعية من ثلاثة فصول..

اعدت هذه المسرحية
في 1958/12/25 م
قدمت لأول مرة على مسرح
الودان 1961/12/28 م
قدمتها الفرقة القومية للتمثيل

الفصل الأول

الشخصيات

- الرئيس : رئيس مجلس إدارة البنك..
المدير : مدير البنك..
شوقي : باشكاتب رئيس مجلس الادارة..
أحمد : الطباع..
سعيد : الفراش..
عبدالرحمن : عاطل عن العمل..
عبدالله : ساعى البريد..
جعفر : رئيس قسم في المصرف..
رضوان : رئيس قسم في البنك..
الدكتور فريد السكربلى..
ناديه : ابنة رئيس مجلس ادارة البنك..

مكتبة الأيسر

الفصل الأول

ترفع الستارة على مكتب فخم.. مكتبة
محترمة.. كراسي.. هاتف.. نقالة أوراق.. في
الواجهة وعلى شمال المتفرج مكتب يوصل
إلى مكتب الطّباع.. على يمين المتفرج باب
مكتب الرئيس.. على شمال المتفرج الجانب
الايسر باب يوصل إلى بقية المكاتب والمدخل
الرئيسي...

الوقت صباحاً..

سعيد... شوقي...

- شوقي : لوحده يتناول الفطور.. (يقرأ جريدة.. يضغط على الزر).. (فترة انتظار.. سعيد داخلاً)..
- سعيد : (داخلاً)... تفضل يا أفندي ..
- شوقي : درت اللى قتلتك عليه ..
- سعيد : من الساعة سبعة ونصف اشتريت اللازم ووصلته للبيت ..
- شوقي : (جرس التليفون يرن.. يرفع الساعة).. الو البنك المركزى الحر للإنشاء والتعمير.. لا.. باشكاتب.. الرئيس؟ مش موجود.. ولا المدير العام.. ما فيش حد.. المكاتب تفتح الساعة تسعة (في حدة) قتلك الساعة تسعة.. (يقفل الساعة في غضب).. (لسعيد).. هو الأفندي دوى معاك قبل فى التليفون...
- سعيد : أيوه يا سيدى ...
- شوقي : أنى مش قتلك قبل الساعة تسعة أنى مش موجود.. قبل هالوقت يا سى سعيد أنى مواطن حر.. إذا كان تشيخ فيا انجى بكري معناها جاى باش نفطر فى هدوء.. سامع...
- سعيد : عندك حق.. حاولت الأفندي باش انفهمه.. لكن هو ما قنعش وأناى ما نعرفش نكذب.. قاللى موجود.. قتله موجود..
- شوقي : (في غضب)... طيب.. طيب.. أرفع الصفرة وهاك الفلوس خلّصه فى الحساب القديم...
- سعيد : حاضر.. «يأخذ الصفرة ويريد الخروج»

- شوقى : سعيد .. نظف المكتب قبل لا تمشي ...
- سعيد : (فى نفور) .. أوه علينا قداش بنظفوها ...
- شوقى : كيف؟ .. والحليب الى قدامك والميه أشكون ..
- سعيد : أستاذ شوقى قداش عمرك ..
- شوقى : عمرى 32 سنة ..
- سعيد : أنى عمرك يا أستاذ شوقى خادام بيه مباشر فى هالمصلحه حاول
كيف اتنقص عليا التعب وبعدين شنوا ما زاللى معاكم عامين يالله
بالكثير ويحولونى على التقاعد .. (ينظف المكتب ويخرج .. احمد داخلا)
- شوقى أحمد ...
- أحمد : شوقى أفندى صباح الخير ..
- شوقى : صباح الخير ..
- أحمد : طبعاً حضرتكم زى العادة حد ما سبقكم ..
- شوقى : أيوه .. عندك مانع يا سى أحمد ..
- أحمد : لا أبدا .. أنا قد ما إنحاول باش إنوض بكرى ما قدرتش ..
- أحيانا نطلع من الحوش نجرى باش نوصل البنك .. تعرف ليا
خمس دقائق كيف طالع من الفراش وانت ماشاء الله كأنك بأت
فى البنك ..
- شوقى : أنا رجل نكره الفراش .. تعودت من الصغر نحب النظام .. فى
حياتى كل حاجة مربوطه بالوقت ..
- أحمد : يا ريت نقدر زيك .. ربما حتى مركزى يزيد يتقوى فى هالبنك اللّ
من يوم دخلته ما تغيرتش حالتي ..
- شوقى : أنت شنوا تعتقد إنجى بكرى لمصلحة البنك ..
- أحمد : طبعاً ..
- شوقى : لا أبدا .. أنت غالط .. إنحب إنجى بكرى باش نفطر فى هدوء
ويكون معاى وقت كافى باش إنوضب مكتبى .. أنى رجل إنحب

- النظام وبس أما مصلحة البنك قاعدة تمشى زى .. الوقت .
- أحمد : خيره الوقت نشبح فيه فى صالحه .. فلوس مكّدسه مالقوش وين يحطّوهم .
- شوقى : يا ريت زى ما تقول .. البنك يأحمد مقبل على الافلاس .. كل يوم المعاملات قاعدة تنقص .. الزبائن لول لول قاعد يهرب .. بعدين انت حاجات زى هذه ما تقدرش تفهمها ..
- أحمد : وما دام الحالة هكى ليه بتجبر نفسك واتجى بكرى باش تنظم مكتبك ما دام عمل ما فيش أحسن تريخ راحتك ..
- شوقى : أنى رجل نظامى .. النظام شعار أسرق .. والدى ربانى على هذا المنوال .. الوظيفة يأحمد يجب إحترامها وتقديسها والاعتزاز بيها أكثر من النفس ..
- أحمد : هذا اذا كان الموظف متبجح ما عlish كان خدم بنصح .. أما اذا كان زى حالاتي ..
- شوقى : من جد وجد ومن زرع حصد ..
- أحمد : الواه؟ شنوا هو اللى أنى مقصر فيه ..
- شوقى : المسألة مش تقصير أو تطويل .. وضعك .. وضعك هو اللى مش مساعدك باش تترقى وتمشى القدام ..
- أحمد : طيب .. علاش ما تنقدينش من وضعى تعاونى وتمشى القدام ..
- شوقى : ما نتلاقوش أبدا .. أنى رجل إنحب النظام وأنت تكرهه .. أنى جدى وصريح وأنت .. الأحسن كيف تمسك مكانك (ينظر ساعته) الوقت ضاع (عبدالله ساعى البريد)

عبدالله ... شوقى ... أحمد

- عبدالله : (يفتح الباب) .. ممكن ..
- شوقى : ممكن .. (عبدالله داخلاً يسلم رسائل) ..

عبدالله : هذه رسائل عادية وهذه رسائل مصحوبة بتوصيات حسب العادة ..

شوقى : طيب .. حطهم على الطاولة الثانية ..

عبدالله : حاضر .. (يضع الرسائل على الطاولة الثانية)

شوقى : أحمد أفندى .. خود الرسائل ونظمها فى الحجرة الثانية حاول كيف ما تغلطش زى عوائدك .. (يقف وينظر الى النافذة)

أحمد : حاضر .. (الدكتور فريد داخلا) .. (يأخذ الرسائل وينسحب)

عبدالله : نهاركم سعيد .. (ينسحب) .. (فريد يودعه فى بشاشه)

فريد... وشوقى ...

فريد : نهاركم سعيد يا أفندى ...

شوقى : سمعنا .. مع السلامه ..

فريد : مش هو يا أفندى .. اللي يكلم فيك شخص آخر ..

شوقى : شخص آخر (يلتفت غاضبا .. يضغط على الزر .. صارخا سعيد ..)
(سعيد مسرعا داخلا) ...

سعيد.. فريد.. شوقى ...

سعيد : ناديت يا أفندى ...

شوقى : الافندى منوا اللي أدنله بالدخول ..

فريد : الأفندى دخل بروحه .. (سعيد ينسحب) ..

شوقى : ليه .. حضرتك ما قرتيش الاعلان المعلق على الباب .. خطه مش واضح .. ممنوع الدخول بدون استئذان ..

فريد : الاعلان مدائرينه لناس تانيه .. أما أنى واحد من العيله .. (يزيل التكر) ..

شوقى : فريد؟ ..

فريد : أيوه فريد دم ولحم ...

- شوقى : قاعد زى عوائدك ما كبرتش ..
- فريد : كبرت .. الواه بنكبر .. شنوا انزاد فى الدنيا .. أنى فريد الأول
- الثاني .. ينجى تَوّا فريد التعس اللى هَمّ الدنيا لَمْ بعضه .. وجى على دماغه فى آخر الزمان .. لكن ما عlish كل شىء يفوت ..
- شوقى : خيرك لا باس ..
- فريد : ما تفكرنيش .. الله يرحم أيام زمان .. تتفكر يا شوقى كنت نعطي فيك على حناكك من كفوف .. كنت حريص فى المدرسه ما تخلّيش حد ينقل منك إلا أنى تتفكر.
- شوقى : يا سلام كيف لا .. حتى أنت يا فريد كنت شاطر .. كنت أحسن واحد فى الصف فى الرياضة البدنيه .. أما أنى ..
- فريد : كنت أحسن واحد فى الحساب .. كنت مرخى والصغار يضربوا فيك لكن ديمه ما تنساش ما فيش منوا كان يخاصم عليك إلا أنى .. الله يرحم أيام زمان ..
- شوقى : دنيا يا فريد ..
- فريد : المهم .. أنى عندى معاك موضوع مهم جدآ ..
- شوقى : (ينظر ساعته) .. تَوّا لا .. فات من وقت العمل عشر دقائق .. موضوعك أحسن كيف تتكلم فيه بعد الظهر وقت الراحة ..
- فريد : بعد الظهر؟ .. هذا معقول .. أنى مستعجل وفى الوقت نفسه ملزوم ..
- شوقى : ملزوم؟ ..
- فريد : فى الدنيا ما غملكش أكثر من البدله اللى قدامك والّا ها لعشره قروش البدله فاضله من رزق الجدود .. أما العشره قروش اتجيك حكايتها بعدين ..
- شوقى : غريب ما قاعد نسمع فيه .. ليه ما حاولتش تعمل بعض الشىء ..

- فريد : حاولت وعملت كثير لكن فشلت . .
- شوقى : عجيبه . . كيف فكرت فى حلان مشاكلك . .
- فريد : فى الوقت الحاضر هانى اهنى . . خالى شغل . . عاطل . . واحد من الملايين الموجودين فى الدنيا عاطلين . . غير فيه فرق . . محسوب أنى عاطل فى بدله محترمه . . زموكن وكرافاته حرير . . ما هوزى ما تعرف ولد عليه كانت متسميه لكن الوقت محاها . . يعنى بالعربي المفضوح رانى قريب انساسى انما محترم وانظيف . .
- شوقى : عجيبه . . غريبه . .
- فريد : ما فيش شىء غريب . . من العائلة ما قعدش إلا الاسم . . الاسم اللى ما يعيشش . فيه بعض العائلات الكبيرة مره مره تتفكر فىا وتعزم فىا . تعرف يا شوقى ليا أكثر من عشرة أيام ماكله طائبة ما طيبتهاش .
- شوقى : طبعا . . مادام يعزموا فيك ما فيش لزوم باش أطيبها . .
- فريد : يعزموا فيا على الشاهى . . أما الأكل السخون ما دخلش معدتي وأنا شاعر لأنها ملزومه والملزوم لازم ييكى . . لكن المعدة ما تبكيش . . الضمير هو اللى ييكى . . لأن المعدة يصادفك يوم إتسكتها . . لكن الضمير إذا كان ما ارتاحش وما القاش شىء يلهمه ويسكته يتعب . . البدله الى قدامك مسكينه قائمه بدور . . دور كبير . . آهو ساترتني . . لكن يحى يوم تقطع وتبيد .
- شوقى : (يلمس البدله) . . ما أطنش تبيد فيه أمل ما زال اتعيش . . يظهر أن قماشها إملح . . .
- فريد : ما يدوم شىء لازم إتجى ساعتها وتنتهى . . خلينا فى المهم . . فى الحاضر . . تعرف يا شوقى هالعشرة قروش اللى وريتهالك ما تقدرش تتصور قداش نعتز بيها ونفتخر . .
- شوقى : عشرة قروش؟ ليه آش السر . .

- فريد : ما هناك سر . كل ما في الأمر كنت خاطم صدفه من شارع وفيه
عماره . قدام العماره كانت فيه سياره شحن واقفه والجماعه الشيلين
كانوا يغنّوا منسجمين . (يا نلّوين تاعونيك هيا إيّصا) عجبتي النغمه
انسجمت معاهم وقعدت نخدم زيهم شعرت بشيء جديد . أول
عمل انقوم بيه في حياتي (يا ناوين تاعونيك هيا إيّصا) . مرت ساعة
ونصف من غير ما نشعر وفي النهايه جى الرئيس واعطاني العشرة
قروش اللّى قدامك . .
- شوقي : عال . . (ينظر في ساعته) . . أوه . . هدرزتنا طوالت . . خدينا من
وقت الشغل أكثر من ربع ساعة . .
- فريد : ما ضاع شيء كلّه داخل في أوقات الشغل . .
- شوقي : نعم . . داخل أوقات الشغل؟ . .
- فريد : أيوه . . قوللى . . هو أنت قداش ليك موظف في هذا البنك . .
- شوقي : من زمان . . .
- فريد : ومركزك كويس . .
- شوقي : الحمد لله . .
- فريد : طبعاً عندك نفود وكلمتك مسموعه عند الجميع . .
- شوقي : في حدود العمل والقانون . . الماشي في هالبنك . .
- فريد : عال . . في حدود العمل والقانون . . قوللى إيه رأيك لو نبدأ نعمل
معاك من الآن . .
- شوقي : كيف تعمل معاي وانت ماكش موظف رسمى . .
- فريد : مش مهم . . نشغل هكّى . . للآه في للآه . .
- شوقي : للآه في للآه؟ مش معقول . . هذا عمره ما صار . .
- فريد : قوللى . . الطاولة اللّى قدامك أشكون صاحبها . .
- شوقي : صاحبها فصلوه وقت خفضوا الموظفين . . .
- فريد : عظيم . . صار فاضيه . . إذن من اليوم ورائح تصبح طاولتي . .
(يقترّب من الطاولة)

- شوقى : (ينظر فى ساعته قلقا) يظهر لى اللى ضيعت عليا وقت كثير من الشغل
 فريد : ما ضاع شىء.. كله شغل اللى قاعدين فيه...
 شوقى : آش ترفس.. شغل منوا اللى قاعدين فيه...
 فريد : أنى نستعجب فيك يا صديقى العزيز اللى ما زال تشد على الشغل
 اللى قدامك موظف زيك فى البنك..
 شوقى : مش معقول. المسئول الأول اللى يخش ويشبحك لازم يستغرب فى
 وجودك.. وينشد عليك..
 فريد : يصير ينشد ويصير لا.. طبعا بنك زى هذا فيه ٦٠٠ موظف
 مستحيل ينعرفوا كلهم وخصوصا بعد العدد اللى فصلوه ما فيش
 شك بعض الاقسام تنضمت من جديد وأنى واحد الى ينضموا فى
 هالأقسام..
 شوقى : (فى هزء) يا سلام على عقلك.. انت مسكين..
 فريد : مسكين ليه..
 شوقى : مسكين من غير شك لأن الوضع الموجود هنايا تجهله تماما..
 فريد : انت غالى يا شوقى أفندى.. أنى فاهم وضع البنك بالمضبوط..
 نعرف الرئيس والمدير وكل المسئولين على الأقسام.. قبل لا
 إنجيك درست كل شىء. تصور حتى مياشركم العجوز عمى
 سعيد نتصوره تماما..
 شوقى : وآش تفيدك معرفتهم..
 فريد : يا عيني والله (يجلس على الكرسي أمام الطاولة).. يلزمنى نعمل وكأنى
 موظف من سنين.. هذه هى الخطة متعى.. أنى نعرف اللى
 البنك يعامل ويتعامل فى الداخلى والخارج وزبائنه أجناس
 وأصناف.. الشغل عندكم ما ينتهيش.. الخاش خاش والطالع
 طالع. بالله عليك أشكون تبىه يوقف عليا اليوم ويسألنى آش
 نعمل ومن أمته جاي للوظيفة..

- شوقى : إذا كان ما سألوكمش اليوم . . غدوه والابعد غدوه أو عشرة أيام لازم ينشدوك . .
- فريد : عشرة أيام؟؟ خير وخير . . على خاطر اذا كان ما نشدوش اليوم وغدوه معنى هذا وليت موظف أوتوماتيكياً ومش غريب بعدين يضلوا يبحثوا عليا اذا تخلفت والّا غبت . . .
- شوقى : (ضحكاً) أما أبسط من عقلك ما أظنش فيه فى الوجود . .
- فريد : يمكن (يضغط على الزر) . . ما تتكدرش يا شوقى . . (سعيد داخلا) . .

سعيد .. شوقى .. فريد ...

- سعيد : (داخلا) . . ناديت يا أستاذ شوقى . .
- شوقى : لا يا سعيد ضربت الجرس كانت غلط . .
- سعيد : عجيب . . عمركم ما غلطوا يا أستاذ . .
- فريد : (يقاطعه) . . أهلاً بعمى سعيد . . كيف حالك . . ماشاء الله ما زالت البركة . . .
- سعيد : (فى استغراب) . . الله يبارك فى حسناتك يا ولدى . .
- فريد : والعزيزياك لا بأس . . كيف حال صحتها . .
- سعيد : حال الكبريا ولدى . . البرد ما يبيش يفارقها . .
- فريد : البرد مصيبه يا عمى سعيد . . ما جربتش تغلفها . .
- سعيد : غلفناها من غير فائدة . .
- فريد : يلزم تستمر مرتين فى اليوم مره فى الصبح ومره فى الليل . .
- سعيد : حاضر يا ولدى . . (ينظر فيه جيداً يريد الخروج) . .
- فريد : اسمع يا عمى سعيد اذا كان جى حد سأل عليا من موظفين والأزوار قوللهم انتقلت الى مكتب الرئيس .
- سعيد : (ينظر فيه جيداً) . . حاضر يا سيدي . .
- فريد : يظهرلى الى انت انسيت اسمى يا عمى سعيد . .

سعيد : (خاجلا) .. الكبر يا ولدى ما خلاش لينا ذاكره ..
 فريد : عندك حق .. انزید إنفكرک .. اذا كان سمعتهم طلبوا الدكتور
 فريد السكربلى هو أفى ..
 سعيد : حاضر يا دكتور .. (ينسحب) ..
 فريد : عال .. عال .. كل شيء قاعد يمشی على ما يرام .. (سعيد
 راجعا).

سعيد .. فريد .. شوقى ...

سعيد : قلت انغلفها مرتين فى اليوم يا دكتور ..
 فريد : أيوه مرتين فى اليوم .. آه .. اسمع .. بالله انزل من فضلك
 جيبلى جبة العمل متعى .. تلقاها معلقة فى الشاطار الثالث على
 يدك اليمين فى حجرة تغيير الملابس .. ملابس الموظفين ..
 سعيد : حاضر .. (ينسحب) ..

فريد .. شوقى ...

شوقى : (غاضبا) عندك جبه عمل هنايا فى البنك ..
 فريد : أبدا ..
 شوقى : أما لاعلاش باعت الراجل باش يجيبها لك .. مش حرام عليك
 راجل شائب تتمسخر عليه وتخلّيه يدور على شيء مش موجود ..
 فريد : ما هو لما يدور وما يلقاش يضللّ ينشد بقية الموظفين وهكى إسمى
 ينشهر فى بقية المكاتب وكل موظف لازم يردد إسمى مش أقل من
 مرتين وهكى عاد .. (يقاطعه شوقى فى هزة) ..
 شوقى : يعتبروك موظف قديم .. (فى حده) .. اسمع .. اذا كان قدرت
 تزلبج المباشر الشائب .. أفى لا .. (ينظر ساعته) .. أرجوك كافى
 تّوا .. الرئيس والمدير على جبة والمسألة تزيد تتعقد ..

- فريد : قلت جاثين.. يا سلام عليك وعليهم.. أنى ممنون لما يوصلوا يا
أستاذ ما تقدرش تتصور قداش يكونوا ممنونين لما يلقونى أهنى..
- شوقى : ممنونين ليه.. أمين المعرفة..
- فريد : (ضحكا) قالك أمين المعرفة.. قبل لا أنجيك بمدة دربت حضرة
الرئيس على شبح وجهى.. فى كل مكان نتقابل معاه.. وين ما
يخش وين ما يمشى أنى وراه أو قدامه.. فى السينما.. فى المسرح
فى المقاهى فى أى مكان يمشيله.. فى اليوم الواحد ما يقلش على
عشرين مرة.. لازم نتقابل معاه..
- شوقى : ويكلم فيك.....؟
- سعيد : أبدا.. كنت بنحييه وهو طبعاً يرد.. إغما زى اللى مش واثق من
معرفتي ما هوزى ما تعرف تتغلب على طبيعته النسيان ومع هذا
كله أنى واثق ما انسانيش..
- شوقى : انقولوا ما انساكش وجي ما حطش باله ليك.. بعدين..
- فريد : بعدين شنوا
- شوقى : ماكش موظف رسمى.. واللى ماهوش موظف ما يصرفولاش
معاش..
- فريد : هذا من حسن حظي اللى ما نيش موظف.. هكّى ما يقدروش
يفصلوني.. اللى ما عنداش وظيفه ما فيش خوف عليه يخسرها..
مع العلم أملى كبير لما تفصلوا موظفين وتبوا تعينوا موظفين جدد
تلقونى حاضر باش..
- شوقى : هو غير ما عندكش أمل.. أنت قاعد تلعب بالنار يا فريد
- فريد : كل شخص فى الدنيا لازم تكون عنده هوايه.. فيه القمار.. فيه
البوكسير فيه لعب كرة القدم وأنى لعب من نوع جديد بنلعب
بشغل حتى لو كان مش موجود..
- شوقى : لكن عملنا محدود ما عندناش شغل ليك..

- فريد : تحضر البركه .. لازم نلقى ما اندير.. آهو مثلاً نكتب رسائل ...
- شوقى : لمنوا ...
- فريد : ما نعرفش .. نكتب رسائل وبس ..
- شوقى : غريبه .. شنوا هو الموضوع اللي بتكتبه ..
- فريد : أى موضوع .. نكتب رسالة لجهة من الجهات .. بعدها يجي الرد .. بعدها إحنا إنرد وهكى عشرين مرة هنايا ينخلق موضوع
- شوقى : والموضوع لا فيه راس ولا رجلين ..
- فريد : يضلوا يخوضوا فيه كلهم وما حد فيهم فاهم حاجة
- شوقى : يصير ..
- فريد : كيف لا .. وهكى رسالة بسيطه تبدأ، إدور من مكان لمكان يطلع من وراها مشروع ...
- شوقى : إرفس .. أنى مستغرب فيك .. كيف قاعد على برا ومع هذا مستشفى المجاديب قاعد مفتوح ..
- فريد : معنى هذا حظي كويس والمستقبل القريب موتيلي مفاجآت ساره .. منوا يدري ... منوا يعرف ...
- شوقى : لا .. منوا يعرف .. مش غريب أنى عندى رغبة نوصل معاك للنهايه لغاية ما يركوك فى حديد ..
- فريد : ما أتحافش .. أنت بريء (يتمم) .. المشروع .. المشروع .. آه .. (ياخذ مجلد كبير) .. مش غريب هذا المخبز التجاري ...
- شوقى : هو يا أستاذ .. (ينظر فى ساعته قلقاً) ..
- فريد : ما تشبحش للساعة .. كله شغل .. معمل المنتوجات الوطنية .. أيوه .. عال هذا المعمل يلزم مساعدته ورصد مبلغ كبير لمساعدته باش يقدر ينفذ مشاريعه قوللى .. أشكون هم البنوك اللي منافستنا

في المشاريع التعاونية . . .

شوقي : البنك الصناعي الحر . . . البنك الاقتصادي وبنوك كثيرة . . .
فريد : عال . . . اذن أول رساله نكتبها لسعادة حافظ بك محافظ البنك
الاقتصادي .

شوقي : طحت وين استرحت . . هذا وين قررت مصيرك . . اظن تسمع
بحافظ بك . .

فريد : نعرف ولده حميده . . بليد من الطراز الأول . . .

شوقي : يقولوا اللي ولده حميده بيتزوج بنت رئيسنا . . .

فريد : أحسن . . لما بنت رئيسنا تتزوج . . معناها ولينا انسابات وهكى
نشتركوا في المشاريع . . نكتبه رساله حول معمل المتوجات
الوطنيه والمشاريع اللي وقفت تنفيذها . . .

شوقي : أما مشاريع . . إذا كان عمرهم ما تقدموا ولا طلبوا . .

فريد : مشاريعي الخياليه . . وهكى لما يستلم الرسالة يقرأها وما يفهم
منها شيء ما فيش شك يرد واحنا انرد . . آش يصير هنايا . . في
البنك ما فيش واحد فاهم الموضوع الا أنى وطبعاً أنكون زعيم
الحركه . . .

شوقي : (ضاحكاً) . . أنت على نياتك يا فريد . . بها البساطه . .

فريد : الأعمال بالنيات يا أستاذ . . قوللي هو مش عندكم طباع . .

شوقي : أيوه . . قاعد في الدار الثانية . .

فريد : عال . . (يضغط على الزر) . . علينا بالعمل وقل اعملوا وسيرى الله
عملكم . . (أحمد داخلا) . .

أحمد . . شوقي . . فريد . . .

أحمد : ناديت يا أستاذ شوقي . .

فريد : لا . . أنى اللي نبيك . . يا . .

أحمد : أحمد . .

فريد : عاشت الأسامي .. بالله يا صديقي العزيز حضر لي الاله الكاتبه
ورقتين رسميتين .
أحمد : حاضر .. نحضرهم وانجي .. (ينسحب) ..
شوقي : صديقك العزيز .. اذا كان حتى العرف ما تعرفاش ..
فريد : آه يا شوقي أفندى انت تنسى ديمه اللي أنى مفروض عليا انعامل
كل الموظفين كموظف قديم .. هذا هو سر نجاح مهمتي .. (أحمد
داخلا) .

أحمد .. شوقي .. فريد ...

أحمد : (داخلاً بالآله الكاتبه) .. حاضر يا أستاذ كل شيء جاهز .
فريد : ما شاء الله .. شباب الله يبارك .. روح فياضة مليانة بالحوية
والنشاط وحب العمل أحمد أفندى ما شاء الله قاعد زى ما خلّيته
زمان ما تغير منه شيء
أحمد : تدوى عليا يا أستاذ .
فريد : أيوه .. الظاهر انستني يا أحمد أفندى أنا الدكتور فريد السكربلى
رئيس قسم الحسابات وياما عملت معاي .
أحمد : أنى يا أستاذ .
فريد : يا سلام ويا ما كنت تشكى على ترقيتك ...
أحمد : وما زلت يا أستاذ لليوم .. ما زال ما أنصافونيش ..
فريد : أنى عارف كل شيء يا أحمد أفندى لازم يتعدّل ..
أحمد : رُعمه يا أستاذ والله رانى فى أشد الحاجة ...
فريد : كون منتهى .. تَوّا اكتب اللي إنغله عليك وفى نسختين من
فضلك ..

أحمد : حاضر يا أستاذ بكل ممنونيه ..
فريد : أيوه .. أكتب إلى صاحب المعالي سعادة حافظ باشا محافظ البنك
الاقتصادى المحترم .. تحية طيبة .. أرجوكم الإسراع فى تقرير

مصير المشروع المقدم اليكم في الخريف الماضي من طرف معمل
المنتوجات الوطنية...

أحمد : قلت معمل المنتوجات الوطنية...
فريد : أيوه.. هذا المشروع يا أحمد يلزم ما تنساش لأنه في المستقبل
القريب جميع أعمال البنك تتركز عليه..
أحمد : وهو كذلك يا أستاذ.. (عبدالرحمن داخلاً)

عبدالرحمن.. شوقي.. فريد.. احمد...

أحمد : (يفتح الباب).. ممكن سيدي..
شوقي : على أشكون أدور..
عبدالرحمن : حضرة الرئيس..
شوقي : الرئيس اليوم ما يستقبلش..
عبدالرحمن : لكن يا سيدي أنى ملزوم بيه.. شىء ضروري..
شوقي : (بحده) قتلك الرئيس اليوم ما يستقبلش.. بعدين أنت ما قرتش
الاعلان الملصق على الباب..
عبدالرحمن : قريته يا سيدي.. ممنوع الدخول بدون استئذان..
شوقي : إذن أنت مخطيء.. هنايا فيه نظام.. هنايا فيه أوصول.. نقدر
نعرف لأى شىء تطلب مقابلة الرئيس..
عبدالرحمن : أنى يا سيدي جاى نطلب وظيفة مباشر عندكم..
شوقي : وعلى خاطر وظيفة مباشر جاى بتزعج سيادة الرئيس..
عبدالرحمن : أستغفر الله.. ما عاذ الله.. نزعج سيادة الرئيس.. أبدا والله
أنى قلت باش تنقضى مصالحتي فيسع فضلت انقابل الرئيس..
شوقي : الرئيس مش ممكن مقابلته في هذا الموضوع.. اتجه لجهة الاختصاص
ومرة ثانية قبل لا تدخل المكتب اطلب اذن رسمي..
عبدالرحمن : ومن أشكون بناخذه اذا كان برّا ما فيش حد..

شوقي : مش شغلى .. تفضل .. (يشير اليه بالخروج) مع السلامة (يفتح له الباب ويخرج يقفل الباب راجعاً) .

شوقي .. فريد .. أحمد ..

فريد : كويس .. كويس .. نستمر فى الرسالة .. (يلاحظ ما كتبه أحمد) .
ونلفت نظر سعادتكم بأن الواجب الوطنى يفرض علينا انجاز هذا المشروع القيمّ والذى سبق أن درسته جميع الوزارات ووافقت عليه .. الا أن ظروف اضطرارية أوقفت هذا المشروع ويسعدنى جدا أن أعلم حضرتكم أننا قد عزمنا على تنفيذه واخراجه إلى الوجود .. هذا وقد أسندنا مهمة انجازه إلى .. بين قوسين من فضلك .. الدكتور فريد السكربلى وأعطيناه السلطة التامة فى جميع الأمور .. وأخيراً تقبلوا أذكى التحيات أخوكم .. شفيق بك ..
رئيس البنك المركزى .. (يأخذ الرسالة يطلع عليها) عال .. عال شكرا يا أحمد ..

أحمد : العفويا أستاذ هذا واجبنا (ينسحب)!

شوقي .. فريد ..

شوقي : طز .. اللّى يسمع يقول حق .. وين تبنى توصل اليوم .. أما تفضلّ السجن والا مستشفى الأمراض العقلية ..

فريد : مش مهم .. المهم هذه أول رسالة تشوف النور .. نور ضوه حار وحرارته تولد عمل وجد واجتهاد ..

شوقي : واشكون هو المغفل الي بيعترف ويوقعلك عليها ..

فريد : ما نعرفش .. أظن لازم بعض الواحد يوقعها .. (ضوضاء وراء الكواليس)

شوقي : (فى خوف) .. الرئيس .. الرئيس وصل .. يالله .. يالله .. درّق

وجهك قبل لا يفيقوا بيك ..

فريد : (فرحا) .. الرئيس .. يا مرحبا .. هذا وين بديت نعيش ..
شوقي : (مسرعا نحو باب حجرة الرئيس .. يفتح الباب ويمسكه وهو خائف)
أحسنلك يا فريد كيف تمشى .. راني مانيش مسئول عليك ..
(الرئيس داخلا) دون أن يلتفت الى حجرته .. شوقي يقفل الباب ...

الرئيس .. شوقي .. فريد ...

الرئيس : (بعد خلع معطفه وطرבוشه .. فريد يفرك يديه فرحا .. شوقي في خوف
الرئيس خارجا) .. نهاركم سعيد يا سادة .. اعلموا المدير بوصولي
قولوله يتصل بيا في الحال .. (ينظر ساعته) عندى نصف ساعة وقت
بعدها بنخرج من جديد .. (يدخل حجرته) ..

شوقي : حاضر يا بك ..

الرئيس : (خارجا من جديد) .. بعد شويه يا شوقي أفندى جائيه بنتى خلّوها
تستنانى واعلمونى وقت وصولها ..

شوقي : حاضر يا بك ..

الرئيس : بالله يا شوقي أفندى ناديلي المدير ..

شوقي : حاضر .. (يخرج مسرعا) ..

فريد : (مسرعا) .. عفوا سيدى الرئيس .. يسمح جنابك يوقع على
هذا .. مستعجل جدا ..

الرئيس : (ويمسك الملف يزنه) .. شنوا هذا الموضوع ؟ ..

فريد : مشروع المنتوجات الوطنية اللّى كلفتني بتحضيره ..

الرئيس : (يتجاهل) .. أنى؟ كلفتك بيه ..

فريد : أيوه حضرتكم وطالب انجازه بسرعة ..

الرئيس : (يفكر قليلا) .. أنى؟ هاها تفكرت (يوقع دون الاطلاع) شكرا يا

شاب على اهتمامك .. (يدخل حجرته) ..

فريد : (يرقص فرحا) .. يا سلام وقعها .. (شوقي داخلا)

شوقي .. فريد...

فريد : وقعها يا حبيبي .. (فرحا يرقص) ..

شوقي : (في ذهول) .. وقعها؟ .. وقع على المسخرة؟ ..

فريد : أيوه .. وقع على المسخرة مانساش عوائده كرئيس ..

شوقي : وبعدين ..

فريد : هذا وين القافله بتبدأ تسير .. حضرة الرئيس وقع الرسالة واسمى

بارز فيها بين قوسين يعنى أنا القاسم المشترك الأعظم .. بوها وأخوها وحموها ..

شوقي : هذا إفتراء .. هذه سرقة تنزلك للهاوية ..

فريد : بالعكس .. هذا وين ابديت إنعيش .. هذا وين نجمى

بيسطع .. نذكر مرة في حفل كبير رئيس جمهورية نادا على عقيد

بلقب لواء .. التانى يوم العقيد أصبح لواء نتيجة غلظه .. وهنايا

حضرة الرئيس وقع بغلط على مشروع وللا مسئول عليه أوتوماتكيا

وهكي وليت عضو فعال في هالبنك بسبب تصرفاته ..

شوقي : مش ممكن ..

فريد : مش ممكن؟ توا بيان (دقات على الباب) .. أدخل (سعيد داخلا) ..

سعيد .. شوقي .. فريد...

سعيد : (داخلا) .. عفوا يا دكتور الجاكييت مالقيتهاش ..

فريد : مش مهم .. تفكرت بعد ما بعثك اللي أنسىتها في المغسله ..

سعيد : إيه هذا علاش مالقيتهاش .. قد ما دورت ما لقيتهاش ..

المكاتب كلها والموظفين سألتهم كلهم .. لكن بدون فائدة ..

فريد : ساعنى يا عمى سعيد .. (يضع الرسالة في ظرف) خوذ هذه الرسالة

وسجلها في قسم الرسائل بعدها أبعثها مسجله مضمونه باليد
بسرعة ..

سعيد : حاضر يا دكتور كون متهى .. (يتوقف) عفوا يا دكتور قتلى نغلفها
مرتين ..

فريد : أيوه .. مرة في الصبح ومرة في الليل .. (يوصله حتى الباب ويقفله)
شوقى : يا ويلك .. آش يخلصك من هالمأزق .. (فريد يتجه للتلفون)
فريد : (يرفع الساعة وبدون أرقامها) الو .. حكومة .. بالله يا حكومه
من فضلك أعطيني وزارة الاقتصاد .. شكرا (انتظار) ألو ..
الوزارة. من فضلك مدير الانتاج العام .. منوا؟ أيوه عمران
لمعى .. شكرا.

شوقى : شنوا قاعد أدير .. لاش تبيه حتى هو ..
فريد : المشروع عمره ما ينجح ويمشي القدام إذا كان الحكومة ما تعاونش
وتساهم فيه .. (يشير اليه بالسكوت) آس .. آس .. أيوه .. الو ..
عمران بك صباح الخير .. أنى الدكتور فريد السكربلى .. المسئول
الأول في البنك المركزى على مشروع الانتاج الوطني .. اهلا ..
اهلا .. بالله من فضلكم قولوا لسيادة الوزير يتصل برئيسنا في
الحال تلفونيا الموضوع مهم جدا ومستعجل أحنأ في الانتظار ..
مع السلامه .. (يقفل الساعة) شفت الأمور كيف تمشى ..

شوقى : شائفها .. الله يخلصها على خير .. لكن قوللي هو عمران لمعى
تعرفه من قبل ..

فريد : أبدا .. عمرى ما شفته ..
شوقى : أما صفاقة .. كيف قدرت تفاهم معاه بهذه السهولة.

فريد : طبعتي هى اللى ساعدتني .. الدنيا يلزم تكون هكى .. حركة
نشاط عمل .. خلق الشيء .. هذه هى خطتي ..

شوقى : قاعد تخدم على هاللك يا فريد .. حبسك أظن مش بعيد ..

- فريد : عاودها... .
- شوقى : أيوه عندك حق إنعاودها.. تحساب نفسك وصلت.. توا انشوفوا لما يحجي المدير العام شنوا تقدر ادير معا..
- فريد : المدير العام.. يا سلام على عقلك.. أنى نعرف نقطة الضعف فى جهازكم الادارى.. الرئيس رجل مصاب بالذهول والنسيان.. المدير العام عامل نفسه فاهم كل شىء وهو صفر على الشمال.. يكره الرئيس ويحسده على منصبه والأثنين عائشين فى نفاق واحد يخاف من الثانى والثانى يحسد الأول وهكى الجو أصفالى.. اذا تعاركوا اثنين الثالث يتمتع...
- شوقى : لكن هذا ما يفيدكش.. المدير مدقق وعصبي ما يتعدى عليه شىء...
- فريد : (التلفون يرن يرفع السماعه) البنك المركزى الحر.. مكتب الرئيس أشكون وزارة الاقتصاد.. أهلا.. أهلا.. سيادة الوزير بيتكلم مع رئيسنا.. حاضر.. نحولكم عليه.. (مسرعاً نحو حجرة الرئيس يبلغه) (راجعاً لشوقى ويقفل السماعه) سامع يا شوقى.. الوزارات بدت تهتم بالموضوع وساعة النجاح وصلت..
- شوقى : شبحى فيها ربطك فى حديد هى اللى مش بعيده.. نقدر نعرف شنوا هو المشروع الى خلوصت الدنيا عليه...
- فريد : ألواه؟.. آش يهملك فى معرفته...
- شوقى : أظن.. حتى أنت والله ماك فاهمه...
- فريد : صحيح.. نظاهر بمعرفته... (المدير داخلا.. شوقى يقفز من كرسيه.. فريد يتجه ويتوقف أمام باب الرئيس)

المدير.. شوقى.. فريد...

- شوقى : سعادة المدير صباح الخير..
- المدير : (فى كبرياء).. يومك سعيد.. (يتجه إلى حجرة الرئيس)

- فريد : (يتعرض له) عفواً يا أستاذ.. الرئيس مشغول في مكالمة تلفونية خطيرة مع الوزارة.. أيوه.. مع وزارة الاقتصاد.. قاعد يتكلم حول المشروع.. أيوه المشروع الكبير.. (يسحب علبه السجائر)..
- المدير : كيف؟.. (يأخذ السيجارة بدون أن يشعر) شكراً..
- فريد : ولعله يا أستاذ شوقى..
- شوقى : (يرتجف خوفاً) حاضر (يولّع للمدير ويداه ترتعشان).
- المدير : خيرك ترعش.. رد بالك تحرقني..
- فريد : أستاذ شوقى حضر من فضلك التقارير اللازمة مع الميزانية المقدره في السنة الماضية لهذا المشروع.. (للمدير).. مانيش عارف وين بنقسم نفسي الوقت مشي كافيني وسيادة الرئيس يُصر على إخراج المشروع في أقرب وقت ممكن...
- المدير : مشروع؟...
- فريد : أيوه.. المشروع اللي درس في الخريف الماضي.. كأنكم إنسيتوني.. أنى الدكتور فريد السكربلى..
- المدير : (حائثاً).. السكربلى؟ فريد...
- فريد : أنى آسف خلّيتكم تنتظروا سيادة الرئيس.. لكن مجرد ما يكمل المكالمه.. أنبلغه وصلوكم.. (يجلس أمام المكتب)
- المدير : صار تبلغوه.. (يحاول أن يتفكر) السكربلى... السكربلى...
- فريد : إيه رأيكم يا بك زعمه ينجح المشروع..
- المدير : أما مشروع..
- فريد : أنى آسف ما نقدرش إنقولكم على تفاصيله لأن المسأله مهتم بها سيادة الرئيس وهو الوحيد اللي أقره.. (الرئيس خارجاً من مكتبه)
- الرئيس.. شوقى... المدير.. فريد...
- الرئيس : دكتور فريد تفضل.. تكلم مع سكرتير الوزارة حتى هو ناسى المشروع ومش فاهم شىء قنعه. أنى حولته ليك على التلفون..

- فريد : حاضر (يرفع الساعه) .. أشكون .. أهلا بالاستاذ .. كيف حالك
يا مرحاب .. انعم سيدي .. أنى فريد السكربلى .. كيف؟
مالكيتوش الملف .. يا سلام عليكم .. إسمع بالتلفون ما تصيرش
مفاهمه كويسه غدوه إن شاء الله نعمل دعسه للوزارة ونتفاهموا
فيه .. طيب يا سيدى حاضر مع السلامة .. (يقفل الساعه) ..
عجيب والله .. ملف يضيع فوضى لكن كل شىء يتوضح فيما بعد ..
الرئيس : (في رقه بخط على كتفه) ما تزعلش يا دكتور .. (يلتفت للمدير) أوه ..
أهلا أهلا نهارك سعيد ليك مدة تستنى فيا ..
المدير : الأستاذ منعنى من الدخول
الرئيس : (ضاحكا) أوه .. زودها كثير ..
فريد : عفوا يابك ما رضيتش توقف المكالمه لأن الموضوع يهمنى كثير
إشتغلت فيه ليل ونهار لانجازة ..
الرئيس : لكن وقت فاضى عندكم موجود وين ما نمشى نلقى فيك الشىء
بالشىء يذكر عجبتمكم مسرحية البارحة .. الواقع شكسير أجاد فى
التأليف
فريد : العفويا بك .. المؤلف كان مولير .. كانت روعه خصوصا
وجودكم معنا فى الصاله زادها روعه
الرئيس : (ضاحكا) شكرا .. (يضع يده على كتف المدير) .. إيه رأيكم فى
السكربلى شاب فى منتهى الخفه والبشاشه واللى نتمناه كل الموظفين
يقلدوه فى هالروح ..
المدير : شنوا تقصد يا بك .. يكونش تقصدوني ..
الرئيس : أبدا .. إنما توا يلزم تتعاونوا مع بعضكم لإنجاز هذا المشروع
مشروع الانتاج الوطنى العظيم ..
المدير : مشروع الانتاج الوطنى العظيم ..
الرئيس : الظاهر حتى أنت ناسيه ..
المدير : لا أبدا .. إنما تنقصني التفاصيل ..

الرئيس : إطمئن.. أحنا من جهة التفاصيل مرتاحين.. الدكتور مكلف من طرفنا وهو المسئول عليه.. أما أنت يا أستاذ ماكتتش نتوقع إنك ناسيه..

المدير : لكن....

الرئيس : ما فيش لكن بالله بالله.. الوقت راح.. (نحو حجرته) تعال نبك عندي موضوع معاك وانت يا دكتور أرجوك لما تجي ناديه بنتي تعلمني وهكى تقدرنا نتعرفوا على بعضكم...

فريد : في الواقع يا بك سبق لي الشرف بمعرفتها أثناء مباراة كرة السلة..

الرئيس : كرة السلة؟ الظاهر. ما يغيب عليك شيء في هالبلاد...

فريد : العفو.. خلقت لهذا يا سيادة الرئيس...

الرئيس : كويس كويس.. (للمدير) شفت يا أستاذ الشباب.. تفضل (مشيراً اليه بدخول حجرته) عندي موضوع معاك.. (ينسحبان).

شوقي... فريد...

فريد : شفت يا شوقي كيف الأمور مشيت.. المدير اللي تخافوا منه كلكم خلتيه لا شيء قدام الرئيس...

شوقي : ما تعتقدش إنك إنتصرت.. الرجل قوى يعرف كيف ينتقم منك على الموقف اللي درتهوله.. (ناديه داخله).

ناديه.. فريد.. شوقي...

ناديه : (داخله).. صباح الخير..

شوقي : (في احترام).. صباح الخير أهلاً.. تفضل..

ناديه : بابا فاضى والّا مشغول...

شوقي : قاعد مع المدير.. إناديلك عليه...

- ناديه : لا ما فيش لزوم خليه يتم ..
- فريد : (مسرعاً يزودها الكرسي) تفضلي يا ..
- ناديه : (تبادل نظرات) شكراً ...
- فريد : أهلاً .. أهلاً .. كيف حالك يا عزيزتي ..
- ناديه : الحمد لله ..
- فريد : طبعاً حضرتك أنسييتيني .. أنى الدكتور فريد السكربلى .. سبق أن تعارفنا فى المباراة الأخيره ضد فريق النجمه ..
- ناديه : صحيح؟ .. كنت حاضر حضرتك ...
- فريد : يا سلام .. فى نهاية المباراة كنت لابسه بدله بيضه وفيها فصوص سود. بشكل نجوم .. يا سلام قداش كنت معجب بلعبك .. إغما الخسارة ما كنتش تنتظر .. فيها .. الحظ .. أما بدلتكم كانت فى منتهى الجمال والذوق السليم ...
- ناديه : عجبتيكم؟ .. (جرس يرن) ...
- شوقى : حضرة الرئيس ينادى (مرتبكاً) .. الرئيس ينادي ...
- فريد : طيب ما تمشيله .. خف نفسك .. (جرس مستمر) ...
- شوقى : (مرتبكاً) حاضر .. ساحووني .. (نحو مكتب الرئيس يضع قلماً فى أذنه) (الجرس مستمر) .. هيا يا بك .. (لناديه) إحتراماتى يا آنسه ..
- فريد ... ناديه ...
- ناديه : (تشير الى الملفات المكدسة) .. إن شاء الله ما نكونش السبب فى إزعاجكم يظهر لى عندكم شغل كثير ..
- فريد : هو صحيح .. لكن على العموم قاعدين على وشك النهايه مشروع الانتاج الضخم يا حبيبتى ..
- ناديه : وأنتم يا أستاذ ممنونين بعملكم مع بابا ..
- فريد : مع بابا .. يا سلام .. بابا رجل عظيم .. قلب طيب .. بس يا خسارة لو ما كانش رئيس ...

- ناديه : كيف؟ ...
- فريد : كنت بنقول وجوده رئيس للبنك ما يخلّش يترقى أكثر من هكّى
بينما لو كان فى وظيفة ثانية يصير يولّى حاجه ثانيه ...
- ناديه : مش مهم .. المهم بابا رجل طيب وحنون .. عيبه هو النسيان
ونقعد ديمه إنخمس عليه ..
- فريد : على العموم ما عادش تخممي عليه .. إحنا نتعاون فى اخلاص
وموده وأنا شخصيا إنجبه كثير لدرجة نفديه بنفسى ...
- ناديه : شكرا يا دكتور .. شعور طيب شعرت بيه من أول لحظة .. نقدر
انقول لأول مرة أنشوف ملفات مكدسة فى هالبنك ...
- فريد : وجودى يا ناديه هو اللّى خلّى الملفات توصل لها لمكان .. كلام بيتّى
وبينك الجماعة اللّى يشتغلوا مع بابا كساله .. تقدرى تسميهم
حفنة حمير ...
- ناديه : أنى شاعره بيه من زمان وخاصة المدير والسكرتير كلّهم زى
بعضهم وتقديرهم لبابا كلّه نفاق ...
- فريد : صحيح .. تعرفى لولا وجودى هالمشروع الضخم اللّى بتعيش منه
آلاف العاطلين عمره ما يتنفذ ولا يدرس إلى يوم بيعثون .. آه ..
لو عندى شويه سلطه .. البنك نخليه يمشى زى الساعة ..
- ناديه : أنى نعاونك .. هات يدك (تأخذ يده) أنى ضدهم كلّهم من زمان
كنت ديمه نتمنى يحى شخص ينظف هالأوساخ المتراكمه
(بتصافحان) إذن معاهدة صداقه ضد المتسكعين ..
- فريد : (فرحا) يا آنسه بعّى فى نفسى أمل كبير وهالأمل لازم تطلع من
وراه نتيجته للصالح العام ..
- ناديه : أنت يا دكتور معزوم عندنا فى البيت بعد الظهر على شربة شاهى
ونفتحلك المجال مع بابا وانخلوه يفهم كل شىء ..
- فريد : شكراً يا آنسه .. (الرئيس داخلا) ..

الرئيس.. فريد.. ناديه...

- الرئيس : هي ناديه ما زال ماجتش...؟
ناديه : شفت.. مش قتلك النسيان...
الرئيس : آه.. ناديه حبيبتى.. (يأخذ معطفه وطربوشه) أنى ماشى يا دكتور
آمتة نقدر نتفاهم معاك حول هذا المشروع..
ناديه : اليوم بعد الظهر يا بابا.. أنى عزمته على شربة شاهى..
الرئيس : عال.. عال.. وهكى يقدر يرتاح شويه.. يظهر لى اللّ فى المده
الأخيره تعب كثير..
فريد : والله تاعب صحيح.. من مدة ما حصلتش ولا يوم إجازة..
الرئيس : ما هو المشكله ما فيش منوا فاهم حيثيات المشروع إلا أنت على
العموم أنى منتظرك بعد الظهر فى البيت مع السلامة (ينسحب)..

المدير.. فريد.. شوقى...

- المدير : (فى غضب) وهكى تجبرنى الظروف باش نشتغل مع بعض فى
المستقبل وباستمرار
فريد : هذا شرف عظيم.. نتعاون مع بعض وما دابيا لو تأمروا الأستاذ
شوقى يساعدنى فى مأموريتى..
المدير : كيف لا.. أستاذ شوقى أنت من الآن تقعد تحت تصرف الدكتور
لإنجاز الملفات الخاصة بالمشروع..
شوقى : لكن أنى يا جناب المدير.....
المدير : شنوا بتقول..
شوقى : (مرتبكاً).. لا شيء حاضر انساعده..
(رضوان.. جعفر... يدخلان).....

جعفر.. رضوان.. المدير.. شوقي.. فريد...

رضوان : (يتكلم ولكنه مائعه) .. حضره الرئيس كلمنى بالتلفون وكلفنى
نتفاهم معاك حول المشروع الضخم...

المدير : أيوه صحيح .. فى اجتماعاتنا الأخيرة .. تتفكرش التاريخ المضبوط
اللى درسنا فيه المشروع...

رضوان : ما نتفكرش .. يصير الزميل جعفر يتفكره لأن ذاكرته قوية وما
ينساش ..

جعفر : (سارحا) .. علاش تتكلموا .. أنى ما فهمتش الموضوع بالظبط ..

فريد : مشروع الانتاج الوطنى الضخم .. إن شاء الله .. إنشاءات تعمير
صناعات مختلفة .. نشاط .. حيوية .. بواسطة البنك الاقتصادى
والصناعى وتأييد وزارة الصناعات الوطنية .. المشروع يا أستاذ
درس فى الخريف الماضى وركنت ملفاته فى الرفوف .. وتوّا عاش
من جديد والفضل يرجع فيه للدكتور فريد السكربلى ..

رضوان : فريد السكربلى ..

المدير : أيوه .. حضرته .. كنت إتظن تعرفوا بعضكم ..

فريد : هم يعرفونى كويس .. لكن ما يعرفونيش اللى أنى المسئول الأول
على تخطيط وتنفيذ المشروع ..

رضوان : صار حضرتك المسئول .. أيوه عظيم ..

المدير : تسمحوا يا سادة تفضلوا فوق فى مكتبى باش إنكمل الاجراءات
الادارية والفنيه لها المشروع ..

رضوان : وهو كذلك ..

جعفر : إنكون ممنون أكثريا دكتور لو تتكرم تحينى فى مكتبى غدوه باش
نتفاهم معاك فى دقائق المشروع ..

المدير : أنى مستعجب فيكم كيف كلکم ناسيين هذا المشروع وأنت يا
دكتور نشكرك ياسر على إهتمامك بالموضوع .. (ينسحبون) ..

فريد : إيه رأيك تَوّا ..
شوقي : رأيى تعرفه بعدما تنكشف ويرموك فى السجن المركزى وأنى
إنجيلك السجائر وانزور فيك .. (أحمد داخلا) ..

أحمد .. فريد .. شوقي ...

أحمد : عفوا يا دكتور ..
فريد : تفضل يا أحمد ..
أحمد : حضرة الرئيس أمشى عندك لزوم بيا وإلا إنروح ..
شوقي : كيف؟ .. تطلب الأذن منه ..
أحمد : طبعاً .. اما لا من أشكون بنطلبه ..
فريد : كويس يا أحمد تقدر تروح وإذا كان بعد الظهر بترتاح .. ما
عنديش مانع عندك الأذن إشتغلت كثير وتلزمك راحة ..
أحمد : شكرا يا دكتور .. (المدير داخلا) ..

المدير .. احمد .. شوقي .. فريد ...

المدير : (داخلا) يا أحمد أفندى بعد الظهر أنى ملزوم بيك عندنا مراسلات
تحتاج للطبع ..
أحمد : لكن بعد الظهر بنعمل راحه طلبتها من الدكتور ..
المدير : من الدكتور؟ .. صار عندك راحه .. طيب طيب تقدر تمشى ..
أحمد : نهاركم سعيد .. (ينسحب) ..

المدير .. فريد .. شوقي ...

المدير : أما لا يا دكتور نقدرنا نتقابلوا بعد الظهر باش نتفاهموا وندرسوا
الموضوع ..

- فريد : أنى آسف بعد الظهر معزوم فى بيت سيادة الرئيس ..
- المدير : معزوم عند الرئيس كويس كويس .. وفى الظهريه وين ماشيين ..
- فريد : (حركة افلاس) .. فى الظهريه .. ما زال ما نعرفش ..
- المدير : ايه رأيك تتغدى عندى فى البيت ..
- فريد : ما عنديش مانع .. بكل ممنونيه ..
- المدير : شوقى أفندي .. إتصل تلفونيا ببيتى .. قوللهم يحضروا لنا غداء ضيف كريم (ينسحب المدير) ..
- شوقى : (يرتمى على الكرسي يده ترمى على الجرس فى حالة اغماء .. الجرس یرن باستمرار .. سعيد داخلا .. فريد حول شوقى) ...
- فريد : شوقى .. شوقى فيق يا حصله .. راك قعمزت على الجرس طاسه اميه يا عمى سعيد الباشكاتب قلبه ناض عليه .. الماء من فضلك ...
- سعيد : قلبه ناض عليه؟ يا ساتر .. حاضر .. (مسرعا ينسحب) .

ستارة....

الفصل الثانى

الشخصيات

الرئيس :	رئيس مجلس ادارة البنك
المدير :	مدير مجلس ادارة البنك..
شوقى :	باشكاتب الرئيس..
أحمد :	طباع
سعيد :	المباشر
عبدالرحمن:	خالى شغل
ناديه :	ابنة الرئيس
جعفر :	رئيس قسم فى البنك
رضوان :	رئيس قسم فى البنك
مراك :	مستشار وزارة المالية
حفظي :	مستشار وزارة الصناعة
فريد السكريلى	

الفصل الثانى

ترفع الستارة على قاعة كبيرة للجلسات
طاولة كبيرة في الواجهة حولها مجموعة
كراسى.. كرسى الرئيس متحرك في الوسط
أوراق.. ملفات القاعة عصره مجهزة بجميع
المستلزمات.

الوقت صباحاً..

سعيد .. أحمد ...

- سعيد : (ينظف القاعة .. جرس التلفون يرن) ..
- أحمد : (يرفع السهاعة) ألو .. ألو .. البنك المركزي الحر للإنشاء والتعمير
الدكتور فريد .. لا .. مش موجود .. نعم .. أيوه يوللى ..
حاضر لما يجي إنقوله .. (يضع السهاعة) ..
- سعيد : اليوم من الصبحيه والجماعه ما تسأل كان على الدكتور فريد ..
- أحمد : علاش .. في ليلة بلا قمر وللى الدينموا متع البنك وخاصة اليوم
وعندهم جلسه خاصه بالمشروع الكبير ..
- سعيد : غريبه .. منوا كان يظن أن سي فريد يوصل لها الدرجة من
المسئوليه 15 سنة فاتوا لما دخل البنك كان عيّل ..
- أحمد : 15 سنه فاتوا ..
- سعيد : نتفكر لما بدى يشتغل هنى وما زلت نتخايل فيه زي اليوم ..
- شوقي : (داخلا) ...

شوقي .. أحمد .. سعيد ...

- سعيد : صباح الخير يا أستاذ ..
- شوقي : نهاركم سعيد .. شنوا فيه .. شنوا قاعدين إديروا؟ ..
- أحمد : قاعدين انضموا في القاعة ..

شوقي : طيب .. كافي الى نضمتوه .. يا سعيد أحسن كيف تمشي وتعدد
في محلّك ...
سعيد : حاضر .. (ينسحب) ..

أحمد .. شوقي ..

أحمد : غريبه يا أستاذ شوقي .. حركه هالاسبوع عمرى ماريتها ...
شوقي : والله مانى فاهم حاجة .. هالمشروع اللّى طلع فى الوجود نهايته ما
ندرى عليها كيف ..
أحمد : وأنت آش يهكم .. ما هو الأستاذ فريد هو المسؤول عليه ..
شوقي : فريد ما هو .. هذا بشيئى قبل الوقت ..
أحمد : ما أعتقدش .. أنت قلبك طيب .. يصير توللّ أصلع لكن
الشيب ما أظنش يركبك .. (دقات على الباب) ..

عبدالرحمن .. شوقي .. أحمد ..

عبدالرحمن : (داخلا) نهاركم سعيد ..
شوقي : أيوه .. ما ناقص إلّا إنت ..
عبدالرحمن : ولا مؤاخذه يا أفندي حضرة الرئيس موجود ..
شوقي : لا مش موجود وبعدين لاش تبيّه ..
عبدالرحمن : بنكلمه على طلبى الّى قدمته .. ما هوزي ما تعرف أنى عاطل
وصاحب عويله ما دابيا نخدم ...
شوقي : لكن هذا مش شغل الرئيس .. إتصل بمكتب العمل وهم الّى
يوظفوك ..

عبدالرحمن : ما فيش فائده إمشيت وجيت لين طاحوا رجليا .. قلت بالكش
حضرة الرئيس يأخذ بخاطري يوظفنى ..
شوقي : لكن أنت يا بوي شنوا تقدّر تعمل .. البنك ملزوم بناس عندها

صَحَّه عندها قوه .. لكن أنت على دوب حالك .. كل اللي قلناه
ينقصك .

عبدالرحمن : صحيح أني كملت كل شيء .. لكن وظيفة مباشر نقدر أنقيمها ..
شغلها خفيف وراتبها ضعيف يعني تناسبني على دوب حالي ...
شوقي : أنت عندك حق .. لكن في الظرف الحاضر ما اعتقدش ملزومين
بمباشر زائد إتعب نفسك .. مش تقول أني بنعرقلك إنما هو هذا
الواقع ...

عبدالرحمن : باهي حضرتك ما تقدرش تتوسطلي مع الرئيس .. يعني تقول فيا
كلمة خير ..

شوقي : يا ريت ما لقيته لنفسى الخير .. حتى نتوسطلك أنت ..
عبدالرحمن : بالكش الأفندي يقدر يعاوفي راهي الدنيا اليوم بالوجوه وكل شيء
وللي بالواسطه ..

أحمد : يا ريت نقدر يا بوي .. أني أصغر موظف في البنك بعد
المباشر ...

عبدالرحمن : يهديكم الله .. سكرتوها وجبتوا مفاتيحها ..
أحمد : قلنا لك الواقع يا بوي .. ما قدرناش .. راجع مكتب العمل
بالكش يسخر ربي يحصلولك مطيريح ..

عبدالرحمن : سنين وأنا عاطل وعائش على الصدقات لكن أني عييت وجهي
تقشر نبي نخدم .. نبي إنعيش من عرقي ..
شوقي : أنت عندك حق يا بوي .. لكن الله غالب أحنا ما عندناش قدره
ليك ..

عبدالرحمن : صار ما فيكمش فائده .. ما فيكمش منوا يعمل المعروف ويجند
نفسه لمساعدتي .. أخ خزيه على الدنيا ومنوا يأمنها ...

شوقي : ما فيش داعي يا بوي للكلام الزائد .. تَوَّاحنا عندنا ما إندير
عندنا أشغال مكده وانا ما عندناش وقت إنضيعوه في
جرتك ..

عبدالرحمن : ما عlish.. عيشوا فيها إتم.. قيموا الأذان.. عبوا جيوبكم
والفقير في ستين داهيه..

أحمد : مش كلام هذا يا بوي.. عيب..

عبدالرحمن : صحيح عيب.. كلام الحق وجاع.. أقعد وافيه.. في الأمان
(ينسحب)

شوقي : أما صحيح علقه..

أحمد : مسكين.. المحتاج شاقى يا أستاذ شوقي (فريد داخلا)

فريد.. شوقي.. أحمد...

فريد : (بيده رزمة ورق).. نهاركم سعيد..

أحمد : صباح الخير يا دكتور..

فريد : الظاهر.. الأستاذ شوقي غاضب عليا.. ما عlish.. نعدروه..

لأنى شغلته كثير فى المحفظه هذه.. لكن ما يدوم حال كل شىء
يتم..

أحمد : أستاذ فريد إذا كان فيه شىء نقدر إنعاونك فيه مستعد..

فريد : ما يخلاش ولو أنى شغلتنك كثير فى الأيام اللى فاتوا.. لكن قريب
يكمل كل شىء تفضل هالملفات واطبعلى تمانية نسخ من
هالرسالة..

أحمد : (يستلم الملفات) حاضر يا أستاذ.. هذا واجب.. أحنا ديمه تحت
الطلب الخدمة معاكم تفتح النفس.. (ينسحب)..

فريد.. شوقي...

فريد : (ينظم الملفات ويصنفها فرق ويرصفها فوق بعضها)

شوقي : لكن قوللى أمتة تفض هالخرافة وزحمة الملفات اللى مكدها فوق
بعضها..

- فريد : هذه خرافة ما إتمش . . خرافه طويله . . كل ما تكدسوا الملفات كل ما لحقائق تطلع للوجود .
- شوقى : غريبه . . فى ظرف أسبوع قلبت البنك الفوقى لوطى إلتمت عندك هالملفات . . وزارتين ويبحثوا على مشروع ماليشى وجود ولا عمره إنبحث . .
- فريد : هو هذا السرّ فى النجاح . . إذا كان تعطيههم وقت كافى للدراسة يضيع . . الوقت وينسوه . . بينما هكّى سخون سخون إذا كان طلع المشروع إلى حيز الوجود هذا اللّى نبغيه وإذا كان ما طلّش صبري لله . .
- شوقى : أنى فاهم النتيجة يا فريد بك . . يا السجن يا مستشفى فشلوم . . مستشفى المهايل يستنى فيك . .
- فريد : مش مهم (يدخل الرئيس) . .
- الرئيس : (داخلا) . .
- الرئيس . . فريد . . شوقى ...
- الرئيس : صباح الخير . . اهلا يا دكتور فريد المحترم . .
- شوقى : (يخني رأسه) سيدي الرئيس . .
- الرئيس : شوقى أفندي تقدر تستعد وتحضر جدول الجلسة . .
- فريد : كل شىء واثق حاضر باش . . .
- الرئيس : واثق؟ . . . غريبه اذا كان ما أعطيتكمش الأوامر . .
- فريد : ما بيتش إنكدر كدرت ما تبّى تأمر بيه . طلبت حضور جميع الموظفين . المسئولين فى المصلحة . . .
- الرئيس : كويس . . تعجبني . . قوللي حاجه . . قتلهم باش يحضروا يا شوقى أفندي مصدر المشروع . . يعنى النسخة الأصلية للمشروع . .
- شوقى : (فى ارتباك) . . مصدر المشروع . .

الرئيس : أيوه المصدر الأساسي اللي انبنت عليها هالأكوام من الملفات ..
صح والّا لا يا دكتور ..

فريد : (مرتبكا) .. أيوه صحيح .. يلزم تحضيره .. شوقي أفندي شنوا
تستنى يالله ابحت عليه مع الجماعة وحضره ..
شوقي : حاضر .. المحاكم .. السجن يستنى فيك .. (يخرج مسرعا)

الرئيس .. فريد ..

الرئيس : شنوا كان يقول ..

فريد : لا .. لا شيء .. غير أتعب مسكين في هالأسبوع في جرت هذا
المشروع ..

الرئيس : آه .. تعب .. طبعاً اللي ما يتعب ما يلقي .. لكن قوللى يا
فريد ..

فريد : تفضل .. خيراً ..

الرئيس : ما تعتقدش أن الاجراءات في المشروع مشت بالسرعة كلام بيني
وبينك أنى متخوف ..

فريد : ما فهمتش شنوا تقصد ..

الرئيس : قصدي بنقول كل شىء مشى جرى فى جرى وأعتقد ربما
يكون ..

فريد : ما فيها شيء .. مسألة السرعة هذه هى طريقي .. السرعة
والانجاز ..

الرئيس : عال .. عال .. الصراحة بنحضر الجلسة مانيش فاهم شىء يعنى
مانيش واق .. إنخاف اللي الجماعة الثانيين فاهمين الموضوع
يصرلي إرتباك ..

فريد : ما اتخافش حتى همّ مش فاهمين شيء ..

الرئيس : كيف ؟ ..

- فريد : يعني بنقول الجماعه التانيين مش غريب مش دارسين كويس ..
- الرئيس : تعتقد هذا ..
- فريد : يا سلام ..
- الرئيس : حسك طمنتني أنى عندى فيك ثقه تامه .. قوللى من كم سنة تعمل معانا فى البنك ..
- فريد : توأ هذا وقته يابك .. هذه حاجات ما ترجعش الشباب خيلنا فى المهم ..
- الرئيس : عندك الحق .. مسأله العمر أحسن الواحد ما يفكرش فيها كثير يستحسن انخش نعمل لحيه راهو الحلاق قاعد يستنى فيا على الأقل مظهرى يستحسن شويه بيان أنشط ..
- فريد : يالله يابك .. تفضلوا .. (يفسح له الطريق) تفضلوا (يدخلان مكتب الرئيس) .. (شوقى .. رضوان .. جعفر يدخلون) ..
- شوقى : (داخلا) تفضلوا ..
- رضوان : صار الجلسه اليوم فى نفس النهار ..
- شوقى : الموضوع مفهوم .. المشروع الضخم ..
- جعفر : بها السرعة .. يعنى فى ظرف اسبوع ومن غير دراسه وافيه ..
- رضوان : هذه عقليه الدكتور فريد ..
- جعفر : مانيش فاهم .. ليه هالسرعه مش معقول مشروع ضخم زي هذا .. أسبوع واحد يكفى لدراسته ..
- رضوان : ما ينساش طبيعته .. هكى كان ديمه .. كل شىء إرتجالى لما كان معاي فى قسمى شفت منه الويل ..
- شوقى : هو خد معاك ..
- رضوان : هذا شينى .. فرفاش بشكل يخوف نتفكر مره قريب إضاربت أنى وإياه ومنها طلبت .. انتقلته ..

- جعفر : وهكى أصبح شخصيه ليها قيمتها أكثر منى ومنك .. قوللى يا شوقى أفندي حسب ما يشاع اللّ هو صديق حميم ليكم ...
- شوقى : أهوزي ما تشوفوا ...
- رضوان : على حسب المسموع اللّ هو كان السبب فى تعيينك فى البنك ..
- شوقى : أنى؟ ...
- رضوان : أيوه .. هكّى بيقولوا هو فى الواقع نشط جدا وجرىء وشكله مقبول عنده تأثير على اللّ بيجاده .. نذكر مره لما فصلنا بعض الموظفين قام بمجهود كبير دافع على بعض الأخوان دفاع مستميت ..
- شوقى : ما نفتكرش .. على العموم إذا كان أنتم تتفكروا هذا ماشى ..
- المدير : (داخلا) ...

المدير .. شوقى .. رضوان .. جعفر ...

- المدير : نهاركم سعيد ..
- الجميع : (الجميع يردون التحيه) ..
- المدير : سيادة الرئيس موجود ..
- شوقى : يحسن فى لحيته ..
- المدير : أشكون معاه ..
- شوقى : منوا غيره حضرة الدكتور ..
- المدير : (يزوم) .. حصله بلوى .. بالله يا شوقى أفندي خلينا لوحدنا شويه ..
- شوقى : حاضر .. (ينسحب) ..

المدير .. جعفر .. رضوان ...

- المدير : يا جماعة السيل لاعب بينا .. سى فريد هذا ناويلنا شماته دار فى

يدّ الرئيس وبدى يتصرف كيف ما يعجبه . .

جعفر : كيف يعنى . . .

المدير : المسألة واضحة زي الشمس عمرى ما نذكر أن فى البنك تقدموا بأي مشروع وتمت دراسته فى ظرف أسبوع وخاصة لما يكون مشروع ضخّم زي هذا . .

رضوان : صحيح . . هذه عمرها ما صارت . .

جعفر : نقدرنا نعتبروا المسألة مقصوده وفيه حد متسلط علينا على مراكزنا فى البنك ويّى يرمينا قدام الأمر الواقع . .

المدير : تقصد الدكتور فريد ما هو . .

جعفر : ومنوا غيره أحنا كنا مرتاحين لا بأس علينا وفى ظرف أسبوع إنقلبنا الدنيا الفوقى لوطى . .

المدير : إذن . . يلزم نتكلم ونوحد كلمتنا . . الدكتور فريد صديق عزيز علينا وفى الوقت نفسه صديق حميم للرئيس حسب ما فهمت منه لما عزمته على الغداء فى بيتي . . لكن هذه المرة نبيّ نوقفه بالمرصاد وانجى ضده وانتم بتساندونى . .

جعفر : وشنوا تبينا إنذيروا . .

المدير : نرفض جلسته اليوم وانطالب التأجيل فى بحث المشروع وانقول الوقت مش كافى لتقديره .

رضوان : صح . . المشروع يحتاج لدارسة أكثر . . احنا ما نخلوش نفسنا نعاى يقود فينا سى فريد زى ما يعجبه . .

المدير : نذكر مرة لما تقدمت بيه أنى هذا المشروع سيادة الرئيس ماباش ينظر فيه ولا قال حتى إدروسه . .

جعفر : صح . . نتفكر لما حولته عليّا للتقدير المالى . .

رضوان : وأنى . . يا ما ضيعت فيه من الوقت . . لما درستته من النواحي الفنية . .

المدير : وتوّا لما جى صاحبه سى فريد بالسرعة وبالسرعة الخاطفه يتم كل

شئ وعلى حساب أشكون...

جعفر : على حسابنا...

المدير : ولهذا إحنا لازم نوقف وقفه رجل واحد.. نرفض إجتماع اليوم وخاصة عندنا حجة فى يدنا وهي أن النسخة الأصلية اللي إندرس عليها المشروع مش موجوده وحد ما قدر يلقاها..

رضوان : فعلاً.. إذا كان ما نلقوهاش ما نقدرش نجلس ونبحث فى موضوع مش فاهمين فيه شئ.

الرئيس : (داخلا ومعه فريد)...

الرئيس.. فريد.. المدير.. جعفر.. رضوان

الرئيس : شنوا فيه هالاجتماع الثلاثى فهمونى..

المدير : كنا نبحث مع بعض يا سيادة الرئيس موضوع جلسة اليوم..

الرئيس : خيرها جلسة اليوم..

المدير : أنى آسف جدا نوقف فى طريق الدكتور فريد وانجى ضده فى بحث موضوع المشروع اليوم..

الرئيس : وضح كلامك ما فهمتش..

المدير : كنت بنقول لو تتكرموا تعطونا وقت أكثر باش نقدرنا وندرسوا هالمشروع.. ما تعتقدش حضرتك أن الوقت مش كافى..

الرئيس : كيف كيف؟.. شنوا أنتم ما زال ما درستوشى..

المدير : أنى ما قلتش هذا يا حضرة الرئيس.. الكل نعرف المشروع ودرسناه قبل ما يحى بين يدين الدكتور فريد.. إنما نطالب بشويه وقت زياده..

رضوان : هو هذا.. أنى من جيهتى درست الناحيه الفنيه.. إنما..

الرئيس : يلزم وقت أكثر..

جعفر : أيوه.. يلزمنا وقت أكثر وأنى بالفعل درست النواحي المالىه.. إنما..

- الرئيس : إنما.. إنما.. إنما شنوا..
- المدير : اللّى ينقصنا فى الوقت الحاضر الأصل فى هذا المشروع.. يعنى النسخه الأصليه.
- الرئيس : هذا طبعي.. النسخه الأصليه لا بدّ منها حتى أنى بنشوفها قبل ابتداء الجلسه..
- فريد : ما فيش شك لا بد من الأصل.. وأنى كلفت منوا يهتم ويحضرها (يضغط على الجرس)..
- شوقى : (داخلا)...

شوقى.. فريد.. الرئيس.. المدير.. جعفر.. رضوان...

- شوقى : ناديتوا عليّ؟..
- فريد : أيوه.. الأصل متع المشروع إلقيتوه والّا ما زال..
- شوقى : (مرتبكا).. الأصل.. الأصل.. لا.. مالقوشى..
- فريد : كيف؟ مالقوشى..
- شوقى : دورنا فى المكاتب كلّها.. البنك قلبته الفوقى لوطى بدون فائده..
- المدير : غريبه.. كيف إضيع ورقة رسميه.. ورقه ليها قيمتها وبعدين نصف ساعه قبل الجلسه..
- فريد : لازم نلقوه.. لازم اذا كان ما فيش يد قاماته وضيعاته..
- المدير : كيف يد إتقيمه واضيعه.. ما فيش منوا مسئول فى الموضوع هذا الا أنت يا شوقى أفندى لأن الأوراق اللّى يوقع فيها حضرة الرئيس تمر على يديك..
- شوقى : أنى مسئول؟...
- المدير : أنعم.. أنت المسئول ولا حد تانى غيرك.. أنت فى المده الأخيره تراخيت ياسر ووليت مهمل بشكل غريب..

- شوقى : أنى مهمل يا حضرة المدير. . .
- المدير : مهمل. . . ولهذا نندرك ونعلمك إسمك نحطه فى القائمه. . .
- شوقى : أما قائمه يا أفندي. . .
- المدير : قائمه المفصولين. . . المفصولين من غير كرامه. . .
- شوقى : أنى ما عنديش كرامه. . .
- المدير : أيوه. . . على خاطر لو كنت عندك كرامه حافظت على سمعة البنك اللى عيشك السنين الطوال. . . ورقة زى هذه إضيع منك ما فيش موظف مسئول. ورئيس قسم فى هالبنك اللى ما درسش. . . المشروع وتعب فى جرتة وفى النهاية تطلع النتيجة. . . الأصل يضيع. . .
- الرئيس : نوصل للمهم يا جماعة. . . من رأيي ، إنخليهم ي زيدوا ويدوروا وإذا كان بعد نصف ساعه ما لقوشى نأجل الجلسة إلى يوم تانى. . . (ينسحبون)

شوقى .. فريد ..

- شوقى : باهى عندك. . .
- فريد : قال دوروه. . . كيف بنلقوه اذا كان مش موجود. . .
- شوقى : أنى ريت ناس ياسره تنطرت من الدنيا أما وضعك مانيش عارف كيف يكون. . .
- فريد : الي هو تَوّا. . .
- شوقى : طبعا. . . شنوا عندك بدير أكثر. . . ما قدرتش تحصل وظيفة باش تعيش بيها تسلطت عليا وهكى قطعت عيشتي وعيشة صغارى. . .
- فريد : أبدا ما كانش هذا قصدي. . .
- شوقى : لكن تَوّا بيانلك. . . كلهم ضدك ويستنوا فى اللحظة اللى يقضوا فيها عليك وخاصة المدير ما يطيقش شبح وجهك. . .

- فريد : مش معقول .. المدير يعرفني أكثر ما تتصور وهذا بان من أول يوم عزمي في بيته .
- شوقي : بالعكس .. هاداكة نفاق .. كرهك من أول يوم شبح وجهك وخاصة لما عرف أن الرئيس قاعد يأيد فيك أما توا يا حبيبي ألقى فاش يكرش .. تشوف الانتقام الصحيح ..
- فريد : ما يقدر يدير لى شيء .. إذا كان فشلت في المشروع مش مهم كثيرين بيدوا في شيء ما يكملوشى وأنى واحد منهم ..
- شوقي : (في يأس) هلكتنى .. أنى خلاص ضعت .. ضعت .. ضيعتني في جرتك ضيعتلى مستقبل وخربتلى بيتي .. (ياخذ معطفه)
- فريد : (مسرعا) .. شنوا إدير يا شوقي ..
- شوقي : بنذرق وجهى قبل لا تصير الفضيحة ..
- فريد : أبدا .. مش ممكن تتحرك من مكانك .. أنى بديت فيها لازم إنكملها .. مش معقول أنكون السبب في هلاكك ..
- ناديه : (داخله) .

ناديه .. شوقي .. فريد ...

- ناديه : صباح الخير ..
- فريد : (بفتور) .. أهلا .. (فترة صمت) .
- ناديه : خيركم مسبتين .. شنوا فيه .. صار شيء ..
- فريد : ما فيه شيء .. أهوا ..
- ناديه : أنى فاهمه .. الشغل كثر عليكم هاليومين ..
- فريد : أيوه .. نوعا ..
- ناديه : المشروع الضخم .. أعظم فكره يحققها البنك في عهد الوالد والفضل يرجع للدكتور فريد النشط ..
- فريد : (في يأس) .. أيوه الشاب النشط ..

- ناديه : طبعاً . لولاك راهو البنك خامد لا حياة فيه . . أنى نعرفهم كلهم
مجموعه موازيها الوالد لا يعملوا ولا يخلّوا منوا يعمل واللى يشبحوه
نشط شويه يتسلطوا عليه ويحيبوه على برا . . .
- فريد : وهذا هو اللى ماشى يصيرلى أنى . . .
- ناديه : مش ممكن . . أنت بديت لازم اتمم يجب ويكره من يكره . .
المشروع الضخم لازم يطلع للوجود . . لأنه مشروع إنسانى . .
حركه ونشاط للناس وللبلاد . .
- فريد : بالفعل يجلب الخير للجميع . . تصوّر يا ناديه معمل زى هذا
كانوا بيعيشوا منه مش أقل من ٥٠٠ عامل واللى ينتجه بيعيشوا
منه آلاف تانيين . . لكن يا خسارة اللى بنيتة مش غريب ينهد . .
- ناديه : هذا مش كلام يا فريد . . خليك صاحب عزيمه قويه ونشاطك . .
اللى بديت بيه لازم تكمل بيه . .
- فريد : إغما فيه شىء مهم يا ناديه ما فيش منوا يعرفه الا أنى وشوقى . .
- ناديه : شنوا هو . . ؟
- فريد : ما فيش شك أظنّ اللى أنى دكتور . .
- ناديه : أيوه . . الدكتور فريد السكربلى رئيس قسم الحركة فى البنك . .
- فريد : أنى لا شىء يا ناديه . . لا شىء إنسان عادى خاطم شارع إندور
على شىء إنديره تسلطت على صديق الطفولة (مشيراً إلى شوقى)
تسلطت على هذا الانسان كنت ناوى بواسطته نطلع شىء للوجود
شىء يجلب الخير للناس والبلاد . . .
- ناديه : أيوه فهمت . . صار انت ماكش موظف مع بابا . . .
- فريد : أبداً . . خاش على الجبل بقادومه باش إندير الخير للغير ومش
لاقيه لنفسى . .
- ناديه : عال . . تعجبني يا ريت منك مائه يخلقوا الشىء من لا شىء . .
- فريد : لكن بدون نتيجته . . بدون فائده . . إذا كان ما إنفضحتش على

وشك الإنفضاح...

- ناديه : الواه؟ ... شنوا شدّوا عليك ..
فريد : طلبوني في الأصل .. النسخة الأصلية للمشروع وهذه ناقصة مش
موجوده حاولت إنذرق لكن بدون فائدة ..
ناديه : خساره .. هو في الواقع المشروع كان كويس .. إحياء شئ كان
ميت معمل كبير زى هذا خساره يقعد مسكر .. كانوا بيستفيدوا
منه الكثيرين معمل يشغل وينتج وبانتاجه تعيش ناس ..
فريد : حلم وما تحقّقش .. أنى كنت ناوى الخير .. لكن الله غالب ما
فضلش الا إنفكر في مصير شوقى اللّى إرमितه في هالورطة وهو
بريء ..
الرئيس : (داخلا) ...

الرئيس .. ناديه .. شوقى .. فريد ...

- الرئيس : يا فريد أفندى إنهنيك من وسط قلبى ..
فريد : أنى .. ألواه ..
الرئيس : إستطعت تقلب البنك فوقى لوطى والجماعة خليّتهم يدوروا ويجروا
وخاصة حضرة المدير الكسلان قاعد يدور زى المهبول في الأصل
امتع المشروع ..
ناديه : هذا شئ طبيعي يا بابا ..
الرئيس : ناديه .. شنوا إديرى اهنى ...
ناديه : جيت باش نحضر كمستمعة لجلسة اليوم على خاطر تهمنى
ياسر ..
الرئيس : خسارة .. إهتمامك بالمشروع جي في وقت غير مناسب ..
ناديه : الواه يا بابا ..
الرئيس : يا شوقى أفندى بلغ جميع رؤساء الأقسام اللّى الجلسة متع اليوم
تأجلت ..

شوقي : حاضر .. (ينسحب) ...

الرئيس .. ناديه .. فريد ...

ناديه : صار تأجلت الجلسة على خاطر طرف كاغط .. طرف كاغط
يوقف جميع الأعمال .

الرئيس : طبعاً .. يوقف كل شيء .. أنى فكره المدير ما نقدرش نشبح
وجهه لكن المره هذه عنده الحق .. مانيش عارف كيف ورقه زى
هذه إضيع وما فيش شك اللّى ضيّعها لازم يفصل فى الحال ..
ناديه : إذن أبدأ قدم إستقالتك ..

الرئيس : شنو تقولي ..

ناديه : الأصل أنت ضيعته ..

الرئيس : أنى ضيعته ..

ناديه : أنعم .. سلمتهولك بيدى فى البيت .. جابه الدكتور ووصانى
باش ما يضيعش .. لكن ...

الرئيس : وعلاش يا فريد ما قتلّيش ...

فريد : أنى ... أنى ...

ناديه : ما باش بقولك على خاطر ما بييش حضرة المدير يشد عليك حجه
لانه يعرفه كويس اللّى هو دائماً يحاول يعرقلك أعمالك ..

الرئيس : حضرة المدير ما هو .. نتصوره أكثر منه .. لكن ما يقدر يدير لي
شيء ..

ناديه : وهذا علاش خلّى المسأله لين وصلت لها الحد وما باش بقولك على
شيء ..

الرئيس : عملت طيب يا فريد ..

فريد : العفو يا بك ..

الرئيس : لكن قوللي يا دكتور .. إذا كان الأصل كان عندى كيف يضيع
منى ..

- ناديه : بابا.. أنت ضيعت حاجات أكبر منه.. مش طرف كاغط..
- الرئيس : صحيح يا بنتي الله يلعن النسيان والسبهاية اللي عندى ساعنى يا دكتور..
- فريد : أستغفر الله يا بك إحنا خدامينك..
- الرئيس : صاحبنا المدير: تَوّا ما زال قاعد يدوّر وقالب الدنيا وهذا وين فهمت اللي هي كلّها خزعبلات فاضيه ناويلي بيها مصيبه لكن أنى لا.. ما نعطيش الفرصه باش يدير اللي في نيته.
- ناديه : تعجبني يا بابا.. هكّى نبيك. ما تخلّيش المدير يتنفّس قدامك ونقط الضعف إمتعك ما تخلّيهاش.. تبان ليه..
- الرئيس : إتهنى يا بنتى.. أنى فاهمه كويس.. وتوّا زدت تأكّدت اللي هو قاعد يحفرلى باش يضرّنى وأنت يا دكتور فريد ساعنى.. فى اللي صدر منى..
- فريد : العفو إحنا لبعضنا مصلحتك هي مصلحتى ومصلحتنا مصلحة الجميع..
- ناديه : وبما أن المشروع يا بابا من وحيك وتفكيرك.. سيادة المدير ما دابيه يعرقلك نشاطك...
- الرئيس : لا.. المرة هذه يغلط.. الجلسة لا بد من إنعقادها هو الأصل على العموم مش حاجة مهمة ياسر..
- ناديه : أيوه يا بابا.. مش حاجة مهمة يا سر ممكن إتحضره من جديد..
- الرئيس : طبعا إنحضروه من جديد.. هو المشروع ما زال يزن فى دماغى نبي روى عندى فكره عليه..
- فريد : عندك فكرة عليه؟ (يستدرّك) قصدي.. بنقول تقدر تحضره وتركز على النقاط متع المشروع فى لَمَح البصر..
- الرئيس : كيف لا.. (يفكر) أيوه.. هو أظن المشروع الضخم للمعمل الكبير اللي توا مقفول من وقت طويل. (يفكر).. أيوه.. هو

طلب مساعدتنا.. لكن إحنا علاش بنساعده؟.. ها..

هاتفكرت باش يخدم ويفتح أبوابه من جديد..

ناديه : تعيش يا بابا..

فريد : فى الواقع يا بك أنت رجل مثالى..

الرئيس : أستغفر الله نعمل بقدر الامكان..

المدير : (داخلا)

المدير.. الرئيس.. فريد.. ناديه...

المدير : يا بك الأصل مالقيناشي.. طار لهذا يستحسن إنأجل الجلسة من غير ما نحدد موعد تانى مضبوط...

الرئيس : لا يا أفندي.. ما فيش تأجيل.. الجلسة اليوم تنعقد..

المدير : لكن هذا مستحيل...

الرئيس : لا.. ما هوش مستحيل يا كسلان أفندي..

المدير : أنى كسلان يا بك..

الرئيس : أيوه.. مهمل بشكل مشين..

المدير : شكراً يا بك.. خسارة العشرة الطويلة الى عشناها وعملنا فيها جميع..

الرئيس : ما فيش لزوم باش تشكرني.. أنى ما قلت إلا الواقع اللي أنت عائش فيه لو كان هذا علاش بتأجل الجلسة ومن غير ما نحدد موعد مضبوط..

المدير : بتأجل على خاطر الأصل مالقيناشي..

الرئيس : أظن أنت ما زال تتفكر خلاصة النسخة الأصلية..

المدير : يا سلام.. كيف لا.. هو فى الأول كنت أنى صاحب الفكره فى المشروع..

الرئيس : أنت (ضاحكا) فكرتك هذه شويه حامضه أنى توا مانبيش نشكرلك

نفسى وأعمالى إنما المره هذه خاطيك ..
 فريد : يا سادة مافيش لزوم للمبارزات .. المهم نجلس مع بعض
 ونلخص الموضوع ونعمل شبه مشروع أصل ..
 الرئيس : حالا .. كلّها .. عشر كلمات انخلص فيها كل شىء تفضلوا
 قدامى ..
 المدير : لا .. انتم الأولين .. (ينسحبان) ..

فريد .. ناديه ...

فريد : (فرحا) شكراً يا ناديه .. انقذتيني جميلك هذا عمرى ما نساها ..
 ناديه : هذا واجب إحنا الشباب لازم إنساند بعضنا وخاصة فى المشاريع
 اللّى فيها الخير للناس أجمعين ..
 فريد : صديقنى أّيست وجى بين عيونى حبس باب بن غشير .. الحبس
 طول ..
 ناديه : حبس؟ ليه؟ أنت يا أخى ما درت شىء بطل أنت ناوى الخير ..
 فريد : ولو .. ما يصدقونيش .. يتهمونى باننى كنت نصاب ومحتال ..
 ناديه : حاشاك يا أخى .. أنت انسان نبيل .. يا ريت منك كثيرين يزول
 الخمول وتتصلح الأمور وتنشط البلاد فى جميع الميادين ..
 شوقى : (داخلا) ...

شوقى .. ناديه .. فريد ...

شوقى : وصلوا المستشارين .. مستشارين وزاره المالية ..
 فريد : (فرحا) .. أهلا بيهم .. المشروع الضخم إستالد وقاعد فى هاديكه
 الدار يرعرعوا فيه .. (مشيرا إلى حجرة الرئيس) ..
 شوقى : ما فهمتش ..
 فريد : مش مهم .. يكبر ويبان ..

- شوقي : صار نقدر نتفضل بالجماعة . . .
- فريد : يا سلام . . كل شيء حاضر باش والجلسه ستعقد بعد لحظات . .
- شوقي : (في استغراب شديد ينسحب) . . .
- فريد : مسكين . . لولاه ما صار شيء من هذا كله . .
- ناديه : باين عليه مازال مخصوض . . (شوقي . . مراد . . حفظي . . يدخلون)
- شوقي . . مراد . . حفظي . . فريد . . ناديه . .
- شوقي : (يفتح الباب . .) تفضلوا
- مراد : السلام عليكم (تبادل التحية) . . أهلا بالآنسة . . أمالا أنت تمثل
- الوالد في جلسته اليوم . .
- ناديه : لا أبدا . . الوالد موجود . . إنما اليوم يوم عظيم بالنسبة للوالد
- جيت باش إنساعده . . .
- حفظي : على فكرة يا دكتور فريد . . الوزارة اليوم أسبوع وهي خايفه في
- بعضها تبحث على الأصل في المشروع الضخم ومالقوش ولا
- نسخة منه .
- مراد : وهكّى حتى وزارة الصناعة والإنشاء والتعمير مرفوسة في بعضها
- واحد يتهم الثاني . . والثاني يصب المسؤولية على الثالث والأصل
- ولا فيه منوا القي نسخة منه . .
- فريد : ومن حسن حظنا كلنا بعد دقائق نبدأ في الجلسة لإقرار المشروع
- وأظن حضراتكم تعرفوا عنه بعض الشيء .
- مراد : يا سلام . . درسناه من زمان وقمناه . .
- حفظي : أظن يا دكتور فريد عندك علم بالمجهودات اللي بدلتها في وضع
- تقرير على المشروع في السنين اللي فاتوا . .
- جعفر : (جعفر ورضوان يدخلان . .)

جعفر.. رضوان.. مراد.. حفظى.. فريد.. ناديه.. شوقى...

جعفر : السلام عليكم ..
حفظى : أهلاً بالأستاذ جعفر...
رضوان : إذن الجلسة صار منها ..
فريد : أيوه يا سيدي .. الآن وبعد لحظات ..
المدير : (الرئيس والمدير يدخلان)

الرئيس.. المدير.. فريد.. ناديه.. شوقى.. حفظى.. مراد..
رضوان.. جعفر...

الرئيس : أما لا .. يا سادة .. ما دمنا موجودين كلنا نقدر نبداً (يصافح الجميع) (المدير يسلم ورقة لفريد) ..
فريد : (يقرأ) .. شنوا هذا ..
المدير : ثلاثة نقاط ملخص المشروع ..
فريد : ثلاثة نقاط؟ أظن شويه ..
المدير : أنقص نقاط أكثر مفاهيمه .. حضر أحمد الطباع باش يطبع الكلام
اللى يصير فى الجلسة وبعدين أنت تلخص الحوار ..
ناديه : ما فيش لزوم للطباع أنى أتقوم بها المهمة ..
الرئيس : وأنت شنوا يدخلك فى الموضوع ..
ناديه : الرغبة يا بابا ..
الرئيس : شنوا رأى الجماعة؟ فى رغبة بنتنا ..
حفظى : إحنا ممنونين ويعز علينا الشباب النشط (الجميع يجلسون)
الرئيس : باسم الله واسم الجميع نفتتح الجلسة (يقف) .. (يسحب ورقة من جيوبه) حضرات السادة .. أنى جد مسرور بهذه اللحظة السعيدة
حيث نلتقى ونجلس لتقرير شىء عزيز على الجميع ويسعدنى جداً
أن أرى بيننا السيد حفظى ممثلاً لوزارة المالية ومراد ممثلاً لوزارة

الاقتصاد ونرحب أيضاً بالأساتذة الأفاضل السيد رضوان المستشار الأعلى للبنك الصناعي والسيد جعفر المستشار للبنك المعماري . . هذا ولا يسعني الا أن أشكر الدكتور فريد السكريلي لما قام به من مجهودات جباره لإظهار هذا المشروع الى حيز الوجود . . كما أشكر بقية السادة العاملين في هذا البنك معي . . هذا وأتمنى للجميع النجاح في هذه المهمة وإقرار ما فيه الخير للجميع والسلام عليكم ورحمة الله . . (الجميع يصفقون) . .

رضوان : الكلمة الآن للدكتور فريد . .

فريد : (يقف) . . حضرات السادة المحترمين . . أهلاً بكم جميعاً ومرحبتين ما تواخدونيش في اللي بنقوله وما تستغربوش في كلامي على خاطر ما تعودتش على الخطابه لأن الخطابه فن وفن بيئ ناسه . . يعني ناس مخصوصين في إلقاء الكلمات والعبارات الرنانه . . أما أني عكسهم إنحب قلة الكلام واتفضل عليه العمل . . العمل المجدي . . العمل المفيد اللي من وراه تطلع فائدة للجميع . . (الجميع يصفقون تعليقات مختلفة)

الرئيس : (يصفق) . . برافو . . برافو . .

فريد : حضرات السادة . . علينا الآن بالعمل . . العمل المثمر المفيد . . هالورقه الصغيره المتواضعه اللي يشبها يقول عليها اللي هي لا شيء مالهش أي قيمة . . طرف كاغط زهيد . . لكن هالطريف الكاغط الى قلناه عليه زهيد هو اللي بيعث فينا شيء جديد . . بيعث فينا روح مليانة بالنشاط والعمل المجدي المفيد . .

الرئيس : (يصفق بحرارة) . . تعيش يا دكتور . .

فريد : العفو يا سيادة الرئيس . . قبل لا نبدأ العمل يجب أن نشيد بنشاط سيادة الرئيس وروحه الطيبة فلولاه ماكناش مجتمعين . . الحق يقال يا سادة إنه إنسان يحب الخير ويعمل من أجل الخير واللي

ساعده كثير في النجاح رأيه السديد وسرعة الإنجاز في جميع الميادين . . .

الجميع : يعيش الرئيس . . (تصفيق) . .
فريد : سادتي الأفاضل . . قبل لا نبدأ في العمل يجب أن أتقدم بجميل الشكر للسادة المستشارين الذين ساهموا بقسط وفير في إخراج هذا المشروع إلى حيز الوجود كما أنه يجب علينا أن لا ننسى سيادة المدير الذي ساهم بقسط كبير لإخراج هذا المشروع . .
الجميع : (يصفقون) يعيش المدير . . .

فريد : علينا بالعمل يا سادة . . لكن قبل لا نبدأ إنحب أنذكركم في شيء عزيز علينا . . شيء يبعث في النفس النشاط والعمل وجميع أعمالنا اليوم إنبت عليه . . التعاون . . وأظن كلكم توافقوني عليه . . إذن قولوا معاً اللي بنقوله . . قولوه من وسط قلبكم وخاطركم . . لأن مبدأه التعاون . . التعاون الصادق . . التعاون المخلص قولوا . . يا ناوين تاعونيك هيا إصّا . . (يردها لوحدة الجميع في إستغراب) ما تستغربوش . . هذا النشيد هو كل شيء عندي وإعادته قدامكم فيه فائده هذا النشيد يدعوا للتعاون . . فيه النهوض . . فيه الحركة . . يا ناوين تاعونيك هيا إصّا (يكررها عدة مرات) قولوا . . ما تتحشموش لما تقولوه بعدين تلقوا نفسكم تعملوا مرتاحين وقر الساعات من غير ما تشعروا . . هيا قولوا معاً . . .

الرئيس : (باندفاع مع الضحكات) . . يا ناوين تاعونيك هيا إصّا . . (ضاحكا ومكرراً) . . يا ناوين تاعونيك هيا إصّا . .
الجميع : (يصفقون يمسون أيديهم ببعضهم يكررون) . . هيا وين تاعونيك هيا إصّا . . (مع ضحكات يكررون) . . يا ناوين تاعونيك هيا إصّا . .

ستارة...

الفصل الثالث

الشخصيات

الرئيس	: رئيس مجلس ادارة البنك
المدير	: مدير البنك
شوقي	: باشكاتب الرئيس
أحمد	: طباع
سعيد	: المباشر
ناديه	: ابنة رئيس مجلس الادارة
فتحي	: ابن رئيس مجلس الادارة.. شقيق ناديه
جعفر	: رئيس قسم في البنك...
رضوان	: رئيس قسم في البنك
مراد	: مستشار وزارة الاقتصاد..
حفظي	: مستشار وزارة المالية..
فريد	:
عبدالرحمن	: خالى شغل...

الفصل الثالث

ترفع الستاره على قاعة للجلسات .. طاولة
كبيرة في الواجهه حولها مجموعه كراسي
كرسى متحرك في الوسط .. أوراق .. ملفات ...
القاعة عصريه مجهزه بجميع المستلزمات ...

الوقت صباحاً ..

سعيد... أحمد...

سعيد : شينك جلسه كانت . . . هذا عمرى قريب انكمله في البنك وما
عمرش ريت حركة زي هالأيام ولا جلسه حاميه زي جلسة
آمس . .

أحمد : الدكتور فريد جمره قويه ولسان قاطع يخوف . . قعد يدور فيهم زي
الزرايط ويهزوا في روسهم زي الطراير . .

سعيد : وخاصة البى الكبير . . (يقاطعه)

أحمد : معبى الجلسه بالضحك والدّوه الفارغه . . ما يستروش يا عمى
سعيد كلهم زي بعضهم . . حاجة وحده لاحظتها محيرتنى . .

سعيد : شنوا هي يا أستاذ أحمد . .

أحمد : لاحظت على شوقي حركات غريبه ما قدرتش نفهم حتى حاجه . .
سعيد : ما فهمتش . .

أحمد : قبل لا يجى الدكتور كان زي الصيد . . حد ما يقدر يتكلم معاه
لكن بعدها جمره وطاحت في الماء . . نّعج وزى اللى صارتله
مصيبه خلّاته حائر . .

سعيد : ما بيه شيء . . إنما يصير وجود الدكتور في مكتبه نقصله من سلطته
والأونظه القديمه اللى كان يدير فيها ما عادش يقدر يمشيها . .

أحمد : زعمه . . .

سعيد : أما لا . . يا عمى سعيد . . كل سيد عنده سيده . . هو إحنا

مش قاعدين إنقطع في قفاه . . إنما الحق ينقال ولو ينادم يقوله على
نفسه (جرس الهاتف یرن)

- أحمد : (يرفع الساعه) .. الو .. أيوه .. موجود في مكتب الرئيس ...
حاضر .. لحظه (يترك الساعه يدخل مكتب الرئيس)
سعيد : (وحده ينظف الطاولة) ..
فريد : (داخلا) ..

فريد .. سعيد .. أحمد ...

فريد : (يرفع الساعه) الو .. أيوه .. أنى الدكتور فريد السكربلى منوا
جريدة الصباح؟ أهلا وسهلا .. تبوا مقابلة .. تفضلوا آمتة ما
تبوا أنى تحت الطلب .. مع السلامة .. (يقفل الساعه) .. بنبدو فى
الدوّه والكلام الفارغ .. أنى كل شيء إنجبه الآ الصحافه
والصحفيين ولو أنهم بيخدموا المجتمع .. لكن ديمه ثيقتي فيهم
شويه ..

أحمد : لكن يا دكتور الصحافه كويسه .. تنور الرأى العام وتخدم مصالح
الناس ..

فريد : هذا إذا كان الصحفي نزيه .. أما إذا كان العكس ما فيش فائده
اليوم تلقاه يحط بنآدم فى القمه على خاطر دفعله فلوس ويصبر
وغدوه تلقاه يرميه فى الحضيض وكلّه على القرش .. القرش اللى
طغى على العباد ..

سعيد : والله الا حق يا ولدي .. تواء زى أنى منوا يشجله .. فقير متملح
ما ينظر له حد على خاطر ما نملكش القرش ..

فريد : فى الهوى سواء يا عمى سعيد .. ما تخافش زي بعضنا .. القرش
ماهوش كل شيء .. المهم الانسان يكون صاحب مبدأ وعزيمه
ويعمل باخلاص (جرس التلفون يرن) .. الو أهلا بصاحب السعادة
(يغلق بيده الساعه) مستشار وزارة الاقتصاد أهلا .. أهلا .. أيوه
التعليقات موجوده كلها .. غدوه صفارات المعمل تبدأ تعوى ..

أيوه.. غدوه تلقاني قدامك في المعمل مع السلامة.. (يقفل
الساعة) كلهم ولّوا ناشطين بدأوا يظهرها في فلاحتهم...

شوقي : (داخلا بيده مجموعة ملفات) ..

شوقي.. فريد.. أحمد.. سعيد...

شوقي : حضرة الرئيس يترجاك توقع هالرسائل ..

فريد : وصل الخير (يتصفح الأوراق) قطع أراضي .. تخطيط منازل لسكن
العمال تخطيط للمخازن .. عال .. عال .. وصلنا ..

شوقي : لوين وصلنا ...

فريد : وصلنا للعمل .. كل شيء يبدأ دريجه .. الأول التخطيط بعدها
المهندس .. بعدها العامل يجي بالفاس ..

شوقي : فيه موضوع بتفاهم معاك فيه ..

فريد : أهلاً وسهلاً .. بالله لو سمحتم خلّونا شويه بروحنا (أحمد وسعيد
ينسحبان) ..

شوقي.. فريد...

شوقي : قبل لا نبدأ وقعل على الوريقات من فضلك ..

فريد : حاضر .. (يوقع دون أن يقرأ) ...

شوقي : بيان اللّ ترقيت بسره بديت توقع من غير ما تقرأ شنوا هو
مكتوب ..

فريد : ما نقراش باش ما نضيعش الوقت .. المقصود حصل .. بعدين يا

شوقي أفندي لو حضرة الرئيس لما وقعل قري راهوا تّوا ما صار
شيء ولا أنى موجود هنايا ..

شوقي : وقت يوصل الفاس بعدين كل شيء بيان ..

- فريد : خطّرها.. شنوا هي آخر الأخبار على صاحب المعمل القيتوه والّا ما زال..
- شوقي : دورنا في كل مكان.. شفننا جميع المستشفيات وحتى مستشفى الأمراض العقلية ولا فيه منوا عارف وين جت رميته ولا وين امشى..
- فريد : غريبه.. كيف انسان زي هذا يختفى وما يلقوشى..
- شوقي : تسمحلى بالجلوس يا دكتور فريد..
- فريد : تفضل من غير تهويش.. تقدر تجلس وتتكلم بنفس اللهجة اللّلى كلمتني بيها أول يوم خشيت فيه لمكتبك..
- شوقي : انجوا لموضوعنا.. (مع تردد) هو في الحقيقة.. في الحقيقة..
- فريد : فيه شيء محيرك يا شوقي..
- شوقي : اللّلى محيرني وضعك.. وضعك في البنك يا فريد وهالأموال الطائله اللّلى رصدتها المجلس لها المشروع..
- فريد : آه فهمت.. ما اديرش في بالك حتى حاجه.. هو صحيح تمر بين يديّ الجنيهات.. لكن توّا حتى مليم ما خشش جيبي.. هو صحيح أنى كنت السبب أنى وجّدت عمل لما لا يقل على 600 شخص لكن على توا ليا أنى لا شيء..
- شوقي : عظيم.. اللّلى درته ما فيش شك كويس.. لكن ما تنساش اللّلى توّا يبطلعولك أعداء.. محسديه يدوروا كيف ينتقموا منك..
- فريد : لاش بيحسدوني وعلاش بيعادوني.. أنى على توّا قاعد زي ما بديت.. فالس.. عريان ما نكسب شيء حتى عشوة.. ليلة كائد فيها..
- شوقي : ولو هذا ما يكفیش.. ما تنساش فيه ناس تبّى تأكل في جرة المشروع واللّلى ما طقش فيه حويجه هو هاداكه اللّلى يضلى يدور فيك..

فريد : ما يقدرؤا يديروا شيء.. المهم الشغل ماشي..
شوقي : ما تنساش الصحافة ما ترحمش.. أي غلظة تصير يتسلطوا عليك..

فريد : هذا يزيد يكبر إسمى ونشهر أكثر.. ما يخوفونيش.. بعدين شنوا بنخسر على تّوا ما ربحت شيء ولا خسرت شيء باش نتندم عليه كان ربت هكّى والا هكّى نولّ للخدمتي نكركر الصناديق ويوميتي ديمه مضمونه..
الرئيس : (داخلا)...

الرئيس.. فريد.. شوقي.. ناديه...

الرئيس : ما شاء الله نشاط..
فريد : أيوه.. نشاط على دوب الحال..
الرئيس : يا سلام عليك يا فريد.. تعرف.. أنت ولّيت زي الهواء والشمس والماء للانسان بالنسبة للجميع..
فريد : العفو بابي ما درناش إلا واجبنا..
الرئيس : يا شوقي أفندي.. قول للجماعة يحضروا أنفسهم باش إنكملوا بقية.. الجلسة..
ناديه : ما زال بكرى يا بابا.. فيه شيء مهم بنقوله لشوقي.. الجماعة يا بابا في الوقت المناسب نبغوهم..
الرئيس : المهم احنا جاهزين..
ناديه : تعال معاي يا شوقي.. عن إذنك يا بابا.. (ينسحبان.. شوقي في حيره)

الرئيس.. فريد...

الرئيس : قولّ يا دكتور فريد ما تراش شيء غريب إهتمام بنتي بهذا

- المشروع .. عمري ماريتهما مهمته بعملى بها الشكل ومش هذا
بس حتى ولدي فتحي تحمّس معاها .. مناقشات في البيت
واهتتام .. الصراحة شيء حيرني ومالقيتلاش تفسير ..
- فريد : حرارة الشباب يا بك .. حبهم للعمل ..
- الرئيس : (مداعبا) .. هذا بس ..
- فريد : حبهم لوالدهم وحرصهم على نجاحه خلاهم يعملوا ليل مع
نهار ...
- الرئيس : بيني وبينك أنى مضايق كثير ..
- فريد : مضايق
- الرئيس : نعم مضايق .. واصله لهنى .. (مشيرا إلى أعلى جسمه) تصور أنه من
اليوم ما عايش فيه سيادة لرئيس ..
- فريد : يا ساتر .. شنوا قدمتم إستقالتكم ..
- الرئيس : لا أبداً .. إستقالة شنوا جتنى ترقيه .. ولّيت صاحب
السعادة ..
- فريد : خوفتي في الأول .. تهانينا القلبيه يا صاحب السعادة ..
- الرئيس : والله ما نيش فرحان بالترقيه ومضايق ياسر ..
- فريد : الواه يا بك .. عفوا .. يا صاحب السعادة ..
- وألقيت نفس ما نعرفش إندير شيء غير الترقيه .. أنت ما تعرفش
شنوا هو السبب اللّى أنى رئيس هالبنك ..
- الرئيس : لأنّ القيت نفس ما نعرفش إندير شيء غير الترقيه .. أنت ما
تعرفش شنوا هو السبب اللّى أنى رئيس هالبنك ..
- فريد : لا يا صاحب السعادة ..
- الرئيس : السبب بسيط جدا وكل واحد في البنك يعرفه .. لو كنت في مكان
ثاني لكانوا طردوني من أول يوم .. مهمل .. عندي النسيان ..
كسول إنضيع أي شيء يطيح بيدي .. حتى أكبر مشروع .. أظن
أنت .. فهمت ..

الفصل الثالث

فريد : (مرتبكا) .. لا يا صاحب السعادة .. إنما ما أظنش ها الصفات عندك ..

الرئيس : لا عندي .. عندي أكثر من هكّى .. ما عنديش صبر فرفاش كركاشي ... المشاريع اللي تجي بين يديا كلّها تموت وفي بعض المرات إنجي متأخر إنخس من الباب الصغير .. إنخاف لا المباشر صاحب الشنب يقوللى على وين يا أفندي .. سكرنا ...

فريد : هذا تواضع يا صاحب السعادة .. انتم عنصر مهم ياسر تقدر تفتخر بيك المصلحة والبلاد ...

الرئيس : هذا صحيح .. البنك يقدر يفتخر بيا لأنى مرة بعد قداش نعمل مشروع يورّد للبنك أرباح ما يكفيه عشرة سنين وهكّى نلقى نفسي مترقى زي ما صار الآن ويلزمني نشكرك أنت ...

فريد : تشكرني ...

الرئيس : آه .. يلزمني نشكرك وما تنساش الفضل يرجع ليك في هالترقيه ويرجع الفضل أيضا للمرض الكبير النسيان .. الاهمال .. عدم الاهتمام .. أظن إحنا فهمنا بعضنا تّوّا ..

فريد : (مرتبكا) .. والله .. والله يا صاحب السعادة .. إلّتوا ما فهمت حاجه ..

الرئيس : أحسن .. وتوا عندي ليك بشاره عظيمه ...

فريد : خير إن شاء الله ..

الرئيس : تعرف يا فريد أفندي عندك انسانة وانسان يدافعوا عليك بشكل غريب ويعزوك فوق ما يتصور العقل ..

فريد : أشكون هم يا صاحب السعادة ..

الرئيس : ابني وابنتي ..

فريد : بارك الله فيهم .. وحتى أنى نعزهم ونحترمهم ..

الرئيس : تعرف من يوم زرتنا في البيت وتقابلت معاه أعجب بيك .. إعجاب شديد جدا ...

- فريد : نفس الشعور .. فهمنا بعضنا من أول جلسه ..
- الرئيس : قاللى يا بوي هذا الشاب عنده مستقبل عظيم .. أفكار جيده ويستاهل .. كل خير واللى زاد أيده بنتى ناديه فى هالكلام ..
- فريد : نعم الأبناء .. أنت محظوظ يا سعادة الباشا .. ربيت وأحسن تربيته من حقلك تعتر بيهم ..
- الرئيس : فيه فكرة عرضها عليا .. استحسنتها ياسر وأيدته فيها ..
- فريد : نقدر نعرف شنوا هي الفكرة ..
- الرئيس : لا بعدين .. أحسن كيف تسمعها منه هو .. على العموم أنى ما عنديش مانع فيها .. إنخليك فى شغلك (ينسحب لحجرة الرئيس) ..
- فريد : (فى حيرة) غريبه .. أنى ما قدرتش نفهم هالانسان .. مرات نلقاه فاهم كل شيء .. مرات نلقاه أبله منه ما فيش .. وأنى أنقول مش غريب حكاية الأصل اللى ضاع منه فاق بيها ..
- شوقي : (داخلا) ..

شوقي .. فريد ..

- شوقي : الجماعة كلهم حاضرين .. حضرة الرئيس فى مكتبه ..
- فريد : أيوه يا شوقي .. مش غريب فاق بالخطه اللى درتها ..
- شوقي : فاق .. فاق .. تّوا يا فريد وين ما توصل توصل ..
- فريد : غريبه .. شنوا هالتغير يا شوقي ..
- شوقي : ما هوش تغيير هذا واقع عائشين فيه إحنا الأثنين حاجتين قدامنا يا ننجحوا يالحبس إحنا الأثنين ..
- فريد : لكن أنت بريء ..
- شوقي : بريء متهم .. مش مهم .. مش هو هذا اللى يلزم إنفكروا فيه ، اللى يلزم تفكر فيه .. فيه شيء ثاني ..
- فريد : شيء ثاني؟ خش فى الموضوع؟ ..

- شوقي : تذكر وقت تكلمنا على محافظ البنك الاقتصادي ..
- فريد : تقصد الأستاذ حافظ ..
- شوقي : بالضبط .. حافظ بك ... الظاهر حكاية زواج ولده حميده بنت رئيسنا ما صار منها شيء ..
- فريد : أميين ليك ..
- شوقي : بيني وبينك يا فريد فيه شيء .. نبيك تخدم الرزين .. اللى ينقولها لك خليه سر .. أنت ما تنذري على شيء ..
- فريد : خش في الموضوع ..
- شوقي : الغريب في الموضوع إحنا في مصلحة عامة والموجودين فيها موظفين والوقت مخصص للعمل الخاص بالمصلحة .. لكن هالكلام ما فيه منه إلا جزء قليل ..
- فريد : قتلك خش في الموضوع وخلّيك من المثاليات ...
- شوقي : الصراحة يا فريد: أنى مضايق من هالأمر .. والدى الله يرحمه ربّانى على هذا المنوال .. النظام .. إحترام الوظيفة .. لكن ..
- فريد : لكن مالقيتاش .. ومش ممكن تلقاه .. القضية قضية بشر قضية الانسان نفسه .. لو كل والد علّم زي ما علّم والدك هالكلام اللى انقولوا فيه ما ليش مكان ..
- شوقي : على العموم .. لأول مرة نحضر مناقشه مالهاش دخل في العمل والّا في المصلحة .. مشكله عائليه وأنى مالياش دخل فيها ..
- فريد : وما دام ماليكش دخل فيها لاش حاضرها ..
- شوقي : حضرتنى ناديه من غير ما نعلم ...
- فريد : الخلاصه يا شوقي ...
- شوقي : الخلاصه ناديه قطعت علاقتها بحميده وسلمته دبله الخطوبه وامشى
- فريد : والأسباب ...
- شوقي : الله أعلم .. اللى صار ناديه طلبت منى نحضر الموضوع ... ركبنا

فوق في المكتبة وكانت جلسه صاحبه حوار غريب ومناقشه حاده
وانتهت زي ما قتلك...

فريد : غريبه .. أشكون حضر معاكم ..

شوقي : فتحي شقيق ناديه ..

فريد : وفتحي شنوا كان موقفه ..

شوقي : مأيّد ناديه ومحرض ..

فريد : محرض؟ ...

شوقي : أيوه: ضد حميده على طول وهو اللي زاد سخّن الحوار والغريب في

الأمر بعد إمشي حميده هنا أخته بحراره وتأبطني وقال لي ألف
مبروك ..

فريد : ألف مبروك؟ وانت شنوا دخلك في الموضوع ..

شوقي : ما نعرفش .. لكن هذا اللي صار ..

المدير : (داخلًا) ..

المدير .. شوقي .. فريد ...

المدير : شوقي أفندي .. بلغت الجماعه باش يحضروا عند الرئيس ...

شوقي : لا .. إنما كلهم موجودين خلّيتهم مع الآنسه ناديه ...

المدير : ناديه؟ .. طيب .. طيب .. أمشي بلغهم وقوللهم يتفضلوا ..

شوقي : حاضر .. (ينسحب) ...

المدير .. فريد ...

المدير : أما أبرد من هالأنسان عمري ما شفت ..

فريد : بالعكس .. ألطف وأخف من دم هذا الأنسان ما فيش مع

احترامي لرأيك إنسان طيب كريم .. مسامح .. أخلاق عالية ..

أنى عمل فيّا معروف مش ممكن ننساه طول حياتي ..

- المدير : آه .. صار هو اللي عملك معروف ..
- فريد : أيوه .. هو يا سيدي .. إنعزه أكثر من نفس وما نتحملش ينقال فيه شيء ..
- المدير : (في استهزاء) .. كويس كويس .. قوللي يا دكتور فريد .. فيه موضوع مهم ياسر مادابيا نتفاهم فيه معاك راس براس ..
- فريد : موضوع مهم؟
- المدير : أيوه .. خيرك أنخضيت ..
- فريد : لا .. أبدا أنى عمرى .. ما ننخض ..
- المدير : مش مهم .. بنآدم هذا صرف كل زمان .. في الحياة أحيانا بتصادفه عراقيل وأحيانا الأبواب تنفتح قدامه وأحيانا بدير عمله كبيرة ياسر وخطيرة يظن اللي ما فاقوش بيه .. يضلى زي الصيد يعتقد اللي الجماعة عدى عليهم الكرطون .. كمشه مغفلين .. صار والّا ما صارش ..
- فريد : وضح كلامك .. أنى إلى الآن ما فهمتش شنوا تقصد ..
- المدير : مش مهم .. مجرد كلام قلته .. خطرها .. صاحب المعمل اللي الوزارات والبنوك تعاهدت بمساعدته القوة؟ ..
- فريد : أنت يا أستاذ دويت وما كملتش وانتقلت بسرعة لناحية ثانية ..
- المدير : أظن مش في صالحك لو استمررت .. لكن قوللي حاجه ما تعتقدش أن المشروع اللي على خاطره إنقلبت الدنيا الفوقى لوطى مبنى على أساس غير سليم .. وصاحب الفكرة فيه قام بحركة صبيانية ..
- فريد : ألواه يا أفندي ..
- المدير : تقدر تقوللي شنوا يكون مصير الأموال هذه في حالة عدم وجود صاحب المعمل ..
- فريد : مصير الأموال يقرره المحامى المكلف من جهة عائلته ..
- المدير : لكن ما تراشى شيء غريب .. في الأول الأصل يضيع نصف

- ساعة قبل الجلسة بعدها يضيع صاحب المشروع مع العلم أن البنوك والوزارات ما بطلتش نشر إسمه في الجرائد والإذاعة . النتيجة ما فيش منوا يعرف عنه شيء غامضة .
- فريد : فيه أخبار عنه . بس متضاربة فيه منوا يقول بعد ما فلّس سافر إلى جهة مجهولة . وفيه منوا يقول . خش مستشفى الأمراض العقلية باسم شخص ثاني . . .
- المدير : لكن أقاربه يقولوا مات . .
- فريد : هذا شيء طبيعي . من صالحهم يقتلوه باش بيدوا يورثوا وهذه الساعة ينتظروا فيها باش يتقاسموا أرزاقه . .
- المدير : على العموم . حضر نفسك جلسة اليوم . ما اعتقدش إتفوت بالسهولة زي الجلسة اللي فاتت . . أظن فيه هلبه حاجات غامضة
- فريد : المهم يا أستاذ إندار وتنفذ . . قرروه بالأكثرية ولا غبار عليه . .
- المدير : أنت تعرف اليوم قداش عندنا في الشهر . .
- فريد : أظن 27 . . .
- المدير : وفي يوم 27 أظن الموظفين يكونوا قدام الشباك باش يقبضوا معاشهم . . .
- فريد : أيوه . . لكن فيه اللي يقبضوا يوم 27 والّا يوم واحد في الشهر .
- المدير : وأنت أمته تقبض ؟
- فريد : (مرتبكا) . . أنى؟ ، ، أنى؟ . . .
- المدير : فهمت كل شيء . . مش مهم . . في الجلسة تتوضح هلبه حاجات . . .
- فتحي : (داخلا) . . ممكن . . .
- المدير : يا سلام . . فتحي أفندي . . تفضل (ينسحب مع ضحكات) . .
- فتحي : (حيرة) المدير طلع وهو يضحك . . صار شيء يا فريد؟
- فريد : مش غريب يا فتحي الوالد والمدير فاقوا بخططنا واللّعبة الى درناها إنفضحت . . .

- فتحي** : ولا يهملك .. أمورنا ماشيه والكاسبين إحنا .. تعرف يا فريد موضوعك تمستله كأني نعرفك من عشرات السنين .. شعرت براحة بوجودك وبمعرفتك والقيت نفسي كأني مسئول معاك ..
- فريد** : اللي مخوفي الآن حضرة المدير مش غريب محضري مكيدته وقاعد يوعد ويهدد وأنى خائف أن جلسة اليوم فيه شيء جديد بينقال ..
- فتحي** : ما تخافش .. اللي قدامك خوك .. دراعك اليمين .. كل شيء عملتله حسابه وماتنساش شوقي قائم بدور كبير ..
- فريد** : ورطة يا فتحي والله ما تنذري على نهايتها كيف ..
- فتحي** : نهايتها الخير .. هو صحيح عندك ناس ضدك .. لكن عندك ناس معاك لازم يتغلب الخير على الشرّ وعلية ما تفكرش إلا في الخير ..
- فريد** : بارك الله فيك يا فتحي .. صدقني ما كنت تتوقع توقف معاي وتساندني بها الشكل .. لما أحكالى الوالد الصراحة استغربت في الأمر ..
- فتحي** : إحنا شباب يا فريد: شعلة المستقبل .. واجبنا نساند بعضنا ونعاون بعضنا وفي النهاية الخير عائد على الجميع ..
- فريد** : (يتأبطه) شكرا يا فتحي ..
- فتحي** : إسمع .. عندي خبر ليك مهم يا سر ..
- فريد** : خيرا إن شاء الله ..
- فتحي** : كنت في المعمل تنظيفات جرى وسكات والعمال الأول الأول بدى يولل من غير ما إنادوا عليهم وغدوه إسمك بالحروف البارزة يعبى جميع الجرائد ..
- فريد** : والله أنى متخوف لا المدير يحضر ليش بعض الحفر ووالدك إنخافه يجي في صفه ويسانده ..
- فتحي** : والدي؟ أبدا .. تعرف البارح شنوا دونا عليك ..
- فريد** : كل شيء نقدر إنديره غير الوحي بيد الله ..
- فتحي** : شوف يا سيدي بالقرب من المعمل فيه فيلاً مسكره كان بيسكن

فيها المدير السابق للمعمل فقال بالوصول بيسكنها الدكتور فريد ..

فريد : لكن أنى ما عنديش الحق فيها .. طبعا بيسكنها المدير الجديد اللي بيعينوه.

فتحي : ومنوا غيرك بيبكون المدير للمعمل ..

فريد : أنى المدير؟ .. مش معقول هذه وظيفة كبيرة عليا تحتاج لرجل يكون مهندس فاهم الصناعة وما يدور في المصنع ..

فتحي : مش مهم .. المدير السابق ما كانش يفهم حاجة ..

فريد : ولو .. هذا ما يعنیش نقبل وظيفة زي هذه .. بعدين ما تنساش اللي سبب إفلاس صاحب المعمل كان المدير السابق ..

فتحي : لا يا فريد .. أنت الوظيفة تقدرها وتقدر حتى أكبر منها ..

فريد : إنفكر في الموضوع بعدين إنرد عليهم ..

فتحي : إصرارك عجيب يا أخى .. أنت في الوقت الحاضر حتى معاش رسمى من البنك ما عندكش ومستغرب فيك حتى كيف عايش الآن ..

فريد : أحسن ما نجبدوش هالموضوع .. المهم أنى وصلت للهدف وفتحت الطريق لغيري ..

الرئيس : (داخلا ومعه جعفر .. حفطي .. شوقي .. فتحي .. فريد)

الرئيس .. المدير .. شوقي .. جعفر .. رضوان .. حفطي .. فتحي .. فريد ..

الرئيس : الآن يا سادة بعد ما وضعنا الأمور في نصابها .. فيه حاجة مهمة ياسر تبى إديران .. يا شوقي أفندي ..

فتحي : عفوا ..

شوقي : خيرك .. يا فتحي .

- فتحي : نستناك في الحجرة الثانية.. بالكش عندهم أسرار.
- المدير : لا.. لا.. خلّيك.. وجودك ما يضايقناش..
- الجميع : (يشيرون له بالبقاء)..
- فتحي : (يجلس في ناصية بعيدة على الجميع)..
- الرئيس : شوقي أفندي...
- شوقي : تفضل يا بك...
- الرئيس : إمشي فيسع للمحفوظات.. الأرشيف.. أرشيف الموظفين جيلى الملف الخاص بالدكتور فريد...
- شوقي : (مرتبكا).. كيف.. الار.. الارشيف؟..
- الرئيس : أيوه.. ارشيف الموظفين.. نبّوا الملف الخاص بالدكتور فريد..
- شوقي : (مرتبكا).. لكن...
- الرئيس : الله.. تصرفات عجيبة.. شوقي أفندي.. يا الله بالسرعة جيب الملف وتعال..
- شوقي : حا.. حا.. حاضر.. (ينسحب)..
- فريد : ما دابيا نفهم يا بك.. علاش طلبتوا الملف الخاص بيا أنى..
- الرئيس : يا سلام عليك يا فريد أفندي.. هذا واجب.. الاعتراف بالجميل فضيلة أنت إنسان كافحت في سبيل شيء وظهرته للوجود فلا بد من إحسانك وضروري البنك يكافيك على المجهودات الجبارة القيمة.. اللّى قمت بيها..
- فريد : لكن أنى ما طلبت منكم شيء..
- فريد : هذا تواضع ما نقبلوش منك.. الجميع موافقين على إنصافك وتعديل وضعك أنت إنسان نبيل شغّل كنت امدرّق على عيون الجميع لكن اليوم وبفضل مجهوداتك وأعمالك ظهرت شيء وحقيقته وهذا شيء.. ماهوش صغير.. عمل فيه فائدة عامة تعود بالخير على الجميع..
- الجميع : (تعليقات مختلفة) عمل جبار.. عمل عظيم.. إنجاز ضخم

الخ . . الخ

فريد : لكن أنى يا جماعة . . (يقاطعه الرئيس) . .

الرئيس : ما فيش لكن . . تهانينا القلبية . .

فريد : غير فاش بتهنوني . .

الجميع : (يصافحونه . . عبارات مختلفة) . .

الرئيس : أنت من اليوم يا دكتور فريد . . المدير العام والمراقب العام

للمعمل الكبير إلى البنك والوزارات أحيوه من جديد . .

الجميع : مبروك مبروك . . تصفيق . . .

فريد : وحدة وحدة يا جماعة . . ما تتسرعوش . . أنى نشكركم على هال ثقة

الغالية لكن مع الأسف الشديد ما نقبلهاش . .

الرئيس : عجبية . . .

المدير : (في هزة) . . شنوا صارلك يا فريد . . .

رضوان : غريبة . . كيف ترفض منصب زي هذا . . .

فريد : نرفض وعلاش ما نرفضش . . أنى حريا أخي . . أرجوكم

تسحبوا ثقتكم ما دامكم مجتمعين . .

جعفر : أنى عمري ما سمعت ولا شفت تصرفات بها الشكل . .

رضوان : وإحنا كنا إنظن أن هذا الخبر يسعدك وتقبله بكل ممنونية . .

فريد : يا ودّي قلت لا . . لا أرجوكم تنادوا على شوقي ما فيش لزوم

يدور على الملف الخاص بيا . . لأنى مش ممكن نقبل بأي حال من

الأحوال . .

الرئيس : رفضك هذا يا فريد إنعدوه إهانة ومس لكرامة السادة الحاضرين

ولهذا نطلبوا تفسير لهذا الرفض . .

فريد : أنى يا جماعة يلزم تعرفوا إلى سبب رفض ماهوش مبنى على قصد

إهانتكم أو مس كرامتكم . . أستغفر الله هذا عمره ما خطر

ببالى . . بل إنعزكم ونقدركم ونشكركم على تقديركم ليّا . .

المدير : فيه حاجه تمنعك؟

فريد : أبدا ما عنديش ولا حاجة . . لكن أنى ممنون نقعد هكى زي ما
أنى قاعد تّوا اللّى درته مش باش إنحسن وضعى معاكم أوطامع
باش نترقى بيه أو نقبض فلوس أكثر . . بالعكس أنى ما نبى منكم
شيء ألا تخلّونى زي ما أنى قاعد تّوا .

المدير : أنى عمرى ما سمعت بموظف يرقوه ويرفض . . ما فيش انسان في
الدنيا يعمل لله وبلاش . .

فريد : سابقا ما صارتش . . لكن تّوا آهى صارت . .

المدير : صار أنت تعمل مش باش تكسب . .

فريد : أنعم . .

المدير : امالا نقدرّوا نعرفوا شنوا هو الغرض متعك قصدى علاش
بتخدم . .

فريد : غرضى مفهوم . . نخدم للتسلية باش ما نضيعش وقتى في
الفراغ . . الخدمة عندي زي الهواية . . فيه ناس كثيرة عندها
هوايه لعب الكرة وفيه منوا عنده هواية ركوب الخيل وأنى بدل هذا
كلّه نتسلى بعملى . . أرجوكم تخلّونى زي ما أنى قاعد . . الطاولة
اللّى قدامك زبيت عليها الكبد ما نقدرش إنفارقها . .

الرئيس : كلام فارغ . . الجماعة قرروا تعيينك مدير مسئول على المعمل
وأنت لازم تقبل . .

فريد : خلاص . . ما دامكم مصرين على تعيينى نصبح مجبور باش
أنوضحلكم كل شيء . .

سعيد : (داخلا) . .

الرئيس : شنوا فيه يا سعيد . . .

سعيد : فيه الملف الخاص بالدكتور فريد أعطاهاولى الأستاذ شوقى . .

(يسلم الملف للرئيس . . . ينسحب) . .

الرئيس : عال . . عال . . (يتصفح الملف مبتسماً أحيانا . . يكشر أحيانا)

الجميع : (في حيرة)

- الرئيس : صار أنت يا فريد أفندي ليك معانا تقريبا ١٥ سنة . . .
- فريد : (مرتبكا) . . كيف . . 15 سنة . .
- الرئيس : أيوه إنتقلت أخيراً كمساعد سكرتير الرئيس . .
- فريد : أيوه . . إنتقلت أخيراً . .
- الرئيس : قوللى . . آخر مرتب كنت تتقاضى فيه قداش . .
- فريد : مرتب؟ . . هو في الملف مش مذكور . .
- الرئيس : في الملف مذكور . .
- المدير : (يتقرب من الرئيس بقصد الاطلاع على الملف)
- الرئيس : (يضع يديه ونصف جسمه على الملف لكي لا يتوصل المدير للاطلاع) . .
- حسب ما بانلي نفس الدرجة اللّى خشيت بيها ١٥ سنة فاتوا بقيت على ما هي عليه الآن . .
- فريد : أيوه يا بك . . بقت على ما هي عليها الآن . . زي ما خشيت زي ما أنى قاعد . .
- الرئيس : غريبة . . ما تراشى إجحاف ونقصان في حق موظف زي هذا يا حضرة المدير . .
- المدير : هو في الحقيقة . . قبل وصلتناش تقارير في حقه ولا هو تقدم بطلب في تحسين وضعه . . .
- الرئيس : لكن المفروض في المدير الاداري المسئول يرد باله من كل كبيرة وصغيرة في المصلحة متعه . .
- المدير : هو صحيح خطأ وتقصير في حق انسان زي هذا . . لكن تّوا اللّى أهم من هذا كلّ رفضه للوظيفة الجديدة ومن غير أسباب . .
- الرئيس : صح يلزم نفهم السبب باش ندرجه في الملف . .
- فريد : ما دامكم مصرين على تعيينى ما نكدر كمش . . قبلت . .
- المدير : قبلت؟ . .
- فريد : أيوه قبلت والفضل يرجع للناس الطيبين . .
- الجميع : (يهتونه) تهانينا . . (تعليقات مختلفة) الخ . . الخ . .

شوقي : (داخلا)

شوقي.. الرئيس.. المدير.. فريد...

شوقي : عفوا يا سيادة الرئيس الأستاذ مراد قاعد يستنى فيكم ..
الرئيس : مراد أفندي جي : عن إذنك يا دكتور فريد ..
فريد : (ينحنى) .. تفضل يا صاحب السعادة ..
الرئيس : شد حيلك يا فريد .. (للجماعة) .. هيا يا فتحي ما تمشيش أنى ملزوم بيك .. (يستدرك) هاها .. (يأخذ الملف)
فتحي : حاضر .. (ينسحبون) ..

شوقي.. فريد.. فتحي...

فريد : (يتأبط شوقي) .. شكرا .. أحسنت يا شوقي .. نجيتنى أنهضتني من غريق ..
شوقي : غصبا عنيّ بنساعدك .. المصيبة واقعين فيها إحنا الاثنين ..
فتحي : برافوا عليك يا شوقي .. كيف قدرت إتخضر الملف مع العلم أن الدكتور ماهوش موظف عندكم ..
شوقي : لو الوالد عندك قري الملف زي ما يلزم راهو فاق بالموضوع لكن الحظ كويس .. صاحب الملف موظف قديم عندنا وتوّا إنتقل لفرعنا الثاني وملفه القديم قعد هنايا ..
فريد : إنهنك يا شوقي جميلك هذا عمري ما ننساه ..
شوقي : المفروض انساعد بعضنا .. عشتنا مش من اليوم .. ما زلت نتفكر لما (ضاحكا) .. الله يرحم أيام زمان ..
فتحي : وأنى من رأيى ما تستغنوش على بعضكم .. العمل ضروري يحتاج لموظفين كويس ليهم وعليهم مسئوليات ..
فريد : يا سلام .. شوقي فى رأس القائمة ..

- فتحي : وتوّا بعد أن مرت أمورنا بسلام ما عlish لو دخلنا في الخصوصيات ..
- فريد : شنوا تقصد؟ ..
- فتحي : شوف يا فريد نطلب منك تجاوبني بكل صراحة وكل صدق شوقي أفندي فاهم جزء من الموضوع وهو اللي شجعني نتقدم وانقول ..
- فريد : ما فهمتش ...
- فتحي : قبل كل شيء أنت متزوج ..
- فريد : لا .. ولا عمري فكرت في الزواج ...
- فتحي : إنخشوا في الموضوع من غير مقدمات ...
- فريد : خش ...
- فتحي : اللي بنقوله باش أنكون أسرة واحدة رابطين بعضنا .. ومتحددين يلزمك تتزوج ...
- فريد : وشنوا بنا خذوا مرأة ونشتركوا فيها ..
- فتحي : (ضاحك) .. الله يسامحك يا رجل .. فيه فكرة بنعرضها عليك ونتمنىّ تقبلها وإذا كان رفضتها خليها تكون سر بينا زي سر الأصل الضائع متع المشروع ...
- فريد : قول يا فريد .. سرّك في بير ..
- فتحي : أنى جريت الموضوع على الوالد وقنعتة بعد ما كدبت عليه اللي هذا الطلب كان من جانبك ..
- فريد : ما زال ما فهمتش .. خش دغرى في الموضوع ..
- فتحي : الموضوع وما فيه ... أختى ناديه ...
- فريد : خيرها نادية ...
- فتحي : ناديه يا سيد كانت مخطوبة من ولد حافظ بك ..
- فريد : حميده ..
- فتحي : بالضبط .. حميده هذا صدقني لا أنى ولا أختى راضيين بيه لكن الوالد الله يسامحه أعطاه الكلمة وتم كل شيء .. لكن اللي صار

- اليوم وبحضور شوقي إنتهى كل شيء ..
- فريد : كيف إنتهى كل شيء ..
- فتحي : أختي تناقشت معاه وانتهت بفسخ الخطوبة وروحت زعلانة للبيت ..
- فريد : مادام فسخت الخطوبة .. المفروض ما تروحش زعلانة للبيت ..
- فتحي : زعلت من حواراه وطريقته في الكلام ..
- فريد : بيني وبينك يا فتحي إفتكت منه الصراحة سي أحميده مدلل وما ينفع شيء ..
- فريد : هذا الكلام قلته للوالد من زمان .. من أول يوم والأستاذ شوقي فاهم كل شيء ..
- شوقي : يكونش يا فتحي في نيتك تعطيتها لفريد ..
- فتحي : هو هذا .. فريد عجبني من أول يوم عرفته فيه .. رجل حر .. صريح صادق نفسه طيبة .. وأنى هذا الصنف من الرجال اللي بروحى نفيه ..
- فريد : العفو يا فتحي .. شكرا على هذا التقدير ..
- فتحي : إذن .. إيه رأيك في الموضوع ..
- فريد : ما زال بكرى .. الصراحة المفاجأة كبيرة عليا وما كنتش نستنى فيها بعدين ظروفى ووضعى ما يسمحوليش .. بعدما نستلم ادارة المعمل ويبدأ العمل ونستقر هاداكه الوقت نبحت في موضوع الزواج ..
- فتحي : طيب .. نقدرنا نقولوا على توأ الف مبروك .. (شوقي وفتحي وفريد يتبادلون التهان ويحضنون بعضهم الرئيس داخلا يشاهد باهتمام) ..
- الرئيس : (داخلا يشاهد فريد وشوقي وفتحي يحضنون بعضهم) ..
- الرئيس .. شوقي .. فتحي .. فريد ...
- الرئيس : (بيده الملف) خير إن شاء الله .. شنوا صار من جديد ..

- شوقي : ألف مبروك يا بك ..
- الرئيس : فاش ..
- شوقي : فريد بك خطيب ببتكم الجديد .. طلبها بصفة رسمية من فتحي ..
- الرئيس : الدكتور فريد يخطب بنتي من ولدي فتحي وأنا ما ندريش؟ عجيب والله ..
- فتحي : ما هو يا بوي مش قتلك من زمان راهي ناديه أحميده مش راضية بيه ..
- الرئيس : وكان هذا .. كلفاتك باش إدور لها عريس ..
- فتحي : أبدا .. إنما الدكتور انسان طيب وهي تقدر فيه وكيف دويتلها رحبت وقالت اللي تبني يا فتحي أنا فيه ..
- الرئيس : آه .. صار ناديه عندها علم ..
- فتحي : أيوه .. كل شيء برضاها ..
- الرئيس : وسي فريد كان عنده خبر بالموضوع ..
- فريد : أيوه يا صاحب السعادة .. قلبي خبيري .. من أول يوم عيلتكم الكريمة خشت خاطري ..
- الرئيس : خلاص .. ما عندناش مانع .. إنما مش تواء ..
- فتحي : الواه يا بوي ..
- الرئيس : بعدما يستلم ادارة المعمل ويتمكن كويس .. إنخافوا لا يركب الشك الجماعة ويقولوا ساند إنسبه الجديد ..
- فريد : معقول .. يقولوا أكثر ..
- الرئيس : فيه حاجة مهمة ياسر إنحب أنوضحها لفريد ..
- فريد : خير إن شاء الله ..
- الرئيس : المشروع هذا اللي أنت أنجزته وقررتيه وقرروه الجماعة نبيك تعرف اللي ما تعدّاش عليا الطرح والفضل يرجع فيه لناديه بنتي وولدي فتحي بعدما إتفقوا معاي في كل شيء ..

فريد : صار حضرتك كنت عارف كل شيء...
الرئيس : نعم.. عارف كل شيء وكان في إمكاني إنوقف كل شيء ونرميك في الحبس وإنزيد نوضحلك أكثر حتى حكاية الملف والدور اللي قام بيه شوقي حتى هوفقنا بيه... (شوقي يتسم)..
فريد : وشنوا هو السرّ يا صاحب السعادة في مساعدتي..
الرئيس : السريّا فريد اللي قصدته في مساعدتك وغمضت عيوني باش نعطي درس لبقية الموظفين الكسالى اللي عندنا في البنك.. أبدأ بسي شوقي هذا رأس اللحم... (دفاق على الباب).
عبدالرحمن : (يفتح الباب)..

عبدالرحمن.. الرئيس.. شوقي.. فريد... فتحي...

عبدالرحمن : ممكن يا سيدي..
شوقي : (لعبدالرحمن) مش قلنا لك يا بوي مائة مرة الرئيس ما يقبلش في هالخصوص..
عبدالرحمن : لكن أني بتتكلم معاه..
الرئيس : خيره السيد.. لا باس.. تفضل..
عبدالرحمن : والله يا سيدي أني مادبيا إنقابل حضرة الرئيس نبّي إنفهمه الموضوع..
شوقي : هذا يا بك مقدم طلب وظيفة مباشر ولكن في الوقت الحاضر ما عندناش لزوم..
الرئيس : خلاص.. ما دام ما عندناش لزوم... الله غالب..
عبدالرحمن : لكن أني توّا مش جاي على الوظيفة..
الرئيس : امالا.. لاش جاي..
عبدالرحمن : أني.. جاي نبّي الرئيس نتفاهم معاه..
فريد : هو هذا الرئيس.. تفضل قولّه شنوا بغيت..

عبدالرحمن : أنى يا سيدي إسمى القيتّه في الجريدة إدّور وافيا . . .

فريد : إسمك في الجريدة؟ أنت أشكون . .

عبدالرحمن : أنى يا سيدي عبدالرحمن الوافي صاحب المعمل الكبير اللّى توا
فتحوه من جديد . .

الرئيس : مش معقول . . أنت وين كنت في هالمدة . .

عبدالرحمن : كنت مدفون وأنى حي . . فلسوا بيا في الحرب اللّى فاتت . . .
إستولوا على معملّى بالقوّة وحولوه الى معمل حربى وما عوضونيش
مرضت وصارتلى مرضه في أعصابى . . بعد ما تمت الحرب كرهت
نفسى . . وكرهت الدنيا اللّى عائش فيها . . أقاربى كلّهم هملونى
وأنسونى ولا فيه واحد دّور عليا . . ماتت زوجتى وصغارى الأربعة
بقنابل العدو . . قعدت وحيد لمنوا يعرفنى ولا دّورنى ولا يسأل
عليا إلا في المدة هادية قرّيت بالصدفة في الجريدة إلقيت إسمى
وطالّين حضوري . .

الرئيس : غريب ما نسمع . . أنت جيت قبل هنيا . .

عبدالرحمن : أيوه جيت . . جيت نطلب وظيفه مباشر باش إنعيش عقاب
عمرى ونلقى في الأفندي هذا . . ديمه يرفض في وجهى ويرد
فيا . .

فريد : وأنّ أوراقك الشخصية موجودة عندك . . .

عبدالرحمن : أيوه موجودة . . من فضل ربّي أوراقى الشخصية ما زلت محتفظ
بيها . . بعد ما انتهت الحرب حاولت ياسر مع جميع الوزارات
والبنوك باش يساعدونى وانرجع المعمل زي ما كان لكن كلّهم
رفضوا . .

الرئيس : صار أنت مقدم طلبات باسمك قبل . .

عبدالرحمن : أيوه سيدي . . ياما قدمت . . لكن فيه ناس بتعاكسني . . يسونى
إنبيع باش يستولوا عليه هُم حتى أقاربى أنفسهم كانوا

الفصل الثالث

طامعين .. لكن أنى فضلت نقعد فقير إنعيش على الصدقات وما

إنبيعش وعينى حيه ...

فريد : أوراقك جبتهم معاك ..

عبدالرحمن : أيوه .. كلهم قاعدين عندي (يخرج الأوراق) .. هذه ورقة عقد

الملكية باسمى وهذه الخريطة الأصلية .. خريطة المعمل قبل لا

نبنيه باسمى حتى هي .. وهذه ورقة التعريف ولو هنايا صورق

نبان فيها صغير .. أيام شبابى يا حصرة .. لكن الملامح ديمه

تبان .. وهذه رخصة والاذن ببداية العمل .. وهذه شهادة من

الحكومة بحسن السيرة والسلوك هاداكه الوقت ...

الرئيس : (يطلع على الأوراق ويدوره يزودها لفريد) ..

عبدالرحمن : (يتنهد) .. إيه .. ياما ياما تعذبت .. يا ما تعدت عليا من نكبات

في عهد الاحتلال لما اخدوا منى رزقي ياما شفت من المستعمرين

أرموني في مستشفى المجانين .. يئوى نهبل بالسيف لكن أنى

صبرت ..

فريد : وصبرك ما ضاعش .. الحق نور يا سي عبدالرحمن ...

الرئيس : تمام .. هو بالضبط وإحنا كنا حائرين .. واحد يقول مات وواحد

يقول هبل ..

عبدالرحمن : بشروني .. شنوا صار .. علاش دورتوني ...

الرئيس : المعمل متعك يرجع ليك ..

عبدالرحمن : معملى يرجعلي ...

الرئيس : أيوه .. الوزارات والبنوك تعاهدوا باصلاحه واعداده وتشجيعه

والفضل يرجع للدكتور فريد السكربلى خدمك بنية صافية

واخلاص وخلاه يحيا من جديد ..

عبدالرحمن : دكتور فريد هذا .. (يحتضنه) بارك الله فيك يا ابنى (ييكى) الحمد

لله ..

فريد : اللى عملته واجب مقدس في صالح الجميع .. هذا المعمل ملك

للجميع .. ملك للمجتمع اللّى انت وأنى وكلّنا منه واليه وجودى
 ووجودك دعم ليه ويّدّى في يدك والله مع الجميع ...
 عبدالرحمن : الحمد لله .. الحمد لله .. اللّى يهمنى أن المعمل يعيش وبانتاجه
 تعيش آلاف من الناس والخير عائد على الجميع (بيكى) .. الحمد
 لله .. معملى يرجع من جديد ..
 الرئيس : تّوّا ما فضلش الّا إنادوا على بقية الجماعة يتعرفوا عليك يا شوقي
 أفندي ناديلنا على الجماعة ...

شوقي : حاضر .. (ينسحب) ..
 عبدالرحمن : كنت ديمه نخطم من يالاه .. قلبي ديمه يخاطبني .. لا بد يوم من
 الأيام يرجع هذا المعمل زي ما كان .. وصلت إنساني .. نطلب
 الصدقات باش أنعيش .. خسرت .. أصحابي .. عادوني أقاري
 كلّهم يبونى إنبيع لكن حبّى لعملى .. حبّى لانتاجى خلّاني
 صبرت ..

فريد : ماعليش .. كلّه فات وتعدى .. العدو المحتل طلعناه وهذا أهم
 شيء .. أرضنا طاهره إنظفيه من العدو والدخيل أما القلة من
 الناس اللّى أساءوا إليك ما تحتارش منهم المهم الانسان يبقى على
 مبداه ...

عبدالرحمن : الحمد لله .. كل شيء من عند الله ...
 فريد : لحظات يا عمى عبدالرحمن وكل شيء في صالحك يتم ...
 الجماعة : (يدخلون) ...

المدير .. جعفر .. رضوان .. مراد .. حفطي ...

الرئيس : يا جماعة الفرحة تمت والمقصود حصل ...
 فريد : إنقدملكم السيد عبدالرحمن الوافى .. صاحب المعمل والمالك
 الحقاني عبدالرحمن الوافى .. (تعليقات مختلفة واستغراب) ..

فريد : هاذوا كلهم يا سيد عبدالرحمن خدموك بنيه واخلاص .. باش
طلعوا المشروع للوجود ..

عبدالرحمن : بارك الله فيهم (يحيهم فردا فردا) .. أنى يا أولادي ما نعرفش كيف
نشكركم .. لساني عاجز .. مش لاقى العبارات المناسبة .. مهما
حاولت ما نلقاش عبارات تناسبكم الحمد لله .. الحمد لله الى ما
خابش ظنى واللى آمنت بيه تحقق ليا وللجميع ...

الرئيس : ولا تيأسوا من رحمة الله ...

عبدالرحمن : صدق الله العظيم ...

الرئيس : وما تنسوش العبارة الحلوة اللى رددناها جميع .. يلزمنا نعمل
وانردها باستمرار ..

فريد : هيا قولوا .. يا وين تاعوينك هيا إصا ...

الجميع : (يرددون) يا ناوين تاعوينك هيا إصا ...

(تصفيق)

النهاية

حلم الجعّانين ..

الجزء الأول

.. مسرحيه إجتماعيه من ثلاثة فصول ..

الفصل الأول

الشخصيات

منصور	
الطبيب	: (شقيقان)
خالد	
زينب	: (أبناء الطبيب)
فتحي	
زكية	: (أبناء منصور)
خدوجة	: زوجة منصور الثالثة...
القاسم	: صهر منصور والد خدوجة..
المقرىء..	
رشيد	: سمسار وصديق منصور...
رمضان	: عامل يعمل مع منصور...
فرج الصنديد	: صديق خالد وفتحي...
الهيكل العظمية:	حسب الامكانيات.. أصوات مسجلة..

الفصل الأول

ترفع الستارة على مقبرة.. مجموعة قبور.. في
نهاية المسرح ربوة مرتفعة بها قبر أحد
الأولياء الصالحين ستارة سوداء دائرية بها
عدة فتحات...

الوقت.. بين العصر والمغرب...

الطيب .. المقرئ ..

الطيب : (وحده داخلا المقبرة .. بيده سلة كبيرة .. بعض الزوار للمقبرة .. حسب
الإمكانات .. يتوقف قليلاً ، ينظر يميناً وشمالاً .. بين القبور) السلام
عليكم ورحمة الله وبركاته .. الله .. الله .. حكم القوى الجبار ..
القوى الجبار .. ما عندنا ما انقولوا فيه .. تَوَّ .. زى تَوَّ كنتم
بين ناسكم وأقارب أقاربكم .. فناء .. الموت كأس وكل الناس
تشربه والقبر باب وكل الناس تدخله .. لازم تدخل .. نعم .. زي
ما قال الحبشي .. يومك .. يومك .. سواء تملك أو تسكن
بالإيجار .. حذها شبرين أرض .. هذا اذا حصل منوا بيه اليوم
الأرض آهى متوفرة .. وغدوة منوا يدري .. (يجلس قرب القبر ..
يسحب سجاره يولعها) ساحنى يا بوي وقت كنت حَيَّ عمري ما
دخنت قدامك .. ما هو كنت نتحشم منك .. عيب إندخن
قدامك .. (يرشف السجارة) هاداكه زمان .. لكن تَوَّ وينه الحشم :
ماتواخذنيش يا بوي .. أنى عارف .. عارف اللّى أنت مش غريب
تستغرب واتقول لاش جائي .. مش غريب تحتج هو في الحقيقة
عندك الحق تحتج .. أنى ولدك حقك عليا يلزم إنزورك ولو مرة في
الأسبوع أو على الأقل في المناسبات (يقف وينحن للقبر) نعرفلك أنى
مقصر في حقك .. مش قائم بواجبى .. لكن مش منى .. من
الظروف .. من الزمان نجروا .. نلهدوا من الصبح لليل ..

نلهدوا باش إنلحقوا وان شاء الله الحال يلاقى .. ما هو القناعة
ماتت والكماليات طغت على الضروريات .. نلهدوا يا بوى
إنخافوا لا يفوتنا القطار ماهو يا بوى اللّى يرقد يفوته الركب وأنى
بيني وبينك مش غريب فاتنى الركب لو ما تفزعش .. فيا ما
إنلحقش (ينظر شمالاً ويمينا) أنت مرة مرة تتفكر فيا .. نحلم بيك
توعد فيا وما توفيش .. كثير من المرات تقوللى في حوشنا فيه كنز
مدفون .. لكن .. ما فهمتنيش وين مدفون تبدأ الموضوع ووقت
بنكرش تقطع وما توليش بوي .. أنى ولدك راهو متملح .. واقف
على التل محتاج .. ملزوم .. عاونى يا بوي .. المنصور خوي ما
خلّى شيء اللّى هناك لحسه .. اللّى عقبته كلّه إستولى عليه ..
خوي منصور عبّى فلوسه زي الرز .. عمارات أراضى فيلات ..
أما أنى ما نملك شيء .. متكورد .. ساحنى يا بوي بالكش نكدت
عليك .. ما تواخذنيش قلبى .. مليون .. المنصور خوى قاعدلى
في خربة الحوش زي مسمار جحى ماباش يرحل .. وماباش يسيب
ما هو سامع بحكاية الكنز المدفون .. حاسدن فيه .. ما هو
طماع .. مش قانع باللّى عنده ما دابيه ما نلحقش عليه .. ببى
نعيش تحت رحمته عاونى يا بوي ..

المقرئ : (يقترّب) ...

المقرئ .. الطيب ..

المقرئ : السلام عليكم ..
الطيب : وعليك السلام ورحمة الله وبركاته ..
المقرئ : بالكش بتقرئ على المرحوم ...
الطيب : اللّى بيدير الخير ما يشاورش .. الله يرحم منوا قراك ووراك ...
المقرئ : من عمل صالحا فلنفسه ومن أساء فعليها وما ربك بظلام للعبيد
صدق الله العظيم ..

- الطيب : صدق الله العظيم . . .
- المقرئ : هو المرحوم يقربلك . . .
- الطيب : والدي . . أعز ما نملك فقدته . . جيت إنزور فيه . .
- المقرئ : عملت طيب . . زيارة ميمونة . . الترحم على الموق مرة مرة
ما إتزيدك إلا بركة . .
- الطيب : ما نكدبش عليك . . سنين ما دورته ولا زرتة . . لكن في المدة
الأخيرة بدى يتفكر فيّا . . نحلم بيه باستمرار والحلمة الأخيرة هي
اللّى خلّتي إنجيه . .
- شنوا إنقولك كل مرة اللّى نحلم بيه يعطيني رأس الخيط ووقت
نّبى إنكرش في الموضوع يقطع وانفيق ما هو يقولوا فيها قدام
وجهى تيسس الخضرايا . .
- المقرئ : عند الله خير . . المهم . . مات وراضى عليك . .
- الطيب : طبعاً راضى عليّا . . بينى وبينك ما فيه شيء . . ما هو مات
وخلاّنى صغير لكن أظن ماهوش راضى عليّ وضعى اليوم ما
ندرقش عليك وحيّك معكوس طائح للطاسة . إنداقى فيها وين
ما ترصّى برّ . . .
- المقرئ : لا حول ولا قوة الا بالله العلي العظيم . . .
- الطيب : هو حضرتك موظف تابع للجبانة والاّ تقرأ على حسابك . . .
- المقرئ : إندوروا في الأجر والأجر حاصل بإذن الله . . .
- الطيب : صار ماكش موظف . . .
- المقرئ : لا . . طالب في معهد ديني . . المقبرة إنجيهها أيام معدودة في
الأسبوع فيه بعض العائلات باش يساعدوني نقرا على موتاهم ما
تيسّر بصفة مستديمة . . .
- الطيب : صار مدائرلك معاش . . .
- المقرئ : ما انسموش معاش . . إحسان ومساعدة . . .

الطبيب : سمعت يا بوي .. مقرىء خصوصى .. لو كان عندي والله ما
انقصر في حقوقك ..

المقرىء : ساحنى المغرب قريب لازم نكون في الجامع .. ما اتواخذنيش
بنمشى ...

الطبيب : والقرايا .. شنوا ما صارش منها ...

المقرىء : تبوا ليل والمغرب قريب .. غدوه إن شاء الله تعالى شوية بكرى
وحاضر ..

الطبيب : ومنوا قالك أنى مروح .. الليلة قررت إنبات هنى بحداه باش
يكملى الموضوع .. عشاي جفته معاي والصبح تجي تلقاني
قدامك ...

المقرىء : ما أظنش غفير المقبرة يرضالك ...

الطبيب : نترجوه .. مش غريب يفرح بيا إنونسه وانهدرز عليه ...

المقرىء : الله يكون في عونك .. في أمان الله (ينسحب)

الطبيب : مع السلام سمعت يا بوي مقرىء خصوصى .. مقرىء .. آه .. لو

تكملى الموضوع زوز مقرئين إنعينهم على حسابك .. أيوه زوز ..

واحد للصبح وواحد لليل .. (الأضواء تنخفض تدريجياً) .. الليل

قرب .. زعمه عساس الجبانة عنده مانع إنبات هنى ما أظنش هو

وين وأنى وين وين يندرى عليا .. المقبرة كبيرة ومفتوحة من كل

مكان .. (يسحب من السلة فرشاة يطرحها على الأرض) .. زعمه الجو

يقعد صافي زي ما هو الآن والآن يتغير .. أما أنى الليلة قررت يا بوي

بنبات أحداك .. قريب منك .. (يسحب من السلة جهاز راديو

صغير) .. زعمه الراديو حرام والآن حلال .. زعمه يحتجوا جيرانك يا

بوي .. (ينفض ويلف حول القبور ويقرأ أسماء الموتى) .. هذا قبر المرحوم

سالم المكسى .. الله الله حتى انت هنى .. الله يرحمك قداش كنت

معكوس .. ولد كيف .. (قبر آخر) عبدالله الملعوص .. لا حول الله

الفصل الأول

هذا آتمه مات .. ماتواخذنيش أنى نعرفك حّاق ما عندكش الريح
وين يدور .. الراديو جبهته باش نقصر الليل .. رد بالك تزعل
منى .. (راجعا يجلس يفتح الراديو نهاية قراءة القرآن) .. خسارة كمل
القرايا يا بوي .. لكن عدوة إنوض بكري نسمعوا جميع (بطفء الجهاز) يا
سلام .. يا عيني على الهدوء .. لا عراك ولا خصام ولا إنشاف ولا
زحام ولا دعاك .. لامنوا يشكى ولا لمنوا يبكى ولا لمنوا يتحرك ..
جيران زي الخوت معيشتهم حسي وزيت لا ولدك ضرب ولدي ولا
ولدك كسر مرش حوشنا بالكوره ولا يعرفوا مراكز بوليس ولا محاكم
سامحنى يا بوي ما تتكدرش من كلامى المفروض ما تفكرش في
هالمسائل .. ما هو كنت ديمه تقول اللّى يقعد في الدار يعطي
كراها .. كنت تقول فيه هالكلام وأنى صغير ما زلت هالكلام
نتفكره ... سامحنى يا بوي .. تّوا بنأكل حويجه إنسكت بيها
معدتي .. (يسحب من السلة قطعة خبز يبدأ في الأكل) .. ما تنساش ..
تكملى الموضوع .. راهو حالتي زي ما فهمتك وانت أدزى بيها
(الأضواء تنخفض تدريجيا مع أنغام موسيقه .. تمتد على الفرشة فترة
صمت .. صوت رعد برق أضواء مختلفة مزعجة .. تخرج من القبور هياكل
عظمية تسلط الأضواء على أحد الهياكل .. يفيق منزعجا .. يحاول الصراخ
لكنه يفقد صوته .. يريد الوقوف لم يفلح .. يرتعش .. أحد الهياكل يقترب
تدريجيا منه) لا .. لا .. أرجوك ماما ..

صوت : ما تخافش .. رانا مؤمنين .. عشنا ومتنا على طاعة الله ..
الطبيب : (يرتعش يحاول الكلام يتلعثم) .. ما .. ما .. تقربنيش ..
صوت : ما تخافش .. خلّى عزيمتك قوية .. إحنا بشر زيك عاش ومات
ودخل في دمة التاريخ زي ما تدخله الناس الثانيين ...
الطبيب : تا .. تا .. تاريخ ...
صوت : أيوه التاريخ .. التاريخ اللّى ما يهضم حق حد .. كان درت شيء
طيب في حياتك يذكرهولك .. ما ينكره حد واذا كان درت شيء

- بطلال يرموك في زبالة التاريخ ..
- الطيب : زبالة التاريخ ..
- صوت : أيوه .. زبالة التاريخ .. كل مخلوق مسئول على تصرفاته ويتحاسب عليها ..
- الطيب : لكن أنى ما درت شيء .. والله ما درت شيء ..
- صوت : ما درت شيء .. (يقترّب منه) ..
- الطيب : (في خوف) .. لا .. لا .. ما تقربنيش .. والله إنظيف عمري ما ضرّيت حد ..
- صوت : ما تخافش .. خسارة قدّاش الفرق كبير بين جيلي وجيلك أيامنا الرجال تتحمل الشدائد .. تتحمل الخير والشر .. تصارع الأهوال بعزيمة قوية وإيمان .. وأنت تخاف من ميت ما فضلش فيه الّا الهيكل .. هيكل العظام ..
- الطيب : (يتلفظ) إيه .. هو صحيح ما فيش لزوم للخوف ما هو زي ما تعرف هذا الشيء عليا جديد .. مش واخذ عليه وما كنتش نستنى فيه ...
- صوت : شنوا هو الشيء الجديد الّلى ماكش واخذ عليه ..
- الطيب : (مع تردد) .. يعني .. محسوب يعنى .. بنقول .. هو صحيح ما فيش لزوم للخوف أنت إنسان طيب ما فيش منك خوف ..
- صوت : أنت ماكش طبعي .. قاعد تخاطب فيّا بلهجة تنشم منها ريحه الكذب والنفاق.
- الطيب : أبدا .. ما نكدبش أعظامي مش صحاح .. مريوح من صغرى ما نتحملش .. بعدين الخوف ماهوش عيب والّا هو حرام .. الّلى خاف سلم ..
- صوت : الّلى خاف سلم .. هذا صحيح .. لكن خوف من خوف لكن انت خواف بشكل تخاف منى ؟ .. أنى ميت والميت كمل .. إنتهى ما خلى شيء وراه غير فعله واسمه اذا كان نظيف.

- الطيب :** والله نظيف .. ما عنديش باش .. عائش من قلة الموت . (تنطفئ
الأضواء على الصوت الأول .. فترة صمت .. موسيقى مرعبة ..
انفجارات .. رعد .. أضواء مختلفة) ..
- صوت :** (ضحكات عريضة) مسكين .. عائش من قلة الموت خوَّاف ..
فالصو .. ما يصلح شيء ..
- الطيب :** (في خوف) إيو الله ليلة إمطريقة .. انت أشكون ..
- صوت :** (صوت امرأة) .. أنى إنسانة مخلوقة زي البشر التانيين سمعتك
وريتك ترعش كيف الطير يا حسرة يا رجالة زمان وشجاعة ناس
زمان ..
- الطيب :** (بتلطف) .. ما هو يا أختي شيء جديد مش واخذين عليه ..
- صوت :** مش واخذ عليه؟ .. يا خسارتك .. أنى مرأه تحشمتلك .. يقولوا
المرأة خوافة لكن أيامنا المرأة ما تبعدش عن الراجل وما تبعدش
عليه .. تحارب وتخدم وتعااند معاه .. تحزن وقت الشدة وتزغرد
وقت الإنتصار ..
- الطيب :** (بتلطف) أما لا لازم كنت مجاهدة ..
- صوت :** كل إنسان في زمانا كان مجاهد .. مؤمن بجهاده .. مؤمن
برسالته .. مؤمن بدينه ووطنه .. إسم الوطن غالى يجري في
عروق دمه .. مخلص في عمله لين يكمل عمره ..
- الطيب :** (بتلطف) .. كلامك جَلُو خَشْ خاطرى ونتمنى نقعد معاكم
دعاه ..
- صوت :** أنت كملت اللى عليك؟ .. درت واجبك؟ راضى على نفسك؟ ..
- الطيب :** (يتلثم) .. راضى على نفسك؟ .. درت واجبى؟ كملت الى
عليها؟ ..
- صوت :** خيرك رددت الأسئلة؟ .. شنوا ماهيش عاجباتك ..
- الطيب :** هُوَ .. هُوَ .. فى الحقيقة مش من الساهل نجاب على أسئلة
ماكتش نستنى فيها .. (ضحكات وصدى أصوات مختلفة) ..

- أضواء .. انفجارات .. موسيقى مرعبة .. صوت رخيم يخاطب ويسلط
الضوء على الهيكل وهو بعيد .. يقترب منه تدريجياً) ..
- الطبيب : (خوف شديد)
- صوت : خلّوه ليّا أنى .. بالك يقدر يجاويني بسهولة ..
- الطبيب : باسم الله الرحمن الرحيم .. حسّك خضيتنى .. الله يخلصها على
خير ..
- صوت : ما تنخض ولا تخاف .. اللى بيكلم فيك كان مربى .. ربّ جيل
وعلم ناس ..
- الطبيب : صار معلم أفندي ..
- صوت : تقدر تقوللى آش جابك وشنوا هو اللى خلاك تنام بين
الأموات ..
- الطبيب : (يتلعثم) ... هو .. هو ..
- صوت : قول .. شنوا جابك .. أنت من نهار بوك مات ماعادش دورته ..
أنت حتى الجنائز ما تقربش فيهم ولا فيه ميت إمشيت وراه ..
- الطبيب : وَيّ .. يعرفوا عنّى كل شيء ..
- صوت : أبدا ما نعرفوا عنك شيء .. هذا كلام أنت قلته واحنا سمعناه
منك .. قول .. آش خلاك تنام بين الأموات ..
- الطبيب : الظروف والله الظروف .. أنى محتاج مش لاقى كيف .. وفي
المنام بانلى ضوء .. لكن خسارة ما طولش ..
- صوت : بانلك ضوء؟ كلام فارغ ما يقبلش العقل .. عرّق اذا كان
بتعيش .. الدنيا كدّ وعمل متواصل .. عمل بصدق واخلاص
وأمان أما الباقي ما يتمرش ..
- الطبيب : هو في الحقيقة مش منى .. بوي هو اللى دورني .. جاني في المنام
ما هو راضى عليا وواجهه حالى .. وهذا علاش الليلة جيت
وقلت نرقد حذاه .. (ضحكات .. صدى مع أضواء .. موسيقى
مرعبة .. دقات طبول) ..

- صوت : (صوت هادئ متزن) .. عمر كش صليت ... ؟
- الطيب : إي والله ليلة مبروكة حالها .. هذا إمين طلع ؟ ...
- صوت : جاوبني على سؤال .. عمر كش صليت
- الطيب : (يتلثم) .. ص .. ص .. ص ..
- صوت : أيوه صليت ...
- صوت : (مع تردد) .. شنوا نقولك .. الحقيقة في رمضان بس ...
- صوت : صار تصل في رمضان بس ...
- الطيب : في رمضان بس .. ثلاثين يوم من الفجر للتراويح والسبحة ماتفارقنيش ...
- صوت : وباقي الشهور والأيام ...
- الطيب : (مع تردد) .. با .. با .. با .. باقي الشهور والأيام ...
- صوت : جاوب .. باقي الشهور والأيام ...
- الطيب : الجمعة مرة مرة والأعياد ...
- صوت : صلاة القياد جمعة وأعياد ...
- صوت : (صوت آخر) .. ما يقضيش الفرض وجاي يطلب في النجدة ...
- الطيب : هُوَ .. هُوَ صحيح قصرت .. لكن مش مني .. من الوقت .. نلهدوا من الصبح لليل ومش ملحقين .. ما هي المعيشة صعبة ...
- صوت : إي والله مسكين .. قوللي عمر كش شربت خمرة ...
- الطيب : (يتلثم) .. خ .. خ ..
- صوت : خمرة .. عمر كش سكرت ...
- الطيب : يا ودّي ما نكدبش عليك .. مرة مرة نحذف في طويسات ...
- صوت : وراضى على نفسك ..
- الطيب : راضى راضى لا .. إنما آهو .. (بصوت منخفض) .. آش يخلصها ما لقيت ما إندير لعمرى ...
- أصوات : الويل .. الويل .. الويل ..

- الطيب : هاذوا خيرهم ...
- صوت : الويل لشارب الخمر.. الويل لشارب الخمر وجالس.. وبائعه ...
- أصوات : ملعون.. ملعون.. (تكرار مع صدى) ...
- الطيب : يا ساتر.. هاذوا متحلفين فيا.. في الشك الليلة نسلم منهم ...
- صوت : صلاة ما تصلّيش.. خمرة تشرب فيها مش غريب حتى الصيام ما تصيمش فيه ...
- الطيب : هنايا يا استوب.. وقف عندك يا خوي.. والله رمضان خالص مستوفى.. صلاة وصيام.. كل شيء يا خوي واللعب بالصيام... لا.
- الجميع : (ضحكات... مع صدى)
- الطيب : عجائب.. شنوا يضحك فيهم.. شنوا زعمه ما صدقونيش...
- الجميع : (يضحكون مع صدى) ...
- الطيب : (متوسلا) والله رمضان عمرى ما كليته.. ديمه صمته وصلّيته...
- الجميع : (عبارات مختلفة).. سكار.. نكار.. معكوس.. كذاب...
- الطيب : كذاب.. سكار...
- الجميع : (تكرار) كذاب طماع.. (مع تكرار وصدى) ...
- الطيب : أنى طماع؟.. أنى وين يا ربى (يحاول الوقوف).. حيلى برد.. جهدى إنقطع أنى وين... أنى حى والا ميت؟ دمي جمد فى عروقي.. ماعادش فيا حيل... شنوا درت يا ربى.. خلصنى منهم أنى بريء والله بريء.. نحس نفس تغيب.. شورنى وليت واحد منهم.. هكّى غوت وما نشوفش حد.. ولا يحضرني حد.. (الهاكل تحتفى)... هاذوا وينهم.. ماعادش نشبح فيهم.. شورنى إنعميت... (يحاول الصراخ.. يفقد صوته)..
خا.. خا.. خالد يا ولدي.. وينك.. تعال نجينى.. (يرغى على القبر) بوي.. بوي.. كّلمنى.. إسعفى يا بوى...

- الجميع :** (ضحكات .. موسيقى مرعبة .. أضواء مختلفة .. طبول .. صمت كامل .. موسيقى هادئة) ...
- صوت :** (برقة) ... أذكر الليّ ما ينساك ...
- الطبيب :** لا إله إلا الله .. هذا منوا؟؟ ... الله يخلصها على خير ...
- صوت :** (صوت امرأة برقة) .. سمعتهم شنوا كانوا يقولوا عليك شنوا عندك ما تقول ..
- صوت :** (يكي) برىء يا وخيتي .. والله برىء ..
- صوت :** (صوت امرأة) لو كنت بريء راك راقد في حوشك .. حامد وشاكر الليّ أعطاك مولاك لكن يا خسارتك .. تغلب عليك الطمع .. الطمع وقطع الرقبة متحادين ...
- الطبيب :** والله ماني طماع .. كل الليّ نبغيه تتحسن حالتي .. راني ما لحقتش ... ما حصلت شيء .. خوي ما خلّى عليّا شيء خوي منصور إستولى على الأخضر واليابس .. رزق بوي كلّ بلعه كلّ لحسه .. ما خلّو لي شيء ..
- صوت :** (صوت المعلم) أنت كذاب والكذاب لا عنده ذمة ولا ضمير ..
- الطبيب :** أني كذاب يا أستاذ .. الله يسامحك ...
- صوت :** (المرأة برقة) لو ما كنتش طماع هذا كلّ ما صار لكش تّوا قبل شوية كنت تقول خوي ما خلّى عليّا شيء وقبلها كنت تقول سكرت وصفيت رزق بوك في شرب الخمر .. صار والّا ما صارش ...
- الطبيب :** (يتلثم) ... ما هُوَ .. ما هُوَ ...
- صوت :** (المعلم) خلّيك منه .. زيّه زي جيله .. يعبدوا الفلوس يجروا وراءهم من غير ما يعرقوا عليهم .. تعلموا بالزلبحة والرشوة والطمع واخذ فيهم طريق ..
- صوت :** رزق بوه صفّا .. ماكفاش .. بوه تعب وخدم وعقب الخير والبركة وراه .. كان يظن الليّ ورثوه يحافظوا عليه وينمّوه لكن مع الأسف صفوه واكلوه ..

- صوت : غراته عينه .. ما خلى ما دار .. مش حاسب حساب ولا دار
للقيم وزن .. ويا خوفى يا خوفى إذا كان يتحصل على الكنز
المدفون ما عادش يوقف قدامه حد ..
- صوت : هو هكى ما عرفش يتمشى .. سكروانكر .. ما صلاش ويعلم
الله شنوا قاعد يدير ..
- صوت : (المرأة برقة) .. مسكين .. خلوه يقول شنوا بيدير لو يتحصل على
الكنز الموعود قول وكون صريح وخليّ قولك بالصدق مليون
وصحيح ...
- الجميع : (مع صدى وطبول وإنفجارات مع تكرار) قُول .. قول ... قول ...
الطبيب : (يأس وخوف) شنوا بنقول يا قولى قول .. شنوا بنقول يا هولى
هول ...
- الجميع : (مع صدى وتكرار) .. قول وكون صريح وخليّ قولك صحيح ...
صوت : (المرأة برقة) .. قول شنوا هو الليّ في خاطرك في الدنيا ما
حصلتاش .. قول شنوا هو الليّ في الدنيا عاجبك ما لحقتش
عليه ..
- الطبيب : لو قلت إنحصل الليّ وعدني بيه بوي في المنام ..
الجميع : (صدى وتكرار) .. قول وكون صريح وخليّ قولك صحيح ..
الطبيب : تعطوني كلمة تعاونوني .. بالكش نقول وما يصير شيء ...
الجميع : قول .. قول .. قول .. قول .. قول .. قول ..
- الطبيب : مش بعيد الجماعة موافقون .. مش بعيد بيساعدوني وجائيين في
صفي (بتلطف) أول حاجة نبيها فيلاً محترمة صالاتها يلهد فيهم
الفرس ويولّى .. أثاث فاخر كلّ طراز جديد .. كلامى معقول
والآ ماهوش معقول
- صوت : (المعلم) ... معقول ومش معقول ...
الطبيب : ألواه يا معلم أفندي ...

- صوت : (المعلم) أيام زمان الليّ يحصل حوش بدارين ومربوعه ما كيفه حدّ...
- الطبيب : ما هُوَ يا أستاذ كل وقت وقته .. انمارو .. آه .. أما لا كيف يقولوا ماري ولا تكون حسود .. كل شيء يا أستاذ ليه أوصوله وتوابعه ... حق والآ لا .. ردوني إذا كان غلطت ...
- صوت : (المعلم) هذا إسراف .. بدخ وتبدير ...
- الطبيب : هنايا تغلط يا أستاذ أفندي شورك ناسي الليّ إحنا في القرن العشرين قرن العجائب والابداع ..
- الجميع : (صدى مع ضحكات) ...
- الطبيب : شوره كلامي ما عجبهمش هاذوا كيف يتفاهموا معاهم مرات نقول معاي .. وأوقات يجوا ضدّي ...
- صوت : (المرأة) ما فيه حدّ ضدك .. ضحكوا على قرن العشرين ...
- الجميع : (مع صدى) قول وكون صريح وخليّ قولك صحيح ...
- الطبيب : (بصوت منخفض) شورهم إقتنعوا بطليبي الأول .. يلزمني نستمر الفيلاّ يكونوا فيها أكثر من أربعة صالات مطبخ محترم كامل التجهيز .. جميع الكماليات فيه ...
- صوت : (المعلم) .. كماليات؟ .. كماليات شنوا يا مبدر ...
- الطبيب : (ضحكة خفيفة) عندك الحق يا أستاذ ماك ما تعرفهاش ماك ما حضرتهاش .. مكيفات .. تلاجات تلفزيون تلفون .. آلات كهربائية أشكال وألوان الليّ ترحي .. الليّ تعصر والليّ تعجن الليّ تغسل .. إيه لو بنسميلك ياما منهم
- الجميع : (صدى .. ضحكات .. تعليقات) ...
- الطبيب : معذورين .. جتهم غريبة .. عندهم حق ماروهاش (الضحكات مستمرة) عندهم حق يضحكوا .. (يضحك معهم) ...
- صوت : (المعلم) هذه بدعة وكل بدعة ضلال ..
- صوت : هذا فساد وضياع للاقتصاد ...

- صوت : هذه لا هي لبونا ولا هي لجدنا
- صوت : (المرأة) الجمل ما ينوضش الآ بحمله . . إتمارشى ما قلنا شيء لكن في الفساد . . عشنا السنين وربينا جيل اللّى قال عليه لا نعرفوه ولا نسمعوا بيه . .
- الطبيب : وأمين بتسمعوا بيه! حصيره ومندار والرقاد على سدّة جريد . . لكن اليوم الشيء تغير اليوم إذا كان ماعندكش اللّى قلت عليه ما يشبحلك حدّ . . ما يحسبك حدّ . .
- صوت : (المعلم) دنيا المظاهر وراحت دنيا الأفعال . . خسارة شدتوا في القشور . . وتركتوا اللّب . . اللّب اللّى عليه الاعتماد . .
- الطبيب : قول اللّى يساعدك . . هذا الموجود . . هذا الماشي . . عندك فلوس انت سيد الكل ما عندكش لا فيه منوا يدورك ولا ينشد عليك . . توّ بالله ما عليكم قداش ليّا معاكم . . فيه منوا دورني؟ فيه منوا سأل عليا؟ لا . . ما فيش . . لكن لو تمشوا للحوش تلقوا خوي منصور لاثنين بيه . . كلّهم يصلّوله ويركعوله . . ما هو فيه علاش . . عنده باش أما أنى الزمان ضاربني بعصاته القوية . . حي لكن مدفون حيّ لكن مردوم . . .
- صوت : (المرأة) . . وشنوا ثاى ناقصك . . .
- الطبيب : قالت شنوا ناقصنى . . إيه يا وخيتي . . ياما منه . .
- صوت : (المرأة) أنت قول . . بالكش (يقاطعها في لهف) . .
- الطبيب : تعاونوني . . تقنّعوا بوي يقولى وين الكنز مدفون . . .
- الجميع : (في صدى) قول وكون صريح وخلّى قولك صحيح . .
- الطبيب : صاربتقنعه . . لكن خير ما جاش معاكم . . زعمه يسمع فيا (نحو القبر) بوي بوي أنت تسمع فيّا . . آه . . لو غير ترضى عليّا نتبحح والله زوز مقرئين نعينهم على حسابك . . إنعم . . نعينهم رسميا بدرجة محترمة . . كل يوم إنجيك بالفل والياسمين والحنة . . ما هو الثيلا فيها جنات كبيرة كلّ مغروس نعم . .

الفصل الأول

انزورك كل يوم .. ما هو أضلّى عندى سيارة وسيارة محترمة ..
فخمة .. لازم تكون فخمة .. إي والله فخمة ...

صوت : (المرأة) .. صار بتشرى حتى سيارة فخمة ...
الطبيب : طبعاً يا وختي .. اللّ لازم لازم سيارة فخمة آخر موديل إنضلى
زي البي نسوق فيها .. معنقر طاقتي ورافع راسي زي الصيد ..
أما لا كيف .. زيّ زي الناس إنمارى .. الدنيا هذه يا وختي
عندى أنى .. شروندي .. مرة شرقي ومرة غربي ورصيهيا وين ما
ترصّي برّ ...

صوت : (المرأة تضحك باستمرار) ...
الطبيب : هذه خيرها .. شنوا صارلها .. كلامي فيه عيب ...
صوت : (المعلم) كلامك يكسر الضلوع .. فالصو .. (يتحرك نحو
الطبيب) ...

الطبيب : (في خوف) لا .. لا .. أرجوك ما تقربنيش .. والله ما نيّتي
حاجة .. قصدى بنعيش زي الناس الثانين ..
صوت : (المعلم) بتعيش .. مالمقيش وين ترمى فلوسك تشري سيارة تعنقر
طاقتك وتكوّش على الناس .. تفكير سخيف تفكير هزيل ..
(يقاطعه الطبيب) ..

الطبيب : أرجوك ما تزعلش .. بلاش السيارة مش لازمتني المهم ما
تغضبش .. حسّك مروجتني هوّ عندك حق .. زمانك السيارة ما
فيش ومش غريب أحسن اللّ ما كانتش فيه .. على الأقل الناس
تكمل أعمارها وتموت .. أما اليوم الحوادث كثر والناس كملها
الحديد .. ولو أن السيارة اليوم ضرورية .. لكن أنى في الوقت
الحاضر نتنازل عليها ..

صوت : مسكين ... قال يتنازل عليها ...
صوت : مبدأ ما فيش .. فيسع ما إنبرم وغير رأييه ..
صوت : (المعلم) مبدأ؟ المبدأ يّي منوا يعمل يّي منوا يضحّي في سبيله

التضحية التي توفر الحياة الكريمة للانسان...

صوت : وهالشكل عنده كرامة.. هذا قفاص.. طماع.. تنبال.. لاخدم
على نفسه ولا كون لنفسه شيء.. طول عمره سكير نكير وقلة
خير.. عابى على غيره.. إتكالى.. جاي يدوي على بوه باش
يورّيه الكنز وين مدفون.. مافكرش يتوب.. ما فكرش يعمل..
ما فكرش يعتمد على نفسه..

صوت : يخدم؟.. يخدم لاش.. يتعب علاش.. ما دام رأيّه منقوب
وجيبه مهتوك..

الطبيب : (المرأة) خيركم عليه.. جيتوا ضدّه الواه؟ خلّوه يكمل خلّوه
يقول..

الجميع : (يضحكون) قول وكون صريح وخلي كلامك صحيح...

الطبيب : زعمه انقول.. هاذوا الليلة إشبح شنوا ناويين.. إذا كان سلمت
منهم عمري ما زال طويل واشبح في الدنيا شنوا ما زال بنشوف
وإذا كان ما سلمتش مكانى هاني وصلته وقاعد فيه...

صوت : قول.. خير سكتت راهو الموعد قريب..

الطبيب : موعد؟.. موعد شنوا اللي قريب..

صوت : (المرأة).. ما تخافش.. شيء خاص بينا..

الطبيب : آه.. خاص ببيكم.. كيف خاص ببيكم؟ ما فهمتش..

صوت : (المرأة).. مش مهم تفهم.. كمل طلباتك..

الطبيب : حاضر يا وختي.. إنكمل.. (بصوت منخفض).. زعمه ناويين

الشر؟.. ما أظنش.. شنوا فيه بيني وبينهم.. هو صحيح ما

إمشيتش زي ما يلزم.. لكن مش منى.. تربيت يتيم..

تشردت.. ترمدت.. تبعت الضياع اللي طحت بين يديهم ما

رحونيش.. بعد ما كبرت وصرت نفهم إلقيت نفسي صفر على

الشمال.. لا قرايا زي الناس.. ولا حرفة في اليد.. واللي زاد

الطين بلّة خوي بدل ما يردني ويعاوني زاد إرهني.. وقف

ضدي .. رزق بوي إستولى عليه من الثور حصلت ودنه ..

خلاني واقف وراقد ريح ..

صوت : قتلك كمل طلباتك .. وقول وكون صريح وخلي كلامك صحيح ..

الطبيب : حاضر يا وخيتي .. والله اللي قلته كله صحيح .. اللي نبغيه يعاوني بوي يقوللي الكنز وين ..

صوت : (المرأة) كمل طلباتك ..

الطبيب : حاضر .. إنكمل .. بعد ما نشري الفيلا والسيارة .. بنى والآ نشري عمارة والآ عمارتين نقبض إيجارهم .. نصيف في البلدان الباردة وانشتي في البلدان الدافية ..

الجميع : (يضحكون) ..

الطبيب : هاذوا خيركم إذا كان دويت هازيين وإذا كان سكتت مش راضيين .. مش غريب إذا كان مازال فاضليتي روشكه الليلة إطير ..

الطبيب : (المعلم) هُوَ أنت عندك روشكه تابثة؟ أنت عقلك كله مقضوض ..

الطبيب : الواه يا معلم أفندي .. أنت ديمه ضدي وكلامي مش عاجبك ..

صوت : (المعلم) .. أنت كللك ماكش عاجبني .. جاهل .. مغرور فاشل .. إتكال .. أنت تقل على نفسك وعلى المجتمع اللي عايش فيه ..

الطبيب : أني يا أفندي؟

صوت : وجودك ما فيش فائدة .. تفكيرك قصير وعقلك صغير ..

الطبيب : أني عقلي صغير؟

صوت : طماع .. جشع .. إستغلال .. ويا ويل منوا يطيح بين يديك .. الفلوس لو يحوك إدير اللي ماداروش الشياطين ..

الطبيب : كافي .. كافي .. أرجوك .. أني بريء ..

- الجميع : (يقربون ويطوقون الطيب) . . .
- الطيب : لا . . لا . . أرجوكم ما درت شيء . . أفى بريء . . .
- الجميع : (يتعدون عنه)
- الطيب : (يكي) مكار . . طماع . . ما عنديش مبدأ . . كلهم سلطوهم عليا . . ألواه؟ شنوا درت . . الواه جوا ضدّي؟ آه حيل برد ودمي إجمد . . (صارخا) لا . . لا . . مانبيش كنز . . خلّوني هكي . . خلّوني إنكمل بقية عمري فقير زي ما كنت . . آه نفسي غابت . . بنموت . . روحى بتطلع . . إعتقني يا ربّي . . نجيني منهم . . (محاول الوقوف يسقط) (ظلام كامل في المسرح . . انغام موسيقى هادئة . . يقف فاشلا ثم يرتقي على البساط وينام . . فترة قصيرة . . تبدأ الأضواء تدريجيا مع أذان الفجر . . تتغير الإضاءة تدريجياً من الليل إلى النهار . . الناس يدخلون المقبرة عمال بيدهم عدة البناء بناء القبورة) . . .
- الطيب : (يفيق مخاطبا الجمهور في الصالة) يا شينك حلمة . . يا شينك ليلة . . (يجمع أشياء ويضعها في السلة . . (للقبر) صباح الخير يا بوي . . (ينحني للقبر) أي . . أي . . يا شينك سهرة يا بوي . . صدقني يا بوي غلطت غلطة واتفوت وما حد يموت . . أرجوك ما تتكدرش مني حلمة البارح صدقني كانت أكبر درس خديته في حياتي . . وانعاهدك ما عادش إنحير عليك . . (ينحني للقبرة خارجا من المقبرة ملوحا بيده مودعا الموق وعلى أنغام الموسيقى تسدل الستارة تدريجياً)

ستارة....

الفصل الثاني

الشخصيات

منصور

: أشقاء...

الطيب

زكية

: أبناء منصور...

فتحي

خالد

: أبناء الطيب...

زينب

خدوجة : زوجة منصور...

القاسم : صهر منصور والد خدوجة...

فرج الصنديد: صديق خالد وفتحي...

رمضان : عامل مع منصور...

الفصل الثانى

ترفع الستارة على مدخل مخزن قديم...
مخزن بضائع.. في الواجهة فتحة كبيرة على
هيئة قوس.. طراز قديم وراءها ممر يوصل
الى الشارع على شمال المتفرج.. جدار.. على
يمين المتفرج في الواجهة فتحة كبيرة على
هيئة قوس توصل الى داخل المخزن... طاولة
قديمة... مجموعة كراسى قديمة مختلفة
الأشكال.. بنك مستطيل.. خزانة.. حديدية
على يمين الطاولة شماعة لباس.. جهاز
تلفون...

الوقت صباحاً..

منصور.. رشيد...

- رشيد : وأنى إنقولك ما هوش مستحيل .. انت خليها في يدى والحل أنى
بوه...
منصور : مستحيل .. لا يمكن .. جربت يا رشيد والفائدة ما فيش ...
رشيد : جربت كيف؟ .. إنت خططت زي ما خططت أنى ...
منصور : ما نعرفش .. لكن درت اللى قلت عليه ...
رشيد : أنت مش تبني إنخس في هالموضوع ..
منصور : يا ريت تقدر يا رشيد ..
رشيد : أنى أسهاني رشيد .. بين يديا يدوب الحديد ..
منصور : آه .. كل ما نتفكر هالمخلوق تركبني نار .. كنز بين يدينا وما
نقدرش نتصرف قاعدلى زي العظم في اللهاء ..
رشيد : كل شيء يحتاج لوقته والمستحيل يوللى جائز .. كل شيء يبي
تخطيط يبي تكتيك وبعدين إتشوفه كيف يحى للطريق ...
منصور : هو غير مايحيش .. أنت على نيائك .. ماك ماخالطاش زي
البوزلفيط ما فيش أمين تشده ...
رشيد : ساهل .. نلقوا منفد .. الكنز المدفون ماتخافش عليه هذا من
نصيبك ما ينحيه منك حد ..
منصور : زعمه؟ تعرف يا رشيد لو يتحقق الحلمة انحبجها لك بعدها لا
يمكن تتكبلك أيام ..

- رشيد : غير خليك في وعدك وما تاخذ إلا اللي يرضيك . . .
- منصور : أنى والدى راضى عليّا . . كل مرة نحلم بيه نلقاه زاهي فرحان راضى عليّا . . حاجة وحدة بس خسارة ما وصلنيش لنتيجة يبدأ في كلامه على الكنز المدفون ووقت يطق وين داسه إنفيق يكونش فيه سر يا رشيد . . .
- رشيد : ما هناك سر . . . مأظنش . . غير أنت من شدة الفرحة تفيق . . .
- منصور : صَحْ . . والله من شدة الفرحة نفيق والحلمة مابتش إتم . .
- رشيد : إنخلوها بالعمل إتم . .
- منصور : وكيف؟ . . .
- رشيد : إنتقوا الطيب من الحوش نظيف عفيف . . بعدها إنجيئوا خبير جيولوجي من غير لا إنسكروا ولا إنهشموا نعرفوا الكنز وين . . .
- منصور : جيولوجي؟ . .
- رشيد : عالم من علماء طبقات الأرض . . هاذوا زي الطبّه اللي يشخصوا المرض في المريض يعاينوا الأرض يعرفوا شنوا فيها وما فيهاش . .
- منصور : على الله يارشيد . . شنوا تبني إندير . .
- رشيد : قولّي . . أنت كيف علاقتك مع ولد خوك . . .
- منصور : خالد؟ . . .
- رشيد : أيوه خالد . . خالد يهمنّا . . هوالّي بيوصلنا للطريق؟ . . .
- منصور : الولد يعمل في نفسه فالح . . يقرأ ويخدم . . إلّسينّ قاطع . . إنّما خير من بوه . .
- رشيد : ماتخاصمتوش . . قصدي ماصارش بينك وبينه خصام . .
- منصور : مرة واحدة تصادمت معاه بعدها ما عاودليش . . طامع في البنية طلب منّي ما نعطيش الكلمة فيها لحدّ ثاني لين يكمل قرايته . . .
- رشيد : بسيطة . . الخلاف اللي بيناتكم إنقيموه . . بوعد معسول إنخلوه يحيي في صفنا ونكسبوه . .
- منصور : صار تبني نوعد وبعدين نزوجه . . .

الفصل الثاني

- رشيد : بالضبط .. نقضى مصلحتنا وانجوا على غير طريق (ينادي) يا رمضان وين الشاهي ...
 رمضان : (من الداخل) واقي ..
 رشيد : تَوَّأ ببدأ العمل .. بوْدَى إتخلّلي الطريق .. تغيب مشوار بعدما ترجع تلقاني كملت كل شيء ..
 رشيد : (داخلاً بالشاهي) ...

رمضان .. رشيد .. منصور ...

- رمضان : تفضلوا ..
 رشيد : (يرشف الشاهي) يا عيني عليك يا رمضان .. طويسة ينصر دينك .. إسمع يا رمضان بالسرعة تمشي للورشة اللّي بخدم فيها خالد .. خالد ولد السيد الطيب .. تقوله يحى ملزوم بيه بشغل ضروري وماتحيش إلا بيه ...
 رمضان : حاضر .. (ينسحب نحو الشارع)
 رشيد : عمرك ما تحير يا منصور .. مادامي موجود .. أمورك تمشي كيف ما يرضيك ..
 فرج : (داخلاً) ...

فرج .. منصور .. رشيد ...

- فرج : وينه منصور .. وينه .. اليوم يومه .. وينه ..
 رشيد : لا باس يا بي ..
 فرج : بي في عينك .. تتسوق فيّا .. يا ..
 رشيد : إستغفر الله .. نتسوق فيك؟ .. حاش لله ...
 فرج : إسمع .. هالأوضاع صرفها على غيري .. كلمة بي إنخلوها لك ما تشرفنيش .. عندي أنى ما تساوى شيء ..
 رشيد : ساحنا يا ..

- فرج : فرج .. فرج .. الصنديد .. الصنديد إسم وفعل .. الصنديد
اللى قدامك .. لحْد اليوم ما قدرش ولا واحد يضحك عليه ...
- رشيد : باهي .. تفضل شنوا فيه .. لا بأس انت حامق بها الشكل ...
- فرج : الدبانة ما تقتلش لكن إدرة الكبد وأنى هذا اللى فورلى دمى ..
وينه اليوم يومه .. رقبته زي الدجيجية نكسر هاله وينه (يقوم بحركة
كسر الرقبة) ...
- رشيد : وضح كلامك إلى الآن ما فهمنا شيء ...
- فرج : تولّى وتفهم .. بالقوة .. نعم بالقوة .. من غير قوة حقك يضيع
ويضحك عليك اللى يسوى وما يسواش ..
- رشيد : يضحك عليك؟ ...
- فرج : في نيته يضحك عليّا .. ويوسخلى شرفى ويدوس على كرامتى لكن
أنى الصنديد .. وينه اليوم يومه ما فيش قوة تقدر تفكه من يديا
وقت نحصل عليه .. رقبته زي الدجاجة إنسلها له (حركة
باليدين) ...
- رشيد : كلامك شوية غامض ماتواخذناش ما زال ما فهمنا شيء ...
- فرج : (صارخا) ولدكم .. فتوح ولد البى منصور .. شاريلة سيارة وتسَلط
بيها على بنات الناس .. بلاعيمه اليوم لازم نجبدهم هنايا .. نعم
هنايا واللى بيصير يصير ..
- منصور : عجائب .. ولدي فتحى متسلط على بنات الناس؟ ... صدقنى
أول مرة نسمع هالكلام ...
- فرج : (يصفق) .. يا فرحتك .. يا نصرتك .. تقدر تفتخر بها الدحية
المارقة ...
- منصور : ولدي فتحى؟ .. لا .. مش ممكن .. بالكش غالط يا ولدى أنى
لو كان عندي علم والّا حَدْ إشكالى منه .. ما نرضاش العيب
نربيّه ...
- فرج : تربيّه؟ .. (يضحك) قال يربيّه .. أطلق الطير وأجرى تحته .. ديرله

- سيارة وأطلقه يبرطع وبعدين تربيّه .. كلام بعيد على بعضه ...
- رشيد : هنايا تغلط يا صنديد أفندي .. السيد منصور لا يمكن يرضى العيب ...
- فرج : البلاد طنجرة وأنى مغطاها كل واحد معروف .. أنى قررت اليوم الولد لازم نرزيه في عمره هنايا وقدام بوه ...
- منصور : لا حول ولا قوة الا بالله .. تّوا هذه مش مصيبة نزلت على دماغى في أشكون تصبحت اليوم ..
- فرج : (ياخذ كرسيًا ويجلس أمام الباب الرئيس) ...
- منصور : لكن فتحى .. ولدى فتحى .. لا .. لا .. مش إمتع دوّه زي يرضى يحشمنى مع الناس .. كنت إنظن فيه راجل طيب ساعدته .. لا .. لا .. مش ممكن ..
- رشيد : ما ترعشش نفسك .. الراجل حامق وعنده حق .. لكن تّوا إنهدوه ..
- منصور : (ياخذ عصاته ويضع شاله على كتفه .. نحو الباب)
- فرج : على وين يا سيد .. أنت لازم تحضر الملطم .. أنت لازم تشوف قهرتك بعيونك باش تترى بعدها تعرف كيف تربى الصغار ...
- منصور : لكن أنى ماشى إنجييهولك ...
- فرج : لا .. ما فيش لزوم .. أنى نعرف اللّى كل يوم يحبك ويقعد مشوار طويل يونس في باباه ...
- رشيد : (ياخذ منصور من يده ويتعد به حوار في هس غير مسموع) (لفرج) تّوا يا أستاذ خليها هكى .. الولد فات فيه والغلط والعيب زي ما يقولوا على زائد العقل .. هالغليان وهالفورة نتيجتها مش في صالح حد ...
- فرج : كل واحد يعرف حسابه .. وأنى قاري ألف حساب ..
- بالقاسم : (داخلا) ...

بالقاسم .. منصور .. رشيد .. فرج ..

- بالقاسم : السلام عليكم ...
- فرج : تفضل لا بأس ...
- بالقاسم : جاي بتفاهم مع إنسيبي منصور ...
- فرج : تفضل .. تتكلم والّا تتحرك ودينى .. (يقوم بحركة كسر الرقبة) ..
- بالقاسم : (مع استغراب يجلس) ..
- رشيد : (نحو منصور يأخذه من يده حوار في همس ويشير ليه بدفع نقود ...) ..
- فرج : (صارخا) لا .. لا .. لا يمكن .. تشروني بفلوسكم .. الشرف ثمنه غالى .. ماينباعش بالفلوس .. مهما كان الثمن ...
- رشيد : (يشير لمنصور بالاتجاه إلى الخزينة) ..
- منصور : (نحو الخزينة يتوقف) ..
- رشيد : (لفرج) يا راجل إحنا بنرضوك وحبال سَوطاحوا في بير ..
- فرج : (في تهكم) وحبال سَوطاحوا في بير .. لكن .. أنى الصنديد ...
- رشيد : نعرفوك تفعل (لنصور) هات يا سيد منصور .. هات اللى يهون بيديك .. هات وسكر عليك هالموضوع ...
- منصور : (بصوت منخفض) .. قداش ...
- رشيد : حتى أنت إضحك .. هات يا راجل .. هذه ما فيهاش قداش مائة .. مائتين .. إجبديا راجل اللى يجي في طريقك ..
- منصور : زي مائة .. زي مائتين .. غير شنوا درت تحت ربي .. جيل فاسد (يسلمه رزمة نقود) هاك يا رشيد .. أعطيه إن شاء الله يصرفهم وين ما ينفعوه ..
- بالقاسم : لا حول ولا قوة إلا بالله ...
- رشيد : (يأخذ النقود .. جزء يضعه في جيبه وجزء يتجه به لفرج) . خود يا أستاذ مش إظن شرينالك شرفك بالفلوس لا والله أبدا إنما آهو باب وسكرناه ...

- فرج** : (ياخذ رزمة النقود) والله الآ على خاطرك لولاك اليوم ولّيت مجرم الصراحة حاجة مش ممكن يتحملها الانسان... .
- رشيد** : عندك حق.. من طرفنا كون متهنى ولدنا نربّوه.. المهم اللّ صار يندفن هنايا لامنوا سمع ولامنوا شاف.. .
- فرج** : حبال سَوطاحوا في البير.. (يخرج مسرعاً راجعاً مسرعاً ويسحب النقود من جيب رشيد ويتجه لمنصور).. إسمع مش إظن شريتني بفلوسك.. لا.. أول غلطة تصدر من ولدك فتحي مصيركم معروف كلكم (حركة كسر الرقبة) مفهوم (يخض منصور) مفهوم .
- منصور** : (في خوف) حاضر... .
- فرج** : (يخرج مسرعاً)... .
- بالقاسم** : لا حول ولا قوة الا بالله... .
- منصور** : مصيبة.. على شوي إمشينا كيل زيت.. اليوم يومه فتحي أنى لازم نتملح منه عقاب عمرى يقعدوا يهدّوا فيا... .
- رشيد** : شباب... .
- منصور** : لكن.. ولدى فتحي مش إمتع دواوي زي هذه.. ما زال راكبني الشك.. ولدى فتحي أبدا ما يديرهاش.. .
- رشيد** : يديرها ما يديرهاش.. هذا الموضوع أنساه قدام فتحي ما تجبداش كأنه ما صار شيء وخلّى الباقي عليّا أنى.. أش قال عمي بالقاسم.. .
- بالقاسم** : مشاكلكم كثرت والله يخلصها على خير.. .
- منصور** : خيرنا.. حتى أنت جائي بهمّك... .
- بالقاسم** : اللّ أوله شرط عقبه سلامة.. تزوجوا بالمعروف وتفارقوا بالمعروف.. .
- رشيد** : توّا هذا مش وقته يا عمي بالقاسم... .
- بالقاسم** : أنت أشكون.. الدّوه بين إثنين والثالث إمين.. .
- رشيد** : هو الحقيقة أنى واحد من العيلة وبودّى نقول كلمة خير.. .

بالقاسم : أنت ما نعرفكش .. حكايتي أنى والمنصور...
منصور : لكن يا سيد بالقاسم عندى حوش ونتفاهموا فيه...
بالقاسم : حوشك ما عادش يتفاهموا فيه.. بنتى ما عادش تبى تقعد فيه...
منصور : لكن هنايا محل عمل.. الخاش خاش والطالع ما يصبح نتناقشوا فيه..

بالقاسم : وأنى اليوم مانيش متحرك من هنى.. الآ بعد ما نهى كل شيء....

رشيد : (يأخذ منصور من يده ويبتعد به.. حوار فى همس.. يتركه)

منصور : (يتجه الى الخزينة يضع فيها بعض الأوراق يقلبها.. يأخذ عصاته وشاله)
إسمع يا بالقاسم وراي أعمال.. ما نقدرش نسبها نقضيها بعدين
إنجيك واذا كان عطلت حوشى تلقانى فيه (ينسحب)..

بالقاسم... رشيد...

رشيد : توّ يا عمى بالقاسم ما فيش قدامك الآ الصبر.. نصيحتي تنوض
تروح وبالسّتر فى حوشكم اللى هو نتفاهموا فيه...

بالقاسم : (يأخذ الكرسي ويبتعد عن رشيد)...

رشيد : عمى بالقاسم.. خود نصيحتي نوض روح ما تعبش نفسك
السيد منصور ما أظنش يرجع ويلتهى بيك..

بالقاسم : أنبح..

خالد : (داخلا ومعه رمضان)..

رمضان.. خالد.. رشيد.. بالقاسم...

رمضان : درت زي ما قتلى ما إتحيش الآ بيه..

خالد : أهلا عمى بالقاسم (يتبادلان التحية)..

رمضان : كيف حالك يا سي بالقاسم...

- بالقاسم : الحمد لله .. في خير من الله وشر من عبده ..
- رشيد : ما شاء الله .. خالد رجال يا عمى بالقاسم عصامي .. قدأش
يعجبني الراجل العصامي الاعتماد على النفس والنظرة للمستقبل
مش كل إنسان نلقوها فيه (رمضان) خش يا رمضان وحضرلنا
الشاهي اللي يفتح الكنوز ..
- رمضان : (نحو الداخل) ..
- خالد : نقدر نعرف علاش طلبت حضوري وشنوا هو الشيء المهم اللي
بتقوللي عليه ..
- رشيد : فيه فكرة ومحاولة مني نتمناها نتحقق .. اللي نسعى ليه راحتكم
ولو أن عمى بالقاسم مش حاسبني ويهين فيا باستمرار ..
- بالقاسم : أنت أشكون باش نحسبك والّا إنديرلك وزن .. اللي نعرفه فيك
إنك سمسار .. وعائش على الغير ..
- رشيد : الله يسامحك ..
- خالد : خلينا في موضوعنا يا أستاذ رشيد ..
- رشيد : شوف يا خالد .. يقولوا .. صفى النية يستوى الحساب اللي
نقصده تكون الثقة بيناتنا قوية وتعتبرني أكبر سند ليك .. جيتك
هنايا فيه وراها شيء عظيم أنى وإياك يا خالد بنحلوا هالمشكل
العويص المطلوب منك تشغل عقلك وذكاك وتتصرف بشجاعة
وماتباليش ..
- خالد : وأنى هذا فاش إندور .. تبهدلت في جرة الوالد .. كثر مرضه وكثر
هباله جوّنا في الحوش ماهوش صافي .. وأنى واختي قعدنا بين
نارين ..
- رشيد : عندي علم .. الفكرة اللي عندي هي اللي بتوصلك للحل اللي
يرضيك ..
- خالد : غير فهمنى شنوا هي الفكرة وأنى معاك في اللي تبيه آش قال عمي
بالقاسم ..

- بالقاسم : دوّه فارغة والطمع وقطع الرقبة متحادين . . .
- رشيد : لا يا عمى بالقاسم ماتغلطش . .
- بالقاسم : وراسك ما نغلط ونفهمك زي ما نفهم جيوي لكن الله غالب ما عندي قدرة عليك . .
- رشيد : عمى بالقاسم أرجوك إحترم نفسك وقول خير . .
- بالقاسم : كل شيء واضح . . عين الشمس ما تدرك بالغربال . . منصور يعرف الحق وين قاعد يدرك فيه وانت مدائر له جبل في رقبتة وقاعد تدرجج فيه .
- رشيد : الله يسامحك . . .
- خالد : خلينا في الفكرة يا أستاذ رشيد . .
- رشيد : اللي نعرفه الوالد ما عادش هاداكه الطيب متع زمان ما قدرناش نعرفوا رأيه شنوا يقوله . . فيه منوا يقول الراجل مصدوم . . فيه منوا يقول ماعادش يجمع . . أقوال كثيرة وان شاء الله ربنا يلطف بيه . .
- خالد : فعلاً الوالد تغير هالأيام . . وديمه سارح . . ديمه يفكر بتكلم بروحه . . من جامع لجامع . . النوم ما فيش عرضته على عدة أطباء أدوية أشكال وألوان والشافي الله . .
- رشيد : وهذه فرصتك يا خالد . .
- خالد : كيف يعني . .
- رشيد : تستلم جميع الأمور في يدك . . أنت ما زلت شاب يلزم تحصل شيء تبني بيه كيان لنفسك . .
- خالد : خش دغري في الموضوع . . قول شنوا هي فكرتك . .
- رشيد : تأخذ وكالة شرعية قانونية من والدك بموجبها تقدر تبيع جميع ما يملك الوالد
- بالقاسم : (يضحك باستمرار) . .

- خالد : خورك ضحكك .. (مستمرا) عمى بالقاسم .. فيه شيء ضحكك ..
- بالقاسم : شر البلية ما يضحك يا ولدي .. اللي يستحوا ماتوا ..
- رشيد : عمى بالقاسم .. أرجوك إحترم نفسك ..
- خالد : هو قال عيب يا أستاذ رشيد ..
- رشيد : طبعاً عيب يا خالد .. تدخله ما عنداش حق فيه ..
- خالد : لا يا أستاذ رشيد .. كلامك اللي قلته هو اللي خلاه يضحك تأخذ وكالة واتبيع هو الوالد شنوا عنده ما يبيع .. أكثر من نصف الخبرة الى داكين فيها روسنا ما هناك شيء ..
- رشيد : هو هذا المقصود نصف الخبرة .. عمك يبيها مادايه تبيعوهاله عنده مشروع عمار ووالدك معاكسه ..
- خالد : عمار؟ (ويضحكان بالقاسم وخالد) قاعد تسمع يا عمى بالقاسم عمار وفي حي شعبي قديم ..
- رشيد : عمار وفي حي شعبي .. أنت آش يهكم فيه .. بيعله وخله يدبر راسه ..
- بالقاسم : حوت ياكل حوت .. ماسدوش العمارات اللي عنده الله لا تغنينا الا بحب الله ..
- خالد : هو في الحقيقة فكرة البيع والوكالة مش بطالة .. لكن المشكلة الوالد يعتقد في الحوش فيه كنز مدفون .. كيف انديروا معاه؟ ...
- رشيد : وأنت تصدق اللي فيه كنز مدفون ..
- خالد : أبدا .. أوهام ...
- رشيد : وحتى أني زيك ما إنصدقش .. لكن عمك مكرش متمسك بمشروعه ..
- خالد : صار بيشري منه مش على خاطر الكتز ...

- رشيد : هذا وهذا لأن هو يعتقد اللى فيه وبودّه تطلعوا باش يتحققله هالحلم ..
- بالقاسم : لا حول ولا قوة الا بالله .. اللهم لا تغنينا إلا بحب الله ...
- خالد : شوف يا أستاذ .. الفكرة مش بطالة ساهلة ومقبولة مستعدين الخبرة نفصوها بس ليا شروط وعمى لازم يقبلها ..
- رشيد : شروط ساهلة والآ صعبه؟ .. شيء ينقبل والا؟ ...
- خالد : (يقاطعه) شيء مقابل شيء الشروط مربوطة ببعضها ومش ممكن ينفصلوا على بعضهم ...
- رشيد : من رأيي قبل لا تقول شروطك نبعثوا رمضان ينادي عليه وانسأحو بيناتكم ...
- خالد : لا .. مافيش لزوم بيني وبين عمى ما فيه شيء .. المشكلة اللى بيناتنا معروفة وعمى بالقاسم يعرف كل شيء بنت عمى بالقاسم كل يوم هي وعمى خصام وعندها حق ماهيش مرتاحة لأن خبرة الحوش ما تسكنش عيلتين ..
- رشيد : خلىنا في الشروط ..
- خالد : الشرط الأول .. يعطينا حوش من أملاكه وينكتب باسمنا من أول يوم ننتقلوا فيه ..
- رشيد : قصدك يملكهولكم ..
- خالد : طبعاً .. يصبح ملكنا من أول يوم ...
- رشيد : لكن ..
- خالد : ما فيش لكن الشرط الثاني يوافق على زواج بنته وزواج ولده هذا الشرط مربوط بالأول والشرطين مربوطين ببعضهم ..
- رشيد : ما فهمتش .. زيد وضح ...
- خالد : فتحي ولده وأنى متفقين واختي وبنته متفقات .. فهمت اللى نقصدوه ...
- رشيد : فهمت .. أولاد العم وبنات العم ...

- خالد : بالضبط .. إذا كان قبل هذه الشروط في أربعة وعشرين ساعة الحوش نفصوه وإذا كان قال لا حوشنا قاعدين فيه وما صار شيء ..
- رشيد : لكن ..
- خالد : أرجوك .. أنت وسيط .. سمسار زي ما قال عمى بالقاسم ..
- رمضان : (داخلا بالشاهي) ... تفضلوا ..
- خالد : (يرشف الشاهي) ينصر دينك يا عمى رمضان .. طويسة يا عمى رمضان تمسح كل شيء .. (يزوده بالكأس) .. تفضل يا عمى رمضان ...
- رمضان : بالشفاء يا ولدى .. يزيدك عز .. (رشيد مذهولاً يفكر) ..
- خالد : ما تفكرش يا أستاذ .. اللعبة ماهيش هوينه زي ما أظن اللي يلعب بينا ما زال ماجاباتاش أمه ...
- رشيد : هذا مش كلام يا خالد .. عيب يا ولدى ..
- خالد : ولدك؟ عيب يا رشيد إذا كان قدرت تلعب بعقل عمى عليا أنى لا .. ناديت عليا وجيتك .. شروطى واضحة أعرضها عليه .. إذا كان قبل هذا الى نبغوه وإذا كان ارفض نعرفوا الطريق ..
- رشيد : طريق شنوا يا خالد ...
- خالد : اللي توصل ...
- رشيد : توصل لوين ..
- خالد : إلى المقصود .. (بالقاسم) عمى بالقاسم نوض معاي ..
- بالقاسم : وين بترفعنى يا ولدى ...
- خالد : وين فيها خيرتك ...
- بالقاسم : خيرتي ..
- خالد : فيه فكرة بنبحثوها جميع .. نوض ..
- بالقاسم : لكن أنى جاي بتفاهم مع منصور ...

خالد : عمى بعددين توّليه .. نفهمك الموضوع باش تعرف شنوا تقول ...

بالقاسم : حاضر .. (يقف) ..

خالد : (نحو الفتحة الداخلية) .. في الأمان يا عمى رمضان .. (ينسحبان دون توديع رشيد) ...

رشيد : (وحده في حيرة .. رمضان خارجا يجمع الكؤوس وينسحب نحو الداخل .
رشيد في قلق يتمشى ذهابا وإيابا . يرفع ساعة الهاتف يدون أرقاما) الو
أيوه أنى رشيد: إسمع جهاز نفسك أنت المكان عرفته .. عال بعد
ربع ساعة تكون في المفهى اللى اتفقنا عليه مع السلامة (يقفل
الساعة) ..

منصور : (داخلا) ..

منصور .. رشيد ..

منصور : شنوا ما جاش الولد ..

رشيد : جي .. ويا ريته ماجاء .. إهانات وشتيمة وقلة دوق سمعنى
الغريب ...

منصور : خالد .. تعدّى عليك وسمعك الغريب ...

رشيد : نعم .. شيء ما يتعاودش هو وانسيبك العزيز .. قعدت بيناتهم
واحد يضرب والثاني يزيد عليه وأنى والله .. لولا معزتك عندي
راني تصرفت معاهم زي ما يلزم وعرفوا أشكون هو رشيد ...

منصور : خالد .. يتعدّى عليك .. تَوّا إنوريه هالئيم .. (ينادى) رمضان ..
رمضان ..

رشيد : ... أرجوك .. زيد الماء زيد الدقيق عمرنا ما نوصلوا لنتيجة ...

منصور : يتعدّى عليك ونسكتوله؟ ... لا يمكن ...

رمضان : (داخلا) تفضل ...

- رشيد : هات الشاهي . . . يا رمضان . . .
- رمضان : حاضر . . . (ينسحب نحو الداخل) . . .
- رشيد : خالد ما تعداش عليه . . شرط شروط ما يشرطهاش إلا واحد مجنون ولهذا ما فيش إلا الجيولوجي اللي قتلك عليه . . .
- منصور : نبي نعرف بالظبط شنوا كان ردّه عليك . . .
- رشيد : أرجوك ما تفكرنيش . . الولد مغرور وحاسب نفسه وين . . . واللي يلزمك من الآن تفتح عيونك زين . . .
- منصور : وهم عيوني مغمضين يا رشيد . . .
- رشيد : الشروط خطيره يا منصور والظاهر مع بعضهم متفقين . .
- منصور : أشكون همّ المتفقين . .
- منصور : البنات والأولاد . . أولاد العم وبنات العم . . مش بعيد يخلّوك قدام الأمر الواقع ولهذا قتلك تفتح عيونك قبل لا الشّرك يتوسع وتلقى نفسك على غير طريق . . .
- منصور : وأمين ليك . . فيه شيء قالك عليه . .
- رشيد : نعم . . قاللي . . طلب حوش تملكهولهم ويسكنوا فيه . . .
- منصور : حوش؟ مقابل نصف خربة؟ هذه لو حطيناها في الدلالة ما تجيب شيء . . .
- رشيد : ويا ريت هذا بس . . توافق على زواجهم . . بتك لخالد . . وزينب لفتحي . .
- منصور : حلو . . ما قصرش . . .
- رشيد : كل هذا مقابل نصف خربة خود حذرك يا منصور وفتح عيونك زين . .
- فتحي : (داخلا بيده مجموعة صناديق خضروات فارغة)

فتحي .. منصور .. رشيد ...

- فتحي : السلام عليكم ...
- رشيد : وعليك السلام ورحمة الله وبركاته .. (منصور) زي ما تفاهمنا .. أرجوك
- فتحي : صباح الخير يا بوي ..
- منصور : (في نفور) خير .. أمين هالجية ...
- فتحي : من المزرعة .. مش وصيتني البارح نتفقد الأمور من الساعة ستة تسهّدت والساعة سبعة كنت غادي والساعة عشرة طلعت وهذه الجية ...
- منصور : يعني لا مشيت هني ولا هني ...
- رشيد : منصور أفندي مش وقته ...
- فتحي : ما فهمتش .. شنوا تقصد من هني والآ هني ...
- رشيد : ما يقصد شيء غير أنت كيف عطّلت عليه قعد حائر ماك تعرف الوالدين يخاف تمشي بالسرعة وأنت أدري بها الأمور ديمه الوالدين يقرؤا النقص ..
- فتحي : هو يعرفني كيف نسوق .. السرعة من يوم تعلمت القيادة محتاطلها وعامل لها الف حساب ..
- منصور : لأ .. مش هذا الليّ نقصده .. أنت يا فتحي مش غريب السيارة ماعادش نبيك تسوقها وممكن نأخذوا سواق ..
- فتحي : أنت حر يا بوي .. السيارة سيارتك وأنت أدري بمصلحتك ..
- منصور : السيارة الليّ بتجيلى وجع الدماغ والتجيلى المشاكل ويهددونى على خاطرها نقيمها ..
- فتحي : مافهمتش .. يهدوك .. كون واضح في كلامك ..
- رشيد : منصور أفندي .. شنوا كنا إنقولوا .. مش إتفقنا ما فيش لزوم ..
- فتحي : لأ يا أستاذ رشيد .. خليه يقول أنى نعرف نفسي لاخلقت مشاكل

- ولا عمري تعديت على حدّ...
 منصور : تعرفش واحد اسمه فرج الصنديد..
 فتحي : فرج الصنديد؟.. اسم غريب.. لا عمري عرفته ولا سمعت بيه..
 منصور : صار لا عمرك تعرفه ولا سمعت بيه..
 فتحي : أبدا أنت تعرفني ما نعرفش نكذب ولا عمرى درقت عليك اذا كان فيه شيء قالولك عليه هذه ودني..
 منصور : أنت طبيعتك تبدلت أخلاقك فسدت بسبب السيارة..
 فتحي : أنى يا بوي؟ غريب ما نسمع.. عمرك ما واجهتني بها الكلام..
 رشيد : ياسي منصور.. أنت مخطيء.. ما عندكش حق فتحي ولدك إنسان مضمون.. نخط يدّي في النار اللّي بريء من الكلام اللّي قاعد تقول فيه..
 منصور : برىء كيف؟.. الناس اللّي جوني واشكولي منه..
 رشيد : مش اتفقت أنى وإياك اللّي الموضوع نبحت فيه أنى..
 منصور : لكن أنى ما نتحملش شكايات الناس وخاصة من هالنوع أنت تعرف القانون ما يرحمش باش تداوي لا سامح الله اليوم صار شيء..
 رشيد : الله يهديك يا سى منصور.. الله يهديك..
 منصور : شيء يجنن يا رشيد..
 رشيد : الهدوء الهدوء.. تّوّا ما فيش إلا الصلاة على النّبي.. إسمع يا فتحي أنت روح بعدين إنجيك في الحوش وبينك إنفهمك شنوا فيه..
 فتحي : تفهمنى كيف؟.. وأنى نعرف نفسى ما درت شيء..
 رشيد : الله يهديك يا فتحي.. إنفهمك شو صار..

فتحي : ماتعش نفسك .. هذا الموضوع لا يمكن نسكت عليه ولازم نتبعه
والظالم بعدين يبان ... (ينسحب) ..

منصور... رشيد...

رشيد : لا حول ولا قوة الا بالله .. شباب .. ما عندهمش الريح وين
يدور ..

منصور : تّوا يبانله ...

رشيد : هذا خلاص عليه .. الطيب حطّه في شيشه وسكر عليه ..

منصور : مش ممكن ... مادامنى حي والله ...

رشيد : ما تحلفش يا راجل الشروط واضحة ولازم مخططين شيء ..

منصور : صار قالك سي خالد مع بعضهم متفقين ...

رشيد : متفقين يا منصور .. كل شيء واضح قدامنا ومن رأيي ما تستنوش

نفذ اللي قتلك عليه اللي يهمننا الكنز المدفون غير هذا مافيش ..

منصور : زعمه تتحق الحلمة يا منصور ..

رشيد : تتحق وأنى واثق مائة في المائة بعد ما نحصلوا الكنز .. يجوا يركعوا

تحت ركبيك ويلغوا اللي اتفقوا عليه ...

منصور : سنين وأنى نعاني في هالبلوي خيرنا مردوم ونتفرجوا عليه مش قهرة

بالله عليك ..

رشيد : فعلا قهرة .. لكن ماعليش الصبر طيب واللى يصبر ينال .. تّوا

ماعادش فيه شيء قدامنا الا نتفقوا مع الجيولوجي .. نتفقوا معاه

ويتسكر هالموضوع ..

منصور : يالله .. دوره واتفق معاه ويصير من غدوه نبدوا في الشغل ...

رشيد : نتفق معاه في كل شيء ...

منصور : في حدود المعقول .. مش يأكلنا زهم وريش .. يضرب الثمرة

ويخليلنا القشور ..

رشيد : معقولا .. أنى رشيد يا منصور ..

- منصور : توكل على الله . . .
- رشيد : في الأمان . . (ينسحب ويرافقه منصور حتى الباب) . .
- منصور : في الأمان . . (راجعا وحده) يا سلام يا رشيد لولاك راني ضعت . .
- آه لو يتحقق الحلم أشكون ما زال يلحق عليك يا منصور . .
- زعمه كنز كبير . . طبعاً . . لازم بيكون كبير . . كأنه مش خايبه
- على الأقل زير . .
- رمضان : (داخلا بالشاهي) . .

رمضان... منصور...

- رمضان : لا بأس عليك . . خيرك تتلكم بروحك . . .
- منصور : (يستدرك) لا شيء نتخيل في شيء ليا سنين نجرى وراه وهذا وين بتتسخر الأمور .
- رمضان : يا سخر سخر لو أنه فيه شيء واجبي إنبهك عليه يصير تغلط . .
- انت اسمع مني بعدين كلامي لوحه . .
- منصور : إنلوحه؟ . . إذا كان فيه فائدة قول . . (يرشف الشاهي) . .
- رمضان : ما تواخذنيش في اللي بنقوله . . هو مجرد كلام ويرفعه الريح . .
- انت زي ما تعرفني خدام نمشي أني يحى غيري . . اللي بنقوله خود
- حذرك من الأستاذ رشيد . .
- منصور : ناخذ حذري؟ . . من رشيد؟ . . .
- رمضان : مش عاجبني . . ما تخلّش يحرك فيك كيف ما يبي . . يصير
- يضرّك . . .
- منصور : زيد وضّح يا رمضان . .
- رمضان : هو يصير فالح وناشط وصاحب رأي . . لكن شبعتي فيه ثعلب
- مكار خود حذرك منه . .
- منصور : ريت شيء منه يا رمضان . . .
- رمضان : شيء ثابت لا . . لكن قلبي خبيري . . الراجل المخلص التنظيف

- ينعرف بيان... أما هذا... لا.. ماتواخذنيش.. مجرد كلام
قلته وأنت حر دير اللي يساعدك.
- منصور : حتى أنت إضحك يا رمضان.. رشيد زي نفسي يسعى لهلاكي
مش معقول.. رشيد لغاية اليوم ربحني وما خسرنيش..
رمضان : يصير...
منصور : لكن قوللي.. أنت ما قلت هالكلام لازم ريت بعض الشيء...
رمضان : الصراحة اللي يتلثلوا ويشحوا ما يعجبونيش.. ما عندنيش فيهم
ثقة.. عندي أني منافقين.. خداعين الراجل اللي يخدم بنصح
وصدق ما فيش لزوم يهترى ويتلثل ويشح...
منصور : ما هو طبائع.. كل واحد عنده طريقة يخاطب ويعامل بيها
الناس..
رمضان : يصير.. سامحني إذا كانت غلطت..
منصور : على العموم.. أنت كتر خيرك نردوا بالناس.. بس الكلام اللي قلته
في رشيد ما نقبلش ولا يمكن نفقد الثقة فيه..
رمضان : سامحني.. إعتبرني ما قلت شيء.. (ينسحب نحو الداخل)..
الطيب : (داخلا معه بالقاسم)..

الطيب.. بالقاسم.. منصور...

- الطيب : السلام على من اتبع الهدى.. زود يا بالقاسم وجه الشيطان
ما هناكش..
بالقاسم : (داخلا)..
منصور : خيرنا.. شورك ما تعرفش إطلع من فمك كلام زين..
الطيب : كلام زين.. هو انت يتعاملوا معاك بالكلام الزين.. آه.. يا
منصور لو ترجع لمولاك وتنحى الشياطين اللي لائدين بيك..
تقولش لوين بتوصل؟.. ماكفاكش اللي عندك ما زال طامع فينا

بطلّنا من خربة الحوش نصف خربة يا راجل نصف وحاسدنا فيها..

منصور : أنت شنوا تبّي مني الآن..

الطيب : جاي بنكمل الصفقة معاك راني ما زالت بعقلي مش زي ما أظن وما يعتقد مستشارك الخاص بنشرك اللي الأولاد درسوا عليا شيء الكلام اللي قاله البلعوط صاحبك وصلني إطمئن ما يصير منه شيء وانزيد بنشرك قاعد على قلبك زي الرحي إذا كان قدرك حاجة تفضل إعملها وبعدين بيانلك..

رمضان : (يخرج من الداخل يتابع الحوار)..

بالقاسم : حالتك ما تعجّيش يا منصور..

منصور : هذا الحاضر واللي ما عجّاش يضرب راسه على الحيط..

بالقاسم : ولا لامته بنقعد أنى واياك في هالرفس.. البنّت قلقت الصراحة ما هيش عيشة من يوم زوجتهالك الراحة ماشفتهاش..

منصور : هذا الحاضر.. حوش بوي ما نطلعش منه واللي ما عجّاش الطريق ساحة..

بالقاسم : خلاص أعطيها كلمتها وفكنا من هالنشاف..

منصور : صار طالب الطلاق..

بالقاسم : طبعاً.. ما فيش حل غيره ما دام أنت متمسك بشيء ماكش محتاج بيه معناها العشرة ما تبيهاش..

منصور : وخدوجة حتى هي تبّي الطلاق..

بالقاسم : خدوجه تبّي راحتها.. تبّي هناها.. تبّي حوش تسكن فيه زي الناس الثاين..

منصور : وخيرة حوش بوي.. مش مالي عينها..

بالقاسم : قتلك تبّي حوش يسكنها.. حوش ترتاح فيه.. لكن هالكلام مش جاي على بالك بعدين يا منصور وين النتيجة.. اللي زرعولك في البحر بطيخ يضحكوا عليك كدابين وسع على خوك

- حتى ربى يوسعها عليك . . .
- منصور : انت مسكين على نياتك . . سنين وأنى صابر رزقنا مدفون نتفرجوا عليه وتوّا وقت اللّى قريب نوصل على خاطر خدوجه نطلع وانسيب كل شيء . . .
- بالقاسم : كنز شنوا يا راجل . . إحمد ربّ على الخير اللّى أنت فيه قيم الطمع عليك . . أنت ماكش محتاج . . عمارات أراضى . . مزرعة فلوس في البنوك شنوا ما زال تبّى . . .
- منصور : نبّى الكنز المدفون . . .
- بالقاسم : كنز شنوا يا راجل . . خود نصيحتي يا منصور وسع على خوك وريح نفسك . . . وزوجتك وقيم عليك . . .
- منصور : لا . . لا يمكن حوش بوي ما أنسيباش إلا بعد ما نتحصل على الكنز المدفون . .
- الطيب : ما تشيطش ريقك . هذا ما يقنعش عمرك ما توصل لنتيجة معاه . . . (وراء الكواليس فرج بصوت مرتفع) .
- فرج : (وراء الكواليس) وينه المنصور وينه اليوم يومه (يكرر باستمرار) . .
- منصور : (متزعجاً نحو الباب راجعاً بسرعة يرفع سماعة التليفون) النجدة البوليس (مرتبكاً)
- فتحي : (داخلا معه . . خالد . . فرج . . .)
- فتحي . . خالد . . فرج . . منصور . . بالقاسم . . الطيب . . .
- فتحي : ما فيش لزوم يا بوي . . (يأخذ منه السماعة) . .
- فرج : خسارتك يا عمي منصور . . الحجم كبير والعقل صغير . . (يرمى رزمة النقود) تفضل . . هاذوا فلوسك . . .
- منصور : فلوسي؟ . . . (يأخذهم ملهوفاً) . .
- فرج : لعلمك دُوري قمت بيه زي ما يلزم . . . مثلت عليك دور ماكانش على بالك . . .

- منصور : مثلت دور . .
- فرج : الراوية تأليف واخراج المؤلف القدير رشيد صاحبك . . .
- الطيب : الله لا تحشمننا . .
- فتححي : بنعرفك اللي أنى برىء . . وبنعرفك اللي صاحبك للهلاك يجر فيك . .
- منصور : مش معقول . . .
- خالد : عمى . . فيق اللي واقفين معاك وقاعدين يعزوك كلهم يتمنولك الخير اللي درته أنى وفتححي وفرج الهدف منه باش تعرف الحق وين . . تعرف الطريق الصحيح عمى إحنا عيلة واحدة هدفنا واحد . . أملنا واحد . . حاول تتغلب على نفسك توب . . الله يرضى عليك . . .
- منصور : (في صمت لا يجيب) . .
- الطيب : جابوب يا منصور . . قول بعض الشيء . . .
- فرج : عمى بالقاسم . . ساعنى ربما وجعتك والا كدرت عليك . . .
- بالقاسم : مسامح يا ولدي . . اللي قاعد إنشوف فيه وشاهدته فيما فات شيء يشبه الكذب لو أحكولي عليه ما أنصدقاش . . مش ممكن يصير . .
- خالد : اللي توحل فيه دبر له . . عمى الله يسامحه نفسه متغلبة عليه ما قدرناش نقنعه اللي رشيد غشاش ومصاص دماء . . ماقدرناش نبعدة عليه . . إخترناله فرج يلعب دور الصنديد . . نصبنا الفخ لرشيد ووقعناه فيه . . .
- بالقاسم : يا شينك ملعوب . . الله لا تبلينا الآ بحب الله . . .
- الطيب : قول بعض الشيء يا منصور . . .
- منصور : آش بينقول يا قولى قول . . آش بنقول يا هولى هولى . . .
- بالقاسم : إسمع . . .
- منصور : (يقاطعه في يأس) . . أرجوك ما تقول شيء . . خلّوني في حالي . . .

بالقاسم : نخلوك كيف؟ أنت لازم تقرر.. بنتي قاعدة تستنى في الحوش..
حوشك هذا بنتي ما عادش بتقعد فيه..

منصور : أرجوكم خلّوني في حالى.. بعدين... بعدين...

الطيب : يا الله يا أولاد.. (يقف).. إسمع يا منصور..

خالد : بوي.. مافيش لزوم.. اللى علينا درناه.. الشروط اللى شرطناها
قاعدة بين يديه.. قبلها.. أهلا وسهلا.. ما قبلهاش لها مدبر
حكيم...

بالقاسم : والحل وين؟... أنى ما فهمت شيء...

فتحي : نوض مع الجماعة بعدين يفهموك... (ينسحبون)...

فتحي.. منصور.. رمضان...

فتحي : بوي... بوي...

رمضان : يا خاش بين الظفر واللحم يا طالع من غير صنه طيبة...

فتحي : بوى إنس اللى فات.. فكّر في المستقبل مستقبل مستقبل أختي
ومستقبل عيالك..

منصور : لا.. لا يمكن أنت وأختك تتزوجوا زي ما نبى أنى.. من الناس
اللى نختارهم أنى خوي الطيب لا يمكن إناسبه ونخالطه واللى
يخالف رغبتى ودينى ما عاد نستعرف بيه.

فتحي : صار ما زلت متمسك برائك...

منصور : لين إنموت.. هو هكّى ما سلكتش معاه يا مابلك يوليلى
إنسيب..

فتحي : بوي.. زيد فكر..

منصور : الكنز.. الكنز.. يا فتحي مش ممكن نسيبه.. رزق بوي مش
ممكن نفرط فيه..

فتحي : لا حول ولا قوة إلا بالله.. (نحو الباب)...

منصور : تعال جاي... وين ماشي...

- منصور : للحوش .. وين عندي نمشي ...
فتحي : اسمع .. وديني .. وديني .. إذا كان خالفت رأبي حوشي ما عاد
تقعد فيه وبنت عمك هذه نحيتها من دماغك وأختك تفاهم معاها
وفهمها اللي مش ممكن نوافق لو تطبق السماء مع الأرض ...
فتحي : باهي يا بوى .. اللي يرضيك أني فيه .. (ينسحب) ..
منصور : إسمع .. (فتحي يتوقف) من اليوم خلطه ماعادش نبها إذا كان
نشوفكم مع بعضكم شرّي وشركم يتخلط ...
فتحي : حاضر يا بوي .. (ينسحب) ..

منصور .. رمضان ...

- منصور : ريت سي الطيب ما يطلع منه .. ريت لوين رامى أشباكه لكن أني
منصور ..
رمضان : (تبادل نظرات وصمت ثم ينسحب نحو الداخل متأسفاً) ..
منصور : آه يا منصور .. لو يتحقق الحلم .. كلهم يركعوا تحت رجلك
زعمه الكنز كبير .. لازم يكون كبير .. إذا كان مش خايبه زين
(مكرراً وحده صوت مرتفع وراء الكوليس)
رشيد : (من بعيد) أستاذ فهيم .. زود منصور يستنى فيك ...
منصور : (في هف) رشيد؟ .. فهيم؟ .. الكنز (مسرعاً نحو الباب)

ستارة ...

الفصل الثالث

الشخصيات

منصور	
شقيقان :	
الطيب	
زكية	
أبناء منصور :	
فتحي	
خالد	
أبناء الطيب :	
زينب	
بالقاسم	صهر منصور والد خدوجه..
خدوجه	زوجة منصور...
رمضان	عامل مع منصور...
فهم	الجيولوجي
المجهول	ضابط شرطة..
شرطه	عدد (2) ...

الفصل الثالث

ترفع الستارة على وسط منزل شرقي ذو طابقين.. في الواجهة فتحة وممر مستطيل في نهايته باب المنزل الرئيسي.. على شمال المتفرج جدار المنزل مُلصق به سلم يوصل إلى الطابق العلوي.. سلم مجسم.. على شمال المتفرج حجرة صغيرة.. حجرة جلوس جدارها يصل إلى جدار الفتحة.. الممر به عدة أقواس.. أثاث بسيط بعش الكراسي.. طاولة صغيرة.. حجرة خالد.. ثلثي المسرح مساحة الحجرة.. تحت السلم بئر ماء.. في المربع الباقي كوسط منزل به أدوات منزلية قديمة.. خابية ماء للشرب. بعض الأسطل أواني غسيل ملابس..

الوقت بعد الظهر...

خالد .. زينب ...

- خالد : (في قلق) .. آش تبينى إندير .. هذا حَدْ جهدي .. ثلاثة شهور ولّى يا سلام عليه صلاة عبادة .. السبحة في اليد .. لكن رجعنا زي ما كُنّا زمان ..
- زينب : الله غالب علينا ..
- خالد : تبهدلت يأختى .. ما عادش عندى عقل .. وين بنفرق نفسى قرايا عمل .. مطالعة في الليل وماكفاش هذا بتتبعه بنرد بالى منه وين يمشى وآش يدير .. عييت يأختى ...
- زينب : وين إمشى ...
- خالد : وين نذرى عليه .. لا خلّيت مراكز بوليس ولا مستشفيات مافيش محلّ اللّى ما دورته فيه السماء قالت ماراته والأرض شورها بلعاته ..
- زينب : يكونش بات في الجبانة زي المرة اللّى فاتت ...
- خالد : ما أظنش على كلامه الخضة اللّى أحداها والخوف اللّى صارله هاديكه اللّيلة الجبانة ما عادش يخطم حتى قدامها ..
- زينب : زعمه يخاف ...
- خالد : يا سلام ... شنوا خلاه يتوب ومن يومها حتى الشرب بطله ...
- زينب : بطل الشرب أيام وبدى يصلى .. لكن ...
- خالد : لكن شنوا يا زينب ...

- زينب : مرة .. مرة .. يغلط وقداش ليلة في ليلة شمّيت عليه ريحة
الخمرة ...
- خالد : غريبة وأنى كل يوم نتبع فيه وقداش مرة في مرة يصلى معنا صلاة
المغرب جماعة ..
- زينب : حتى أنى ريته يصلى في صلاة العشاء بكندرته وحوائج من غير
وضوء وصنته من الخمرة تقلب الراس ..
- زينب : خسارة .. فرحة وما دامت بعد ماتاب وقلنا خلاص إندهبت
شيرته وارجع لعكسته يكونش فيه سبب يا خالد ...
- خالد : فيه يا زينب بوي مش قانع بحالته .. في نيته شيء مش لاحقه
مادابيه يدير فلوس يستغني .. لكن خلاص ماعادش يلحق الوقت
فات مايقدرش ولهذا باش ينسى إرجع لعكسته إرجع لسكيره
ونكيره وبلاه ..
- زينب : وشنوا يفيده شرب الخمر؟ ...
- خالد : ما يفيد شيء لكن عقله هكّى يقوله ما دامه ساحى ما يقنعش
بوضعه .. بعدما يسكر ينسى نفسه ويفقد قيمته ويضلل مبسوط
أربعة وعشرين قراط ...
- زينب : يا ودّي كلام بعيد على بعضه قدّاش مرة يروح شارب لكن كلامه
هُو هُو ما هوش حامد ديمه يشكى ويتقرّز والداء والدواء في الكنز
المدفون ..
- خالد : كنز شنوا يا زينب .. قولى هذه بلوى وجت على روسنا ...
- زينب : شنوا تقول حكاية الكنز صحيحة ...
- خالد : دوه فارغة ...
- زينب : لكن عمك ما بطلش .. الكنز المدفون .. الكنز المردوم .. أطلعوا
من حوشى ...
- خالد : خليه يرغى .. شروطنا شرطناها وما نطلعوش الا بعدما يوافق
عليها ...

- زينب : أمس حكّلي زكية قالت اليوم عمي جائب مهندس كبير يطلع الكنز المدفون ..
- زكية : (تنزل من الطابق العلوي .. تتوقف قليلاً) ..
- خالد : أما رشيد هذا ما نعرفش نهايته كيف ...
- زينب : مش قلت فضحتوه وامشى في حاله وعمك إفتك منه ...
- خالد : كنا نضنوا بعد الدور اللي لعبناه ينتهى لكن عمك خيب ظننا زاد تمسك بيه أكثر ..
- زينب : وعلاش يتمسك بيه ..
- خالد : ما نعرفش .. يصير الطمع .. يصير الغباء .. عمي طماع يتمرغد وينسى التعب .. ماتهاش الا مصلحته ...
- زكية : (تدخل الحجرة) :

زكية ... خالد ... زينب ...

- زكية : شنوا صار يا خالد .. عمي القيتوه ...
- خالد : لا يا زكية مالمقتاش المهم المحلات اللي فيهم خطر ماقرهمش إطير السكرة زي .. ما يقولوا ويحضروا المدائنية ...
- زكية : نشدت الجماعة اللي يتردد عليهم ..
- خالد : إنشدت قالوا شافوه أمس في الصبح خدى شويه أشياء بعدها ماعادش شافوه ...
- منصور : (يطل من السلم وينادي) .. زينب ... يا زينب ...
- خالد : نوضى .. ردّي بالك .. ديمه ما نعرفش .. فاهمه ما نفهمش ما نعرفش أكثر من .. هالكلمتين ما تقوليش ...
- زينب : حاضر .. مانعرفش .. ما نفهمش .. (تخرج من الحجرة) .. ناديت يا عمي ..
- منصور : أيوه ناديت .. تعالى نبيك ..

خالد... زكية....

- خالد : مشكلة.. قعدنا بين نارين يا زكية... .
- زكية : والله كانى زيك مانرعرش نفسي.. بوك تعرفه ماهوش متع إنشاف بالية الشيطان بالكأس إشبح وين جت رميته قعد... .
- خالد : شيء يجنن ويحرق الدم.. لو كان بوي إنسان مستقيم رانا عائشين في أرغد عيش وماناش مهددين باستمرار من بوك.. .
- زكية : حسك وجعتني يا خالد... .
- خالد : وراس بنية عمى ما وجعتك هذه حقيقة مرة إتعانوا منها لغاية اليوم أختى قاعدة تخدم في بوك زي الأسيرة وأنى زيها.. .
- علاش... .
- زكية : خالد هذا مش كلام مافيه حد خير من حد كلنا نخدموا في الحوش زي بعضنا.. وبوي يخدم في زينب ما هي أكبر منى واسمها ماشي في فمه... .
- خالد : لا يا زكية.. عمى نتصوره ونفهمه نظرتة لينا مفهومة زمان كنا صغار ما نعرفوش عداه علينا لكن تَوّا ما يتعداش هذا الشيء واضح حتى أنت تشوفى فيه صار والّا صارش.. .
- زكية : صار.. لكن مش هو هذا المهم.. في شيء قدامنا أهم... .
- خالد : تقصدي.. (مع ابتسامة).. .
- زكية : (تقاطعه) أيوه يا خالد تكمل دراستك بعدها يدير الله طريق.. .
- خالد : دراستي؟.. يا ريت نقدر.. .
- زكية : يا ريت نقدر.. شنوا قاعد تقول يا خالد.. .
- خالد : الطريق طويلة يا زكية ومش غريب تزوجى وتخلي الصغار وأنى ما زلت نعانى اللّى أنى فيه.. .
- زكية : نتزوج؟.. الواه.. شنوا غيرت رأيك... .

- خالد : مش أنى اللّى غيرت رأيى أصحاب البضاعة ما يرضوش .. يبحثوا على شاري يهون وأنى زي ما تعرفى قاعد فى نصف الطريق ...
- زكية : أصحاب البضاعة .. شنوا قالولك أنى سلعة بتاجر بيا بوي ..
- خالد : استغفر الله .. حاشاك أنت إنسانة دم ولحم ولكن حسب فهم بوك الفلوس أهم من كل شيء ...
- زكية : لا يا خالد .. الموضوع بين إثنين والثالث إثنين ..
- خالد : لكن هذا بوك والكلمة الأخيرة ليه .. أنت نسيتى شنوا صار بعد الفضيحة اللّى درناها لرشيد ..
- زكية : لا ما إنسيئتس ...
- خالد : إنسيئتى ردّه على الشروط ...
- زكية : أرجوك يا خالد؟ .. خلى الأمور بيد الله واللّى مصوره ربّى راضيين بيه ..
- زينب : (نازلة من السلم بسرعة .. تدخل الحجره) ...

زينب .. زكية .. خالد

- زينب : يا هائج هيجه .. عمرها ما صارت (مقلدة منصور) ... أطلعوا من حوشي فكوني من شبح وجوهكم عييت منكم ..
- زكية : وأنت شنوا رديتي عليه ..
- زينب : زي ماوصاني خالد .. ما نعرفش .. ما نفهمش وهو يزيد يغلى ويكبك واجعه الكنز ما دابيه نرحلوا اليوم قبل غدوة ..
- خالد : قاعدة تسمعى يا زكية مشكلتنا كل يوم تكبر .. عقولنا وعقولهم بعاد على بعضهم ومن الصعب نحققوا اللّى اتفقنا عليه ..
- فتحي : (قادما من الخارج .. نحو الحجره) ...

فتحي ... خالد ... زكية .. زينب ...

- فتحي : السلام عليكم ...
- خالد : وعليك السلام .. تفضل ...
- خدوجة : (نازلة من السلم العلوي .. تتوقف قليلا في السلم)
- خالد : كيف ماشية الأمور ...
- فتحي : كل شيء في طريقه زي ما إتفقنا ...
- زكية : فهمونا شنوا فيه ...
- فتحي : روينه يا زكية .. شبحتي فيها اليوم بيصير فيها الليّ ما صارش قبل ..
- زكية : فيه شيء جديد ...
- فتحي : فيه يا زكية .. عمى رمضان قالليّ رشيد ما زال لاصق في الوالد ويتلاقى هو وواياه في حوش رشيد واليوم جائنا وجائب خبير الكنوز معاه ..
- خدوجة : (نحو الباب تتوقف تتابع الحوار) ..
- زكية : كيف هكّى .. خالد .. شنو رأيك في هالموضوع ...
- خالد : نفس رأي فتحي الليّ يراه أنى فيه ...
- زكية : معقولا هالرجل تخلوه يلعب بينا ونتفرجوا عليه ..
- خالد : منوا تقصدي بوك والّا رشيد ..
- زكية : نقصد رشيد ...
- خالد : لا يا زكية أنت غالطة .. العلة في عمى وبوى .. الأثنين متمسكين بشيء وهمى ماهوش موجود .. لوبوي وبوك أقتنعوا الليّ هالشيء مش موجود ما يقدر رشيد يلعب بينا ورانا من زمان مرتاحين ...
- زكية : والحل يا خالد فيه شيء إتفقنا عليه وقررناه كيف نقدرنا نحققوه قدام هالعراقل ..

- فتحي : ناعمدوا على نفسنا نواصلوا دراستنا ويوم نخلصوا اللّى إتفقنا عليه إنفذه . .
- خالد : من غير رضاهم مانرتاحوش . . ماينوناش . .
- زكية : تقصد بوي يا خالد . . .
- خالد : طبعاً . . بوك عظمه كاسح من الصعب نتغلبوا عليه . . .
- فتحي : ما نسبقوش الزمن المشوار ما زال طويل ويستحسن موضوعنا هذا ما عادش نجيدوه . . بيناتنا متفقين . . آش قالت زينب . . .
- زينب : (بتسم) شنوا عندي ما نقول . . .
- فتحي : أما موضوع الخبر كونوا متهنين اللّى درته أنى وخالد بعددين اتشوفوه . .
- خالد : (نحو الباب يفتحه) . . مرت عمى . . .
- الجميع : (يخرجون من الحجرة) . . .

خالد.. خدوجه.. فتحي.. زكية.. زينب...

- زكية : تتسنى علينا . . تتجسسى . . .
- خالد : مش عيب يا مرت عمى . . شنوا درنالک . . نحترموا فيک وعمي بالقاسم نعتبروا فيه واحد منّا وانت إديرى هالعمل . . .
- فتحي : العيب مش فيها العيب في بوي . . هواللّى کلّفها وكان هذا آش نزلها من غرفتها . .
- خالد : خشيّ داخل يا بنت . . .
- زكية : لا خليها تحضر معانا اليوم يومها اللّى إدور فيه (تهجم عليها وتمسكها من شعرها)
- خدوجة : (تصرخ) منصور . . . منصور . . .
- منصور : (يخرج من غرفته) . . نحو السلم) . . .

منصور.. خالد.. فتحي.. زكية.. خدوجة.. زينب...

- منصور : شنوا فيه...
 فتحي : فضيحة يا بوي...
 منصور : شنوا قاعد تقول يا ولد..
 خالد : قالك الحقيقة.. شنوا ما زال فيه.. تتجسس علينا.. أصبحنا
 عدوانها..
 زكية : يا خاش بين الظفر واللحم يا طالع من غير صنّة طيبة..
 منصور : أسكتي يا بنت.. ضمّي فمك..
 زينب : الحمد لله لا درنا بيدينا ولا برجلينا
 خالد : قلة حياء.. ولينا عدوان ما عاdash فيه قيم..
 منصور : تحشم يا خالد وبلاش تلقيح..
 فتحي : لا يا بوي خليه يتكلم من حقه يدافع على نفسه.. ما يصح تقعد
 تتجسس علينا كل واحد منا ليه حدود ولما يفوتها يردّوه..
 منصور : خدوجه... أنت صحيح..
 خدوجة : أنى.. أعطيني ويجيني ما صارت هالدّوه.. غيرهم يكرهوني.. ديمه
 ضدّي يهتشوا فيّا ومع بعضهم متفقين ضدّي وضدك..
 خالد : حرام عليك يا مرت عمي ما فيه ولا واحد منا جبلك ولا تكلم
 عليك..
 زينب : إرمى علينا من يخاف الله..
 زكية : الحوش حوش بونا والناس بيخاصموننا..
 منصور : يا سر بلا تلقيح يا بنت وانت يا خالد محسوب قاري متعلم مش
 عيب مرت عمك أكبر منك مقام ترفع صوتك عليها أنت
 المفروض عليك على عيوني أنى تحترمها وقدامها ما تقولش آه..
 خالد : تدوي جديات يا عمي..
 منصور : طبعاً.. جديات.. أمالا إنبروا..

- خالد : إدوسنى وتتعدى عليا وتطلب إحترامها . . هذا كثير علينا يا عمى . . رانا بشر . . نحس ونتألم زي البشر التانيين . .
- منصور : ولو . . هذه مرأة والقدر ليها . . والّا هالكلام ما مرش عليك في المدرسة . .
- خالد : لا . . إلى حدّ الآن ماقالوش اذا داسوا عليكم والا تجسسوا عليكم إحترموهم قالوا ربّوهم ما تخلوهمش يفوتوا حدود الأدب . . .
- منصور : أنت قليل الأدب ولسانك ملوى على رقبتك زيك زي بوك . .
- خالد : شكرا . . الله يسامحك . . عندك الحق . . منه وجاي نعطوها سوط وأدق على دماغاتنا . . مش هُو هذا اللّى يرضيك . . مش هُو هذا اللّى يشفى غليلك . .
- فتحي : لا يا خالد . . حقنا ندافعوا عليه . . احنا ماخطيناش والمخطيء مانسكتولاش . .
- منصور : أسكت يا ولد هذا الموضوع يخصكش . .
- فتحي : يخصنى يا بوي هذا ظلم ما نرضوش بيه . .
- منصور : قتلك أسكت . .
- خالد : قالك أسكت يا فتحي . . المظلوم ظالم واللّى ما عجباش يشرب ماء البحر مش هو هذا اللّى يرضيك يا عمى . . .
- منصور : أنت دوتك كثرث وربّ يفكنى شرك . .
- خالد : مضبوط لسانى إطوال ويلزم إنقصه أنى نعرفك يا عمى ونتصورك تماما وقبل لا تحرك فمك كلامك مفهوم . . .
- منصور : تربية فاسدة . . (خدوجة تبكى) . . ماعليش يا خدوجة ما تبكيش . . بالوقت كل شيء إنخطوه في مكانه الصحيح . .
- خدوجة : لا إستحى ولا تحشم قعد . . يدفد فيا وسمعنى الغريب قبل لا إتجى يا منصور (تبكى) . .
- خالد : (مقلدا عمه) ما تبكيش يا خدوجه توّا نتملح منهم كلّهم . . . وغصبا عنهم . . إنلوحهم من الحوش . .

- منصور : شورك هازىء يا ولد . .
الطيب : (داخلا يتابع الحوار دون شعورهم به) . .
خالد : أبدا هذا كلامك مش كل يوم قاعد تردد فيه (مقلدا) وسعوا
علياء . إنتلفوا درقوا وجوهكم حاولت بكل الطرق لكن ما
قدرتش وما تقدرش إحنا أصحاب النصف الند للند مع الفرق
أنت عندك الفلوس وقلة الخير وإحنا عندنا الفقر وحب فعل
الخير . .
منصور : تواء إنشوفوا . . قليل الأدب أنعم أنت ماكش متربى عامل نفسك
قاري ومتعلم لكن عندى أنى ما تساوي شيء بعدين إمين ما هو
معروف يطيب الخوخ ويرجع لماليه . .
الطيب : (صارخا) داخلا . .

الطيب .. منصور .. خالد .. فتحي .. زينب .. زكية .. خدوجه ...

- الطيب : وينهم . . الله يلعن السلعه اللى ما تشابه لأهلها . . بالكش القيته
في قرارك حاش المظلوم ساعنى يا فتحي . . ساعنى يا ولدى
البطن تجيب صباغ ودباع لكن خوي هذا (ينحنى) عفواً يا خدوجه
هانم . . .
زينب : (فرحة) بوي على سلامتك . . وينك كنا مشغولين عليك . . .
الطيب : بعدين يا زينب (لمنصور) خلينى نتفاهم مع خدوجه هانم (بتهمك
لمنصور) خيرك زعلانه يا خدوجه هانم . .
منصور : (غاضبا) خدوجة هانم . . .
الطيب : (في هزء) أيوه خدوجة هانم ساعنى يا خوي البهجة بهجة تريس
الطول والعرض والشنب اللى يشوفك يقول عليك راجل ونصف
ولكن الواقع العكس . . أنت ياك لا باس نازل في قفطان النوم
وتهدد فيهم . .

الفصل الثالث

- منصور** : أعرف شنوا إطلع من فمك يا طيب . . اللي قاعد تقول فيه ماهوش في صالحك . .
- الطيب** : أمالا ناوي تخصم مني العلاوات . .
- منصور** : مع أشكون نتفاهموا . . إحنا ما سلطنا مع المحسوب بنادم بنسلخوا . .
- الطيب** : (في تهكم) عفواً خدوجه هانم . . عفوا خدوجة منصور أنت محسوب أكبر مني ما تجربنيش نسمعك أكثر ولو أن عمالك يستحي منهم إبليس . . يا إبليس . .
- منصور** : طيب . . أعرف شنوا تقول . . أنت راك في حوشي ونقدر نطلعك في نفخة سيجارة . .
- الطيب** : صلح يا منصور . . صلح لسانك . . قول نصف حوشي أرحم منوا عقب . . لو كان يطلعك ويشوف عمالك ينكرك يقول هذا مش ولدي . .
- خالد** : ياسر يا بوي . . مافيش لزوم . . زيد الماء زيد الدقيق . .
- الطيب** : (يقاطعه) وهكّي تولّي روينه هويا ولدي بنلقى أحسن من هالفرصة على الأقل نفرغ المزود المليون . . هالمخلوق ما يبش منوا يتحشم منه مغرور بماله . . قال يطلعني في نفخة سيجارة . . لكن أني نقوله طز . . طز فيه وفي ماله . .
- زينب** : ما ترعش نفسك يا بوي . . بالوقت يولّي ويفيق . .
- منصور** : أركبي يا خدوجة كأني منصور إنبان . . (نحو السلم) . . (للطيب) بعدين نتفاهموا . .
- الطيب** : مستعد . . ديمة وراسك خربة هالحوش ماني طالع منها كانش ميت الله غالب عليا . . أما الكنز اللي تحلم بيه وراسك ما دامني حي ماك واصله . . (للاولاد) هو يظن اللي أني خلاص انتهيت . . هبلت ماعاذش نجمع هو صحيح عندي العكسة ربّي يتوب عليا . . لكن أنتم درعاني أنتم خوتي ومالي . . أمّا هو يمشي

يشرب أمية البحر باش يهون على نفسه . . .

منصور : (منصور وخدوجة يصعدان نحو غرفته) . .

الجميع : (نحو حجرة خالد) . .

منصور : (يتوقف في السلم) . . فتحي . . زكية إركبوا . .

فتحي : ملزوم بيا يا بوي . .

منصور : قتلك إركب . . ملزوم بيك . . .

فتحي : (فتحي وزكية نحو السلم يصعدان) . .

خالد .. الطيب .. زينب ...

خالد : وينك البارح يا بوي حيرتنا . . النهار كله حائرين إندوروا عليك . .

الطيب : علاش تتحيروا . . ماكم تعرفوني لاني متع شر ولا عندي دواوي . . فارغة . . .

زينب : لو كان غير ربّي يهديك وقت اللي بتغيب توقظنا . .

الطيب : نوقظكم كيف . . هذه حاجات تصير على غفلة ما اندرقتش عليكم عزموني جماعة شربت أكثر من اللزوم . . مالقيتش جهد باش انروح . . .

خالد : لا حول ولا قوة إلا بالله العلي العظيم . . بعدما فرحنا اللي تبت وبديت قائم بواجبك . . الصلاة والعبادة . . ليه عليك يا بوي ترجع زي ما كنت . . .

الطيب : ماهو يا ولدي معكوسة . . مالقيتش باش نداويها الا بعكسه أما الصلاة آهي أختك بالكش تركتها . . قوليله يا زينب . .

زينب : والله لو إلقيناك هذا كله بناقص منه . . .

الطيب : عندكم حق . . حاضر بالوقت والصبر إنقصوه أما خوي منصور أني نعرف طبه . . .

الفصل الثالث

- خالد : لا تعرف طبه ولا دواه .. أنت ما يهكمش فيه .. إحنا نعرفوا
كيف نتفاهموا معاه .. أنت ما عاdash تدخل ...
- الطبيب : معقولا يا ولدي ما ندخلش .. هذا بلعوط كبير ما تقدرش
عليه ..
- خالد : بوي ما تنساش اللي إحنا عيلة واحدة .. مهما تكون الخلافات اللي
بيناتنا ماقدروش نفصلوا من بعضنا ..
- الطبيب : لكن هو يا ولدي ما يحبناش .. يجب نفسه الفلوس ذهبوا شيرته
منصور لو ما ياخذش خبطة كيف ما نعرف أني أبدا يتراجع ...
- خالد : شنوا رأيك يا بوي نبدلوا معاه الأسلوب ...
- الطبيب : شنوا تقصد نبدلوا الأسلوب ...
- فتحي : (نازلا على السلم) ..
- خالد : بالكلمة الحلوة .. بالكلمة الطيبة ..
- الطبيب : يعني نعملوه .. نصلوا على طرفه ...
- خالد : لا ... نتركوه ..
- الطبيب : ما فيش فائدة يا ولدي .. هذا ما يفهمش إلا بالكاسح ..
- فتحي : (يدخل الحجرة) ...

فتحي .. خالد .. الطبيب ...

- فتحي : عمى ..
- الطبيب : خشن يا فتحي ..
- فتحي : يا شينك حكاية يا عمى .. بوي ما يشعفش .. مازال قاعد في
نواياه ...
- الطبيب : قصدك تمرغد وانسى التعب .. زي الحمير ..
- فتحي : حكاية الكنز رجعت ماهوش مفلت فيها .. وأنا خائف جيّ
رشيد وخبير الكنوز تخلقلنا زوبعة في الحوش والنتيجة ما يعرفها
حد ..

- الطبيب : حلوه . كل مرة نسمعوا خرافة جديدة . . .
- فتحي : عمى رمضان كلّفه بوي يمشى مع رشيد للخير ويجيبوه . .
- الطبيب : حلوه صار عندنا ما نتفرجوا . . .
- فتحي : نتفرجوا كيف؟ . . تقعدوا مضحكة قدام الناس . .
- الطبيب : ومنوا قال هالكلام . . أنى ما يقدر حدّ يضحك عليا . . .
- فتحي : عمى . . إحنا عيلة واحدة واللي يمس الصبع يمس اليد كلها . . .
- الطبيب : هذا صحيح . . لكن ما باليد حيلة . . كل جبل يجيد على جرارته . .
- فتحي : لا يا عمى . . المفروض نوقفوله وانردوه
- الطبيب : وانردوه كيف؟ . . .
- فتحي : تفاهم معاه وقنعه . . .
- خالد : من رأيي لا يا فتحي بدى حماق فيسع يولع والريح ما عنداش وين يدور (دقات على الباب)
- فتحي : مش بعيد الجماعة وصلوا . . .
- الطبيب : مرحبين بيهم . .
- خالد : بوي نترجوك ما تدخلش فيه شيء درناه يسرك . .
- الطبيب : ما تخافش . . ما أنخلوهمش يضحكوا علينا . . أطلع حل الحوش . . .
- خالد : بوي أرجوك ما تفسدش الليّ درناه . . .
- الطبيب : حاضر .
- فتحي : (نحو الباب)
- الطبيب : (يخرج من الحجره) . . (بصوت مرتفع) طلّع الكراسي يا خالد زينب حضرى الشربات . .
- فتحي : (داخلا ومعه بالقاسم) . .

بالقاسم.. فتحي.. الطيب.. خالد..

- بالقاسم : السلام عليكم.. (منصور يخرج من غرفته)...
- الطيب : وعليك السلام.. تفضل ياسي بالقاسم.. حصانك جراي جيت في الوقت المناسب (يزوده كرسيًا)...
- بالقاسم : خير إن شاء الله.. (منصور واقفا يطل من السلم)...
- الطيب : قبل كل شيء شنوا هو الريح اللّى إرماك..
- بالقاسم : شنوا نقولك خطمت على مخزن منصور إلقيته مسكر إستغربت قلت لازم فيه شيء.. يا منصور مريض والآ فيه شيء...
- الطيب : حضرتى الشربات يا زينب...
- بالقاسم : الشربات...
- الطيب : فيشطا.. حفلة كبيرة بعد شوية بيوصلنا خبير الكنوز خوي منصور بيحقق.. حلمته اليوم...
- بالقاسم : ما زلنا في الدّوة الفارغة...
- الطيب : ما دام رشيد في جرتنا البلب والعجن يزيد...
- بالقاسم : رشيد؟.. ما زال وانا...
- الطيب : بعد شوية يشرفنا وجائب في جرتة خبير الكنوز.. حضري الشربات يا زينب...
- بالقاسم : هو منصور وين...
- الطيب : قاعد في غرفته هو وخدوجة بسلامتها خسارة يا بالقاسم انت إنسان طيب ورجال لكن بنيتك بسلامتها بعيدة عليك.. قصدي شوية كاسحة ولسانها طويل..
- بالقاسم : صار شيء يا طيب..
- الطيب : خذت طريق معوجة.. هي بتوصل لشيء لكن ما عرفتش غلطت إمشت في طريق فسدت بيها كل شيء...
- بالقاسم : ما فهمتش...

- خالد : بوي .. مافيش لزوم .. عمى بالقاسم نحترموه وانعزوه .. اللي صار ننسوه ..
- الطيب : لا يا خالد .. إذا كان منصور حركها ودبر عليها تخلق مشاكل المفروض .. ما ترضاش ما تنجرش .. صار والا ماصارش يا بالقاسم ..
- بالقاسم : ما فهمتش ...
- الطيب : إحنا وإياك متفاهمين والّا لا ...
- بالقاسم : متفاهمين .. أحنا خوت يا طيب ...
- الطيب : بيناتنا صار شيء غضبك والا أنت ماكش راضى عليه ...
- بالقاسم : قتلك إحنا خوت ما فيش بيناتنا إلّا الخير ..
- الطيب : عمرهاش خدوجة شكتلك من صغارى ...
- بالقاسم : أبدا ... مضايقة من السكن وبس ...
- الطيب : اللي صار اليوم ...
- خالد : بوي .. أرجوك ... مافيش لزوم ... (الطيب لا يعيره اهتمام) ..
- الطيب : اللي صار اليوم الأولاد والبنات مجتمعين في هاديكه الدويره نزلت الهانم من فوق وقعدت تتصنت وراء الباب ...
- بالقاسم : غريبه ... بنتى تتصنت عليهم؟ ...
- الطيب : اللي صار لاموها الأولاد قعدت تبكى الحبة ولّت قبة ... كذب وافتراء وزيادة .. الصراحة غلطتها اليوم ما تدّاواش ..
- بالقاسم : خدوجة دارت هالعمل .. أغرب ما نسمع ...
- الطيب : هاتى الشربات يا زينب ...
- بالقاسم : شربات منوا يا طيب ... هذا الكلام ما يفرحش .. (بصوت مرتفع) الله يلعن هاداكه اليوم اللي وافقت فيه (صارخا) خدوجة ... خدوجة ..
- منصور : (من السلم) .. تفضل يا سي بالقاسم ... إركب فوق ...
- الطيب : يستحسن تركب تفاهم معاها في غرفتها ...

- بالقاسم : (يتجه للسلم راكبا) . . .
- الطيب : حضري الشرابات يا زينب (مع ضحكات) . . .
- الطيب . . . خالد . . . فتحي . . .
- خالد : ما عندكش حق يا بوي . . . تسرعت وهذا غلط . . .
- فتحي : بالعكس يا خالد أحسن شيء داره . . . سكرها النفس (دقات على الباب) . . .
- الطيب : زود يا خالد حل الحوش . . .
- خالد : حاضر . . . (مسرعاً نحو الباب) . . .
- الطيب : زينب . . . حضري الشرابات . . .
- منصور : فتحي شنوا حكاية الشرابات يا عمى . . .
- الطيب : حكاية طويلة بالوقت إنقولها لك . . .
- خالد : (داخلا ومعه رمضان) . . .
- رمضان . . . خالد . . . الطيب . . . فتحي . . .
- خالد : (بصوت منخفض) . . . زود يا عمى رمضان . . .
- رمضان : (في همس وصوت منخفض) الراجل جبته . . .
- الطيب : أهلا بيه يا مرحبا . . .
- رمضان : (مشيرا اليه بالهدوء) خلّيتهم في المقهى . . . صاحبنا خائف منك يا طيب قالّ برا شوف الجو . . .
- الطيب : قوله مليح . . . يستقبلوك بالأحضان . . .
- رمضان : فيه شيء مهم يلزم تعرفوه . . .
- الطيب : قول يا رمضان . . .
- رمضان : الراجل اللّي جابه الأفندي رشيد عمكم رمضان قصقص عليه . . .
- اللعبة جديدة خطتها رشيد وأنّى فقت بيه . . . الراجل اللّي جائبه

لا هو مهندس ولا خبير صنعته مكاس أشجار.. زي
السمسار...
الطيب : طاح وين استراح.. اليوم حفلة كبيرة.. حضري الشربات يا
زينب...
رمضان : لاريتكم ولا ريتوني.. هيا في الأمان.. (نحو الباب يصحبه
فتحي)...
بالقاسم : (نازلا من السلم يصحبه منصور)...

بالقاسم.. منصور.. الطيب...

بالقاسم : خلاص.. ماعادش نتحمل أكثر.. بنتي اليوم نروح بيها بعدها
يدير الله طريق
منصور : الله يهديك.. أنت ماكش مقدر مصلحة بنتك...
بالقاسم : (ينادي) خدوجة.. خدوجة.. إنزلي... اني ما طالب منك
شيء وما نبي منك شيء.. يوم تقرر وتسكن بنتي في حوش
بروحها ترجعلك غير هذا ماعادش عندي معاك كلام...
خدوجة : (نازلة من السلم وهي ترتدي اللحاف)...
بالقاسم : ساحنا يا طيب وساحونا كلكم.. قدامي يا بنت.. (ينسحب
بالقاسم وخدوجة يتبعهما منصور)...
خالد : شفت غلطتك يا بوي نتائجها.. قلنا لك ما فيش لزوم.. لكن
أنت..
منصور : (راجعا في غضب)..

منصور.. الطيب.. خالد...

منصور : باهي عندك يا سي خالد...

- خالد : (ينظر فيه ويتركه داخلا الحجرة) ..
- منصور : خيرك سكتت يا طيب .. عجبك اللي صار .. ما نعرفش الواه ما تبوش ترتحوني غير آمتة نفتك منكم ..
- الطيب : (ينظر فيه ولا يجيبه يتركه ويدخل الحجرة) ..
- منصور : (وحده .. يتمشى ذهاباً وإياباً في قلق) ..
- زكية : (تطل من الطابق العلوي .. تجلس على أول درج من السلم) ..
- فتحي : (داخلا بسرعة) بوي ...
- منصور : (سارحا)
- فتحي : بوي ...
- منصور : أشبي بلاك ...
- فتحي : خبير الكنوز وصل ..
- منصور : (فرحا) .. وصل؟ وينه ...؟ ...
- فتحي : خليته في المقهى هو والأستاذ رشيد وعمى رمضان ...
- خالد : (فرحا) صار القوة .. جابوه .. يا سلام .. إيوا الله نهار مبارك .. (بتلطف للطيب) .. طيب .. خالد خلوده يا ولدي ..
- الطيب : (مع خالد يخرجان من الحجرة) ...
- منصور : خلوده ...
- الطيب : لا باس يا منصور ..
- منصور : هُوَ .. هُوَ .. في الحقيقة فيه شيء مهم ما دابينا نتفاهموا فيه ما يصح يا خوى نرقدوا على أودانا .. خيرنا مدفون يحي منه نقعدوا مكتفين نتفرجوا عليه ..
- الطيب : لا ما يصح نقعدوا مكتفين .. رزقنا مدفون يا خالد يلزمنا نطلعوا عليه ...
- منصور : هو .. أنى فكرت في الموضوع .. والقيت منوا يوصلنا اللي نبوه نحققوه ..

- الطيب : يا سلام عليك يا منصور.. خالد.. عمك حلمته تتحقق اليوم..
- منصور : إن شاء الله.. هُوَ.. هُوَ.. في الحقيقة مادابيا إنكونوا متفاهمين في الشيء اللي درته وقمت بيه..
- الطيب : متفاهمين يا خوي.. أنت الموس واحنا اللحم.. تكلمنا يا سر في الموضوع وأنت زي ما تعرف وخيك ما عنده جهد دفه يطيح.. (مشيرا إلى النقود)...
- منصور : ما تفكرش يا طيب.. أنى المسئول.. المهم موافق...
- الطيب : موافق يا خوي.. اللي تبيه أنى فيه..
- منصور : (بتلطف) خلوده... ساعحنى يا ولدي إذا كان غلظت معاك..
- خالد : إنت ما غلطتش يا عمى وما تغلطش.. إنت قاعد تفكر في مصلحتنا بس يا خسارة إحنا ماناش فاهمينك.. ماقدرناش نفهموك..
- منصور : خدوجة الله يهديها.. غلظت معاك وزاد بالقاسم عكر الجو بيناتنا..
- الطيب : مش مهم يا منصور.. بعد ما نطلعوا الكنز كل حاجة تنحط في مكانها الصحيح..
- منصور : زعمه كنز كبير..
- الطيب : طبعا كنز كبير.. اذا كان مش خاويه على الأقل برميل..
- منصور : آه يا سلام.. ما تقدرش تتصور قداش أنى فرحان..
- الطيب : كلنا فرحانين بيك.. دير اللي يساعدك.. المهم حوش بوي قاعد فيه..
- منصور : بالله يا فتحي بسرعة قوللهم يتفضلوا..
- فتحي : حاضر.. (مسرعاً ينسحب)..
- الطيب : حضري الشربات يا زينب..
- منصور : (ضاحكاً.. الشربات)..

- الطيب : فيشطا.. حفلة كبيرة يا منصور.. مش بعيد فيها الشطيح والرديح...
- منصور : خسارة.. خدوجة زعلت وامشت...
- الطيب : ما تتكدرش.. نرجعوها.. بالقاسم وخدوجة يعزوك ما يرضوش يفلتوا فيك...
- منصور : (سارحا) يا سلام.. زعمه كنز كبير..
- الطيب : (بتلفظ) قوللى يا منصور.. تّوا بعدما ما تتحصل على الكنز شنو إدير...
- منصور : ما فهمتش...
- الطيب : كيف نقسموه؟...
- منصور : ساهل يا طيب ما نتخاربوش.. رزق خوه عند خوه...
- الطيب : شنوا رأيك نتنازلك على حصتى باش ما نتخاصموش...
- منصور : ومنوا قالك نتخاصموا.. أنى خوك يا طيب.. رزق واحد..
- الطيب : رزق واحد صحيح.. فى الكنز لا.. مش من حقي نشاركك فيه..
- منصور : الواه؟...
- الطيب : هذا هو.. أظن أنى حر..
- منصور : المهم يا طيب نطلعوه على سر الأحوال بعدين ساهل..
- الطيب : إنت متأكد أن الخير اللّى جاي يقدر يطلع عليه..
- منصور : مائة فى المائة.. أكيد يا طيب.. (ضوضاء وراء الكواليس)...
- منصور : حسّهم جوا يا طيب..
- الطيب : مرحبتين بيهم (يصفق داخلا حجرته)..
- منصور : (نحو الباب مسرعا) أهلا.. أهلا.. (حوار فى الممر).. (رمضان.. فهيم.. منصور يدخلون.. خالد يدخل حجرته)..

منصور... فهيم.. رمضان...

- منصور : أهلاً وسهلاً.. يا مرحباً.. زوديا رمضان نظم الشغل...
رمضان : (ينظم الكراسي والطرايزة.. فهيم يتأمل في المكان)..
فهير : (يسحب سماعة طبية ويضعها في أذنه)..
منصور : أهلاً وسهلاً.. إيوا الله نهار مبروك.. (يجلسون)
خالد : (يخرج من الحجرة بيده المشروب) تفضلوا.. (يوزع)..
منصور : هذا خالد ولد خوي الطيب.. شاب من خيرة الشباب وأنى معتز بيه...
فهير : (يهز رأسه.. يقف ويضع السماعة على الأرض.. وعلى الجدران.. ثم يرجع)
فتحي : (داخلا معه مجهول يقفان في الممر)..
الطيب : (من الحجرة يتكلم) وينهم.. أهلاً بيهم.. (يخرج من الحجرة)..

الطيب.. منصور.. فهيم...

- الطيب : (بحرارة) أهلاً وسهلاً يا مرحباً.. الحوش نور يا منصور.. الأستاذ وجهه وجه خير.. نور العلم يلمع عليه..
منصور : هذا خوي الطيب يا أستاذ..
فهير : أهلاً وسهلاً..
الطيب : (يقف ويحييه من جديد) أهلاً بالأستاذ.. أستاذ الكنوز.. تعرف يا أستاذ لما أحكالى خوي منصور بقدمكم فرحت.. بيني وبين نفسي قلت مش معقول الأستاذ فهيم نقدروا نحصلوا فيه طريق وخاصة لما إلقيت إسمكم في مجلة العلم والعلماء هات الشربات يا خالد..
منصور : هو في الواقع يا أستاذ مش لاقين عبارات الشكر قبولكم وتشريفكم بالنسبة لنا شيء عظيم..

- الطيب : فعلاً شيء عظيم . . .
- منصور : الحقيقة أنى وخوي راكتبنا حيرة من سنين . . مش لاقين حل . . .
- فهم : ما فيش حيرة . . كل مشكل ليه حل . . العلم متوفر والعقول متنوره المهم الانسان ما يقعدش مكتف . . يتحرك . . .
- الطيب : صح . . . كلامك كله حكم . .
- منصور : اللي صار يا أستاذ قعدت نبحت ورينا إرزقنا بيبك . .
- فهم : في الواقع الأستاذ رشيد كلمنى من مده . . إتصل بيا وأنى كنت مشغول لكن هو كرش فيا كثير ندرس هذا الموضوع من جميع نواحيه العلمية والجغرافية والجيولوجية . . .
- الطيب : ودرستوه يا أستاذ . .
- فهم : لا . . وعدته بعدما نرجع من الخارج نهتم بيه . . بس ما فهمتش منه بالظبط . . شنوا هو الموضوع بيقول كنز مدفون ومش معروف مكانه وين . . مادابيا تزيدوا تفهموني بالتفاصيل . . .
- منصور : هو في الحقيقة الموضوع شوية دقيق يحتاج لشوية دقة وشيء من السرية والكتمان ماك تعرف بروحك ناس الدنيا ما يخلّوش حد متهنى . . .
- الطيب : صلح يا منصور . . مش كل الناس . . قول فيه بعض الناس حق والآ لا يا أستاذ . . .
- فهم : صح . . صوابع يدينا يختلفوا أحياناً تلقى عائلة متكونة من زوز خوت والآ ثلاثة . . الأب واحد والأم واحدة تلقاهم يختلفوا في الشكل والعقل . . .
- الطيب : صح كلامك كله حكم . . . زَيَّي أنى وخوى الفرق بيني وبينه زي الضوء والظلام . . .
- منصور : (ضاحكاً) خوي الطيب يحب المزح وديمه ينكت . . .
- فهم : باختصار . . إحكيلى يا أستاذ منصور . .
- منصور : شوف يا أستاذ الحوش هذا ورتناه أنى وخوي من حياة المرحوم

- فهميم : اللّى جابلكم الخبر ما قدرتوش تفهموا منه الكنز وين مدفون ..
- منصور : لا ... ماقالش ...
- فهميم : والواه ما قالش ..
- منصور : يقطّع يا أستاذ وقت اللّى بيقول نفيق ...
- فهميم : تفيق؟ ...
- منصور : أيوه نفيق ما هو الحكاية كلّها في المنام ..
- فهميم : في المنام؟ يعني في الحلم ...
- منصور : أيوه في الحلم .. الوالد الله يرحمه .. حلمت بيه قداش مرة في مرة نفس الكلام يقول ويعاود فيه .. في حوشكم فيه كنز مدفون لكن وين ما نعرفوش ..
- فهميم : وانت يا سي الطيب ..
- الطيب : أنى ما نرقدش في فراشى يا منصور .. الوالد مشيتله في الجبانة رقدت بحداه تصوّر يا أستاذ نمت بين القبور .. ليلة كانت ما تتوصفش فهمت فيها كل شيء ..
- فهميم : خلاص .. المشكل إنحز .. نتقاسموه وحبال سوطاحوا في بير ..
- منصور : خليك منه دوته فارغة ...
- الطيب : دوق ماهيش فارغة يا طماع .. دوق مليانة يا بليد ..
- منصور : أنى بليد ...
- الطيب : إنعم بليد ماتبيش تفهم .. جائب الأستاذ تهز فيه يحسابك على قاعده ولو ان حتى مش بعيد عليك .. حمار ويمشى على زوز رجلين ...
- فهميم : أنى حمار بزوز رجلين ...
- الطيب : أنت شيطان رجيم .. سمسار لا عندك همه ولا ضمير ..
- فهميم : أستاذ طيب .. أرجوك .. راك فت حدود الأدب ...
- الطيب : أدب؟ هو أنى فت حدود الأدب أنى ما زلت ما قلت شيء إنت

ماكش فهيم .. إنت بهيم .. كيف تقبل دعوه سخيغه لو ماكنتش
سخيف ...

فهم : (غاضباً) أوه ... شيء عجيب .. أما صحيح قليل الأدب ...
منصور : لا حول ولا قوة الا بالله .. أستاذ فهيم .. أرجوك ما تواخذناش
راهو ماهوش على عقله .. أرجوك .. أنت جاي على خاطري ما
يهمكش فيه ...

الطيب : (في همك) أيوه يا أستاذ ما تتكدرش راني مش على عقلي مخبول هبل
مورق .. (يسكه من عنقه بعنف) لكن وشرفك أعقل منك يا
سخيف (يتركه)

فهم : لا .. هذا كثير .. لا يمكن .. دقيقة وحدة ماعادش نقعدها أنى
عمري ما سمعت إهانات بهذا الشكل ...

منصور : لا حول ولا قوة إلا بالله .. تّوا هذه مش مصيبة على رأسي ..
الطيب : إن شاء الله تنفلق ...

فهم : أرجوكم وروني باب الحوش وين .. (يريد الانسحاب) ..
منصور : لا .. لا .. أرجوك .. مش ممكن تمشي .. على خاطري يا
أستاذ ...

فهم : خلاص .. وصلت حدّها .. دقيقة وحدة ما نقعدهاش (مسرعاً
نحو الممر) .. (المجهول يتعرض له) ..

المجهول .. فهم .. منصور .. الطيب .. فتحي .. خالد ...

المجهول : على وين يا سيد ...

فهم : أستاذ منصور .. هذا منوا؟ ...

المجهول : تولّى وتعرفه ..

منصور : فتحي .. هذا امين طلع .. أشكون خششه الحوش ..

المجهول : شوية صبر ويتوضح كل شيء ...

- والدنا . . عشنا وتربينا فيه . . الوالد الله يرحمه عاطينا قلة السماح
ما نتركوشي ولغاية اليوم قاعدين ساكنين فيه . .
- فهم : (يقف ويتأمل في الجدران ويضع السماعه الطيبة . . يفحص ويدق على
الأرض والجدران والكراسي والطاوله) يظهرلي البيت عتيق . . .
- الطيب : قال عتيق . . هذا يا أستاذ من عهد سيدنا خرشف والله ما ساكنين
فيه الا من العازة . . .
- فهم : فعلاً غير صالح للسكن . . مش غريب ماهوش صحى من
الرطوبة . .
- الطيب : رطوبة وسكت . . إحنا عقولنا صدّت وركبها الندى . . .
- منصور : (ضاحكا) خوي الطيب يحب المزح . . ماتواخذاش مرة مرة يفلت
وما يوزنش . . .
- فهم : ماعليش . . على حسابه . . أنى يعجبني الانسان البشوش . .
الناس الأوله تقول . . شد خبزتك واطلق عبستك . . .
- الطيب : كلامك حلوا يا أستاذ . . يحل النفس . . .
- منصور : الوالد لما مات خلانا صغار . . اللّى ربانا خالنا لين كبرنا . . بعد ما
توفى خالى تولّيت دفة الأمور بصيفتي أنى الكبير . . .
- الطيب : وهكى يا أستاذ برك على الموجود . . اللّى هناك لحسه وهذا ما
فضل . . .
- منصور : خلّينا نفهموا الأستاذ . . شورك ما تنساش عوائدك . . .
- الطيب : هات الشربات يا خالد . .
- خالد : حاضر . . . (يجمع الكؤوس ونحو الحجره) . .
- الطيب : ايوا الله نهارك مبروك . . فيشطاً . . حفلة كبيرة يا أستاذ قدومكم
لينا شيء عظيم . . .
- فهم : (مبتسماً) . . شكراً . . .
- الطيب : ربنا يكلل أعمالكم بالنجاح . . .
- فهم : باللى نعرف ما نبخلش وعمرى ما بخلت . .

- خالد : (داخلا بالشربات) تفضلوا ..
- الطيب : كول يا أستاذ هو رائح رائج .. أحلى على قلبي من العسل ..
- كول .. يا مهندس الكنوز والشاهي باللوز .. كول يا عبكري ..
- فهميم : (مبتسماً) .. شكراً .. شكراً ...
- منصور : وآمته إن شاء الله تبدوا في العمل ...
- فهميم : فوراً .. بس فيه شيء قبل لا نبدأ بالعمل .. أظن فهمكم الأستاذ رشيد ..
- منصور : جاهزين يا أستاذ (يسحب رزمة نقود من جيبه) تفضل .. هاذوا على الحساب ..
- فهميم : (يستلم الرزمة يتفحصها) ..
- منصور : ألف ورقة زي ما اتفقنا ...
- فهميم : صح .. (يضع المبلغ في حقيته اليدوية) ... أظن جونا صافي والأخوة متفقين ...
- الطيب : لاش متفقين أنى ما تعباش عليا .. وخيك يلعب واقف مليم واحد ماندفعاش ..
- منصور : أقعد ساكت يا طيب .. هذه أمور نعرفها أنى ..
- الطيب : حاضر .. أنى سككت (يضع يده على فمه) ..
- فهميم : تفضل يا أستاذ منصور فهمني بالتفاصيل ...
- منصور : الحكاية وما فيها .. عندنا معلومات ثابتة وأخبار صحيحة اللي الوالد قبل لا يموت دفن كنز في الحوش .. بس ماقالش وين دفنه وقعدنا حائرین لغاية اليوم نبحتوا عليه ...
- خالد : (يجمع الكؤوس) ..
- فهميم : (يقف مفكراً) .. يسحب الساعة الطبية يقوم بحركات غريبة) ..
- الجميع : (يتهايمزون في إستغراب) ..
- فهميم : صار في الحوش هذا فيه كنز مدفون ...
- منصور : أيوه يا أستاذ رزق مدفون منه محرومين في أشد الحاجة ليه ..

- منصور : لكن أنى صاحب الحوش.. لازم نفهم أشكون اللى سمحك بالدخول...
- فتحي : أنى يا بوي.. اللى يكلم فيك وخش الحوش ضابط شرطة..
- منصور : شرطة؟
- فتحي : سامحنى يا بوي.. هذا الموضوع ما ينحزش إلا بها الشكل.. رشيد ضحك علينا كثير ولعب زي ما يعجبه لكن جت الساعة اللى لازم إنحددها معا..
- منصور : ولدى يشكى فيا؟.. ولدى يجيبلي الشرطة في البيت..
- الطيب : يزيدكم عز.. هات الشربات يا خالد..
- خالد : عمى اللى عملناه اليوم أنى وفتحي لصالح الجميع..
- منصور : حتى أنت معاها يا خالد..
- المجهول : فيه شيء مهم يلزم نوضحوه يا سي منصور.. الشكاية جتنا من السيدين فتحي وخالد قدموا عريضة ووضحوا فيها كل شيء.. الشكاية جتنا من مدة وقمنا بواجبنا تبعا خطوات رشيد وتبت عندنا أنه إنسان عاش على الغش والتحايل على الآخرين ضحاياه كثيرين وفيه أدلة ثابتة. عليه بعدها قبضنا عليه والنيابة حبساته..
- منصور : رشيد محبوس..
- المجهول : نعم... رهن التحقيق...
- فهم : لكن أنى بريء يا أفندي.. عمري ما خالطته إلا المرة هذه..
- المجهول : أسكت أنت محتال محترف.. حوارك مع منصور والطيب كله سجلناه أنت إسمك الصحيح ميلود بن ميلاد.. خراس امزارع وسمسار بيع وشراء سيارات.. إمين جاك إسم فهم والعلم اللى تدعى فيه..
- فهم : لكن يا أفندي...
- المجهول : أسكت ولا كلمه.. فتحي قول للجاعة يخشوا بعد إندك يا سي

منصور.. تفضل يا فتحي..

- فتحي : حاضر...
منصور : مش معقول.. رشيد يدير هذا كله وأنى ماندريش...
الطيب : قلنا لك يا منصور.. نبهناك.. لكن أنت ما تبش تفهم...
المجهول : الصراحة العريضة اللى قدموها الأولاد فيها أشياء ما يقبلهاش العقل والأولاد متألمين ويتمنوا أن السيد منصور يرجع لصوابه والطريق الصحيح...
منصور : مش ممكن.. مش معقول.. رشيد... (فتحي داخلا ومعه رجلان من الشرطة)..

فتحي.. المجهول.. منصور.. الطيب...

- منصور : (داخلا) تفضلوا...
الشرطي : (تحيه عسكرية)...
المجهول : أرموا في يده الحديد.. (مشيرا إلى فهم) (الشرطة تنفذ.. يأخذ المجهول الحقيقة).. مهمتنا إنتهت.. المطلوب حضوركم في المركز لأخذ أقوالكم...
الطيب : حاضر.. تّوا نلحقوكم...
منصور : فلوسى يا أفندي في الشنطة...
المجهول : فلوسك في يد العدالة تأخذهم بعد ما تقرر النيابة غدوه الساعة الثانية كلكم تشرفوا.. مفهوم..

فتحي.. خالد.. منصور.. رمضان.. الطيب..

- الجميع : مفهوم..
المجهول : يالله قدامي.. (ينسحبون)...
الطيب : يزيدكم عز... رفعتوا رأسي.. (بصوت مرتفع) زكية.. زينب..

- زغردوا.. (صوت زغاريد) فيشطه.. حفلة كبيرة (زينب وزكية تتأبطان بعضهما) فيشطه أرقصوا يا أولاد... غنوا (منصور يرقى على الكرسي) (خالد وفتحي يتأبطان بعضهما)...
- منصور : مش ممكن.. رشيد يخوني.. مش معقول...
- الجميع : (نحو منصور)....
- الجميع : منصور.. مازلت مكرش في العنكبوت.. ماكفاكش اللي صار ضحك عليك مرتين قدام عيونا ويعلم الله قداش مرة في الخفاء فيق يا منصور.. توب.. قيم من دماغك حكاية الكتز كنزك بين يديك.. أرضك.. بلادك.. أولادك.. بناتك.. خيراتك جاوب يا منصور...
- منصور : لا.. لا.. مش ممكن أبدا.. لا.. رشيد.. لا.. مش ممكن...
- الطيب : معيز ولو طاروا..
- منصور : مش معقول.. مش معقول..
- فتحي : بوي...
- منصور : (صارخا) كله منك يا ملعون.. كله منك فسدت عليا كل شيء...
- الطيب : تحشم يا منصور.. اللي داروه الأولاد في صالحك..
- منصور : لا.. لا.. مش ممكن.. مش معقول...
- الطيب : (يشيرا إلى خالد وزينب بالدخول إلى حجرتهما.. نحو الحجرة.. فترة صمت راجعا) يكون في علمك يا منصور حوش بوي ما نسيباش مهما حاولت أنى والأولاد واقفينك في الطريق وانت وين بتحط رأسك حط رجلك...
- منصور : توا انشوفوا يا عنادي يا عنادكم... الكتز مانيش مسييه.. ومش ممكن تتنازل عليه.. (فتحي وزكية ورمضان يدخلون الحجرة)...

- الجميع : (أغنية شعبية قديمة... أو مطلع من المألوف) .. طيب المنازل بذكرى الحبيب...
- منصور : (هائجا... يتوقف أمام الحجرة) كأنى منصور إنبان.. (مسرعا نحو الباب الخارجي) ..

النهاية...

حلم الجعّانين ..

الجزء الثانى

.. مسرحيه إجتماعيه من ثلاثة فصول ..

الفصل الأول

الشخصيات

منصور	
الطبيب	: شقيقان
فتحي	
زكية	: أبناء منصور..
خالد	
زينب	: أبناء الطبيب
الحاج عمر	: صديق منصور
رشيد	: صهر منصور
رمضان	: عامل منصور
محمود	
أحمد	: أبناء رمضان..
خميس	: محتال

الفصل الأول

ترفع الستارة على وسط مخزن كبير
قديم... في الواجهة فتحة مقوسة على شمال
المتفرج وراءها ممر يوصل الى الشارع على
يمين المتفرج في الواجهة فتحة على هيئة
قوس توصل الى بقية المخزن.. المبنى
قديم... طاولة.. كراسى مختلفة... خزانة
حديد... مقعد مستطيل مجموعة ملابس
ركينة.. خابية كبيرة للماء فوقها صحن
وكأس معدني...

الوقت صباحاً...

رمضان .. الطيب .. محمود .. أحمد ...

- الطيب : عطل اليوم .
- محمود : نستنوا يا عمى الطيب ..
- الطيب : ودنه طويلة وخاصة وقت بيدفع اللّى عليه ..
- رمضان : (داخلا بابريق الشاهي .. يصب الشاهي في الكؤوس) ..
- محمود : إحنا ما نبوا منه شيء الآ يخلي سبيله ويعطيه الأوراق اللازمة ..
- رمضان : تفضلوا .. (يوزع) .. الشاهي والكلام الباهى ..
- الطيب : الشاهى موجود والكلام الباهي هو اللّى ما هناش ..
- رمضان : موجود يا طيب .. بس منصور خوك ساعحنى نقولك ما نيش عارف طينته إمنين .. أكثر من عشرين سنة وأنى معاه .. الراجل هو هو ما تغيرش .. ما عرفته جاهل .. ما عرفته فالح .. إنسان غريب ...
- أحمد : بوي .. أنت لازم تنهيا معاه .. الجماعة اللّى في السوق كلمونى وحددوا أول الشهر تبدأ في العمل .. أهم شيء يعطيك الشهادة والباقي بالوقت نطالبوه ..
- رمضان : ما دابيا يا ولدي يطلقني من اليوم ... لكن ..
- أحمد : ما فيش لكن .. ما دام شغل ما عادش فيه لا ش شادك ..
- بعدين المكان اللّى حصلناه قريب من الوحوش يريّجك ...
- محمود : الحق ينقال يا عمى الطيب الأولاد وحضرتك ما عندنا ما نقولوا

- فیکم لكن عمي منصور صعب المفاهمه معاه... .
- الطبيب : مش منه يا محمود.. من سمعته... بوي الله يرحمه عاش ومات
وماسمعناش ولا واحد قال فيه كلمة بطالة.. أما خوى وين ما
تمشي اللي يقولك مصاص دماء.. اللي يقولك إستغلاي.. اللي
يقولك مراي.. ما يخافش الله.. حشمننا يا ولدى.. لكن الله
غالب الفلوس يذهبوا الشيره... .
- أحمد : تَوّ يا عمي الطيب الوقت تغير.. الناس تعلمت.. تقدمت تفهم
ما عادش هالسلوك يرضوا بيه يلزمه يفيق... .
- الطبيب : آهو ما فاقش.. قاعد في عماه.. هو لو يعرف.. لو يفهم.. لو
يحترم نفسه ويحترم الناس اللي لائدين بيه يرضى يتزوج أخت
رشيد.. رشيد؟ ما نعرفش.. قد مادوينا.. قد ما نصحنا..
لوح كلامنا.. طلق بنت بالقاسم وجاب بلاء أزرق في الحوش..
أحمد : ورأيك هذا الزواج يطول.. .
- الطبيب : ما نعرفش.. البنت صغيرة ودماغها مليان شياطين.. .
- رمضان : كلامك صحيح يا طيب.. رشيد قاعد كل يوم يحلب فيه... .
- محمود : في فكرة عرضتها على فتحى وخالد ممكن تطلع منها نتيجة.. .
- الطبيب : صعب يا محمود.. رشيد ملعون.. لصق أخته باش إستولى على
منصور وما أظنش هذا الرجل ما زال يجي للطريق.. .
- محمود : على العموم الأولاد مُصرّين على الفكرة وانت نبوك زي ما
كنت... .
- الطبيب : شنوا أنقولك يا محمود صدقني عييت منه وأيست.. .
- محمود : لا.. لا يا عمى الطيب.. ما تأيسش.. نوض معاي وانفهمك
شنوا هو اللي بنديره.. .
- الطبيب : حاضر.. .
- محمود : إسمع يا بوي.. أنت إستمر معاه حتى آخر الشهر.. كرش فيه
يعطيك الشهادة بس والباقي خليه... .

الطيب : صار اليوم ما تبوش تكلموه .. مش قلتولي تعالى عاوننا في الموضوع.

محمود : موضوع الوالد نخلّوه زي ما هُو حتى آخر الشهر .. يالله نمشوا بوي .. لو نشدك منوا جى .. أنت ماريتتاش .. (ينسحبون) ..

رمضان : (يودعهم حتى الباب) .. (وحده) ..

زعمه يقدرُوا يجيئوه للطريق .. هذا من يومه معوج .. انسان مريض علته لاصقة فيه .. طماع .. أناق .. يحب نفسه .. في مصلحته يدير كل شيء ما يهأش .. يا ما عدّتيه .. غصبا عني .. لكن تَوّا لا .. اليوم والحمد لله الأولاد كبروا .. نبي نرتاح ما خير ليش من المكان اللي قالولي عليه الأولاد .. على الأقل نفتك من مشاكله اللي قاعد نشوف فيما كل يوم ومش قادر نقول شيء ...

(منصور داخلاً) ...

رمضان : صباح الخير يا سي منصور ..

منصور : نهارك سعيد .. (يخلع شاله ... يجلس) ..

رمضان : (يجمع الكؤوس) ..

منصور : خيرك كنت تتكلم بروحك ...

رمضان : أني؟ ...

منصور : نعم .. وقت اللي وصلت سمعتك وأنت تتكلم ما بيتش نقطع عليك ..

رمضان : الكبير يا منصور .. الأولاد .. الصحة ما عادش هي ..

منصور : (يزوم) شاهيك واتي ..

رمضان : ديمه .. البراد على النار ما دامني قاعد شنوا ما زال عندي ما إندير ..

منصور : شورة كانوا عندك ضيوف ...

رمضان : ما يخلص.. الأولاد جوا بيزوروك ويصبحوا عليك بالخير لكن
حضرتك عطلت..

منصور : أولادك...

رمضان : أيوه.. أحمد ومحمود.. كانوا خاطمين خطوم (نحو الداخل)..

منصور : (يزوم وحده).. غريبه جوني باش يصبحوا عليا بالخير (الهاتف

يرن).. أيوه.. أنى منصور.. صباح الخير.. الحمد لله آهو..

مرة مرة.. لا.. مش موجود.. ما نعرفش.. ساعحنى أنت

أشكون.. حاجى.. وينك يا راجل.. مشتاقين والله.. بالظبط

ماتت الحماره حاشاك وانقطعت الزيارة.. ما عlish يا سيدي ربنا

يعاونك أهلا وسهلا بيبك.. مرحبتين.. قاعد.. حاضر.. اذا

كان جى انقوله.. مع السلامة.. (يقفل الساعة)..

رمضان : (داخلا بالشاهى).. تفضلوا..

منصور : دنيا.. الصحاب ولّوا معارف.. كلّها تجرى وتجرى ما حد

يندرى على حدّ.

رمضان : الحياة تغيرت يا منصور الى ما يخدمش ما ياكلش.. هذا حصانك

وهذه السدرة.. عملت تعيش ما عملتش دنبك على جنبك

بالأخص الى زي حالتى.

منصور : (يرشف الشاهى).. طويسة يعطيك الصحة.. شويية طائبة في

ماها.

رمضان : كل شيء يا منصور وقت يطيب في ماه فيه بنه زائدة أكثر من

عشرين سنة وأنى وهالبراد.. وين الشاهى يا رمضان هات

الشاهى يا رمضان خدمة على دوب حالى عشنا غير من قلة

الموت.

منصور : بديت تزن يا رمضان وحسّك بدينا نسمعوا فيه.

رمضان : إن جيت للحق من زمان نغلى.. لكن دخلا في.. لكن توّ ساعحنى

إنقولك الوقت تغير.. بديت نحس.. ولّيت بنادم.. حقى الى

كان مهضوم بين هذا وهذا علاش بديت نزن وحسي بديت تسمع فيه ..

منصور : صار هكي الدّ وه .. حتى هذا رأي ..

رمضان : (يجمع الكؤوس في صمت نحو الداخل .. يتوقف يتابعه منصور بالنظر) ..
(راجع) .. ما تتكدرش منّي لو فرغت الليّ في صدري ..

منصور : شنوا معنى كلامك يا رمضان ..

رمضان : كلامي واضح .. نفرغ الليّ في صدري .. ما هو كلام الحق وجاع وأنى نعرفك ماكش غريب عليّا ..

منصور : حتى هذا رأي .. تفضل شوف شغلك ...

رمضان : وينه الشغل .. أكثر من هات الشاهي .. جيب الشاهي ما فيش ..

منصور : خلاص .. وأنت طيب الشاهي ...

رمضان : الصراحة يا منصور قلقت .. ما دابيا تخمم في موضوعي ...

منصور : وفاش تبيني إنخمم .. طار الحمام وصفقى ياوزه ...

رمضان : مادام طار الحمام سقدني .. لاش قاعد ..

منصور : طيب الشاهي ...

رمضان : لا يا منصور قعادي ما فيش فائدة لا ليّا ولا ليك .. ما يصح

نضيق عليك ما دام شغل ما عادش فيه .. أحسن شيء نوسع عليك ...

منصور : وانت منوا قالك مضيق عليّا ..

رمضان : ما قاللي حدّ نعرف بروحي .. صفيني في حقي وانذب في حالي ..

منصور : صار بتركنا ..

رمضان : نطارد في معيشتي .. المكان الى قالولي عليه أولادي ما خير ليش منه .

منصور : صار بتقعد قدام السوق تمزق الوريقات ...

رمضان : إنمزق الوريقات .. نواطي البضاعة من السيارات .. إنستفها ..

إنعس نرد بالى من اللّى يخش ويطلع المهم نثبت وجودى وراسى
فوق. . .

منصور : وانت بدل هذا كلّ ما تقعدش معانا نخدموك في المزرعة. .

رمضان : المزرعة؟. . .

منصور : أيوه. . ترفع الخضرة والفواكهة للسوق تبيعها. .

رمضان : ما نقدرش. . المزرعة عمري ما خدمتها ولا نفهمها وبيع الخضرا

في السوق يبي شطارة وجهد وأنى الله يحسن الخاتمة.

منصور : زيد فكر يا رمضان بالكش تغير رأيك. .

رمضان : فكرت وصممت. . ما خير ليش من المكان اللّى قالولي عليه. .

منصور : وتوا شنوا طالب. . .

رمضان : حقوقى وشهادة معاهم. . .

منصور : شهادة؟. . .

رمضان : أيوه. . ورقة تقول فيها اللّى خدمت معاك أكثر من عشرين سنة

والمعاش اللّى كنت تعطيني فيه ولا باس تقول فيا كليمه طيبة. . .

منصور : ولاش الورقة. . شنوا ما يعرفوش اللّى انت خدمت معاي. .

رمضان : يعرفوا. . لكن طلبوها منى. . قالوا جيب شهادة من صاحب

العمل اللّى كنت معاه. .

منصور : حتى هذا رأي. . تّوا يحى إنسيبى وانكلموه يديرلك شهادة. .

رمضان : أعوذ بالله. . فكنى منه. . خلى ولدك فتحى يكتبها وانت توقع

عليها.

منصور : شورك ما زال تكرهه. .

رمضان : نكره فعله. . نكره أعماله ومش ملزوم باش نجه. .

منصور : حتى هذا رأى. . مش يقولوا نسيب ولا ابن عم قريب. .

رمضان : يقولوا. .

منصور : انت نسييت اللّى الأستاذ رشيد نسيبى اللّى يمس الصبع يمس اليد

كلّها.

- رمضان : نسيبك مش نسيبك هذا شيء يخصك . . قتلك فكنى منه فكنى منه . .
- منصور : لكن هذا نسيبي من يوم تزوجت أخته أموري كلها سلمتها في يديه . .
- رمضان : وأنى ما نعرفاش . . لا خدمت عنده ولا تعاملت معاه . .
- منصور : ولو . . ديمه ديمه نسيبي وهو عندي كل شيء ولا ولدى ولا خوي ولا العيلة كلها تجى في مكانه . . هو في كفة والعيلة في كفة . .
- رمضان : تتكلم جديات . . .
- منصور : بالجباسى . .
- رمضان : بالجباسى . .
- منصور : مش يقولوا بنادم عينه ميزانه وبعد العشرة تبان الناس . .
- رمضان : لكن هذا أعماله يستحى منها الشيطان . .
- منصور : ودار شيء يفرح الملائكة . .
- رمضان : أعوذ بالله . . أعوذ بالله . . هذا وقت تشوفه الملائكة تهرب منه مش ممكن تقربه . .
- منصور : خسارتك يا رمضان . . ما زلت على نياتك وما تفهمش . .
- رمضان : وانت طبعا تفهم أكثر منى . .
- منصور : طبعا نفهم أكثر منك . . مش يقولوا كرش في ديل الكلب لين يطلعك من الغريق .
- رمضان : لكن هذا ولا مؤاخذه كلب مكلوب . . صاحبه في حجرة . . يمص دمه ووقت تواق يضرب وما يبالش . .
- منصور : صار ما تصدقش اللي النسيب خير من ابن عم قريب . .
- رمضان : مش كل نسيب إنسيب . . هذا الرجل ما عنديش ثقة فيه . .
- بروال كذاب منافق . . سارق . . ناسبك يا منصور وزوجك أخته لمصلحته واللى وصله إستولى على كل شيء وخطك تحت رجله . .

- منصور : حتى هذا رأي .. بديت تنبع يا رمضان .. حسك طلع الشيء اللي
ما كانش فيك .
- رمضان : آهو كلام وينفخه الريح ...
- منصور : لكن قوللي .. خيرك هالكلام ما قلتاش زمان والا البقرة وقت
إطيح يكثرنا سكاكينها ..
- رمضان : قلته يا منصور .. ويا ما قلت .. لكن ما فيش منوا يسمع ..
- منصور : صار كنت ضدّي من زمان ...
- رمضان : ضدك لا .. ضدّ أعمالك .. ضدّ العوج . : ما كنتش راضي على
الشيء اللي إديروا فيه وما زلت مانيش راضي على العمل الى
قاعدين اديروا فيه ..
- منصور : حتى هذا رأي .. زي شنوا مثلاً ...
- رمضان : إنشد نفسك .. ما ظنش ما فهمتش اللي نعينه .. وريقتي يا
منصور والله يسمعنا على بعضنا الخير .
- منصور : حاضر .. بعدين ...
- رمضان : وأمه .. ما دايا اليوم قبل غدوه نباشر عملي الجديد ..
- منصور : ما تقلقش .. نهاية الشهر نصفوك في حقوقك وتمشي في حالك ..
- رمضان : أمري لله .. أمري لله (ينسحب نحو الداخل) ..
- منصور : (يتابعه بالنظر) .. حتى هذا رأي ..
- رشيد : (داخل يده حقيبة صغيرة) ..

رشيد... منصور...

- رشيد : بالأحضان يا نسيبي العزيز .. بالأحضان يا أعز نسيب .. كل
شيء على ما يرام ..
- منصور : رمضان .. رمضان .. (رمضان مسرعاً) ..
- رمضان : تفضل ..

- منصور : إسمع تفكرت شيء مهم . . (يفتح درج المكتب يسحب ورقة ورزمة نقود) . . نبيك تمشي تخلص الكهرباء . .
- رشيد : (يأخذ الورقة يقرأ) مأتين وأربعين دينار . . كهرباء . .
- منصور : حساب قديم . .
- رشيد : زي عوائدهم . . يخلّوا الحساب يتراكم اللي تجي فيه يصبره . .
- منصور : تفضل يا رمضان . . هاذوا الفلوس وهذا الواصل . .
- رمضان : (يأخذ الفلوس والوصل نحو الشارع) . .
- منصور : (يقف ويتجه الى الباب . . يتأكد من إبتعاده . . راجعا) . .

منصور.. رشيد...

- منصور : ملعون . . آخر عجلة في الكرطون طلع حسّها . .
- رشيد : قلنا لك بعده . . قلنا لك تخلص منه . . لكن . .
- منصور : قاللي كلام مروجني بيه . . ماهوش راضي على الشيء اللي إنديروا فيه . .
- رشيد : أوه . . الرجل فات حدّه . . أزوجه ما تستناش . . منوا يعرف يبيعنا جملة . .
- منصور : زمان حسّه ما يقيماش فوق . . يتسلون يا سويدي تربح . . تحت أمرك وتوتا ما يعجباش اللي إنديروا فيه . . صرق يا كرمة وصار فيك التين . .
- رشيد : راسه سخون يا منصور . . قيم عليك . . لوحة قبل لا يلوحنا . .
- منصور : غذوه تحضرله شغلة وتوريه الطريق . .
- منصور : أوه . . طق في اللحم الحي . .
- منصور : قاللي ما عنديش ثقة فيه . . قتله إتق الله يا راجل . . هذا إنسيبي ما يصحش عيب . . قال شيء . . رشيد متعك واحد منافق وبروال كبير . .

- رشيد : هذا مش كلامه يا منصور.. فيه منوا قاله هذا الكلام.. لكن صبرك عليا وحيدة وحيدة نربوهم كلهم.. نوصلوا هدفنا بعدين يعرفوا رشيد..
- منصور : زعمه نوصلوا يا رشيد.. أنى ما نرتاحش ونتهنى إلا بعد ما يتحقق الحلم..
- رشيد : يتحقق واتشوفهم بعدين يجوك ويركعوا تحت ركبيك (يخبط على الحقيبة) على تَوّا أقبض فليساتك..
- منصور : بشرنى يا رشيد.. لوين وصلت..
- رشيد : كل شيء على ما يرام.. بعنا وقبضنا فليساتنا وهاذوا يا سيدي فليساتك..
- منصور : يا سلام.. (يفتح الحقيبة يأخذ رزمة نقود) يا عيني عليك يا رشيد.. يا عيني عليك يا أعز نسيب..
- رشيد : اللى يركبها يعرف كيف يسيرها يا منصور
- منصور : (بصوت منخفض).. البضاعة رفعوها..
- رشيد : يا عيني.. وصلت لمواقعها سالمة.. البارح للصبح طول الليل واحنا نكركروا فيها..
- منصور : (بصوت منخفض).. كيف تمت البيعة..
- رشيد : تمت زي ما يلزم.. تحت حس مس.. بيع وشراء فى المسكوت لا تعرفهم ولا يعرفوك..
- منصور : زعمه ما فيش.. الصراحة رمضان قَاللى كلام غصنى بيه..
- رشيد : ولا يهملك.. إذا كان صار شيء لا سامح الله أنا المسئول..
- منصور : يا سلام عليك يا رشيد لولاك البضاعة.. (يقبل رزم النقود)..
- فليساتي.. على شوي طرق منى.. يزيدك عز (بصوت منخفض).. قوللى يا عزيزى شنوا هو نصيبك فى العملية..
- رشيد : نصيبى؟ هذا كلام يقوله يا منصور.. إحنا ما قسمناش رزقنا واحد أنى كلنى ليك..

- منصور : معقولا .. كل واحد وحقه .. ما فيش منوا يخدم جهنم وبيات في الصقع ..
- رشيد : عيب يا منصور .. ما يجيش بيناتنا .. هاذوا كلهم فليساتك على اليمين ماني واخذ منهم درهم ..
- منصور : لكن انت سعيت .. تعبت يجي منه ما تاخذش شيء ..
- رشيد : قتلك على اليمين ماني واخذ درهم .. عيب يا راجل تعبك راحة راحة يا أعز نسيب .. (دقات على الباب) عمر داخلا ..
- عمر .. منصور .. رشيد ..
- عمر : السلام عليكم ..
- رشيد : (مرحبا بحرارة) .. حاجي يا مرجبا .. أهلا وسهلاً .. (تبادل تحيات) ..
- منصور : وينك يا راجل ولّيت زِي العيد .. هكّي .. هكّي الصحاب يديروا وينك ما عادش نشوفوك ..
- عمر : حال الواحدني يا منصور .. الأولاد زي ما تعرف لاهيين بدراستهم قعدت بروحي في المزرعة والمزرعة تحتاج منوا يخدمها ويرد باله منها ..
- منصور : صار المزرعة خداتك على ظهر ..
- عمر : ليل ونهار .. اللي تتركه والّا تهمله تفقده والّي تفقده ما يتعوضش وأنت زي ما تعرف ما عندي مصدر رزق غيرها ..
- منصور : نويشط ما شاء الله عليك .. وجيهك نائر وصحتك لا بأس ..
- عمر : الحمد لله في خيار الخير ..
- عمر : بالمناسبة شنو صار في هاداكه الموضوع ..
- عمر : ما صار شي ..
- رشيد : الواه؟
- عمر : الصراحة خفت .. الرجل ما نعرفاش وانت ما ضمنتاش ..

- رشيد : نضمنه كيف يا حاج راني : زيّك ما نعرفاش .. كل شيء على السمع ، ، وقت اللّى سألتني نعتك وين تلقاه .. زي ما سمعت قتلك بعدها ما نذرى على شيء .
- عمر : وأنى مشيت حسب النعته إلقيته في الأول زي اللّى خاف منّي لكن بعد ما فهمته رفعني للمنطقة ..
- رشيد : عظيم .. بعدين ..
- عمر : بعدها يا سيدي مشيت أنى وياه تأكدت بنفسى من كل شيء والقيناه سليم زي ما قال ..
- رشيد : خلاص ما دامك تأكدت أظن ما عادش فيه خوف ..
- عمر : الصراحة ما زلت متردد ..
- رشيد : إن شاء الله ما نباعتش .. عندي صديق قاعد يدور بالريق اليبس ..
- عمر : شنوا تقول زعمه إنباعت ..
- رشيد : ما يقعد شيء يا حاج الطايح مرفوع هات شيء خود صرفه الناس عندها فلوس ما تباليش ..
- عمر : صار رأيك نتوكل على الله ...
- رشيد : ما تراجعش اذا كنت بيها ملزوم .. المليح ما يقعدش .. خسارة لو تفلت منك .. الحاجة خير من حقها يا حاج خود منه تنازل رسمى وادفعله المهم ما تملكش ومحتاج يوافقوك على طول ..
- عمر : يستر الله ... هذا فال وعلى الله الكمال ..
- رشيد : تعجبنى .. هذا فال وعلى الله الكمال .
- منصور : إحنا آسفين رمضان مش موجود قعدنا من غير شاهي ...
- رشيد : هذا كلام يا نسيبي .. أنى نطيه ..
- عمر : ما تعبش نفسك يا أستاذ .. الشاهي مانيش حشائشي فيه ..
- رشيد : تعبكُم راحة يا حاج .. كلّها دقيقتين .. (يسحب نحو الداخل) ..

منصور... عمر...

- عمر : (مشيراً إلى رشيد) .. كيف ماشى معاك ..
- منصور : يا سلام .. نعم النسيب .. لو كان مش منه ومن أفكاره راني ضعت .. صدقني ضعت .. كنت غارق ونجاني من الغريق ..
- عمر : هو في الحقيقة جابني موضوع .. إنقولوا فال وعلى الله الكمال ..
- منصور : خير إن شاء الله ...
- عمر : في المدة اللي فاتت زارني رشيد في المزرعة وكلام يجيب كلام جنبنا موضوع الأولاد والزواج شوي دلني عليك .. قال لي دونك منصور عنده بنية تحظ الزواج .. قلت بيني وبين نفسي .. هذا فال وعلى الله الكمال ..
- منصور : يا سيدي أهلاً وسهلاً بك .. عندي بنت هكي كبرها ..
- عمر : الناس الأوله تقول عليك بنت الوصول لا الزمان يطول ..
- منصور : وقالوا الوجه الى تعرفه خير من اللي ما تعرفاش ..
- عمر : واحنا الحمد لله معرفتنا ما هيش معرفة اليوم .. عُمر من الأعمار ..
- منصور : إنت خوي يا حاج عمر أكثر من صديق .. خدمنا جميع وياما ..
- عمر : يااما ..
- عمر : نخشوا في التفاصيل ..
- منصور : إنخشوا .. قبل كل شيء ما عنديش معاك بنت .. اللي تبته موافق عليه ..
- عمر : فال وعلى الله الكمال .. هو الولد عندي قاعد يدرس في الخارج ما زال عامين ويتخرج .. العام هذا والعام الجاي ...
- منصور : أيوه .. صار دوته طويلة ..
- عمر : لا .. الولد مكرش في الزواج .. ما دايا العطلة الجايه نزوجه ويرفعها معاه ...
- منصور : كأنه هكي ماشى .. ما عنديش مانع .. كلام بيني وبينك مضايق

منها واصله عندى لهنى .. أنت ماكش برانى ما دايبا تريحنى
وترتاح ..

عمر : الواه؟ هي متعباتك؟ .. قصدي تاغب في جرتها ..

منصور : تاغب تاغب لا .. مانيش مرتاح .. المشكلة البنت يتيمة بعد ما
توفت أمها الراحة إنقامت من الحوش .. ثلاثة مرات تزوجت
وطلقت على خاطرها آخر زوجة أخت الأستاذ رشيد وإن شاء
الله .. إن شاء الله هذا حد السو ..

عمر : سمعت بعض الشيء بس ما كنتش فاهم التفاصيل ...

منصور : ثلاثة مرات تزوجت وطلقت .. الواه؟ لأن المرأة اللي تحي تتسلط
على وانت زي ما تعرف زوجة الأب ديمه مكروها لو تكون
مرابطة ...

عمر : لا يا منصور. ما هوش صحيح .. قول حاش المظلومين .. اللي
تزوجتها ربّت أولاد وبنت أم الصغار بغاها الله وخلّتهم الكبير
فيهم عمره عشرة سنين ...

منصور : يصير .. لكن أنى هذا اللي صار لى ما ارتحتش وهذا علاش قتلك
ما دايبا ترتحنى وترتاح ..

عمر : خلاص .. أنى قصدتك .. هذا فال وعلى الله الكمال ...

منصور : من جيتهى موافق على اللي تبیه ...

رشيد : (داخلا بالشاهى ...) ..

رشيد .. منصور ... عمر ...

رشيد : الشاهى والكلام والباهى .. تفضلوا ...

الجميع : (يرشفون الشاهى .. فترة صمت) ..

رشيد : بشرونى ...

عمر : فال وعلى الله الكمال ...

- رشيد : ولوين وصلتوا...
 عمر : في التفاصيل...
 رشيد : خشوها.. خير البر عاجله...
 منصور : اليوم طبعاً لا.. ما هو لازم نلود في طرافي...
 عمر : (يقف)...
 رشيد : المهم اتفقوا..
 منصور : متفقين...
 رشيد : مبروك يا حاج فال وعلى الله الكمال..
 منصور : (يودع عمر ومعه رشيد حتى الباب)..

رشيد... منصور...

- رشيد : اخنيك يا نسيبي.. أكبر عقبة في حياتك نقزتها..
 منصور : يا سلام عليك يا رشيد.. ما نعرفش كيف نشكرك..
 رشيد : تشكرني؟ هذا كلام يقولوه.. هذا واجب.. أنى خوك.. دراعك اليمين..
 منصور : ما زلت خائف يا رشيد.. البنت كاسحة.. زعمه ترضى..
 رشيد : كيف لا.. أنت بوها والكلمة الأخيرة ليك..
 منصور : هو صحيح أنى بوها.. لكن ما زلت خائف.. ثلاثة مرات خطبوني فيها ترفض تقول لا.. مانيش متسعةجلة وخوذ من هالكلام..
 رشيد : المرة هذه نخلوها ما تقولش لا..
 منصور : انت على نيائك ماك ما تعرفهاش..
 رشيد : بالعكس.. نعرف اللي ما تعرفهاش.. أسرارها عندي.. البنت مش منها فيه منوا قاللها قولى لا..
 منصور : تقصد الطيب خوي...

رشيد : نقصد خالد . . خالد الشروط اللي شرطهم ما زالوا قائمين . .
طبعا ماهوش بروحه الطيب هو اللي يحرك فيه . . ما نرقدوش يا
منصور . . ما نخلوش السيل يلعب بينا . . هذا الباب لازم نسكـره
في وجوهم

منصور : يا ريت نقدر . . ثلاثة مرات ترفض . . آخر مرة قالت أنى حرة
هاداكة زمان تتحكم في مصيرى . . زواجى ما يقدر حد يدخل
فيه . . .

رشيد : هو صحيح مصير ما حد يقدر يدخل فيه وما يتمش الا برضاها
واحنا هذا اللي بنعملوه . . نخلوها توافق برضاها وانزوجوها لابن
الحاج عمر . . .

منصور : كيف؟ . .

رشيد : الشيخ سحنون . . .

منصور : الشيخ سحنون؟ . . .

رشيد : ملك الجنون . . هذا الرجل جمد الميه ويدوب الحديد بيديه تصور
يا منصور حط صبعه الصغيرة على دحيه طابت في الحال بعينى
ريته مش قولت قال . .

منصور : (يرتعد) تحصنت بالله . . ذكرنا الزبده واللبن . . .

رشيد : خيرك نخضيت . .

منصور : (مرتبكا) . . هو هو كل شيء نتحمله إلا حكاية الجنون والناس اللي
تخدم في الزمياطي . الصراحة نخاف منهم لا نقرهم ولا نخليهم
يخشولى حوشى حتى لو بيطلعنا الكنز . .

منصور : الكنز؟ . . .

رشيد : أيوه الكنز المدفون . .

منصور : (مع تردد) . . هو هو الشيخ سحنون يقدر يطلع الكنز؟

رشيد : يا سلام . . إيه رأيك الشيخ سحنون يعرف الكنز وين مدفون . .

منصور : معقولا . . شنوا نزل عليه الوحي . . .

- رشيد : قتلك يجمد الماء . . الماء . . . هذا الرجل فظيع . .
منصور : وكيف عرف اللي كنز مدفون . . .
رشيد : منى أنى . . إتصلت بيه واحكىتله الحكاية . . إرصد النجوم واتصل
بيهم في الغيوم وقالوله على كل شيء . . .
منصور : سبحان الله
رشيد : وبحمده . . .
منصور : رشيد ما يرقدش . . يفكر . . من يوم ناسبتك وأعطيتك أختي وأنى
نختم على مستقبلكم . . أختي نبها ترتاح . . تتهى . . تعيش
معاك في نعيم . .
رمضان : (داخلا) . .

رمضان .. رشيد .. منصور ...

- رمضان : تفضل . . هذا الواصل وهاذوا باقى الفلوس . . .
منصور : (يأخذ باقى النقود والواصل) . .
رشيد : إسمع يا رمضان بالسرعة ناديلنا على خالد . . .
رمضان : وخالد وين نلقاه . .
رشيد : دوره . . إذا كان ما لقيتاش خليله وصايا في الحوش . .
رمضان : (متمعضاً) . . حاضر (ينسحب) . .
رشيد : (يتبعه ليتأكد من إبتعاده) . . حضرله أوراقه وفكنا منه وجوده يعكر
علينا الجو . .
منصور : وخالد شنو إنديروا بيه . . علاش مناديه . .
رشيد : وحده وحده يا منصور . . فيه مفاجأة حلوة خلّيتها سر لين إتم .
منصور : ما فهمتش . . .
رشيد : في المدة اللي فاتت عملت حريكة ما قتلکش عليها . . حريكة
توصلنا نصف الطريق والنصف الثاني أسهل منه ما فيش . .

- منصور : زيد فهمنى يا نسيبي العزيز .. لولاك راهي راحت ليل ..
- رشيد : شوف يا سيدى .. تتفكر الشقة الكبيرة اللي في شارع الغرب اللي كنت مأجرها للأجنى ..
- منصور : نتفكرها .. كيف ما نتفكرهاش .. (بصوت مرتفع) .. كيف؟ ..
- رشيد : هذه يا سيدى اللي ساكن فيها الآن قاعد بينى في دبلكس .. محتاج بفلوس إتصل بيا وأحكالى موضوعه .. قلت هذه فرصه .. نأخذوها منه بعدها نرحلوا الطيب وصغاره وهكى حوشنا يصفى الجو فيه ..
- منصور : ما فهمتش بينى ومحتاج بفلوس ..
- رشيد : بسيطة .. نعطوه مبلغ بسيط مقابل الأثاث الموجود في الشقة وشقتنا نعملوا فيها اللي نبوه ..
- منصور : يعنى باش يسبب الشقة نعطوه فلوس؟ ..
- رشيد : بالضبط ..
- منصور : معقولا يا رشيد شقتى .. ملكى ..
- رشيد : (يتنحى) ..
- منصور : سابقا ملكى ندفع فيها فلوس ..
- رشيد : ما تسكرش رأسك يا منصور وانسى الشقة كانت ليك خود نصيحتي ونفذ اللي نقولك عليه ..
- خالد : (داخلا ...) :

منصور .. خالد .. رشيد ..

- خالد : السلام عليكم ...
- رشيد : يا مرحبا .. أهلا وسهلا .. (مرحبا بحرارة) .. أهلا تفضل ..
- منصور : غريبة .. شنوا الريح اللي إرماك ..
- خالد : توحشتك يا عمى ليا مدة على جلسة معاك .. جاي بنوسع خاطري معاك ..

- رشيد : أهلا وسهلا بـيك وحتى عمك مشتاق لـيك والدليل بعـتنا رمضان
باش يناديـك . .
- منصور : (يتجاهل) أنى؟ أنى ناديت عليه؟ أنى . . (يستدرك) ها . . ها
صح . . بعـتنا رمضان . . هو وينه رمضان يا خالد . .
- خالد : وين ندري عليه . . ليا مدة ماريتاش . . .
- رشيد : بشرنى يا خالد . . مشيت وين قتلك . . .
- خالد : مشيت وعجبـنى الشغل . . شقة ممتازة . . عظيمة . . حلوة كبيرة . .
أثاث فاخر . . يا ما أنت كريم يا رب . . على الله يكون لنا فيها
نصيب . .
- رشيد : إطمئن يا خالد . . عمك يعزك معاك في اللّ تبغيه . . .
- منصور : على شنوا تدووا . . رانى ما فهمت شيء . . .
- رشيد : منصور . . منصور . . خيرك تنسى بسرعة . . مش كنا نتكلموا في
هالموضوع . .
- منصور : آمتة . . ما نتفكرش . .
- رشيد : منصور . . خيرك سارح . . مش تكلمنا ووافقت وقلت يا ريت
المهم . . يطلعوا من الحوش . .
- منصور : أنى قلت؟ . . أنى؟ . . (يفكر) ها ها صح تفكرت . . أيوه تكلمنا
على الشقة اللّ في الشارع الغربى . . .
- رشيد : بالظبط . . خالد امشى شافها وعجبـاته وجاك باش يتفق معاك . .
- منصور : يتفق معاي؟ . . فاش بيتفق معاي؟ . . .
- رشيد : على الشقة . . مش قتلك الأجنبي اللّ كان فيها سافر . .
- منصور : أيوه سافر الملعون . . سافر وما دفعليش الايجار . . عامين ما دفعلى
شيء . .
- رشيد : هو صحيح لـيك انت ما دفع شيء . . لكن هو دفع وتنازل لغيره
اللّ هو موجود الآن في الشقة وقاعد بينى وملزوم بفلوس . .
فهمت والّا إنزیدوا إنفهموك . . .

- منصور : الخلاصة يا رشيد.. شنوا هو المطلوب... .
- رشيد : الخلاصة نبوا الشقة ترتاح فيها العيلة وتنتقل من الحوش.. .
- منصور : وينتقلوا منوا شادهم.. . شارع الغربى يعرفوه.. . يمشوا يتفاهموا مع اللى قاعد فيها.. . أما أنى مالياش دخل.. .
- رشيد : منصور.. منصور.. مش إتفقنا نتفاوض مع صاحب الشقة وتعوضه بمبلغ بسيط مقابل الأثاث الموجود.. . بعدها العيلة ترحل ويسيبولك الحوش... .
- منصور : أنى قلت؟... أنى؟ (يفكر).. ها ها.. تفكرت.. صح قلت هو صاحب الشقة وينه خير ما جاش معاك.. .
- خالد : وين نذري عليه.. أنى لا كلمته ولا تفاوضت معاه.. رشيد أعطاني ورقة مشيت بيها.. وقت وصلت دقيت على الباب فتحلى تفضل بيا قلبت الأثاث تفرجت من غير كلام ولا كلمة قلتها بعدها طلعت وجيتكم نجرى فرحان. زي ما قاللى الأستاذ رشيد نفدت.. .
- منصور : بوك عنده علم.. .
- خالد : نعم.. رفعتة معاي ما هو لازم يكون كل شيء برضاه.. .
- منصور : عجباته الشقة والأثاث.. .
- خالد : يا سلام.. روج فرحان فوق ما تتصور وهو اللى قاللى إمشى فيسع لعمك واتفق معاه.. .
- منصور : وآمته ترحلوا.. .
- خالد : فوراً.. يجيبلنا المفتاح الأستاذ رشيد نرحلوا على طول.. .
- منصور : وبعد ما ترحلوا بتملكوها.. .
- خالد : طبعاً يا عمى وقت يضلّى عندنا التنازل نعملوا إجراءات التملك.. .
- منصور : قاعد تسمع يا رشيد.. بيعملوا إجراءات التملك.. .

رشيد : منصور.. منصور.. ما تتركش الطير وتقعّد تجرى تحته هذه
فرصة ما تتعوضش...

منصور : باهى.. توّ انشوفوا.. حتى هذا رأى...

خالد : اللّ يريحك يا عمى.. الشقة عجبتنا الخبرة.. مستعدين نتركوها
آمته ما يجيب المفتاح الأستاذ رشيد..

رشيد : خلاص يا خالد إعتبر الموضوع منتهى... هاليومين نجيك
وانسلملك التنازل والمفتاح...

خالد : شكرا.. (يقف).. السلام عليكم...

رشيد : وعليك السلام (يودعه حتى الباب) في الأمان يا ولدى...

رشيد.. منصور...

رشيد : الحمد لله.. فرجت يا عزيزي.. أكبر عقبة في حياتك نقرتها يا
سلام ما تقدرش تتصور قداش أنى فرحان.. هذا أكبر
إنتصار...

منصور : ما تتسرّعش.. خليه يستالد وانسموه..

رشيد : شنوا تقصد..

منصور : إيه يا رشيد.. إيه ما أطولها وما أرق حبالها..

رشيد : ما فهمتش..

منصور : شنوا أظن خوي الطيب هوّين..

رشيد : لا ما هوش هوّين.. نعرفه.. لكن اللّ طلبوه وشرطوه حضرنا ما
أظنتش ما زال عنده ما يقول...

منصور : شورك انسيت بقية الشروط...

رشيد : لا.. ما انسيتهمش.. فكرت فيهم.. (رمضان داخلا)..

رمضان : (داخلا يهلت يرمى على الكرسي)

رشيد.. رمضان.. منصور...

- رشيد : (مسرعاً) .. لا بأس يا رمضان .. خيرك ..
- رمضان : وين بنلقاه الخير .. تهزوا فياً من مكان لمكان وفي جرائركم نحصل الشتائم والسب ...
- رشيد : صار شيء يا رمضان ..
- رمضان : صار .. عمري ما ريت الطيب غاضب بها الشكل .. لأول مرة يسمعى كلام (مقلداً الطيب) .. برّا إمشى من قدام وجهى يا سمسار .. قاللى بلغ هالشيطان الرجيم .. بلغ رشيد هالملعون .. لو يعفس عتبة الحوش كلمة يعفس عاودها مرتين .. لو يعفس عتبة الحوش بلاعيمه نجدهم ..
- منصور : مش قتلك ..
- رمضان : سب وشتيمة أشكال وألوان ..
- منصور : مش قتلك ...
- رمضان : قاللى بلغهم .. الملاغين الزوز .. ما يعبوش .. حوش بوي ما نتركاش لو تطبق السماء على الأرض ..
- منصور : مش قتلك ..
- رمضان : وكلام وكلام .. بعدها دفرني وجيت ملوح على الأرض ..
- رشيد : غريبة .. وقت اللى صارت هالدّوه .. خالد كان موجود ..
- رمضان : موجود .. وقت اللى وصلت القيتهم كيف جوا ما نعرفش وين كانوا .. قلت لخالد الأستاذ رشيد بعنى ليك وقاعد يستنى فيك قاللى حاضر تركنا وامشى بعدما إمشى خالد كرش فيا الطيب نشرب الشاهي معاه .. قعدت .. هدرزه عادية لعب وضحك ووقت اللى بنتركه نط فيا الرجل إنقلب وما خلى ما قال ..
- رشيد : ما عlish يا رمضان .. ما تواخدش يصير أعصابه متوترة ..
- رمضان : وريقتي يا منصور .. وريقتي .. إعتقنى لوجه الله ..

- منصور : تَوّا هذا وقته يا رمضان .. إحنا وين وانت وين ..
 رمضان : الصراحة مشاكلكم كثرت وأنى راجل على دوب حالى شنوا درت
 نقعد عقاب عمرى يسمعوا فيّا الكلام ..
 منصور : وأنى سمعتك كلام يا رمضان؟ ...
 رمضان : أنت لا .. لكن اللّى صارلى اليوم عمره ما صار ..
 منصور : خوي ماك تعرفه .. مش كنت ديمه إدافع عليه وجاي معاه ..
 رمضان : خوك ما نلومش عليه .. مش منه .. صهد غيره هو اللّى حارق
 جواجيه (ومشيراً إلى رشيد) .. وريقتى فليساقى واللّى تلقوه هنيا
 قصوله رجلية .
 منصور : مش قلنالك آخر الشهر نعملولك حسابك وانسقدوك .. تفضل
 رمضان : حاضر .. أمرى لله .. (ينسحب نحو الداخل) ..

رشيد .. منصور...

- رشيد : شيء يحير .. خالد يكذب عليّا ..
 منصور : خالد ما كدبش عليك يصير وقت امشوا مع بعضهم الطيب عجبه
 الحال وما قال شيء لكن بعدين غير رأيه ..
 رشيد : ويغير رأيه الواه؟ ..
 منصور : ما ينساش عوائده .. زي الحربة يتلون ما فيش منين تشدّه زي
 البوزلفيط ..
 رشيد : غريبه .. شنوا ما زال يّبى ..
 منصور : طامع في الكتز .. ما هوش مفلت فيه ..
 رشيد : يفتح الله .. الحوش لازم يطلع منه ..
 منصور : وكيف يطلع منه؟ ما سمعتش شنوا قال لرمضان ..
 رشيد : اللّى قاله ما يهمنيش .. لا بد من حل .. أختى مش ممكن نخليها
 على هالحال لا بد من حل .. أما باش نقعد هكّى لا .. يمنعنى

نزور أختي بمنعني نخش الحوش؟ شنوا يظن؟ أنى نسيبك يا منصور.. شقيق زوجتك.. كيف ترضى كيف تسكت لها المخلوق؟ أنى شيطان أنى سمسار؟.. أنى نسيبك والآ.. لا.. (يتصنع الغضب)..

منصور : الهدوء يا رشيد.. هذا هبل والعيب على زائد العقل..
رشيد : لا يا منصور هذا زودها.. ماهوش هبل.. هذا قليل الأدب..
متهور الصراحة.. كله منك يا منصور.. ساكتله إخذى عليك الغلب لكن عليا أنى لا.. أنى رشيد.. أنى إنسيبك والآ.. لا.. منصور : طبعاً إنسيبي.. أنت أعز انسان عندي في الوجود..
رشيد : خلاص.. تلحاح.. تحرك.. ما تسكت.. هو لو يعرف يقدر اللي عملته لصالحه.. يقدر اللي قاعد نعمل فيه لاسعاده.. هذا جزاي يا منصور بمنعني إنزور أختي.. أختي الوحيدة يا منصور.. (يتصنع البكاء)..

منصور : لا.. لا يمكن نرضاله.. ما يقدرش يمنعك.. أنى صاحب النصف في الحوش أنت تحش غضباً عنه..
رشيد : لكن آهو تحداك.. بلاعيمي بيحبدهم.. يبيك تعادينني يا منصور..

منصور : مش ممكن يحط صبعه عليك.. أنت على تواء ما تقول حاجة..
رشيد : هذا مش حل.. لا بد من حل.. أما باش تقعد مكتف لا.. أنى لازم نجيب (بصوت منخفض) الشيخ سحنون.. أيوه.. الشيخ سحنون يسلط جنونه عليهم يجلوا من الحوش..

منصور : خلاص.. جيبه واللي بيصير يصير..
رشيد : أيوه إنجييه بس فيه شيء إنخافوا عليه..
منصور : اللي هو..

رشيد : الكتز يا منصور.. ما نبوا حد يشاركنا فيه الطيب لازم يطلع من الحوش قبل لا أنجيوا الشيخ سحنون..

- منصور : وكيف انطلعوه؟ .. آهو مش راضى .. .
- رشيد : يلزم نكرش في الموضوع ..
- منصور : نكرش كيف؟ ..
- رشيد : تهون .. تدفع .. انت يا منصور تببها حمرة جرايا ما تاكلش شعير
مرة تقوللى اللى تببها فى فيه ومرة توخر تقول بيناتكم مالياش
دخل ..
- منصور : (ضاحكا) .. حتى أنت يا رشيد ..
- رشيد : شنوا حتى أنى .. كلامى مضبوط والا لا .. مش هو هذا اللى صار
(ضوضاء وراء الكواليس) ..
- الطبيب .. خالد .. فتحي .. منصور .. رشيد ..
- الطبيب : (داخلا) .. زود يا فتحي .. خش يا خالد .. مجلس التخطيط
مجمع ..
- رشيد : (مرحبا بحرارة فاتحا ذراعيه) .. أهلا بيهم .. المحل نور يا منصور ..
تفضلوا ..
- منصور : (في حيرة يلتقى نظرة عليهم جميعا في صمت) ..
- الطبيب : خريك يا منصور تحيرت .. حيراتك جيّتنا .. خضك وجودنا ..
- منصور : هو في الحقيقة الناس وقت تخش تطلق السلام ..
- الطبيب : صح .. تطلق ويلزم تطلق السلام .. لكن .. على منوا تببنا نطلق
السلام .. السلام يطلقوه على الناس اللى تحب السلام يطلقوا
السلام على الناس تحب فعل الخير مش على الناس اللى ناصبة على
الغير ..
- منصور : طيب .. سلّم خوي إحفظ لسانك واعرف شنوا تقول ..
- الطبيب : وانى قلت حاجة يا خوى ..
- رشيد : أنت ما قلت شيء بس خوك ناوي الخير ..

- الطيب : أنت أسكت .. ما يخصكش .. بيني وبين خوي ما تدخلش ..
- منصور : يحى منه يا طيب ما تدخلش .. أنى من العيلة .. رانى إنسيب ..
- الطيب : إنت لا شيء لآك من العيلة ولا نعرفوا بيك ..
- رشيد : لا .. لا .. ما تغلطش .. رانى إنسيب وأختى قاعدة فى الحوش ..
- الطيب : قتلك إسكت يا بلعوط يا خراب البيوت ..
- رشيد : أنى بلعوط .. الله يسامحك ..
- الطيب : بتسكت والآ والله بلاعيمك نجدهم ونندرك رِدْبالك تعفس عتبة الحوش ..
- رشيد : منصور .. أرجوك توقف خوك عند حده .. هذا مش أصول ..
- منصور : تقوليش شنوا جاي تبى منى ..
- الطيب : نبى نتفاهم معاك ..
- منصور : فاش تبينا نتفاهموا ..
- الطيب : فى حل
- منصور : والحل وينه ...
- الطيب : إلقيناه وجيناك بيه .. هذا خالد ولدى وهذا فتحى ولدك أظن ما زلت تعترف بيهم ..
- منصور : الخلاصة يا طيب ..
- الطيب : الخلاصة .. الأولاد تخرجوا من مدة ويعملوا من مدة .. كل واحد منهم عنده شهادة هكى كبرها .. كل واحد منهم عنده وظيفة .. عنده دخله .. متحمل مسؤولياته .. جوك اليوم طالبين نهاية لمهازلك .. جوك اليوم طالبين يبعدوا الأندال اللى لائدين بيك ..
- منصور : شنوا قاعد تقول يا طيب ..
- فتحى : قال الصبح يا بوي .. حكاية اللى عرفك صغير ما تكبرش فى عينه حكاية قديمة ما عاdash ليها مكان .. إحترامك وتقديرك واجب

وفرض ما إنقيمش راسي عليهم لكن يا بوي يكون فيه إحترام
متبادل .. الكبير يقدره والصغير يقدره إفتح صدرك وخلينا
نتفاهموا معاك ..

منصور : (في تهكم) الله الله صغارنا وبيعلمونا ..

فتحي : بوى يلزم نصارحوا بعضنا ..

منصور : نصارحوا بعضنا؟ ..

فتحي : نعم الصراحة يا بوى هي اللي تخط كل واحد منا في مكانه

الصحيح .. نترجاك تسمع مني اللي بنقوله .. الصراحة ماناش

راضين على السلوك الى أنت ماشي بيه ...

منصور : كيف .. كيف .. ماكش راضى .. من آمتة الابن يقيم راسه على

بوه ..

فتحي : بوي .. ماتقلبش الكلام .. ما فيش ابن يقيم راسه على بوه اللي

مش راضيين عليه الممارسات الخاطئة اللي قاعد تقوم بيها .. يلزم

تهتم بمزرتك غير هذا لا الماضي انساه .. إحميه من دماغك

ونظف الأوساخ اللي حواليك ..

منصور : (في تهكم) الله .. الله .. ما زال الودن تسمع ..

خالد : عمى .. يلزم تقنع بالكلام اللي قاله فتحي .. إحنا نعرفوا شنوا

قاعد يصير في هالمكان .. نصيحتنا ترك عليك .. إهتم بمزرتك

واحمد ربى على الخير اللي انت فيه ...

منصور : (لا يجيب .. يلتقى نظرات في صمت) ..

الطيب : شنوا رأيك يا منصور ..

منصور : نبوا حل يا طيب .. هذا الكلام نخلوه على غير طريق ..

الطيب : حل شنوا اللي تببه ..

منصور : اللي نبه تعرفه وياما تكلمنا فيه لكن دماغك مسكر ما تبش

تفهم ..

الطيب : وسّع يا خوى .. مزرتك كبيرة وعندك فيها حوش .. أما وخيك

يلعب واقف راقد ريح أكثر من نصف الخبرة ما عنديش . آه يا منصور لو تتفكر عمارتين كانوا عندك . . عشرين شقة تقبض إيجارهم ترجيتك شويه يا منصور تعطيني شقة إندك فيها راسي أنى والأولاد ما إرضيتش . . ماهانش عليك . . وماكفاش هذا قاعد لي في خربة الحوش زي مسمار جحي طامع في الكنز . . الكنز المدفون . . صدقني يا منصور هذا وَهْم وَهْم ما يوصلك لشيء . . (فترة صمت) . . جاوب يا منصور . . .

خالد : ما فيش فائدة يا بوى . . عمرنا ما نوصلوا لنتيجة . . .
الطيب : اللّى يمل يعطى البل . . أما أنى ما عنديش وين نمشي . . حوش بوي ما يقدر حد يطلعنى منّه وغير هذا ما فيش . . .

منصور : (متوسلا) . . تقوليش خيرك هكى . .

الطيب : هكى كيف؟ . .

منصور : ما تبيش نفهم . . .

الطيب : نفهم كيف . . تقدر تقوللى علاش قاعدلى في خربة الحوش نصف خربة يا راجل ماكش تاركها . . قاعد تعمل في المستحيل باش إطلعنى منها أنت وسمسارك هالبهلوان الكبير . .

خالد : طامع في الكنز يا بوي

رشيد : كنز شنوا يا راجل . . .

الطيب : الكنز المدفون يا بروال . . الكنز المدفون اللّى حلم بيه منصور الكنز المدفون اللّى ناوى يعوّض بيه . . .

منصور : طيب . . ضُمّ فمك من غير تجريح . . .

الطيب : رزق الماء ماشى للماء . . قلنالك من زمان قيم عليك واخطاك لكن أنت زدت فرعت . . طغيت . . تُغرف . . الى يواتيك تنزل عليه لا خليت أخضر ولا يابس لكن . . هاه يا منصور . . .

منصور : نبوا الحل . . الحل . . .

الطيب : الحل موجود ما فيش أبسط منّه . . توب باب التوبة مفتوح أغسل

مخك ونظف ضميرك إبعد على الشياطين . . . (مشيراً إلى رشيد . .
فترة صمت) . .

منصور : (تبادل نظرات وصمت ولا يجيب)
الطيب : جابوب يا منصور . . خورك سككت . . المال راك عبدته أكثر من
اللزوم . . رتخنا ورّيح نفسك . . جابوب يا منصور . .

منصور : خرف . . .
الطيب : صار إنخرف . . زكار يضرب قدام جامع . . لكن هه يا منصور
خطها إهني . .

فتحي : بوي . . فيه شيء لازم يكون واضح قدامك . . الزمن تغير واحنا
نعيش في عصر جديد . . أمس غير اليوم . . وغدوه غير اليوم
فتحي ولدك ماهوش فتحي زمان . . بوي هكي ماعادش نواصل
معاك . . بنتزوج وانكون أسره وبيت . .

منصور : تتزوج . . .
فتحي : طبعاً . . نتزوج . . نتزوج ومش طالب منك شيء إلا رضاك كل
شيء جاهز فكرت واسعيت من أجله . .

منصور : الله الله قاعد تسمع يا رشيد . .
فتحي : رشيد ما يهاش . . الموضوع بيني وبينك . . وهو عليه بعيد . .
منصور : حتى هذا رأى . .

خالد : هذا قرار يا عمي . . اللي شرطناه قاعد ساري المفعول متمسكين
بيه وفي القريب العاجل بنفدوه . .

منصور : حتى هذا رأى . . ما زال الودن تسمع . . .
المجهول : (داخلا بصوت مرتفع) . . أرجوكم ما يتحرك حد الموضوع خطير
ولازم تكونوا حاضرين . . .

المجهول.. رشيد.. منصور.. الطيب.. فتحي.. خالد...

- منصور : (في خوف) الموضوع خطير.. أنت أشكون..
- المجهول : أنى المتليع...
- الطيب : حول.. شنوا حتى أنت لعبوا بيك..
- المجهول : أرجوك.. ما تزيدنيش على ما بيا يا..
- الطيب : الطيب.. شقيق منصور.. وهذا ولدى خالد.. وهذا فتحي ولد منصور وهذا..
- رشيد : (مقاطعا).. فهمنا شنوا فيه يا أخ..
- المجهول : البضاعة ضمّوها.. اللّى هناك رفعوه وجيتكم نجرى..
- منصور : أنت أشكون..
- المجهول : أنى خميس.. خميس شقيق الحاج عمر صاحبك..
- منصور : خميس؟ شقيق الحاج عمر؟.. (يتأمل فيه).. غريبة أنى عمرى ما ريتك معاه خوك الحاج عمر نعرفه.. لكن أنت...
- الطيب : بالكش خوه من حليب الحكه..
- المجهول : أنى شقيق الحاج عمر من بوه وبس..
- منصور : والحاج عمر وينه؟...
- المجهول : ما نعرفش.. أنى جاي نأخذ المبلغ اللّى خداه منى رشيد..
- منصور : المبلغ؟..
- المجهول : أيوه المبلغ والّا عليا وعلى أعدائي..
- الطيب : وَيَّ.. الله لا تكشفنا ولا تبلينا الا بحب الله (ينضم الى الأولاد)..
- المجهول : شنوا قلتوا.. ما تعطلونيش.. دقيقة وحده تمشوا كيل زيت رشيد البيعة تمت على يديك.. البضاعة انت سلمتها لي.. وفلوسي عندك..
- رشيد : هُوَ هُوَ..
- المجهول : هُوَ شنوا.. ما تقدرش تنكر.. انت بعلى وانت سلمتلى البضاعة

- وأنت اللّى قبضت الفلوس...
رشيد : تفكر كيف.. أنى ما ليش دعوه.. أنى رجل بسيط توسطت بالخير
وفي يدى.. ما قبضت شي...
المجهول : المهم ما تعطلونيش.. يا إما الفلوس وإما نبلغ فيكم وين ما
ترصّى بر..
منصور : تبلغ فينا؟..
المجهول : طبعاً نبلغ فيكم.. أنى اللّى يهمنى فلوسى اللّى دفعتمهم إذا كان
إستلمتهم لاريتكم ولا ريتوني وإذا كان رفضتوا تحملوا اللّى بصير
بعدين..
الطبيب : وّى.. يا شينك عصابة يعرفوه ممنوع يديروا فيه..
خالد : ما نخصناش فيهم يا بوي.. إحنا أبرياء منهم..
الطبيب : أبرياء صحيح.. لكن هذا الشيء يمسننا يشوّ سمعة العائلة..
المجهول : يالله يا رشيد.. ما عنديش وقت نضيعه (يمسكه بعنف).. الفلوس
وين درتهم.. فلوسى اللّى قبضتمهم منى..
رشيد : الفلوس.. الفلوس..
المجهول : أيوه الفلوس.. عشرين ألف دينار.. دينار فوق دينار..
وينهم..
رشيد : قاعدين بجمادهم في هاديكه الشنطة.. سلمتهم لصاحبهم زما
قبضتهم سلّمتمهم.. عليا اليمين درهم واحد ما خديت منهم..
زي ما إستلمتهم سلّمتمهم..
منصور : رشيد.. كيف هكّى.. معقولا نرجعه الفلوس..
رشيد : والله أنت حر.. ترجعه ما ترجعلاش.. هو وضحك كل
شيء..
منصور : زعمه ما يطق فينا شيء؟..
المجهول : إذا كان فلوسى رجعولى ما يطق فيكم شيء.. هُمّ حققوا معاي

- وظلقوني.. قاعدني يدوروا في خوي الحاج عمر باش ينشدوه
البضاعة جت إمين..
- منصور : إن شاء الله أنت ما قلتهم شيء..
- المجهول : قلتهم..
- منصور : قلتهم؟..
- المجهول : قلتهم البضاعة لخوي الحاج عمر.. قالولي إمين جت قلتهم ما
نعرفش.. وين خوك؟ مسافر..
- منصور : مسافر؟.. أمته سافر..
- المجهول : هو ما سافرش قاعد في المزرعة والمزرعة كبيرة وين بيلقوه..
- منصور : صار بعدتهم...
- المجهول : أيوه.. بعدتهم.. قلتهم أني راجل فلاح ما نعرف شيء..
- الطيب : (ضاحكا).. قال فلاح ما يعرف شيء..
- منصور : اسكت يا طيب.. ريضنا الله يهديك..
- الطيب : إعتقدها بيدك وحلها بسنوك.. نصحناك يا منصور أخطاك..
- قيم عليك لكن أنت لا بسك هالشيطان..
- المجهول : قيلنا من قطاك.. راني فوق بركان قريب نتفجر (يهجم على رشيد
ماسكاً بعنقه) رشيد.. فلوسى.. قنع صاحبك قبل لا نظربق
عليك..
- رشيد : (يتصنع الخوف) حاضر.. منصور.. منصور الموضوع خطير سكر
علينا هالباب (يأخذ الحقيبة)..
- منصور : (يتعرض له).. لا.. لا.. لا..
- رشيد : ما تقول حتى شيء.. زى ما إستلمتها منه إنسلمها له ويعوضنا
الله خير..
- الطيب : يا ويلكم.. رزق الماء ماشى للماء..
- رشيد : (للمجهول).. خود أمانتك..
- خالد : (يتسلل وينسحب دون أن يشعر به رشيد)..

رشيد : خود أمانتك .. وخليّك في وعدك .. لا تعرفنا ولا نعرفوك ..
 المجهول : (يتسلم الحقيبة مسرعاً ينسحب) .. (فترة صمت وتبادل نظرات) ..
 الطيب : شنوا خّممت يا منصور ..
 منصور : فاش تبينى إنخمم ...
 الطيب : في الموضوع اللّـي جوك الأولاد من أجله ..
 منصور : إحنا وين وأنت وين ...
 الطيب : كل واحد يا خوي ينده على صلاح بلاده ..
 منصور : أرجوك يا طيب فكّنى ..
 الطيب : ما تزعلش .. أنى ماشى .. لكن يكون في علمك ما دام هذا
 الشيطان لاصق فيك والله ماك رابحها ولا عاد تشوف خير
 (ينسحب الطيب والأولاد) ..

رشيد .. منصور ..

منصور : (في حيرة) .. الحاج عمر .. ياشينك ورطة ..
 رشيد : ولا يهملك .. ما تفكرش .. موضوع الحاج عمر إنساه .. زيدها
 على الكدس (رمضان يطل عليهما دون أن يشعر به) ..
 منصور : أنى خائف يا رشيد .. خائف يدوروني ..
 رشيد : يدوروك؟ .. يدوروك الواه؟ .. أنت بعت ...
 منصور : لا ...
 رشيد : أنت قبضدت حاجة .. خديت فلوس ...
 منصور : لا ...
 رشيد : اللّـي باع .. قبض وأنت لا بعت ولا قبضدت ..
 منصور : صار تبينى ننكر نقول ما نعرف شيء ..
 رشيد : طبعاً .. وأنت بالفعل هالناس ما تعرفهمش ..
 منصور : والبضاعة ما يعرفوهاش ليا أنى؟

- رشيد : يعرفوها كيف؟ .. أنت ماكش صانعها .. بعدين ما فيش زيبا في السوق إسمك مكتوب عليها؟ (رمضان يطل دون أن يشعر به)
- منصور : لا .. لا صنعتها ولا إسمى مكتوب عليها وفيه زيبا في السوق ..
- رشيد : خلاص الواه بتشغل بالك .. هالموضوع أنساه فكر في غيره .. (فترة صمت وقلق .. منصور في حيرة) ..
- منصور : الحاج عمر .. ترونت يا رشيد .. الله يخلصها على خير ..
- رشيد : ما ترونتش .. قول هذا وين بيختر يدامها وينخشوا في الصحيح ..
- منصور : إدّوشنت يا رشيد ..
- رشيد : إدّوشنت؟ .. خليك صلب قوى .. إنت الآن فكر في الكنز اللي بنعوضوا بيه اللي خسرناه .. فكر كيف نتخلصوا من الطيب وصغاره .. فكر في الشيخ سحنون ..
- منصور : ما فيش فائدة .. كلهم ضدى .. خوى صغاره ولدى .. بنتي ..
- منصور : مش مهم .. فكر في الشيء اللي بتعوض بيه كل شيء ..
- منصور : مخبله يا رشيد ..
- رشيد : إنصفوها ولا يهكم .. أنت لازم تهون .. تدفع .. نستلموا الشقة وبعدما نستلموها أنى واثق مائة في المائة .. اللي الطيب ييلع الكلام الى قاله يوسع علينا ويخليلنا الطريق ..
- منصور : أفرض دفعنا ورحل الطيب ما فيش خوف بعد ما يسكنوا يطلعوهم ..
- رشيد : ما أظنش يطلعوهم .. هذه الشقة ملكك ..
- منصور : (يقاطعه) سابقا ..
- رشيد : طيب .. سابقا .. تنازلت عليها لحوك لأنكم تسكنوا في خربة حوش غير صالحة للسكن ولما يجوا يفتشوا يلقيوها بالفعل خربة غير صالحة لعائلتين ..
- منصور : فعلا ما تسكنش عيلتين ..

- رشيد : وإيه رائك ..
- منصور : قداش تكلفنا ...
- رشيد : ألى تكلفنا مش مهم الطيب نرحلوه ومشروعنا إنفدوه ..
- منصور : آه يا رشيد لو يتحقق الحلم .. لو ..
- رشيد : يتحقق لو تنفذ المخطط اللى أنى ما شى بيه ..
- منصور : إنفذ .. بس أنى خائف ياكلونا زهم وریش ..
- رشيد : لا .. ما ياكلوناش .. رشيد قبل ما تزلبحش .. أنت تعرفنى شنوا نكون ..
- منصور : نعرفك وثيقتى قوية فيك لكن هالملاعین مارتحنونیش ..
- رشيد : يوللوا ويرتحوك ما إديرلهمش وزن ..
- منصور : آه يا رشيد كل ما نتفكر الكنز تركبى نار .. والدى الله يرحمه ديمه نحلم بيه نلقاه زاهى فرحان راضى عليا .. ديمه يقولى رد بالك يا منصور تفرط فى الحوش .. حقك دافع عليه .. رد بالك تتنازل .. لكن يا خسارة وقت نشده وين الكنز مدفون يقطع وانفيق ...
- رشيد : الصبر طيب .. بعد نفضوا الحوش إنجيوا الشيخ سحنون ..
- منصور : برا يا رشيد .. دير اللى يساعذك ...
- رشيد : نمشى إناديلك صاحب الشقة ..
- منصور : جيبه .. اليوم لازم انتمم معاه .. نبى نرتاح من هالملاعین ..
- رشيد : حاضر .. فى الأمان ...
- منصور : فى الأمان .. (يودعه حتى الباب) .. زينة .. (وحده) ... آه .. لو يتحقق الحلم .. منوزيك يا منصور .. زعمه الكنز كبير لازم بيكون كبير إذا كان مش خاييه على الأقل زير ..
- رمضان : (يقاطعه) .. باللطف إن شاء الله ...
- منصور : رمضان؟ ... أنت قاعد ...
- رمضان : لا .. بنروح للبيت .. (ينسحب بسرعة)

منصور : تعال جاي (مسرعاً نحو الباب ينادي) رمضان .. رمضان .. (يأخذ شاله مسرعاً يجري وراءه) .. رمضان .. رمضان ..

«ستارة»...

الفصل الثانى

الشخصيات

منصور	
الطيب	: شقيقان
زكية	
فتحى	: أبناء منصور
خالد	
زينب	: أبناء الطيب
رشيد	: صهر منصور
الحاج عمر	: صديق منصور..
رمضان	: عامل عند منصور..
أحمد	
محمود	: أبناء رمضان
مختار	: محتال
خميس	: محتال
سليم	: صاحب الشقة

الفصل الثانى

ترفع الستارة على وسط مخزن قديم..
مخزن بضائع.. فى الجهة فتحة على هيئة
قوس على شمال المتفرج توصل إلى الشارع..
وعلى يمين المتفرج فى الواجهة فتحة كبيرة
على هيئة قوس توصل إلى داخل المخزن..
المبنى قديم..

الأثاث

طاولة كبيرة فى الوسط نوع قديم.. خزانة
حديدية نوع قديم..
جهاز هاتف.. كراسى مختلفة الأشكال...
مقعد مستطيل خشبى.. شماعة.. جرة كبيرة
للماء.. مغطاة بصحن وفوقها كوب معدنى
للشراب..

الوقت صباحاً...

عيسى يوسف الربيعى

رشيد.. منصور.. مختار...

- رشيد : (بيده ابريق الشاهي يصب في الكؤوس ويوزع) تفضلوا...
منصور : (يرشف الشاهي)...
رشيد : لوين وصلتوا..
منصور : لشيء.. صاحبنا مشيطةها.. يبي ينحيها بجلدتها..
رشيد : معقولا.. ما نخلّوش يصلخنا.. المعقول معقول واللى مش معقول مش معقول..
منصور : معقول يا رشيد.. حوشى.. حوشى.. رزقى نشره مرتين؟..
رشيد : كل شيء بالرضى والتراضى ما يقدر حد يغضب علينا.. بعدين كل شيء بثمره..
مختار : يرحم بيها والديك.. كل شيء بثمره.. أكثر من حقى ومن اللى صارفه وموجود فى الشقة ما نبى شيء..
منصور : حق منوا يا ولدى.. حوشى.. ملكى.. نشره مرتين؟..
مختار : ما تغضبش.. نتفاهموا بالمعقول من غير حماقة وغضب..
منصور : نتفاهموا كيف؟ أنت بشمطنى.. شويتنى.. بتبلعنى زهم وريش..
مختار : أبدا.. كل شيء يتم برضاك ومش من عوائدي تأكل الناس زهم وريش.. أنت قلت هذا الحوش ملكى..
منصور : أيوه ملكى وأوراق الملكية موجوده وكنت مأجره لاجنبى وعندى حتى عقد معاه..

- مختار : الاجنبى الى اجرتة وينه؟
- منصور : وينه؟ وين نذري عليه.. هرب وكلا في إيجار عامين..
- مختار : لا ما هربش.. سافر.. باع الأثاث اللي في الحوش واخدى منى مبلغ مقابل التنازل عليه.. أنى ما نعرفكش.. لا أجرت منك ولا شريت هذا الحوش خذيته من جهة رسمية.. ندفع في أقساط شهرية وبعد ما نسدد في الكامل يصبح ملكي معلوميتك من يوم طلع الأجنبى الحوش أصبح ملكي أنى.. واضح..
- منصور : لكن أنى ما قبضت شىء ولا درهم...
- مختار : فهمه يا رشيد.. قال ما قبضش..
- رشيد : منصور.. خير الكلام ما قل ودل.. أوصلوا لحل..
- منصور : نوصلوا كيف؟ صاحبنا عالقها رابعة وداس على البنزين..
- مختار : (يقف).. ما صار شىء.. لاش شياط الريق..
- منصور : (متوسلا) أستاذ رشيد.. كيف هكى حوشى نشره مرتين؟..
- مختار : أنى آسف اللى جيت.. لو كنت ندرى هذا بيصر راني بعث لولده وانتهيت..
- منصور : لولدى؟..
- مختار : أيوه ولدك اللى اسماه فتحى.. جاني في البناية قالى الشقة نبها مستعد ندفع اللى تباه..
- منصور : ولدى فتحى جاك وقال هالكلام؟..
- مختار : نعم لكن أنى أعطيت الكلمة قبله لرشيد ما رضيتش نوللى في كلمتي..
- منصور : ولدى فتحى بيع ويشرى وما يقوليش؟..
- مختار : قال بيبى يتزوج..
- منصور : يتزوج؟.. أمته صار هالكلام؟..
- مختار : من مدة.. بعدما جاني رشيد بيومين.. جاني وجاب حتى الفلوس معاه..

- منصور : مش معقول.. ولدى فتحى يتزوج من غير ما يقوللى.. مش
معقول ولدى فتحى ما يشاورنيش.. (متوسلا) أستاذ رشيد كيف
هكى فتحى يتزوج من غير ما يقوللى..
- رشيد : منصور.. سكر هالموضوع.. ما ضيعش الوقت..
- منصور : نسكره كيف يا رشيد.. ولدى فتحى يدير هالعائل.. (في حدة)
أنى لازم نتملح منه.. لازم نوريه..
- رشيد : منصور.. موضوع فتحى خليه بعدين..
- منصور : لا.. لا يمكن.. اليوم يومه..
- مختار : الظاهر دوتكم فاضية وما يصير شيء.. (نحو الباب)..
- رشيد : (رشيد).. لا يمكن تمشى.. (لمنصور) منصور سكر هاللباب قبل لا
يفلت.. من يدىك..
- منصور : نعطيه المبلغ اللي قال عليه..
- رشيد : قتلك سكر واستلم الحوش..
- منصور : لا.. لا.. ولدى فتحى اليوم يومه..
- مختار : أما انت انسان غريب.. هذا ولدك يا راجل المفروض ما تقول
شيء ما دام هو ملزوم بيه..
- منصور : ولدى..
- مختار : أيوه ولدك.. المفروض تفرحله وتعاونه.. مش تتملح منه
وتوريه..
- منصور : ولدى يخونى وانعاونه.. ولدى بيع ويشرى في رزقى من وراى
ونفرحله هذا عمل يديره..
- مختار : سامحنى يا أستاذ رشيد أنى ماشى.. أمته تجيب المبلغ نقداً نسلملك
الشقة في يدىك ثلاثة أيام إذا كان ماجيتنيش نتصرف..
(ينسحب)..
- رشيد : (مسرعاً وراءه).. إسمع يا أخ.. إسمع..
- منصور : (وحده) اليوم يومه فتحى.. حوشى ونشره مرتين..

- رشيد : (راجعاً) ..
- منصور : امشى ..
- رشيد : (مقلدا منصور) .. امشى ..
- منصور : كيف هكى ..
- رشيد : الله غالب .. شهر وضاع .. شهر يا منصور وأنى نجرى وراءه باش
جبهته للطريق وفي الأخيرة .. (مقلدا منصور) إمشى ...
- منصور : اللى دوخنى ولدى فتحى .. الفلوس إمنين جوه .. وين
القاهم؟ ..
- رشيد : وين القاهم معروف .. الشيء واضح قدام العين ..
- منصور : كيف يعنى ...
- رشيد : مخطط الطيب مفضوح .. زينب شنوا قاعدة إدير ..
- منصور : زينب بنت خوى؟ .. خوى الطيب يوللى نسيبي؟ هو هكى ما
خلصناش معاه يا مابالك يوللى انسيب ...
- رشيد : ومش هذا بس صغار بنته يقولوك يا جدى ..
- منصور : لا .. لا يمكن ..
- رشيد : الفخ كبير يا منصور .. ماتنساش خالد وزكية .. أخبارهم عندى
توصلنى من أختى كل يوم .. دونك يا منصور .. نظّف حوشك
طلّعهم قبل لا يجيبوك على براّ نفد زي ما قتلك قبل لا تلقى
نفسك على غير طريق ..
- منصور : شيء يخوخم .. الفلوس وين القاهم ..
- رشيد : فتجى خليه بعيد .. إنصفوا الأول الأول .. نستلموا مفتاح الشقة
نطلعوهم بعدها بيانلنا كل شيء ...
- منصور : مصائب .. كل مرة يفتح شرك جديد ..
- رشيد : ولا يهمك .. معاك رشيد .. هات المبلغ وخلينى نمشى نجيبلك
المفتاح قبل لا الشقة يلفوها الغير ..
- منصور : الصبر .. لا حول ولا قوة الا بالله .. هو قداش قال ...

- رشيد : أربعة إرزم . .
منصور : أربعة إرزم؟ . . . أربعة إرزم . .
رشيد : مخلوفين يا منصور . . ما يضيع شيء . .
منصور : الصبر . . (نحو الخبرة) تفضل . . ما تنساش قبل لا تسلمله
الفلوس تغير الأقفال وجميع المفاتيح . . .
رشيد : من غير ما توصي . . (يخرج رزمة مفاتيح من جيبه) كل شيء ضارب له
حسابه .
منصور : يا عيني عليك . . دميغ ما شاء الله عليك . . .
رشيد : في الأمان . .
منصور : (يودعه حتى الباب) زينة . . زينة . . (وحده) زعمه يتحقق الحلق
زعمه الكتر كبير . . لا بدّ يكون كبير. اذا كان مش خايبه زير . .
(رمضان داخلا دون أن يشعر به يتابع) لكن فتحي . . إمينين جوه
الفلوس ولدى يتزوج من غير ما يقولي وضد رغبتى؟ . . يرضى
يتزوج بنت خوي الطيب؟ . . خوي الطيب الليّ طول عمرى أنى
واياه جاوى في نار . .

منصور... رمضان...

- رمضان : السلام عليكم . . .
منصور : وينك يا رمضان . . صحة النوم . . .
رمضان : نوم شنوا . . أنى من الصبح إندور عليه . .
منصور : أشكون هو الليّ إدّور عليه . .
رمضان : الشيخ سحنون . . .
منصور : الشيخ سحنون؟ . . الواه إدّور عليه؟ . .
رمضان : عجائب؟ . . الواه إندور عليه . . شنوا انت ما تعرفاش الواه
إندور عليه . .
منصور : بتعرفه إمينين . . ريته عندي . .

- رمضان : أنى غريب؟ شور ما عادش فيه بيناتنا تقدير.. خلاص الاحترام
بيناتنا إنتهى ..
- رمضان : حاش لله .. مش هذا قصدي ..
- منصور : امالا شنوا هو قصدك ..
- رمضان : قصدي انتم بعنوني ليه .. قلتولى إمشيله من الساعة ثمانية في
الصبح وترصدله قدام حوشه وما تجيش الآ بيه ..
- منصور : أنى بعتك يا رمضان؟ ..
- رمضان : لا .. اللى بعنى ظلك ..
- منصور : ظلّى .. حلوه ظلّى .. هو ظلّى كلمك من غير ما نشعر بيه ..
- رمضان : الأستاذ رشيد .. نسيك العزيز ..
- منصور : آه فهمت .. قول رشيد هو اللى بعنى ..
- رمضان : قاللى تمشى للشيخ سحنون وتقوله السى منصور قاعد يستنى فيك
بالريق اليابس وقاللى هذا شيخ كبير ما تسبىاش لين يجى
معاك ..
- منصور : شيخ كبير؟ .. شيخ شنوا ..
- رمضان : شيخ الكنوز والشاهى بالفستك واللوز .. زمان جاب فيهم وطلع
كلامه فاشوش وتوا بىّ يجيب سحنون ملك الجنون باش يلعبوا
الزربوط ..
- منصور : شورك هازىء يا رمضان ..
- رمضان : على منوا ..
- منصور : على الشيخ سحنون ..
- رمضان : لا مش هازىء إنما مستغرب ومش لاقى بيها كيف ..
- منصور : خسارتك يا رمضان فيه أمور كثيرة ما تفهمهاش ..
- رمضان : قول اللى يساعدك .. شنوا ما زاللى معاكم .. آخر الشهر واتجيبنى
الطريق ..
- منصور : انت ما قتلش شنوا قالك الشيخ سحنون ..

رمضان : ما قالى شىء.. لا كلمنى ولا كلمته.. من الساعة ثمانية وأنى واقف قدام الحوش.. نستنى فيه.. كل ربع ساعة نطقطق على الحوش يطل من الروشن ويقوللى (مقلدا سحنون) الصبر جميل. إنتظر يا بني..

منصور : جَلَوْ...
رمضان : نطقطق ويعاود نفس الكلام.. منتهى البلادة وصحة البهت بعد ساعتين فتح باب الحوش وقاللى.. (مقلدا سحنون) خذ يا بني هذه الرسالة وسلمها للأستاذ رشيد..

منصور : رسالة؟.. وبينها الرسالة؟...
رمضان : قاعدة عندي.. (يبحث على الرسالة) تفضل..
منصور : (يستلم الرسالة) شنوا فيها يا رمضان؟...

رمضان : وين نذرى عليها..
عمر : (دقات على الباب.. يطل برأسه ويدخل)..
عمر.. رمضان.. منصور...

عمر : السلام عليكم...
منصور : (مرحبا بحرارة.. تبادل التحية.. يجلسان) حضر لنا الشاهى يا رمضان
رمضان : حاضر.. (ينسحب نحو الداخل)..
عمر.. منصور.. عمر...

عمر : الأستاذ رشيد وينه؟..
منصور : طلع عنده شغل بقضية ويوللى..
عمر : (في حيرة) زعمه يوللى..
منصور : لا بأس..
عمر : فيه موضوع جيت من أجله...

- منصور : خير إن شاء الله . .
- عمر : موضوع ولدى اللي تكلمنا فيه في المدة اللي فاتت . .
- منصور : خيره ولدك؟ صار شيء لا سامح الله . . .
- عمر : البارح جوني الجماعة . . الطيب خوك وخالد ولده وفتحى ولدك الصراحة سمعت منهم حكايات على رشيد تخوف إستغربت قلت كيف منصور يرضى بها الشيء إذا كان كلامهم صحيح . .
- منصور : كذايين . . خليك منهم . . اللي ما يجبكش يحلمك الحلمة الشينة . لو رشيد ما لقيتش فيه فائدة إناسبه؟ . . نرضى بيه . . أنت تعرفنى يا حاج مش برانى عليك . .
- عمر : الصراحة خوفوني وخفت عليك . . كلامهم حيرنى . .
- منصور : إطمئن يا حاج . . منصور ما هوش دبدوب ولا مغفل . . مصلحتى نعرفها وين . .
- عمر : صار حكاية الأستاذ فهم وحبست رشيد وطلاق بنت بالقاسم كلها كذب . ما فيه منها شيء . .
- منصور : حكاية الطلاق صحيحة والأسباب زي ما حكيتلك . . أما الباقي كله كذب وتسلط باش ما يرتحونيش . .
- عمر : فيه موضوع تاني تكلمت معاهم فيه ويلزمنى إنبهك عليه . .
- منصور : خير ان شاء الله . .
- عمر : موضوع ولدى والزواج . . .
- منصور : خيره ولدك . . مش اتفقنا وأعطيتك الكلمة . .
- عمر : هو صحيح إتفقنا لكن الطيب . . خوك قاللى إبعد على البنت . . البنت مخطوبة لخالد ولدى من زمان والبنت والولد متفقين . .
- منصور : كذايين . . يكذب عليك يا حاج . . البنت أنى أبوها ومسئول عليها وما فيه حد يقدر يعطيها من غير رضاي أنى . .
- عمر : لكن الطيب نبهنى وخالد حدرنى وفتحى ولدك أكذبلى . . الصراحة قعدت حائر فى هالموضوع . .

- منصور : شوف يا حاج .. لما يتناسبوا عيلتين لازم يكونوا متفاهمين وعلى بعضهم راضين صح والا ... لا ..
- عمر : صح .. الزواج رباط مقدس ولازم يكون مبنى على الحب والأساس الصحيح ...
- منصور : وهذا مش موجود .. خوي الطيب أنى وياه ما نتلاقوش سنين أنى وياه مش متفاهمين كيف تبينى إناسبه ... كيف تبينى نرضى بيه .. خالد فهمته مليون مرة اللى البنت مش ممكن نزوجها ليه ..
- عمر : الصراحة يا منصور خوفوني .. انت صديق قديم عزيز عليا ما نبيش نفقد صداقتك ومش فى نيتى نعادى حدّ ولهذا ما دابيا نقعد بعيد ...
- منصور : خطرهما .. حتى أنى عندي موضوع قبل لا ننساه بنقولك عليه ..
- عمر : موضوع يخصنى أنى ..
- منصور : شنوا نقولك جانا واحد قال البضاعة اللى بعثوها للحاج عمر شدوها؟ ..
- عمر : بضاعة؟؟ بضاعة شنوا؟ ..
- منصور : بضاعة فاضلة عندي باعها رشيد واللى إستلمها خوك ..
- عمر : ما عنديش علم ..
- منصور : غريبة .. وخميس ما قالك شيء ..
- عمر : خميس؟ ..
- منصور : أيوه .. خميس خوك .. شاب صغير .. طويل .. شعره كبير ..
- لابس نظارات سود.
- عمر : ما عندناش هالاسم .. خوتي الثلاثة تعرفهم قاعدين مع بعضنا فى المزرعة نخدموا جميع والتجارة من زمان سبناها ..
- رمضان : (داخلا بالشاهي) يوزع الشاهي .. تفضلوا .. (ينسحب نحو الداخل)
- منصور : (سارحا) .. غريبة .. كيف هكي ..
- رمضان : (من الفتحة يتابع الحوار دون أن يشعر به منصور) ..

- منصور : غريبة.. صار خميس ما هوش خوك من بوك...
- عمر : سؤالك غريب.. منوا قالك عندي خو اسمه خميس ومن بوي..
بوي الله يرحمه تزوج مرة وحدة بس.. أمي بس.. خلف منها
أربع بنات وثلاثة أولاد غير هذا ما فيش..
- منصور : (سارحاً)..
- عمر : منصور.. منصور.. خيرك.. لا بأس.. منصور.. منصور..
خيرك سرحت
- منصور : (يترك) ها.. ها.. لا.. لا.. ما فيه شيء...
- عمر : كيف ما فيه شيء.. أنت ماكش طبيعي.. فيه شيء كدرك والّا
خير عليك من طرق..
- منصور : لا.. لا.. أبداً.. ما فيه شيء..
- عمر : كيف ما فيه شيء.. شنوا حكاية البضاعة وخميس..
- منصور : لا.. لا.. ولا حاجة.. فكري مشوش.. أموري مش صافية..
مرات نضلى نهلوس ما نعرفش على نفسى شنوا نقول وشنوا
إندير...
- عمر : الصراحة يا منصور حيرتني معاك...
- منصور : (يغير الحوار) رشيد واجعاته الأرض ما دابيه ما تفلتش منك..
- عمر : منصور.. خيرك غيرت الموضوع.. شنوا حكاية البضاعة
وخميس..
- منصور : لا.. لا.. ما فيه شيء ما تواخذنيش.. مرة مرة نهلوس..
- عمر : إن شاء الله كيف ما تقول...
- منصور : خلىنا في الموضوع الأرض.. رشيد قاللى أنصححه الحاج ما
يفلتهاش..
- عمر : بارك الله فيه مهتم..
- منصور : طبعاً بيهتم انت من العيلة يا حاج..
- عمر : شنوا نقولك.. بعدما روحت منك جاني الراجل واتفقت معاه

- يجبى التنازل واليوم ان شاء الله عندى موعد معاه... .
- منصور : يعني كلمت معاه!.. .
- عمر : تقريباً.. . صاحب الأرض ماريتاش.. . اللى نعتنى عليه رشيد وجانى ما هو المالك اليوم بيرفعنى لصاحب الأرض بندفعله ونأخذ التنازل.. .
- منصور : تأكدت كويس يا حاج.. . قصدى كل شيء مضمون... .
- عمر : مضمون بإذن الله.. . تأكدت بنفسى.. . الأرض ما زالت ليه وباسمه.. .
- منصور : كأنه هكى ما تراجيش.. .
- عمر : (يقف).. . ساعحنى يا منصور بنمشى.. .
- منصور : خيرك زيد هذرز رشيد على جيه.. .
- عمر : ما عlish.. . يوم ثاني إنجيك.. . (نحو الفتحة) في الأمان ياسى رمضان.. .
- رمضان : (يخرج من الفتحة يودعه).. .
- منصور : (ينهض ويرافقه حتى خارج الباب).. .
- رمضان : (يتأكد من إبتعاد منصور.. . وحده) وَيْ ياشينك خبط.. . آهو الدق الصحيح هذا التبرويل والّا بلاش.. .
- منصور : (راجعا يتوقف دون أن يشعر به رمضان يتابع الحوار).. .
- رمضان : ياشينك ضربة.. . في الصميم.. . عشرين الف دينار ورقة تنطح ورقة ومع هذا صاحبنا ما هوش جاي للطريق.. . قَدْ مانصحوا ماباش يفهم كل خطبه يأخذها يتمرغد وينسى ويفقع من جديد.. . ما نعرفش هذا الرجل طينته إمنين (مقلدا منصور) زعمه الكنز الكبير. لازم بيكون كبير اذا كان مش خابيه.. .
- منصور : (يسعل).. . (فترة صمت يجلس).. . إسمع يا رمضان.. . أظن أنت سمعت وفهمت شنوا صار.. .
- رمضان : تقريباً.. .

منصور : نبّى نترجاك اللى صار يقعد سر بيناتنا . أنت تعرف كلام الناس
والشهادية اللى صار ما نبّى حدّ يسمع بيه . . لا خوى ولا صغارى
ولا صغارك ولا صغار خوى واللى تطلبه منى نعطيك . .

رمضان : أنى ما طالب شيء ورقتي وبس وبعدها نتسلح وبتجيبنى
الطريق . . .

منصور : حاضر . . اللى تبّيه نرضيك بيه . . فلوس . . شهادة . . غير دير
زي ما قتلك وإذا كان ربّى قدرنى وقول آمين وتحصلت على الكنز
لا بدّ نحسبك فيه . . .

رمضان : لا . . لا . . ما نبّى منك شيء وريقتى . . أما الكنز الله لا يكون لي
فيه نصيب .

منصور : آه يا منصور . . (بصوت مرتفع) . . لَو . . لَو . . لَو . .

رمضان : وآمته شغلى يكون وآتى . . .

منصور : هاليومين . . كون متهنّى . . تفضل . . (يشير اليه بالانسحاب) . .

رمضان : حاضر . . أمرى لله . . (يأخذ الكؤوس وينحسب) . .

منصور : (وحده في حيرة) يا شينك ملعوب . . زعمه كلام الحاج مضبوط
معقولا خميس ما هوش خوه . . (يفكر) خميس . . إمنين طلع
أشكون جلبه؟ يكونش خوى الطيب وعصابتة لعبوا هالدور
(بصول ويجول في حيرة) وفتحى؟ فتحى إمنين جُوه الفلوس وين
القاهم؟ يا شينك مصائب . . لكن لا . . أنى منصور ما يتعداش
عليه . . اليوم يومه فتحى . .

فتحى : (داخلاً) . .

فتحى . . منصور . .

منصور : أهلاً . . أهلاً . . جيت يا وجه الشوم . .

فتحى : وجه الشوم؟ . .

منصور : وين كنت يا وجه المصائب . .

- فتحي : بوى .. خيرك ...
- منصور : قتلك وين كنت ..
- فتحي : كنت في الورشة جبت السيارة ...
- رمضان : (خارجا يتوقف يتابع) ..
- منصور : كذاب .. نعم كذاب .. السيارة ما فيها شيء .. نعرفك وين كنت إنفضحت يا فتحي .. إنكشفت أوراقك ..
- فتحي : (لرمضان) هذا خير ..
- منصور : طاح الغطاء يا ملثمه .. نعرف كل شيء واطلعت على حقيقتك ..
- فتحي : شنوا قاعد تقول يا بوى ..
- منصور : عقابها عذر ودبح من العنفقة .. هذا انت اللي كنت متحزم بيك ..
- فتحي : (لرمضان) .. دبح من العنفقة؟ .. طاح الغطاء .. شنوا صار له ..
- رمضان : (يشير اليه بالهدوء) ..
- منصور : هذا جزائي .. ربيتك وعلمتك وخليتك راجل بين اندادك في الآخر تولي عليا وتدبحني من الجدر للجدر ..
- فتحي : بوي .. لا باس عليك ..
- منصور : ما تتضعش البراءة .. على خاطر كل شيء ثابت عليك ..
- فتحي : ثابت عليا؟ ..
- منصور : صار بتزوج يا فتحي ...
- فتحي : طبعا وهذا الكلام عندك علم بيه ..
- منصور : وخطبت ودفعت وقاعد تستنى في الشقة لين يرحل منها صاحبها وتسكن فيها ومش هذا بس بتناسب أكبر عدو ليا من سنين ..
- فتحي : شقة منوا اللي دفعت فيها ونستنى في صاحبها لين يرحل ..
- منصور : شقتنا اللي في الشارع الغربي اللي كانت مأجرة للأجنبي ..
- فتحي : أنى درت هذا كله؟ ..

- منصور : (في تمكّم) .. لا .. أنى ..
- فتحى : أنت متأكد من الكلام الذى قاعد تقول فيه؟ ..
- منصور : يا عينى .. فقنا بيك يا فتحى .. ما تحاولش تنكر .. بوك ما يغيب عليه شيء ..
- فتحى : ما تتسرعش يا بوى .. السرعة مش باهية .. ما يضح الابن وبوه يقعدوا يتخاصموا على شيء ماليش أساس ولا وجود ..
- منصور : منصور فيه إثباتات يا فتحى .. الناس الذى جوى ما يكذبوش ..
- فتحى : وأنت .. صدقتهم ..
- منصور : طبعا صدقتهم .. شنوا اظن منصور مغفل .. راقد على ودنه ..
- ما يفهمش قوللى .. الفلوس الذى عندك وين القيتهم .. إمين مصدرهم ..
- فتحى : أنى عندى فلوس؟ ..
- منصور : الفلوس الذى بتشرى بيهم أثاث الشقة .. الشقة التى بتزوج فيها ..
- فتحى : تدوى جديات يا بوى ..
- منصور : (يتكّم) .. لا .. إنصروا .. خسارتك يا منصور .. (يصفع وجهه بيديه الاثنتين) كنت هبل .. مغفل .. أيوه مغفل (يصفع على وجهه) أيوه مغفل .. سلمتك رزقى وقعدت تسرق وتنهب وتحط على غير طريق ..
- فتحى : أنى سارق يا بوى؟ ..
- منصور : أيوه سارق وغشاش؟ ..
- فتحى : (بصوت مرتفع) بوى .. كل شيء ليه حدود .. توّا توّا نبّى الاثباتات .. توّا تحضرلى الذى قالولك ولدك قاعد يسرق فيك ..
- منصور : الناس موجودين ومستعد نحضرهملك ..
- فتحى : خلاص .. حضرهم هالكمشة برواله الذى لاثنين بيك ..
- منصور : فتحى .. بوك ما هوش هوين باش البرواله تحيط بيه نبّى نعرف

- الفلوس اللي عندك مصدرهم إمينين ..
- فتحي : أما فلوس .. أنى لا عندى فلوس ولا فكرت في الشقة والا هالكلام اللي قاعد تقول فيه :
- منصور : (في تهكم) تَوّا انقولوله .. على أشكون بتعديه ..
- فتحي : إسمع يا بوى ما دام أنت متأكد نسرق فيك ما فيش الا الشرطة تحزها بيني وبين الناس اللي لائدين بيك ..
- منصور : الشرطة؟ ..
- فتحي : طبعاً .. هذا شيء مش ممكن نسكت عليه .. لازم نرفع قضية ضدهم نطلب حتى منهم بعدها بيان الحق .. (يخرج مسرعاً) ..
- منصور : (مذهولاً) الشرطة؟ الشرطة؟ .. (يستدرك) .. فتحي فتحي يخرج (مسرّعاً) .. فتحي فتحي .. (يخرج مسرعاً) فتحي .. (راجعاً) رمضان .. زوديا رمضان ألحقه جيبه قبل لا يورطنا .. قنعه يا رمضان ..
- رمضان : نقنعه كيف .. نقوله إقبل الكلام اللي قاله بوك ..
- منصور : يورطنا يا رمضان .. هذا طائش ما يفهمش ..
- رمضان : لا يا منصور .. ولدك ماهوش طائش .. تابت ومن حقه يدافع على شرفه أما أنى خاطينى ..
- منصور : صار هكّى يا رمضان .. يا موت دونك صاحبك ..
- رمضان : اعفينى يا منصور .. شنوا ما زاللى معاكم .. أعطينى وريقتى والله يسمّعنا على بعضنا الخير ..
- منصور : (حائراً) .. الشرطة؟ .. زعمه يديروها
- رمضان : ما تتكدرش لو نفرغ اللي في صدرى ..
- منصور : (يقاطعه) تفرغ اللي في صدرك؟ ..
- رمضان : إنعم راهى جائية منك لهنى (يشير بيده الى اعلى نقطة من جسمه)
- منصور : صار ما زلت مليون ..

- رمضان : قريب تنفجر .. مش قادر إنقولك حاصل وصابر عافس على رقبتي
برجليه الاثنين ..
- منصور : غريبة .. أشكون هو اللي عافس على رقبتك برجليه الاثنين ..
- رمضان : الفقر العازة ..
- منصور : شنوا قاعد تقول يا رمضان ..
- رمضان : المحتاج شاقى يا منصور .. دليل .. حقير محقور .. يعيش طول
عمره تحت رحمة الغير .. يعرف الحق وين يقعد يدرك فيه ..
- منصور : كلامك جديد يا رمضان ..
- رمضان : وموجه ليك ..
- منصور : موجهه ليا .. صار أنت ضدّي ..
- رمضان : لا .. أنى لا شيء .. كنت عندك وما زلت ما نساي شيء وما دام
هذه عقليتك سامحنى نقولك .. أنت اللي ما تساوى شيء ..
- منصور : ما نساي شيء؟؟ .. أنى ما نساي شيء؟؟ ..
- رمضان : فيكش لله تعطينى وريقتى وانذب في حالى حقوقى ما نبهمش
متنازل عليهم أرجوك ما عادش عندى جواجى يتحملوا اللي قاعد
إدير فيه ..
- منصور : باهى .. حتى هذا رأى .. صار زى منوا يربى ..
- رمضان : (يقاطعه) .. بالعكس .. أنى انسان عندي ضمير .. خدمتك
بنصح ونية صافية رغم العيوب اللي فيك .. الفقر والحاجة هم
اللي جبرنى نتحملك والناس الأوله تقول .. اللي بتخدمه طبعه
واللي بترهنه بيعه وأنى هذا اللي كنت نعمل فيه وسامحنى نقولك إذا
كان صغارك والعيلة كلّها ما لقوش فيك الخير بنلقاه فيك أنى؟ ..
- منصور : حتى هذا رأى .. جوابك سكات ..
- رمضان : ما دام جوابي سكات لاش قاعد .. (ينسحب للخارج بسرعة)
- منصور : (يتأكد من إبتعاده) .. في ستين داهية والناس لاهية .. ملعون
منصور ما يساوى شيء .. أنى؟ ما نساي شيء؟ ما زال الودن

الفصل الثاني

تسمع وقت الّلي جاي يا سويدي خدمي .. زي الحصان كان
يلهد راسه فوق ما يقيماش .. أني ما نساوي شيء؟. لكن تَوَا
يشوف .. الّلي عَصَّك وقصَّك في سنونك ...

سحنون : (وارة الكواليس) .. حَيَّ (ضوضاء .. عزف على الدفوف) حَيَّ ..

منصور : (نحو الباب مذهولاً ...) ..

سحنون .. رشيد .. منصور ...

سحنون : (داخلا يعزف على دف .. يحوم حول منصور .. حركات بهلوانية) حَيَّ ..

رشيد : (بيده صندوق داخلا يضعه على الطاولة) ..

سحنون : (مستمرًا في العزف على الدف ويحوم حول منصور وهو في حالة ذهول
وخوف) حَيَّ حَيَّ ..

رشيد : تفضل يا شيخ .. إستريح .. (سحنون يجلس) هذا منصور يا
شيخ ..

سحنون : حُيَّيت بتحية مزهرة معطرة وزكية ..

منصور : (في خوف .. يتسمم) ..

رشيد : بختك كبير يا منصور .. الشيخ جبته من مكان ما يخطر لكش على
بال .. نزلته من رأس الجبل .. تصور كان عنده موعد ومهمة في
برج الثور قتله ما يصيرش يا شيخ تخلينا معلقين ..

سحنون : أمورك متيسرة باذن الله .. الصّلاح كلّهم معاك .. برج النعجة
وبرج النملة وبرج الفيران إجتمعت بيهم وفهموني شنوا فيه ..
(صارخاً) حَيَّ .. حَيَّ ..

منصور : فرحنى سويدي الشيخ .. قوللي راني على الكنز (ملهوف) ..

سحنون : حَيَّ .. قول يا رفاعي يا حباس الأفاعي ...

منصور : (مرتبكاً) .. يا .. يا .. يا ..

سحنون : قول ..

- منصور : يا .. يا .. رفاعى يا حباس ...
- سحنون : ما تخافش .. أمورك مقضية بجاه الشيخة محضية .. قول يا ابن
المفعوص إحفضلى العروس ووصلنى للكنز المدسوس قول ..
- منصور : (مرتبكا) .. يا .. يا ..
- سحنون : قول يا منصور .. قول ولا تخبيش يا زين إيش تقول العين للعين
(يغنى ويعزف على الدف) .. تقوله ولا تخشاش رقيب بعيد وصالك
والا قريب .. ويوم الوعد نشوفك وين قوللى ولا تخبيش يا
زين .. إيش تقول العين للعين قول واحكىلى على الكنز
المدفون ...
- أصوات : (مسجلة بصدى) ... لا .. لا .. لا .. ما تقول شىء ..
- منصور : (يرتعش في خوف) ..
- سحنون : حاضر ما تقول شىء ..
- أصوات : (مسجلة بصدى) .. كل شىء معلوم ومكانه مفهوم ..
- سحنون : سرکم في بير وأخبارکم ما توصلش الغير .. حَيَّ .. (لنصور) هات
يديك ومد رجلك ..
- منصور : (في خوف ينظر لرشيد) ..
- سحنون : هات يديك ومد رجلك ..
- رشيد : (بحركة يشير اليه بالقبول) ..
- منصور : (في خوف يمد يديه ورجليه) ..
- سحنون : (يتأمل في رجله ثم في يديه ييزق على يديه) يديك سخية وحاجتك
مقضية بجاه الشيخ الممدود والشيخة الملوية .. حي (ضحكات ثم
يصول ويجول ويعزف على الدف ويغنى) .. قوللى ولا تخبيش يا زين ..
إيش تقول العين للعين ..
- منصور : (في حيرة وقلق يتبادل النظرات مع رشيد) ..
- سحنون : لا تحتار .. الدنيا حلو وحرار .. فيها اللى يحب الفلفل وفيها اللى
يحب الشاكار ما تفكرش ولا تحتار .. الكنز مضمون ومكانه معلوم

ومسجل عندى بالساعة واليوم.. صاحبك جيناه وفي بيتك
ضيفناه وفي ليلة من الليالي نخلولك تهرز معاه فهمتنى يا
منصور..

منصور : لا يا سويدي الشيخ...

سحنون : (نحو الصندوق.. يضع يده على الصندوق).. جيناه المرحوم اللي
يقطع وقت النوم..

منصور : (في خوف يرتجف) بوى بوى جبتوه؟..

سحنون : (يفتح الصندوق.. يخرج جمجمة) هذا بوك ما عادش يقطع وقت
النوم...

منصور : بوي؟.. (يغمى عليه)..

رشيد : (مسرعا).. منصور (يصفعه بتلطف على وجهه) منصور.. زوديا يا
شيخ الرجل صاخ (يرش على وجهه الماء).. منصور..

سحنون : بسيطة.. بسيطة.. زرّه واتفوت وما حد يموت... (يصفعه بعنف
على وجهه) فيق يا حصلة.. فيق راك قاعد في نصف الطريق..

منصور : (يبتعد) لا.. ما نبّيش كنز.. ردّوه يشدّ حجاره ويرقد في داره.
(مكررا هذا الكلام) يشد حجاره ويرقد في داره..

رشيد : (متوسلا) منصور.. شنوا هالهبال.. تحكم في أعصابك يا
راجل..

منصور : لا يا رشيد.. ما نبّيش كنز.. أرجوك بعدوه.. يشد حجاره ويرقد
في داره..

سحنون : (مداعبا).. هذا بوك الحنون.. بوك اللي يقطع وقت تحلم بيه..
(مداعبا الجمجمة) يحبك يا منصور.. فرحان بيك.. (يضع الجمجمة
في الصندوق ويقفله) الله غالب.. قال يبيكش قالك شد حجارك
واقعد في دارك.. هيا يا رشيد..

رشيد : معقولا يا شيخ..

سحنون : أنى وراي اعمال ما نقدرش إنسيبها..

رشيد : قصدك بتسافر لبرج الثور..
سحنون : الليلة لازم نحضر الاجتماع ما تواخذنيش..
رشيد : وآمته ترجع يا شيخ..
سحنون : هذا سر.. مكاني تعرفه.. آمته تحضر اللي إتفقنا عليه كنزكم
نطلعوه.. (صارخاً) حَيَّ.. (يأخذ الصندوق وينسحب)..
منصور.. رشيد...

منصور : (سارحاً فترة صمت وذهول.. يستدرك مسرعاً نحو الباب راجعاً) إمشي يا
رشيد..

رشيد : (مقلدا منصور) إمشي يا رشيد..
منصور : ليء ليء.. شنوا هذا يا رشيد.. دمي إجمد وحيلى برد والدنيا
صغرت بيّا..
رشيد : خفت من الموت..
منصور : ما نعرفش.. وقت شفت بوي أعصابى فقدتهم.. ليء ليء
حسيت جسمي باللى فيه إنقض.. ما عادش ملكت في نفسي
شيء..
رشيد : لهاالدرجة انت خوّاف يا منصور.. الرجال تصارع الأهوال
والغوال تخاف من الميت؟ هيكل عظمى؟..
منصور : ما قدرتش نتحمل..
رشيد : مادام ما تتحملش علاش مكلفنى.. الواه بعتنى.. ويا خوفى اللي
بنيناه كله ينهد.

منصور : (يوحوح).. كيف إندير يا رشيد..
رشيد : وين ندرى عليك.. ما دامك خواف بها الشكل الكنز يضربوه
الغير الشيخ سحنون مكانه معروف ورمضان يعرفه ومائة في المائة
الطيب وصغاره قالهم عليه..
منصور : زعمه بيمشوله..

الفصل الثاني

- رشيد : طبعاً يشوله زي ما إمشيناله ودورناه يدوروه ويجيبوه بعدها تلقى روحك عرم.
- منصور : أنت كملت مع صاحب الشقة . .
- رشيد : يا سلام . . قبض فلوسه والواصل معاي . .
- منصور : والمفتاح جبته؟
- رشيد : لا . . المفاتيح غير تهم والشقة غدوه الصبح نستلموها . .
- منصور : الواه؟ . .
- رشيد : عندهم فرح . . زوجته إنزاد عليها عيّل والحوش مليون . . اليوم عندهم السبوع يكملوا فرحهم وتأخدوه . .
- منصور : ما زلت خائف يا رشيد . .
- رشيد : وشنوا هو اللي مخوفك . .
- منصور : الجنون . . الموق . . ما نتحملهمش . .
- رشيد : ما تخافش . . أنى معاك . . وقت الشيخ يقوم بالعملية أنت أقعد بعيد . .
- منصور : يا ساتر . . بوى يطلعه من قبره ويجيبه للحوش . . .
- رشيد : أنت حضرله الفلوس اللي قتلك عليهم والشيخ نمشيله ونتفق معاه . .
- منصور : وخوي كيف إنديروا معاه . .
- رشيد : خوك ما عادش تفكر فيه . . حضر الفلوس وخليّ البقية عليا أنى . .
- منصور : حاضر . . اللي تبنيه أنى فيه . . المهم الكنز نضمونه . .
- رشيد : كنزنا مضمون يا منصور . . شدّ حيلك . . أنى ماشى وادعيلك بالتوفيق . .
- منصور : برا يا رشيد . . توكل على الله . . (يودعه حتى الباب) زينة . . زينة وحده (في حيرة) . . تخبلت يا منصور . . (سارحاً) . . فترة . . يستدرك) . . لا . . (يسحب امرأة من جيبيه مخاطباً نفسه) . . أنت لازم تتحمل يا منصور . . الرجال تتحمل الغوال والهوال . . صدقت يا

رشيد (يضع المرأة في جيبه) زعمه الكنز نتحصل عليه؟ مصائب ..
كلهم ضدى .. ما يحبونيش .. حاسدينى .. زعمه اللى قاله الحاج
عمر كلام صحيح .. ما أظنش .. لكن خميس إمين طلع ..
عشرين ألف دينار يأخذهم من يدك يا منصور .. (يصفع يديه على
وجهه) عشرين الف .. زعمه خوي الطيب هو اللى دار
الملعوب ..

الطيب : (وراء الكواليس .. ضوضاء وكلام غير مفهوم) ..
منصور : يا ساتر .. شنوا جابه هالمصيبة .. شنوا جاي يبنى منى ..
الطيب : (داخل مع رمضان) ..

رمضان .. الطيب .. منصور ..

الطيب : زود يا رمضان .. خش هذا محلك .. أنت من العيلة .. خوى
منصور ما تواخداش ما عادش يظبط لكن قلبه طيب ما يرضاش
العيب ..

منصور : الرطابة وقلة الدهان .. وين إلقيته هالرويق الحلو ..
الطيب : أنت يا منصور خوي ولد أمى وبوى .. فيه شىء يربطنا .. مهما
يصير بيناتنا الدم يحن يا منصور ..
منصور : كلام معسول ما يرويش .. اللى جفته معاك قالى ما إنساوى
شىء ..

الطيب : ما تحملك وعاشرك عشرين سنة .. منصور .. حاول ترجع
للأصل .. تفكر أمك وبوك كيف كانوا عائشين .. أنى خوك يا
منصور ..

منصور : وتوا شنوا جاي تبنى منى ..

الطيب : نبى سلامتك ورضاك على عمنا رمضان .. ما يصح هذا الرجل
بعد هالعشرة الطويلة يمشي منا زعلان واللى يمس الصبع يمس اليد
كلها ..

- رمضان : أنى ما طالب شيء الشهادة واندب في حالى ...
- الطيب : حاضر يا رمضان .. خوى منصور لازم يرضيك ومادام قالك آخر الشهر يصفيك بحقوقك ما عليك إلا بالصبر ..
- رمضان : حاضر .. أمرى لله ..
- الطيب : هات يدك يا منصور وانت يا رمضان (يشبكهما في بعضهما) يا الله تسامحوا (يتصافحان) الحمد لله .. قلب المؤمن على خير .. عقبالينا يا رب .. (فتحى داخلا ومعه المجهول) ..
- فتحى .. منصور .. الطيب .. رمضان .. سليم ..
- فتحى : السلام عليكم .. (تبادل التحية بين الجميع .. منصور حائر) .. هذا يا دكتور والدى .. وهذا عمى الطيب شقيق الوالد .. وهذا عمى رمضان واحد من العيلة ..
- سليم : أهلا وسهلا .. (يسحب أوراق من الحقيبة) .. اسمحولى إنقدم نفسى أنى الدكتور سليم سالم سلامة ...
- الطيب : أهلا وسهلا ..
- سليم : تفضل يا أخ منصور هذه الأوراق الرسمية الخاصة بالشقة ..
- منصور : أما شقة ؟ ..
- سليم : الشقة اللي في الشارع الغربى اللي فيها أنى .. في المدة اللي فاتت جانى الأستاذ رشيد من طرفكم وترجاني نسمح للأخ خالد الطيب يشوف الشقة ويقلب الأثاث اللي فيها لأن خالد حسب ما قاللى رشيد عنده رغبة في شراء الأثاث اللي كنت ناوى إنبيعه .. وبالفعل جانى خالد ومعه والده (مشيراً الى الطيب) قلبوا الأثاث والشقة وامشوا .. لكن اللي صار اليوم جانى إبنكم وترجاني إنجى إنوضح شيء لحضرتكم شيء ما عنديش علم بيه والّا ليّا دخل فيه ..
- منصور : (يتصفح الأوراق ويقرأ .. مع استغراب) ..

- سليم : (يوضح له الأوراق) هذا إصال الليّ دفعت بيه الشهر الليّ فات وهذا التنازل من الرجل الليّ سافر.. وهذه الموافقة من جهة الاختصاص...
- منصور : (حائراً) كيف هكي؟ .. ومختار؟ ..
- سليم : مختار؟ .. الليّ يسكن في الشقة هو أنى سليم سالم سلامة والأوراق الليّ بين يديك إثبت هالكلام.. الحكاية الليّ جاني بيها ولدك الليّ خلّتي إنجيك حكاية ماهاش أصل.. الليّ جاك وتفاوض معاك نصاب ناصب عليك ونصيحتي اذا كان رجعلك سلّمه للشرطة..
- منصور : ما عندكش في العيلة واحد أسماه مختار؟ ..
- سليم : قتلك ما نعرفاش واذا كان عندك وقت تفضل معاي للشقة تلقى الوالد والوالدة والعيلة والصغار..
- منصور : (حائراً) .. غريبة..
- سليم : إن شاء الله ما دفعتلاش فلوس وضحك عليك..
- منصور : لا.. ما دفعتلاش..
- سليم : خلاص يبقى الصورة واضحة قدامك ويلزم تشكر إبنك الليّ إهتم بالموضوع وجاني لعلمك إبنك ما نعرفاش ولا انت نعرفك الليّ خلّاني إنجيك الجانب الانساني والواجب الاجتماعي..
- الطيب : بارك الله فيك يا دكتور..
- سليم : أظن كل شيء واضح..
- الطيب : واضح يا دكتور.. واضح يا منصور بعد هكي فساد..
- منصور : (مذهولاً) ..
- سليم : (يجمع الأوراق ويضعهم في الحقيبة) أظن إنتهت مهمتي يا شاب..
- فتحي : (مبتسماً) شكراً يا دكتور.. ساعحنى في تعبك.. (يتصافحان)..
- سليم : أستغفر الله.. هذا واجب.. السلام عليكم...
- فتحي : (يودعه حتى الباب راجعاً)..

منصور.. الطيب.. رمضان.. فتحى...

- رمضان : شفت يا منصور الغلط وين.. لا حول ولا قوة الا بالله العلي العظيم..
- الطيب : أنى خلاص.. ما عادش نبى نقول شىء.. اللى ما يشعفش دنبه على جنبه..
- منصور : (حائراً) مش معقول.. مش معقول..
- فتحى : شنوا هو اللى ما زال مش معقول..
- منصور : (حائراً).. مش ممكن.. كيف هكى؟..
- الطيب : خسارة يا منصور.. فرحة وماتمتش والله قلتها لخالد مستحيل هالشقة صاحبها يتركها.. الصراحة فيها أثاث يمحن ومنظمة بشكل يحل النفس..
- رمضان : صار عجباتك يا طيب..
- منصور : (سارحاً)
- الطيب : عجبتنى فوق ما تتصور.. قلت لخالد لو حصلناها نتنازلوا على كل شىء.. والكنز اللى حلم بيه منصور مشبط ملبط عليه..
- رمضان : هو صحيح فى حوشكم فيه كنز..
- الطيب : الواه تنشد بتقسم معانا يا رمضان..
- رمضان : استغفر الله.. نقسم معاكم؟..
- الطيب : قلت لعلاش حتى انت لعابك سال..
- رمضان : اللى محيرنى كثر عندكم العجن والبل وكل حبل يجيد على جزارته جرة هالكنز..
- الطيب : بالنسبة ليا أنى خلاص.. لو نحصل شقة مليحة زي اللى ريتها اليوم غدوه تجيبنى الطريق.. لكن خسارة فرحة وماتمت..
- (لنصور).. ما تتكدرش يا خوى.. يلزمك تفرح اللى فتحى وقضك وما خلاش سى مختار يضحك عليك.

- رمضان : شياطين يا طيب .. يبيعوا القرد ويضحكوا على اللي شاربه ..
- الطيب : منصور .. خيرك إنكمدت .. قول .. إذا كان زلبحك مختار صاحبك مستعدين انطلعوه من بطن الحوت .. انت وراك رجال .. قول يا منصور ما تبلعش السكين بدمه .. (بتلطف لمنصور) .. فيه شيء يا منصور ..
- منصور : لا .. لا .. ما فيش شيء .. إنحس في نفسي مش باهية ..
- الطيب : هذا الضمير يأنب فيه .. معدور .. ما هو ظلم ولده قاله انت سارق تسرق فيا بتزوج وتشرى أثاث وكلام وكلام ما عlish يا منصور .. قول اللي يساعدك .. إحنا ديمه ليك .. منك واليك تكلم المكلوبة وما تأكلش شحم درعائها .. (صوت خالد ينادي من بعيد) ..
- خالد : فتحي .. فتحي ..
- فتحي : (فرحا) هذا خالد يا عمي .. (مسرعاً يخرج)
- الطيب : زعمه جابوه ..
- رمضان : إن شاء الله .. (الطيب ورمضان مسرعان نحو الباب) ..
- منصور : (حائراً) .. هاذوا خيرهم ..
- الطيب : (يتابع بالنظر واقفاً أمام الباب) (فرحا) جابوه يا منصور جابوه .. أيوه .. هو .. جابوه ..
- منصور : (حائراً) .. أشكون هو اللي جابوه ..
- الطيب : الكنز يا منصور .. الكنز .. جابوه يا منصور ..
- منصور : الكنز .. ؟ (يريد التحرك) ..
- الطيب : الكنز يا منصور .. إفرح يا منصور .. (يتابع كأنه يشاهد شيئاً بعيداً) أيوه هو إلقوه .. آهم جائيين .. قريب يوصلوا .. أيوه بالشوية عليكم .. أيوة وحدة وحدة .. يا سلام عليكم .. (صارخاً) جول .. هدف .. هدف .. (خالد وخميس .. ومحمود .. أحمد يدخلون) ..

- الطيب : (مرحبا بحرارة) بالأحضان يا أولادى .. (يتأبطهم واحدا واحدا) ..
- منصور : (مذهولا) ...
- الطيب : قد عان .. تريس محصيص يا منصور .. مش قتلك وراك رجال .. رجال ما يرقدش الليل .. زود يا خالد إحكى لعمك شنوا صار ..
- خالد : ما فيش داعى للتفاصيل .. اللّ يهمنى عمى اللّ لائدين بيه ..
- الطيب : لا يا ولدى .. عمك لازم يعرف أشكون هو خميس وكيف قدرت أنت والشباب تجيروه ..
- خالد : خميس يا بوي إنسان تافه .. منحرف .. جبان .. اللّ إختاره باش يقوم بها الدور كل شىء فكر فيه إلّا شىء واحد ما حطاش في الحساب وجودنا كان يعتقد اللّ العيلة كلّها ضد عمى منصور وما فيه حد يوقف معاه .. اللّ صار العكس اللّ خلانى إنشك يوم صارت الحادثة .. حركات خميس والغمز والهمس اللّ كان بينه وبين رشيد .. بعد ما إستلم خميس الشنطة انسحبت من غير ما يشعر بيّا حد وسبقته وتبعته حتى لين وصل منزل رشيد .. فتحه صاحبنا وخش .. بعد ما تأكدت حضرت أحمد ومحمود أبناء عمى رمضان وفي أقل من نصف ساعة .. قنعنا خميس وجبناه في صفنا ..
- الطيب : شفت يا منصور التكتيك .. شفت صاحبك لوين وصل .. طلقت خدوجة وزوجك أخته ضد رغبة الجميع .. إتهمت ولدك .. العيلة كلّها عاديتها وآخر ما فيه نصبك فخ وارماك فيه ..
- خالد : بوي .. ما فيش لزوم للماضى .. ننسوه .. يلزمننا تفكروا كيف نحلّوا مشكلة خميس ..
- الطيب : تسلموه للشرطة يحققوا معاه ..

خالد : مش حل يا بوي .. خميس وعدناه ناخدوا فلوسنا وما نبلغوش فيه ..

الطبيب : معقولا نتركوه .. هذا إنسان منحرف تعدّى علينا .. لعب دور والي كلفه معروف إذا كان نتركوه معناها خلينا رشيد يبرطع زي ما يعجبه يدير لا يا خالد يا ولدي خميس مع رشيد لازم نسلموهم للشرطة والي تحكمه المحكمة راضيين بيه ..

خالد : فيه شيء لازم يكون واضح من يوم صارت الحادثة رشيد ما عادش يعرف خميس وين إمشي ..

الطبيب : كيف يعرفش .. مش قلت فتح حوش رشيد وخش فيه ..

خالد : نعم .. قلت .. لكن اللي صار بعدما خضرت احمد ومحمود تفاهمنا معاه قبل لا يوصل رشيد .. الراجل القيناه جبان .. طماع .. المبلغ اللي كان بيقبضه من رشيد ٣٠٠ دينار .. خلفيات العملية ما يعرفهاش رشيد بسّطله العملية ونظّمها له من غير تعب وزى ما شفنا نفذها ..

الطبيب : ديمه ديمه نصاب ومحتال ويلزم ما نروفوش عليه ..

خالد : فيه مشكلة خطيرة يا بوي .. مشكلة البضاعة ..

الطبيب : ما فهمتش ..

خالد : البضاعة اللي عمي طرف فيها ما عرفناش وين إمشت .. رشيد بالتأكيد يعرف لمنوا باع بدليل الغاية اليوم ما بان شيء .. الشيء الوحيد رشيد يعرفش خميس وين إمشي بالشنطة والفلوس ..

الطبيب : والشنطة والفلوس وينهم ؟ ..

خالد : قاعدين في مكان مضمون .. خميس إلقيناه ما مسهمش كان يستنى في رشيد باش يقبض مبلغه منه ويسلمه كل شيء ..

الطبيب : وانتم شنوا هو رأيكم في الموضوع ..

خالد : رأينا نسكرها لموضوع من غير ما إنبلغ الشرطة .. خميس وعدناه

مبلغ نعطوهوله . . العملية مش إنظيفة . . ممنوعة . . عمى ينضر

ويخش في سين وجيم رغم اننا حدرناه ونصحناه لكن . .

أحمد : اللي بنقوله كلام موجهة لعمى منصور واللى نتمناه ما يتكدرش منى

والدى كلکم تعرفوه إنسان بسيط . . طيب القلب . . فقير . .

محتاج . . جابه النصيب وخدم معاه . . عشرين سنة . . كنا صغار

ما ندرکش ما نعرفش تربينا زي ما تربوا الكثيرين زيّا . .

محرومين . . مسحوقين الصحيح يا عمى منصور ماكانش ضدك . .

كان ضد ممارساتك الفاسدة . . كان ضد تصرفاتك . . ولما روح

للبيت وأحکالنا على يعملک يکى . . متألم وهذا الأمر هو اللي

خلانا نتحمسوا مع خالد وفتحي والنتيجة والحمد الله درنا بعض

الشيء . .

الطيب : بارک الله فيکم . . اللي درتوه ما يخطرش على بال رشيد

ومنصور . . شفت يا منصور . . العقول النظيفة . . العقول

المخلصة . . ولو أنى موضوع خميس مانيش راضى عليه . . يلزم ما

تتركوشى للشرطة إنسلموه . .

خالد : خميس يا بوى تفاهمنا معاه ووعدناه نلقوله عمل شريف يعيش

وينتج ويبنى حياته من جديد ومن تاب تاب الله عليه . .

الطيب : خلاص . . ما دام خميس بيخطى الطريق اللي ماشى فيه هذا أكبر

شيء حققتوه تفضل البضاعة . . اشكون اللي شراها؟ . .

خالد : مش قلنا يا بوى اللي شراها يعرفه رشيد . .

الطيب : وافرض شدوها . . شنوا هو الحل؟ . .

خالد : القانون يا بوى واللى يغلط يتحمل غلطته . . المهم نتفقوا على

حل . .

الطيب : إحنا دويانا يا ولدى لكن عمك ما زال ماقال شيء . .

خالد : فيه إقتراح إناقشوه والرأى الأخير للجميع . . كلنا عرفنا اللي رشيد

جرثومة فساد ويلزم ينقام من الطريق .. لكن كيف انحوه؟ ..

الطيب : منصور يلزه ويبعده عليه ...

خالد : لا يا بوى عمى ما يقدرش ..

الطيب : ما يقدرش؟ ..

خالد : نعم .. لعدة أسباب .. أولا اخت رشيد قاعدة في البيت .. ثانياً

أسرار عمى كلها بين يديه .. زيد على ذلك رشيد لا عنده ذمه

ولا ضمير وعلى هذا يلزمنا نفكر زين ..

الطيب : سلموه للشرطة وافضحوه ...

محمود : لا يا عمى الطيب .. رأى عمى منصور يستمر معاه كأنه ما صار

شيء علاش يستمر معاه؟ .. فيه شيء .. راسخ في دهن عمى

منصور ومتمسك بيه اللي هو الكنز.

الطيب : الكنز؟ .. آه صحيح .. الكنز اللي حلم بيه ..

محمود : لكن عمى منصور ما زال ما سمعنا منه شيء ...

خالد : عمى .. الشباب قاعدين يستنوا فيك ..

منصور : (ينظر فيهم جميعاً ولا يجيب) ...

خالد : ما دام عمى ما قال شيء نتركوه يفكر .. الصورة واضحة قدامه

اللي علينا نستمرروا في عملنا .. نتبعوا كل كبيرة وصغيرة ما

ندخلوش وهو حُر يعمل اللي يصلح بيه .. متفقين يا شباب ..

الجميع : متفقين ...

خالد : يا الله .. توكلوا على الله ..

منصور : (صارخاً) لا .. ما تمشوش .. فلوسى وينهم؟ .. الشنطة وينها؟ ..

محمود : فلوسك قاعدين في مكان مضمون .. يوم تصفى حالك من الناس

اللي لائدين بيك يوصلوك ...

منصور : لكن هاذوا فلوسى .. كيف ما يرجعوليش ...

محمود : كانوا فلوسك .. أما الآن لا .. رد بالك تشكى والّا تحكى لواحد

هذا الموضوع إندفن اهني ويوم تصفى أمورك إحنا موجودين...

الطيب : يزيدك عز يا ولدى...

محمود : يا الله يا جماعة...

خميس : ... تسمحولى بكلمتين؟...

الطيب : تفضل...

خميس : ساعنى يا عمى منصور تزليحت.. رشيد زليحني وغريباً والأولاد

نجومك منه وزى ما قال خالد أنى تافه وطماع وعقل صغير.. لكن
من اليوم تبت بنخدم ونتيج ومن عرق جبينى إنعيش..

الطيب : هو هذا الصحيح يا خميس والحمد لله طحت بناس قادوك للطريق
الصحيح..

خميس : ساعنى يا عمى الطيب..

الطيب : مسامح يا ولدى... اللى تاب تاب الله عليه..

محمود : يا الله يا شباب.. (ينسحبون).. (رمضان يتجه الى الداخل)..

منصور : (وحده).. (يتأكد من إبتعادهم).. ترونت.. ترونت يا منصور

كيف هكّى.. معقولا رشيد يلعب بيّا لا.. مش ممكن هاذ دور
بيلعبوه.. فلوسك قاعدين في مكان مضمون بيعدوه على

منصور.. وينك يا رشيد.. معقولا إنسيبى.. أخته زوجتى

يرضى فيّا؟ مش بقولوا إنسيب ولا ابن عم قريب.. كيف

هكّى.. يا شينك دوخه معقولا إنفسد كل شىء.. الكنز..

الشيخ سحنون.. خميس.. مختار.. معقولا.. بعد هذا كلّ

إنسيب؟ كيف إنسيب؟.. لا.. لا يمكن الحلمة ثابتة.. (رمضان

يخرج من الداخل يتابع).. بوى قاللى رد بالك تفلت الكنز اللى في

الحوش.. كرش يا منصور بيديك ورجليك كرش مهما كانت

العراقل.. ياشينك ملعوب.. لكن أنى منصور الرجال تصارع

الأهوال والغوال.. الكنز لازم منه.. زعمه نتحصل عليه..

زعمه الكنز كبير!! لازم بيكون كبير.. اذا كان مش خاويه زير..

رمضان : (صارخا) باللطف إن شاء الله .. (ينسحب مسرعا) ..

منصور : (مذهولا يريد الكلام لكنه لا يستطيع) .. يا .. يا .. رمضان ..

ستارة...

الفصل الثالث

الشخصيات

منصور	
الطيب	: شقيقان
فتحى	
زكية	: أبناء منصور
خالد	
زينب	: أبناء الطيب
سالمه	: زوجة منصور الرابعة
رمضان	: عامل مع منصور
أحمد	
محمود	: أبناء رمضان

المشهد الأول

ترفع الستارة على حجرة شرقية.. مربعة الشكل.. على يمين المشاهد.. باب من النوع القديم يوصل الى بقية الغرف والطابق الأرضى.. في الواجهة مقعد مفروش مستطيل الشكل.. مقعد شرقى للجلوس.. مجموعة وسائد.. على الجدار قرشاة شرقية.. على الأرض فرشاة شرقية.. على الشمال.. المقعد سرير لشخص واحد بقربه دولاب صغير..

الوقت صباحاً...

منصور.. سالمة...

منصور : (يصول ويجول ذهابا وإيابا.. يلقي نظرة على حقيبتين كبيرتين) قتلك لا
لا.. اليوم خروج من البيت مافيش.. أمك آمس كنت
عندها..

سالمة : (واقفة بقرب الحقيبتين).. وأناى حلفت يمين واعر الليلة هالحوش ما
نباتش فيه..

منصور : حلفتى حلفتى.. منوا قالك إحلفى...

سالمة : (في دلع).. ترضى تحتنى يا منصور..

منصور : نقدر نعرف لاش بتمشى لأمك اليوم..

سالمة : (في دلع).. خاطرى ضيق يا منصور.. أعصابى متوترة...

منصور : في حد كدرك والّا نكد عليك...

سالمة : (تتصنع الغضب).. الله لا تربحك يا رشيد ولا تختم عليك كنت

في خيار الخير إرميتنى في جهنم وامشيت.. يا الله يا رشيد..

منصور : تعاركت انت ورشيد..

سالمة : يا ريت نقدر.. لكن ودينى.. ودينى هالحوش ما عاد قاعدة
فيه..

منصور : (حائر) الله هذه خيرها.. سالمة.. سويلمة فهمينى شنوا فيه..

سالمة : قتلك ارفعنى لأمى ما تناقشنش..

منصور : حاضر نرفعك بس لازم نفهم شنوا فيه.. فيه حد تعدّى

عليك .. فيه شيء حير عليك .. سالة .. سويلمة .. انت تعرفي
معزتك عندي لاحوه ولا مريومة ولا خدوجه خشوا قلبي زيك ..
انت احسن زوجة عندي انت كل شيء عندي في الوجود ..

سالة : كلامك صحيح يا منصور ..

منصور : طبعا صحيح .. اللي نقول فيه من وسط القلب .. قلبي سكتني
فيه يا سويلمة ..

سالة : تفكر يا عزيزي شنوا قتلى بعد ما تزوجنا بأسبوع ..

منصور : (متجاهلا) .. بعد ما تزوجنا بأسبوع .. أنى قتلك شيء .. أنى؟ ..

سالة : أيوه .. أنت .. تفكر يا منصور ..

منصور : نتفكر؟ .. أنى قلت حاجة؟ (يستدرك) ها .. ها تفكرت قتلك
أنت احسن زوجة .. وصلت هالحوش .. متعلمة .. متنورة ..
متفتحة .. منظمة .. فاهمة ..

سالة : هذا بس ..

منصور : رشيقة .. عفيفة نظيفة ..

سالة : لا يا منصور .. مش هو هذا اللي نقصده .. انت وعدتني بشيء
وما نفذتاش وعدتني بشيء وما وفيتش بيه ..

منصور : (يتجاهل) أنى؟ أنى وعدتك بشيء؟ .. (يستدرك) ها ها .. صح
تفكرت قلتيلي أنى امرأة متحررة .. حرة .. نحب نتج .. نحب
النشاط .. كنت نعمل عندي نشاط بنرجع لنشاطي زي ما كنت
وأنى سكتت ما قلت شيء ..

سالة : زيد تفكر يا منصور ..

منصور : (متجاهلا) ..

سالة : أنى نفكرك يا عزيزي ..

منصور : تفكريني؟ .. شنوا أنى نسيت؟ ..

سالة : (دلع) .. منصور على منوا بتعديه .. زيد تفكر ..

- منصور : (فترة صمت يتفكر) ها ها تفكرت .. قتلك هذا الحوش ما هوش
لائق بيك ..
- سالة : هذا بس؟ مش قتلى بعد الأربعين ننتقلوا في حوشنا اللي في المزرعة
اللي قاعدين يصلحوا فيه ..
- منصور : ها .. ها .. صح .. تفكرت ..
- سالة : وفات الأربعين وفاتوا الستين والثمانين وما صار شئ (تتصنع
الغضب) يالله يا رشيد .. الله لا تحتم عليك .. إرميتني في جهنم
وامشيت يالله يا رشيد كيف ما رميتني في النار ينتقم منك الجبار ..
- منصور : سالة .. ما ترعشيش نفسك .. تّوا كنتى لا بأس عليك ..
- سالة : (بحدة) قتلك أرفعنى لأمى أرفعنى لأمى ودينى الليلة هالحوش ما
إنبات فيه (تتصنع البكاء) عييت يا منصور ملّيت فديت ريقى شاط
من العياط .. ما عادش عندى أعصاب تتحمل .. (تستمر في
البكاء) ..
- منصور : (يوحوح) لا حول ولا قوة الا بالله .. سالة .. سويلمة .. سلّومتى
شوية صبر وما جائيك الا الخير ..
- سالة : الصبر يا خالقي الصبر ..
- منصور : اللي يصبر ينال يا سالة .. تعرفى لو يتحقق الحلم اللي أنى حلمت
بيه منوا ما زال يلحق علينا .. أنى واياك نعيشوا في نعيم ..
- سالة : خلاص يا منصور .. حلفت يمين واعر ما نتراجعش فيه ..
- منصور : والكنز يا سالة نخلّوه؟ معقولا إنسيبوه بعد هذا كله؟ مش وعدتك
بعد ما نحصلوا كنزنا هالحوش نتركوه ..
- سالة : نبّى راحتى يا منصور .. صحتى .. عييت يا منصور من الصبح
للّيل وأنى نرغى ليل ونهار واياهم خصام وانت الدّوه مش
عليك ..
- منصور : خصام؟ همّ خاصموك؟ كيف هكى .. أشكون همّ اللي
خاصموك؟ أنت أغلى إنسانه عندى في الدنيا .. انت نواره

الحوش .. لا .. حوّه ولا مريومه ولا خدوجة يجوا في ظفرك اللّ
تلوحيه .. انت انت مستعد على خاطرك نخش النار .. مستعد
نخاصم قبيلة بحالها ..

سالمة : (في دلح) صحيح تخاصم قبيلة على خاطري يا منصور ..
منصور : أيوه نخاصم .. بروحي نفديك تّوا شنوا إندير ليهم اليوم يومهم
هالكمشة ملاعين ..

سالمة : لكن أنى حلفت يا منصور والله والله ... اللّيلة هالحوش مانى
قاعدة فيه (بحدة) قتلك ارفعنى لامّى ما عادش بنقعد ..

منصور : حاضر .. حاضر ما ترعشيش .. تّوا نرفعك .. (بتلطف) إسمعى
تّوا خشى غرفتك خلّينى إنفش غلّى فيهم .. لازم يفهموا اللّ انت
سيده البيت لازم يفهموا كيف يحترمك هالكمشة مخربّين ...

سالمة : إسمع أنى نازلة نستناك في وسط الحوش .. ما نبش نسمع شىء
وقت اللّ تكمل معاهم جيب الشناطى معاك .. (تشير الى
الحقيتين) ..

منصور : شناطى؟ ...

سالمة : أيوه .. الشناطى اللّ قدامك ...

منصور : شناطى؟ (نحو الحقيتين يزن ثقلهما) شنوا فيهم يا سويلمة ...

سالمة : حوائجى الكبار والصغار .. مصيوغاتى .. دهبّى وكل ما يلزمنى
بنرفعه معاى ..

منصور : (في حيرة) رافعتهم؟ (بتلطف) سويلمة بترفعيهم الواه؟ ..

سالمة : عندي فرح .. عرس بنت عم جدي بنقعد فيه سبعة أيام بنحضره
من أوله إلا آخره مانيش راجعة لين يفض ..

منصور : سبعة أيام .. إنهن عليك تحلّينى سبعة أيام بروحى .. سبعة
أيام .. (فترة صمت وتبادل نظرات) حتى هذا رأي .. باهى فيها
خيرته توكلّى على الله بعدما ما نتفاهم معاك نجيك ...

سالمة : ما تعطلّش يا عزيزي .. الكلام معاهم ما يفيدش .. ما ترعشش

منصور : (يتأكد من إبتعادها) لا حول ولا قوة الا بالله .. (نحو الحقائق يزن ثقلهما) شورها لمت اللّى هناك (قلقا) يا شينك ورطه (محاولا فتح الحقيبة) سكرتهم .. زعمه ناوية الشرّ عرس بنت عم جدها .. امنين طلع .. سبعة أيام؟ كيف هكي .. نسكت وانغمض عيونى .. زعمه ناوية شىء في دماغها إديرها؟ (يصفع بيديه وجهه) خسارتك يا منصور .. ما عندكش بخت .. ثلاث مرات تزوجت وطلقت والرابعة قاعدة تدرجح في الطريق كلّ منهم هالملاعين .. كلّ منهم .. (نحو الباب ينادى) زينب .. زينب .. يا زينب ..

زينب : (من بعيد) .. نعم .. منصور : تعالى نبيك .. (قلقا) مصائب عرس بن عم جد أمها؟ عرس سبعة أيام حوائجها الكبار والصغار .. الذهب كلّ رفعاته (نحو الحقائق) الذهب دهبي .. زعمه؟ (يخط على رأسه) تّوا هذا مش بلاء أزرق على رأسى .. (زينب داخلة وهو يخط على راسه) (تقاطعه) ..

زينب .. منصور...

زينب : ناديت يا عمى .. منصور : أنى؟ أنى ناديت (يستدرك) ها ها .. أيوه ناديت ... زينب : تفضل يا عمى ... منصور : (يتطلف) قوليلي يا زينب الحق وما درقى عليا شىء .. انت يا زينب الانسانة الوحيدة الموجودة في هالبيت اللّى نعزها وانقدرها ...

زينب : صحيت يا عمى ... منصور : انت يا زينب الانسانة الوحيدة الصادقة الطيبة اللّى ديمه تقول في الحق قوليلي يا بنتى شنوا قاعد بصير في هالحوش في غياى .. نبيك ما درقى عليا شىء ..

- زينب : (براءة) .. إنظفوا الحوش .. إنظموا .. دياره الأربعة كلّها دار بعد دار نغسلوا الطناجر والقذور والمعاجن ما نخلّوش حتى حاجة ما نظفوهاش ..
- منصور : وبعدين ..
- زينب : نغسلوا الحوائج وننشرهم على الحبال وانطبيوا الغذاء والعشاء وبعد الظهر نخطوا عالة الشاهى وانهدرزوا واذا كان فيه جوائح بيوا الحديد نحددوهم .
- منصور : وبعدها تخطوا عالة الشاهى شنوا يصير ..
- زينب : نهدرزوا يا عمى .. لعب وضحك وكلام حلو ..
- منصور : لا .. يصير فيها القيل والقال والكلام البطال وتقييد الأحوال بعدها تتلاطحوا ويصير فيها الخصام ..
- زينب : خصام؟ .. إحنا واشكون .. يا عمى ..
- منصور : (بصوت منخفض) .. سالمة ..
- زينب : (مبتسمة) الأستاذة سالمة يا عمى ..
- منصور : أستاذة ..
- زينب : هكّى قالت .. من يوم جت قالت أنى أستاذة .. عندي شهادة هكّى كبرها (مثرة بيدها) هكّى كبرها ..
- منصور : عندها شهادة؟ ..
- زينب : هكّى كبرها .. نبهت علينا وقالت كل واحد ومقامه .. ما نسمعش لأى واحدة منكم تنادينى باسمى .. اللّ يبينى يقول ..
- أستاذة سالمة ..
- منصور : أستاذة؟ .. أستاذة فاش؟ ..
- زينب : ما ندرى .. هكّى قالت .. خفنا منها ما قريناهاش .. ما نكلموش فيها وما إدير معانا فى شىء .. الحوش كلّ من أوله لآخره أنى وزكية قائمين بيه ..
- منصور : غريبة .. شنوا ما ادير فى شىء ..

- زينب : زي الراجل يا عمى .. تغسل يديها وتاكل .. بعد ما تطلع يا عمى كل يوم تلبس حوائجها وتطلع في جرتك ..
- منصور : تطلع؟ ..
- زينب : كل يوم صبح وعشية .. في الحوش ما تقعدش إلا وقت أنت موجود ..
- منصور : كيف هكى .. يصير هذا كله وأنى ما ندريش ..
- زينب : تحييها وحدة إسماها الأستاذة إفتخار ويطلعوا جميع ..
- منصور : إفتخار؟ .. أمين طلعت الأستاذة إفتخار؟ ..
- زينب : ما ندرى .. قالت صديقتها قرت معاها في الكلية وتخرجوا جميع ..
- منصور : هي سالمة قرت في الكلية؟ ..
- زينب : وعندها شهادة هكى كبرها .. خوي خالد مضائق منها لكن ما يبيش يكدرك غمض عيونه وسكت ..
- منصور : وزكية ما قالت شىء ..
- زينب : زكية يا عمى .. غمضت عيونها وسكرت أودانها وخيبت فمها ..
- بوى هكى وصاها وحتى فتحي زيها .. بوى قال مافيش ولا واحد منكم يكلمها إخدموا تحملوا إعتبروها مش موجودة .. المهم خوى منصور يرتاح ردوا بالكم تنكدوا عليه ..
- منصور : بوك قال هالكلام ..
- زينب : قاله يا عمى وهذا اللى صار .. ما فيه حد يقرب فيها ولا يخالط فيها ..
- منصور : (حائرا) أستاذة؟ قرت في الكلية أستاذة فاش؟ شىء يحير ..
- زينب : ديمة تقول انتم كمشة جهال متخلفين .. ما تفهموش محكومين محبوسين في الحوش زي الفيران .. قالت أنى منصور شارطة عليه ما يقدرش يقول قدامى آه .. متساوين أنى وإياه في الحقوق ..
- زي زيّه ..

- منصور : وآمته صار هالكلام...
زينب : من يوم جت يا عمى.. كل يوم تعطى فينا في درس.. تتكلم على حقوق المرأة تتكلم على حرية المرأة كلامها حلو يعجبنا.. فهمنا منها هلبة حاجات باهية لكن..
منصور : عال.. حتى هذه ما تلوحهاش يا منصور.. صار تفتحلكم في عيونكم..
زينب : تبى الحق يا عمى كلامها حلو.. قالت عليك وعلى بوى كلام ما نقدرش نعاوده..
منصور : شنوا قالت؟.. (خالد من بعيد ينادى)..
خالد : (ينادى) زينب.. يا زينب..
زينب : (مسرعة نحو الباب) أنى هنايا يا خالد قاعدة مع عمى..
منصور : قوليلي شنوا قالت عليا وعلى بوك..
زينب : عيب يا عمى كلام كبير ما نقدرش نعاوده..
منصور : شنوا شتمتينا؟.. قالت كلام بطل..
زينب : ما نتكدرش يا عمى لو نعاوده..
منصور : لا ما نتكدرش.. قولى..
زينب : قالت.. قالت عمك منصور وبوك.. (خالد داخلا)

خالد... منصور.. زينب...

- خالد : صباح الخير يا عمى..
منصور : خير..
خالد : لا باس يا زينب.. صار شئ لا سامح الله.. (تبادل نظرات) عمى لا باس خيرك مكشّر.. الصراحة وقت خشيت الحوش والقيت الأستاذة واقفة في وسط الحوش إنخضيت.. صبحت عليها بالخير فنصت فيا وما ردتش..
زينب : ماعليش يا خالد.. هذه أستاذة ما تتكدرش منها.

- خالد : عمى .. بتترجلك إن شاء الله ترديش في وجهى .. هو في الحقيقة يصير الوقت مش مناسب لكن ما عlish .. انت قلبك كبير ما أظنش ترفض ...
- منصور : قول ..
- خالد : الحقيقة فيه مناسبة طيبة قمنا بعمل ونجحنا فيه والوالد وعدنا اذا كان ننجحوا يدبعلنا خروف ونتردوا بيه تلتهم العيلة وانقضوا مع بعضنا يوم جميل ..
- منصور : وشنوا دخلنى في الموضوع .. بتتردوا ماشاركم حد ..
- خالد : طالبين يا عمى منك الحوش اللّ في المزرعة .. بودنا زردتنا نقضوها في مزرعتك وانت تكون معانا والعيلة كلها ..
- منصور : وشنوا المناسبة يا سى خالد ..
- خالد : مناسبة تعرفها يا عمى ..
- منصور : أنى نعرفها؟ ..
- خالد : (مبتسماً) .. أيوه .. حكاية خميس وغيره والوالد شرالنا اللاّزم ما داينا غدوه جمعة تكون معانا ..
- منصور : واشكون ماشى معاكم ..
- خالد : كلنا يا عمى .. عمى رمضان وصغاره وعيلتنا ..
- منصور : حتى هذا رأى باهى تّوا انشوفوا .. هو فيه شيء دايا نتكلم معاك فيه راس براس
- خالد : تفضل يا عمى .. إنزلى يا زينب .. ردّى بالك .. الأستاذة راك تحيرى عليها .. زي ما وصاك بوك ..
- زينب : حاضر ... (تشحب) ...
- خالد ... منصور ...
- منصور : (حائراً) استاذة؟ استاذة فاش؟؟ شيء يدوخ ..
- خالد : عمى .. لا باس .. خيرك تتكلم بروحك ..

- منصور : أنى؟ أنى تكلمت بروحى؟ ..
- خالد : أيوه.. أستاذة أستاذة فاش شىء يدوخ.. هذا الكلام كنت تقول فيه ..
- منصور : أنى تكلمت بروحى؟ (يستدرك) ها.. ها تفكرت.. هي أستاذة فاش ..
- خالد : الله أعلم.. إحنا يا عمى من يوم جت هالانسانة حاولنا بقدر الامكان نتبعدوا عليها.. بحثنا باستمرار على راحتك وهناك اللّ يهمننا تكون سعيد رغم إنها يا عمى متسلطة عليهم.. تهين فيهم تحتقر فيهم.. تتبجح عليهم اللّ هي أستاذة.. لكن هُمّ قعدوا صامدين صابرين في سبيل راحتك وسعادتك كل شىء يهون..
- منصور : أنت عندك علم تطلع كل يوم..
- خالد : عندي علم ونعرف وين تمشى ومع اشكون..
- منصور : وين تمشى؟
- خالد : وين ما يرفعوها رجليها.. حشيشتها الأسواق تخش سوق وتطلع سوق.. ما أظنش فيه سوق والّا جمعية اللّ ما تعرفهاش..
- منصور : غريبة..
- خالد : تشرى باستمرار.. أظن عندها من الفساتين والكنادر يلبسوا طوابير واخده حاجتها وحاجة غيرها..
- منصور : فيه شىء تاني تعرفه..
- خالد : فيه يا عمى.. سر غامض مافيش ولا واحد في العيلة يعرفه إلّا أنى.. هذا السر كتمته واحتفظت بيه لنفسى ما نبّيش إنقوله ولا إنطلعه هذا السر يهملك لو نحكيه لوك يصير يآثر عليك..
- منصور : (حائراً) سر؟.. يهمنى ويآثر عليا؟..
- خالد : نعم يآثر عليك..
- منصور : نقدر نعرفه..
- خالد : لا.. ما يصح أنى نبحت على سعادتك يحى منه إنكد عليك أنت

- عمى مهما كانت الخلافات بيناتنا ما نرضاش فيك ..
- منصور : حسك خوفتني يا خالد .. قول يا ولدى شنوا هو السر ..
- خالد : لا .. مش في صالحك ..
- منصور : كيف هكّى .. خالد انت متأكد من الكلام اللي قاعد تقول فيه ..
- خالد : متأكد .. مائة في المائة ولو أنى ما زال ما قلت شىء ..
- منصور : مش قلت فيه سر؟ ..
- خالد : أيوه قلت ..
- منصور : باهى قوله وريحنى ..
- خالد : عمى .. أنت طلقت ثلاثة نسوان واتهمتنا اللي كنا السبب في قلة راحتك .. ما يصح الآن إنكون السبب في خراب بيتك زي ما قلت ..
- منصور : خيلنا في اللي فات .. نبى نعرف شنوا هو السر اللي أنت محتفظ بيه ..
- خالد : عمى .. توعدني وعد صادق يقعد بينى وبينك وما إطلعاش ..
- منصور : نوعدك ..
- خالد : توعدنى تحقق بنفسك في هذا الموضوع بعد ما نعطيك رأس الخيط ..
- منصور : نوعدك ..
- خالد : زواجك يا عمى بالأستاذة زواج ما هوش صحيح ..
- منصور : كيف يعنى ..
- خالد : اللي بنقوله ماهوش مبني على أساس متين .. زواج مصلحى زواج مادی .. الأستاذة اللي تدعى الأستاذية ناصبة فخ .. تزوجت وطلقت ثلاث مرات وأنت الزوج الرابع وماكش الأخير ..
- منصور : مش معقول .. تزوجت مرة واحدة بس وزوجها اللي مات كنت نعرفه صاحبي مقاول كبير ..
- خالد : قتلك تزوجت ثلاث مرات وعندى الاثباتات .. خالها رشيد

شريكةا في جميع العمليات الزوجية ..

منصور : خالها رشيد؟ .. شنوا قاعد تقول ..

خالد : قتلك عندى الاثباتات .. خالها رشيد وأمها طينة وحدة .. الأم

من نوع إستغلالى لا دمة ولا ضمير تنصب فخها هي ورشيد

والأستاذة تمثل الدور .. تزوجت واطلقت زي ما قتلك وما

إطيحش إلا على الكتف السمين .. تغرف منه واتجيبها الطريق ..

منصور : (حائرا) .. مش معقول ...

أصوات : (وراء الكواليس ... تصفيق وهتافات) ..

منصور : (مذهولاً .. الجميع يدخلون وهم يصفقون) ..

الطيب .. فتحي .. زكية .. منصور .. خالد ...

الجميع : (يهتفون خالد وتبادل التحيات) ..

الطيب : يقولوا يا منصور .. تكلب المكلوبة وما تأكلش شحم درعائها ..

منصور : ما فهمتش ..

الطيب : خسارتك يا منصور ما تنساش عوائدك زي اللي يتمرغدوا وينسوا

التعب ..

خالد : بوي .. ما فيش لزوم .. عمى تقدمتله بطلب وما زال نستنى في

الرّد ..

الطيب : ما تعباش يا ولدى ما تلقاش رد ولهذا غيرنا رأينا ..

خالد : شنوا ماصارش من الزرده؟ ..

الطيب : زردتنا إنديروها في حوشنا .. الخروف بعد الظهر ندبحوه ..

نشوا اللحم ورقصوا وانغنوا الليلة نبوها للصبح ..

سالمة : (من بعيد تنادى) منصور .. يا منصور ..

الطيب : الأستاذة تنادى يا منصور ..

منصور : (نحو الباب) هانى جاي .. (نحو الحقائق يأخذها) ..

الطيب : صفقة جديدة يا أولاد ..

- منصور : (يترك الحقائق) شنوا قلت ..
- الطيب : هو أنى قلت حاجة ..
- خالد : بوى .. أرجوك .. مش قلنا عمى تهمنا سعادته وراحته وهناه ولاش الدوه الزائدة ..
- الطيب : صح .. لاش الدوة الزائدة ..
- خالد : عمى توكل على الله .. الرزق رزقك والمال مالك .. دير زى ما يعجبك توكل على الله ..
- منصور : (يأخذ الشنط .. تبادل نظرات بين الجميع .. ينسحب) ..
- زكية : (نحو الباب تتأكد من إبتعاده) .. اللّى هناك لمّاته يا عمى .. أربعة شناطى عبّتهم .. دولابها ما خلّت ولا حاجه فيه .. الذهب كلّه رفعاته ومش بعيد خدت فلوس من خزنة بوى ..
- الطيب : أنت متأكدة ..
- زكية : نعم .. بوى عنده حبوب النوم مرة مرة يستعمل فيهم وأنى قائمتهم في مكان باش ما يأخدهمش ديمه .. الحبوب البارح انقاموا من مكانهم ما لقيتهمش ..
- خالد : رأيك البارح أخذاهم ..
- زكية : بالتأكيد أخذاهم .. معقولا تفرغ الدولاب وتعبى الشناطى من غير ما يفيق بيها وما يقول شىء ..
- الطيب : قلتي أربعة شناطى وهو إنزل باثنين ..
- زكية : شنطتين قاعدين في غرفتها سكرتهم ورفعت مفاتيحهم ..
- الطيب : إسمعى .. نزليهم في دارى ..
- زكية : حاضر يا عمى .. تعالى يا زينب معاى .. (ينسحبان) ..
- فتحى : مشكلة يا عمى .. ما زال ما عرفناش كيف هالرجل إنجيويه للطريق ..
- الطيب : الصبر طيب .. اللّى قررناه واتفقنا عليه بإذن الله بنفدوه .. انتم والحمد لله رجال ماكمش محتاجين بيه ..

فتحى : بودنا يا عمى كل شىء يتم برضاه ..
الطيب : بودنا .. حَدْ جهدنا نعملوه في النهاية اذا كان ما قدرناش أمرنا
لله ..
زينب : (داخلة) ..

زينب .. الطيب .. خالد .. فتحى ...

زينب : بوى .. عمى رمضان جاء ..
الطيب : مرحبتين بيه .. قوليله يتفضل ..
زينب : حاضر .. (تسحب) ..
خالد : اللّى محيرني يا بوى الواه عمى ما يقنعش لدرجة أنى إنشك أن هذا
الانسان صائر له خلل في عقله وامريض ...
الطيب : خَلَلْ في عقله لا .. لكن مريض هذا صحيح .. خوى مرضه
خبث الطمع .. يكرش في العنكبوت .. تهمه مصلحته وبس إيه
لو نحكيكم شنوا عدّيت منه ..
رمضان : (داخلا) ..

رمضان .. الطيب .. فتحى .. خالد ...

رمضان : السلام عليكم .. (الجميع يتبادلون التحية) ..
الطيب : أمالا جاباتك الزردة ..
رمضان : لا .. جابنى .. وين منصور ..
الطيب : إمشى يوصل الأستاذة قالوا عندها عرس بنت عم جدها
خالد : عمى رمضان قال جابنى وغير الموضوع ..
رمضان : قولوا الله يثبت علينا عقولنا لين نوصلوا قبورنا ..
فتحى : فيه شىء يا عمى رمضان؟ ..
رمضان : فيه .. اللّى جابنى الشيخ سحنون ..
الطيب : الشيخ سحنون؟ .. شنوا يكون ..

- رمضان : بروال كبير . رشيد قاللى هذا الشيخ يتعامل مع النجوم
والشياطين يتغذى في الأرض ويتعشى .. في القمر ..
- الطيب : حلو يتعشى في القمر ..
- خالد : لعبة جديدة يا بوى ..
- رمضان : حكاية الكنز ما ماتتش .. الشيخ سحنون قاللى منصور يعرف
مكانه وين .. وهو اللّ يطلعه ..
- فتحي : حكاية حلوة يا عمى رمضان نورنا الله يخليك ..
- رمضان : في المدة اللّ فاتت بعنى رشيد قاللى إمشيله واستناه وما تجيش الا
بيه عرفنى بحوشه وين وبعدها إمشيت ..
- فتحي : وجبته ..
- رمضان : لا .. خلاى نستنى قدام الحوش ساعتين واعتذر .. قعد يمثل عليا
ركبني الشك حسيت اللّ فيه لعبة بين رشيد وسحنون ما ندرقش
عليكم حكيت لأولادى أحمد ومحمود وأبدت أنى وإياهم وراء هذا
الشيخ لين عرفنا حقيقته شنوا يكون ..
- الطيب : فخ جديد ..
- رمضان : بالضبط .. فخ ومن نوع جديد ..
- الطيب : انت ما قلت شيء لمنصور ..
- رمضان : لا .. ماقلتلاش وحتى لو إنقوله ما يصدقنيش .. هو لو أعطاني
حقوقى والشهادة رانى إمشيت ..
- فتحي : الشهادة واتيّة ناقصة توقيعه وحقوقك حضرتها آخر الشهر باذن الله
كل شى يتم
- رمضان : بارك الله فيك يا ولدى ..
- الطيب : كمّل لنا خرافة الشيخ سحنون ..
- رمضان : خرافة كبيرة .. السيد منصور مكرش بيديه ورجليه البارح جاني
وترجاني نمشى لسحنون قاللى رشيد مسافر وما قاليش ..
- الطيب : رشيد مسافر عندكم علم يا أولاد ..

- فتحي : لا يا عمى . . .
- رمضان : رشيد على حسب كلام منصور ليه أربعة أيام مسافر . . اللي صار
إمشيته خلاّنى ساعتين نستنى فيه وفي الأخيرة قاللى اليوم ما
نقدرش وغذوه اذا كان تمكنت إنجيه . .
- الطيب : أهلا وسهلا بيه . . يا مرحبتين . .
- فتحي : مهازل . . آخر المطاف الدجالين . . .
- الطيب : كل ما يصير من رشيد عرف نقطة الضعف وين وبدى يضرب
على الوتر الحساس . .
- خالد : يضرب ما يضربش إحنا جاهزين . . انت يا عمى رمضان
حضرلنا الشباب يجوا يشاركوا فرحتنا اليوم . .
- رمضان : الساعة قداش بتتسقدوا للمزرعة . . .
- الطيب : غيرنا رأينا زردتنا في حوشنا . . الليلة للصبح إرقيص واشطيح . .
(زكية وزينب تنسحبان) . .
- تنطفئ الأنوار

المشهد الثاني..

الوقت بعد الزوال...

الطيب.. خالد.. احمد.. محمود...

- فتحي : (بيده العود يعزف ويغنى) ..
الطيب : (بيده الطبله) ..
خالد : (بيده الدف) ..
الجميع : (ينشدون ويغنون أغنية شعبية قديمة) .. إنس الطمع ينساك فقر
الدنيا.. الخ.. الخ...
منصور : (داخلا يتوقف يتابعهم)

منصور.. الطيب.. خالد.. احمد.. زكية.. زينب...

- منصور : (يقاطعهم) ما شاء الله.. ما شاء الله.. غاب القط العب يا فار..
ما شاء الله العم يغنى والأولاد والبنات يصفقوله ومش هذا
بس.. حتى أولاد رمضان لحقوا فينا طريق.. شورة لاعاد فيه
حشمة ولا عاد فيه احترام..
محمود : (يقف) الف مبروك يا عمى الطيب.. ساحنا يا عمى منصور كنا
معزومين على هذا الحفل البهيج.. كل شىء بالبركة...
منصور : (مذهولا)..
احمد : (يقف) الف مبروك يا خالد.. صدقنى فرحتك من أعماق أعماق
قلبي... (يتأبطان بعضهما)...
منصور : كل شىء بالبركة.. ألف مبروك..

- الطيب : خيركم يا ولاد.. مش قلنا الليلة للصبح شطيح وارديح .. زردتنا ما كملتش ..
- محمود : قاعدين يا عمى الطيب.. تلقانا في دار خالد.. (منصور) كل شيء بالبركة يا عمى منصور.. (يضافحه وهو مذهول) ..
- أحمد : تهانينا يا فتحي وانت يا خالد.. (منصور) .. كل شيء بالبركة الحمد لله على هالساعة المباركة.. (ينسحبان) ..
- خالد : هيا يا شباب.. هاني جائيكم...

منصور.. الطيب.. خالد.. زكية.. زينب...

- منصور : (حائثا) ألف مبروك؟ .. كل شيء بالبركة ..
- الطيب : خيرك تلهوت يا منصور.. هذه بداية يا منصور والخير قدام ..
- منصور : بداية؟ الخير لقدام؟ ..
- الطيب : بداية الأفراح وليالى الملاح.. هذا وين بيختر يدامها وبتوللى بركوکش بالصحيح.
- منصور : بركوکش؟ .. شنوا قاعد تقول يا طيب؟ ..
- الطيب : انت لو عرفت الأولاد علاش بيباركوا لبعضهم تتحصرم .. يصير لك إنفجار ومش بعيد مصارينك ترميهم؟ ..
- منصور : مصارينى نرميهم؟ ..
- الطيب : (في هس مع ابتسامة) الأولاد.. إلقوا الكنز..
- منصور : نعم؟ ..
- الطيب : قتلك إلقوا الكنز واتقاسموه ..
- منصور : مستحيل ..
- الطيب : مش ممكن.. وين إلقوه.. سنين وأنى نبحت عليه كيف إلقوه؟ ..
- الطيب : كيف إلقوه ما نعرفش.. قبل لا تجى بشوية اللى هناك قاموه..
- خساره حصانك مش جرای..

- منصور : كيف هكّى يتقاسموه .. وأنى يا طيب ..
- الطيب : على الشط جابوك ..
- خالد : كنز كبير يا عمى .. لا هو خابية ولا زير ..
- الطيب : زغرودة يا بنات .. أقهروا الحساد .. (صوت زغاريد وراء الكواليس)
- شِدّ العود يا فتحي .. أعزف .. (بغنى) ليلة في العمر يا محلاها
والله عمرى ما نساها (أغنية شعبية قديمة) ..
- منصور : (حائراً) إلّقوه وتقاسموه .. لكن ..
- الطيب : لكن شنوا ..
- منصور : (متوسلاً) .. أنى يا طيب ..
- الطيب : انت لا شىء .. طار الحمام وصفقى ياوزّه .. الأولاد إلّقوه وأنى
تنازلتهم عليه ..
- منصور : مش معقول .. بأي حق تتنازلهم عليه .. كيف .. كيف ..
- الطيب : عيب يا منصور .. هاذوا أولادنا .. لا فيهم عدو ولا ولده بعدين
انت تعرفنى المال أنى وياه مش صحاب .. اللّى يهمنى الأولاد
يكونوا ملحومين متحدين ..
- فتحي : ربنا يخلّيك يا عمى ..
- منصور : لكن يا طيب هاذوا إصغار ما يعرفوش قيمة الكنز ما يحافظوش
عليه ..
- الطيب : بالعكس يحافظوا عليه أكثر منى ومنك .. واحد جاهل زيّك وزبى
صحيح ما يعرفوش بقيمته .. أما هُمّ شباب متعلم كل واحد
منهم يعرف اللّى ليه واللّى عليه (للأولاد) .. صح يا شباب ..
- الجميع : أيوه صح ..
- منصور : (حائراً) مش معقول .. وأنى .. وأنى .. لا .. لا .. ما تتنازلش
أبدا .. صغارى ما دامنى حى ما يملكوا معاى شىء ..
- الطيب : وهُمّ بالفعل معاك ما يملكوا شىء .. منك ما خدوا شىء اللّى إلّقوه
دوّروا عليه زي ما دورت أنت وأنى لكن طلّعوا شاطرين اكثر منى

- ومنك طلعه وتقاسموه..
- منصور : وبأي حق يتقاسموه؟ .. كيف ترضاهم...
- الطيب : راضى يا خوى.. أحلى على قلبى من عسل..
- منصور : (متوسلا) سنين وأنى تاعب فى جرة الكنز.. معقولا بها السهولة
نتنازل عليه لا.. لا يمكن.. حقى أبدا نفرط فيه...
- الطيب : خلاص.. أويته المحاكم قدامك.. إشكى اذا كان عندك حق
طالب بيه صح يا أولاد.
- الجميع : أيوه صح..
- منصور : (حائرا) .. محاكم!! نشكى!!..
- الطيب : أيوه.. إمشى قوللهم أولادى وأولاد خوى إلقوا كنز فى حوشى
وتقاسموه.. عفوا.. فى نصف الحوش ما هو عندك النصف
النصف بس.. صح يا ولاد..
- الجميع : أيوه صح...
- منصور : (حائرا) نشكى؟ أنى نشكى؟ (بإصرار) أيوه نشكى وعلاش
مانشكيش.. من حقى نشكى واللى عنده حق يأخذه..
- الجميع : (يصفقون وزغاريد) ..
- منصور : شورهم هازئين..
- الطيب : لا.. متأسفين ومتألين.. (فترة صمت تبادل نظرات) قوللى يا
منصور.. انت عرفت الكنز وين إلقوه.. قصدي فى أية جهة
الجهة اللى تسكن فيها حضرتك والا اللى نسكن فيها أنى ماهو
الحوش مقسوم على اثنين.. نصف ليا ونصف ليك..
- منصور : مش مهم نعرف وين إلقوه.. وين إلقوه إلقوه..
- الطيب : لا.. ما هو بينشدوك..
- منصور : ينشدونى؟..
- الطيب : طبعا لازم يعرفوا وين إلقوه.. شنوا تجاوبهم.. صح يا أولاد..
- أحمد : أيوه صح..

- منصور : (مروغا) .. وهَمَّ وين إلْقوه
- الطيب : ريت كيف ما تعرفش يا غشيم
- منصور : (متوسلا) أرجوك يا طيب وين إلْقوه؟
- الطيب : (في همس) هذا سر .. سر غامض
- منصور : (متوسلا) أنى خوك يا طيب ولد أمك وبوك ترضى يحرموني من حقى خلك عاقل يا خوى .. فكر معاى
- الطيب : هذا سر يا خوى والسر يحتفضوا بيه .. بعدين ما يرضوا يقولوك عليه .. صح يا أولاد
- أحمد : أيوه صح
- الطيب : هيا يا أولاد ماعادش عندنا كلام بنقولوه
- أحمد : (ينسحبون وهم يصفقون ويغنون .. زغاريد وراء الكواليس)
- منصور : (وحده مذهولا) الكنز إلْقوه .. مش معقول مستحيل إلْقوه هاذوا ملاعين لازم إتفقوا يلعبوا هالفصل .. منصور ما يتعداش عليه لا يمكن .. (يستدرك) لكن .. أنى عمرى ما لقيتهم ملتَمين وفرحانين .. يغنوا ويرقصوا الواه؟ .. (باصرار) .. هاذوا لازم إلْقوه زعمه نشكى!! شنوا نقول .. بالكش الشكاية تهلكنى ننضر .. ما هو الكنز إلْقوه تحت الأرض اللى تحت الأرض ما هوش ليا .. للمجتمع ياشينك دوخه (يرقى على الكرسي .. يفكر) (يقفز) لا .. لا .. أنى منصور .. مش ممكن حقى نتنازل عليه .. لكن كيف يلزم نبحت على الطريق اللى توصلنى .. (نحو الباب) .. ينادى) .. فتحي .. فتوحه .. تعال يا ولدى .. فتوحه .. أنى مريض (مسرعاً يرمى على السرير) .. آه .. آه .. بنموت .. (فتحي داخلا) فتوحه تعال يا وليدى

فتحي ... منصور...

فتحي : بوى .. لا باس عليك .. خيرك .. خيرك .. باسم الله الرحمن

الرحيم . . (يضع يده على جبين منصور) لا حول ولا قوة الا بالله
العلی العظيم رأسك سخون تقول طلقت فيه النار . . توا كنت لا
باس عليك . .

منصور : (يتألم) آه آه اللى جاني جاني . . شورني رعشت (ينخض ويرتعش)
رعادية راكبتني الدنيا كلها تلف واودور . .

فتحي : تحصنت بالله . . الانسان ما عنده في نفسه شيء (يضع يده على جبين
منصور) ليء ليء . . رأسك تقول عليه فرن . . حرارة غريبة . .
سبحان الله نجيبك طيب . .

منصور : طيب شنوا يا ولدي . . الطيب ربّي آه آه طول عمرى شاقى
الراحة ما ضقتهاش خوى الطيب بيلاه . . حوّه مريومة . . خدوجة
كلهم زادوني غمّ وهمّ وحلت يا فتوحة . . سالمة سيّبتني وامشت
بتغيب سبعة أيام . . عرس بنت عم جد أمها . . سبعة أيام يا
فتوحة . . .

فتحي : حالك يكدر يا بوى . . (يضع يده على جبينه) يا لطيف يا لطيف انت
مريض ياسر يا بوى لازم إنجيلك طيب . .

منصور : لا . . لا . . ما نبيش طيب . . فتوحة وليدي انت محسوب الكبير
والكبير ربّي . . . إعتادي على الله وعليك . . فكر معاى رأين خير
من رأى انت مشاء الله عليك رأيك مليح . .

فتحي : شكرا يا بوي على هذا التقدير . . لكن أنت مريض والمريض ما
يفكر في شيء الا في صحته . .

منصور : (يتألم) آه آه . . راسي حاشاك يلف زي الفراره يغلى زي المحرك . .
تقول عليه ماطور جرار . . بعد ماطلعوتوا تصفقوا رعشت . .
صغرت بيّا الدنيا . . حسيت نار ركبتني والموت طقت في
بلعوطي . . قلت خلاص النهاية (يتألم) . .

فتحي : نهاية شنوا يا بوى . . إن شاء الله بعد عمر طويل . .
منصور : (يتألم صارخاً) ويك وَاكْ وُوكْ . . (مكرراً) راسي مائج تقول عليه

شكشاكه .. هو صحيح الأعمار بيد الله .. لكن ما دابيا أمورى
تكون منظمة .. رزقى ملموم مش في نيتى نموت وانخليكم
حائسين ..

فتحى : إستعوذ من الشيطان وأذكر مولاك ..
منصور : لا اله الا الله .. (يتألم) .. اللّ لازم لازم يا وليدي قلت قبل لا
نموت ما دابيا نوزع رزقى عليكم .. ما نبيكمش بعدما نموت
تتخاصموا ..

فتحى : وانت علاش بتشغل بالك بها الدّوه الزائدة .. جحى قال يوم
نموت توفى الدنيا.

منصور : لا يافتوحة .. جحى غالط .. هذه أنانية .. أفى نحبكم .. نعزكم
ولهذا قررت نقسم رزقى عليكم في حياتى .. (يتألم) وَيْكَ وَآكُ
وُوكُ .. (مكررا) وَيْكَ وَآكُ وَوُوكُ الموت يا ولدى تتعشى وتتغدى
معانا .. ماهيش بعيدة علينا .. وين ما غشوا في جرتنا ساعة من
الساعات ما هناك شىء .. تَوّا كان منصور حَيّ يرزق .. تَوّا اذا
كان حضرت غاب طبييها ..

فتحى : صار قررت تقسم علينا رزقك قبل لا نموت ..
منصور : بالظبط .. قبل لا نموت .. الخير بكرى والشر بكرى ..
فتحى : خلاص .. اللّ يريحك يا بوى ..
منصور : اللّ يريحنى يا ولدى رضاك .. نبيك تفهم مصلحتك .. أنت
ولد .. ذكر وشرعا الولد .. يصحله أكثر من البنت ..

فتحى : قصدك حصتين وحصّة ..
منصور : بالظبط .. لكن أفى من عندى بنعطيك بعض الشىء زائد على
حقك ...

فتحى : الواه؟ ...
منصور : قلت البنت يجيها نصيها ما تحيرش لكن انت شاب قدامك
مستقبل لازم تبنيه ..

- فتحي : لا يا بوى .. ما نرضاش .. نأخذ الزائد على حقى لا .. حرام
شرعا لا يجوز كل واحد وحقه والشرع ما يغضب حد ..
- منصور : (صارخا يتألم) .. ووك ووك .. ووك ..
- فتحي : لا باس يا بوى ..
- منصور : راسى حاشاك يفن ..
- فتحي : نجيبلك حبة الدوخة ..
- منصور : لا .. لا .. اللى نبيه يا ولدى رضاك وأنى معاك اللى عندى نقسموه
زي ما يبي الشرع ..
- فتحي : هو هذا المظبوط ..
- منصور : لكن يا فتحي فيه شىء مهم ما دايبا نتفاهموا فيه ..
- فتحي : حاضر نتفاهموا اللى يريحك أنى فيه ..
- منصور : الكنز ..
- فتحي : خيره الكنز؟ ..
- منصور : الكنز يهمنى يا فتحي .. نبى نعرف كيف تقاسمتوه .. انتم
صغيرين قلبكم طيب لكن عمكم نواياه ما تعرفوهاش .. يأكلكم
زهم وريش ..
- فتحي : هو فى الحقيقة عمنا مارينا منه الا الخير ..
- منصور : يصير .. لكن أنى نعرفه .. ما فيش أمان يضرب اللب ويخليكم
القشور ..
- فتحي : ما أظنش يا بوى هو تنازل على كل شىء ..
- منصور : هو غير ما تنازلش : هذا شيطان ولعب ببيكم ..
- فتحي : والله يا بوى حيرتنى معاك ما زال ما فهمتش شنوا هو قصدك واللى
تغنيه ..
- منصور : كيف ما فهمتش .. الكنز مش إلقيتوه ..
- فتحي : إلقيناه وثقاسمناه وعمنا تنازل على نصيبه فيه ..
- منصور : خلاص ما دامكم تقاسمتوه لازم عرفت شنوا كان نصيبك فيه ..

- فتحى : ما نعرفش ..
- منصور : ما تعرفش ..
- فتحى : هو في الحقيقة بعدما إلقيناه عمنا جمعنا وجاب المصحف وحلفنا كلنا أقسمنا اللي يقعد سر بيناتنا وما تقولوا عليه لحد ..
- منصور : صار حلفكم هالملعون ...
- فتحى : يمين واعر .. حطينا يدينا على الكتاب وحلفنا جميع ..
- منصور : وحلفتوا جميع .. (صارخا) صحّة للتريس .. لعب ببيكم .. توا انت تجي راجل ويعبوا عليك .. كيف يزلبحكم وترضوله كيف .. كيف ..
- فتحى : ما نعرفش ..
- منصور : (مقلداً فتحى) .. ما نعرفش .. آه يا نارى عليك يا منصور .. عبيت عليك وصار اللي صار .. تريتها سالمة عندها حق ..
- فتحى : عفوا يا بوى .. الأستاذة سالمة ..
- منصور : أستاذة بالفعل .. أستاذة عليك وعلى غيرك .. ما غلطتش وقت اللي قالت صغارك ما يصلحوا شىء .. (صارخا) ودينى اذا كان ما تقوليش كيف تقاسمتوه حوشى ماعاد تقعد فيه .. نحرملك من جميع ما نملك ولا عاد انت ولدى ولا عاد ننسب عليك (فترة صمت وتبادل نظرات) .. فنّص فيّا كولنى .. تبّى تقول والّا .. ودينى .. ودينى إنفد اللي قلت عليه (صارخا) قول ..
- فتحى : ما نعرفش ..
- منصور : عرف وطيحة من جرف دبodob .. صحّة للتريس .. تعيش الضياع في روس المدبدة تقوليش وين عقلك؟ .. وين تعليمك .. كيف يا هبل يلعبوا بيك ..
- فتحى : ما نعرفش ...
- منصور : صار ماكش قائل .. حتى هذا رأى .. باهى .. اذا كان أنى منصور إنبان إنتلف من قدام وجهى .. (ينسحب فتحى) خزية ..

درّية فاسدة أولاد القهرة ساعة وأنى نرغى .. (مقلدا فتحي) ما
نعرفش .. لكنى أنى .. أنى منصور لازم نعرف وين إلقوه وكيف
تقاسموه .. ياشينك دوخه .. كنز ويسكّوه . زعمه زكية تطلع منها
نتيجة .. تقول بالكش البنية قلبها حنين وارهيف .. يا ودّي ما
ندرى .. كلّها بزرّة واحدة قاله إمين هالعرق . قاله من
هالشجرة .. الشجرة أنى لازم الدّم يحن .. (نحو الباب ينادى) ..
زكية .. زواكى .. زكية ...

زكية : نعم .. (تجيبه من بعيد) ..

منصور : أنت وين ...

زكية : أنى فى المطبخ نشوى فى اللحم ..

منصور : تشوى فى اللحم .. واحد مشنوق والثاني يأكل فى الحلوة (بصوت
مرتفع) تعالى نبيك ..

زكية : (من بعيد) .. حاضر .. تّوا إنجيك ...

منصور : تشوى فى اللحم .. تّوا بيانلها .. زعمه تقول! .. لكن سألته
قالت زكية ما تصلح شىء زعمه لو خديتها باللطف والسياسة
تنطاع تقولى .. ما هو لّو جيتها بالكاسح نخاف تنكس وتنكر فيا
(نحو الباب ينادى) زكية .. زواكى ...

زكية : (من بعيد) هانى جائية يا بوي .. نشويلك فى طريف لحم ..

منصور : تشويل؟ يا شينك دوخة .. كنز ويلعوه .. كنز ما نحصل منه
شىء ياشينك لعبة (نحو الباب) زواكى .. تعالى سلّم بنيتى ما نبيش
لحم ..

زكية : (من بعيد) .. حاضر .. هانى جائية ..

منصور : يا رب جيها فى الصواب .. زكية ديمه أرطب من خوها .. اذا
كان تعرف شىء ما درقّاش .. (ويتمدد على السرير) .. ريت سي
الطيب ما يطلع منه لكن منصور وراه والزمان (يتصنع المرض) ..

آه .. آه .. يا راسي .. آه يا دماغى .. (زكية تدخل بيدها صحن به لحم) آه يا ضلوعى .. آه يا مخى ..
: (تقف بجانب السرير) .. زكية

زكية .. منصور ..

زكية : تفضل يا بوى لحيمة إدوب فى الفم ..
منصور : (صارخا) ووك ووك ووك .. (مكررا) .. بنموت يا زكية من إمبكرى نتلوى ويعلم الله بحالى ..

زكية : هذه لحيمة خروف وطنى ما إدير لك شىء ..
منصور : (صارخا) ووك ووك ووك .. أنى مريض يا زكية لحمة شنوا تّوا هذا وقته يا بنتى ..

زكية : ساعنى يا بوى .. توا كنت لا باس عليك .. صار انت مريض (تأخذ قطعة من اللحم وتأكلها)

منصور : مريض يا بنتى .. اللّى جانى جانى راسى عظامى ... أودانى ..
كُنّى مهرّس ..

زكية : (تمضغ اللحم) يا نارى .. مسكين .. هذا برد يا بوى ..

منصور : برد؟ .. إمين جانى البرد .. (يتألم) ..

زكية : إسمع .. تّوا نجيبك غاز وزيت وانغلفك بيه ..

منصور : غاز شنوا يا بنتى .. هذا وجع كبير مش بعيد رعشة ..

زكية : كأنها رعشة يا بوى غُدوه الحى إنسبولك عند الشيخ سحنون؟ ..

منصور : الشيخ سحنون؟ دَوّه فارغة .. هذا بروال كبير من زمان قاموه ..

زكية : معقولا يقيموه يا وى .. وين يقدروا عليه .. الشيخ سحنون قاعد موجود يده طويلة يتغذى فى الأرض ويتعشى فى القمر ..

منصور : الشيخ سحنون؟ .. أنت .. أنت .. منوا قالك عليه ..

زكية : (فى هس مع ابتسامة) الأستاذة سالمة ..

زكية : (صارخا) وَاكْ ووك ووك .. أنى مريض يا زكية .. مصارينى

بنتقطع زي اللي متحصرم نفسه غارقة.. فيه شىء يا بنتى بنقولك عليه كنت داسه عليك..

زكية : تّوا هذا وقته يا بوى.. انت مريض خليفهم يجيولك طبيب... .

منصور : لا.. لا.. مانبيش طبيب ولا شيخ بسببلى.. بنقولك على سر ردّى بالك تعاوديه.

زكية : لكن أنت مريض يا بابا.. الدّوه مش باهيه ليك.. الأحسن تراتح غدوه إن شاء الله تصبح لا باس عليك وتكلموا جميع..

منصور : غدوه؟.. لا.. لا.. اللي بنقله اسمعيه وافهمى قصدي.واللى نبغيه..

زكية : حاضر.. (تأخذ اللحم وتأكله) اللي تبنيه أنى فيه..

منصور : (يتألم..) آه يا صدرى.. تقولى عليه رَحَى.. (أثناء الحوار لا تغيره اهتمام تأكل اللحم باستمرار).. من الصبح يا بنتى حسيت بشىء ماكانش عندي.. قلت خلاص يا منصور هذه الموت وصلت..

زكية : (تضحك).. بعيد الشرّ عليك.. إن شاء الله بعد عمر طويل..

منصور : طويل والّا قصير ما عندنا وين نهربوا منها وعلى هذا فكرت فيك انت حنينة طيبة تعزييني ونعزك.. زكية واحدة مش إثنين..

زكية : كثر خيرك يا بوى.. ربّ يطول في عمرك..

منصور : قعدت نفكر فيك.. قلت شنوا يكون وضعك.. بعد ما نموت..

زكية : بوى.. شنوا هالكلام اللي قاعد تقول فيه.. سألتك بالله تحلحز من مطراحك..

منصور : اللي لازم لازم يا بنتى.. اللي فكرت فيه وقررتة كلّ لصالحك انت بنية ونصيب البنية ماهوش زي الولد.. هكّى الشرع يقول لكن بوك عمل العكس.. نصيبك من الرزق يكون أكثر من ثلاث مرات.. فتحي حصة واحدة وانت ثلاث حصص..

زكية : كيف هكّى؟.. مش حرام تخالف الدين..

منصور : (صارخا) وُوكُ وُوكُ وُوكُ...

- زكية : خيرك يا بوى .. لا باس عليك ..
- منصور : مصارينى حاشاك ...
- زكية : تبى الحق يا بوى .. أكثر من حقى ما نبيش .. رزق الحلال يرق
وما ينقطع حرام يا بوى ما نرضاش بيه ...
- منصور : هو صحيح حرام لكن هذا رزقى أنى حرفيه .. نكتبه ليك
برضاي بصفة مبايعة .. يعنى بعتهولك برضاي .. وينه الحرام ..
- زكية : لا لا يابوى .. هذا حرام واضح زى الشمس .. مش ممكن
نرضى بيه ..
- منصور : (صارخا) وَاكْ وُوكْ وَيْ .. (مكررا) ..
- زكية : بوي .. خيرك لا باس عليك ..
- منصور : اعظامى يفلقوا ..
- زكية : والله حيرتنى معاك .. عملت شىء بصراحة نخاف منه ..
- منصور : بلاش .. نقسموا الرزق زي ما قال الشرع ..
- زكية : (تضحك) .. صحيت يا بوى! ...
- منصور : لكن فيه شىء محيرنى هو اللى مدوخنى وقاعد نفكر فيه ..
- زكية : شىء محيرك؟ ...
- منصور : الكنز .. الكنز يا زكية .. هو اللى محيرنى ..
- زكية : محيرك الكنز ...
- منصور : خوي الطيب ملعون .. يلعب بيكم .. يزلبحكم ما تحصلوا فيه
شىء من الثور يعطيكم ودنه .. قوللى كيف تقاسمتوه ..
- زكية : شنوا هوا ..
- منصور : الكنز يا زكية ..
- زكية : قبل كل شىء عمى الطيب تنازل من حين جنباه وما إخذى منه
شىء ...
- منصور : إنقولوا الطيب تنازل ولو أنى ما إنصدقش .. أنتم كيف
تقاسمتوه ..

- زكية : ما نعرفش ..
- منصور : نعم .. ما تعرفيش؟ .. مش كنتى حاضرة وقت تقاسمتوه ..
- زكية : ما نعرفش .. أنى غشيمة .. خوى فتحى هو اللّى يعرف كل شىء ..
- منصور : عجائب .. صار خوك فتحى هو اللّى يعرف كل شىء أنت كيف ترضيله كيف تفرطى في حقك .. شنوا جاهلة .. وين عقلك ..
- وين تعليمك .. وين شهادتك اللّى هكى كبرها .. سنين يا بنتى وانى تاعب في جرتكم نرفع وانجيب للمدرسة سنين ويعلم الله بحالتى .. قوليل رانى بوك كيف تقاسمتوه ..
- زكية : صار تبينى نقولك ..
- منصور : إيه يا بنتى .. قوليل .. الله يرضى عليك ..
- زكية : وعلاش تبينى نقولك ..
- منصور : كيف علاش .. مش أنتى بنيتى وأنى بوك .. رزقنا واحد واللى بيّا بيك ..
- زكية : (تصنع التفكير) .. وين إلقيناه يا ربى!! وين!! وين!!
- منصور : (في لهف) وين إلقيتوه؟ ..
- زكية : (تصنع التفكير) كيف تقاسمناه يا ربى!! كيف كيف!! ..
- منصور : (في لهف) .. أبوه كيف تقاسمتوه ..
- زكية : ما نعرفش ..
- منصور : (مقلدا زكية) ما نعرفش .. بضاعة .. صار سألها عندها الحق ..
- زكية : (في تهكم) الأستاذة سألها يا بوى ..
- منصور : أستاذة بالفعل .. أستاذة عليك وعليكم كلكم .. الكلام اللّى قلاته فيكم كلّ صحيح .. كلّ مطبوط .. (مراوغا) .. زواكى ..
- قوليلى سلم بنتى كيف تقاسمتوه ..
- زكية : ما نعرفش ..
- منصور : (في حدة) ودينى .. إذا كان ما تقوليش نلذك من الحوش ودينى اللّى

- قررتَه في صالحك نلغيه ..
- زكية : وشنو تبيني نقول ..
- منصور : الكنز .. وين القيتوه؟ .. كيف تقاسمتوه ..
- زكية : تعرف يا بوى .. (تتوقف .. منصور في لهف يتابعها) خوى فتحي يعرف كل شىء إناديلك عليه ..
- منصور : لا .. نبى نعرف منك .. وقت اللى إلقيتوه وتقاسمتوه وين كنتى ..
- زكية : كنت معاهم ...
- منصور : عظيم .. مادام كنتى معاهم لازم شفتى كيف تقاسمتوه ..
- زكية : أيوه شفت ...
- منصور : عظيم .. كيف تقاسمتوه .. أكداس أكداس .. بالميزان؟ بالقرعة هو هذا اللى بنعرفه.
- زكية : خوى فتحي يعرف كل شىء ..
- منصور : (مقلدا) .. خوى يعرف كل شىء .. ياشينك درويشة .. يكونش يا بنية عمك الطيب حلفك يمين واعر ما تقولى شىء ...
- زكية : (تمز رأسها) حلفت ...
- منصور : (صارخا) .. ملعون .. خائن .. غدار ..
- الطيب : (من بعيد) .. زكية .. تعالى كولى اللحم المشوى ..
- زكية : (نحو الباب) .. هانى جائية يا عمى .. (الطيب من بعيد) ..
- الطيب : زكية .. تعالى خودي حصة بوك ..
- زكية : (لمنصور) .. نجبيلك حصتك من اللحم المشوى ..
- منصور : (مقلدا زكية) .. نجبيلك حصتك؟ (صارخا) ودينى .. التوم إنقطره في عيونكم غدوه حسابى معاكم .. إذا كان أنى منصور نبان ..
- زكية : حتى أنى يا بوى ..
- منصور : كلكم .. خونة .. غدارين .. إنتلفى من قدام وجهى ..

زكية : (نحو الباب مسرعة.. تتوقف) إنجيلك حصتك من اللحم المشوى..

منصور : (صارخا) إنتلفى.. (تسحب.. يتأكد من إنسحابها) خزية زريعة حريق. ما فيهمش ولا واحد طلع زيك يا منصور.. خسارة الله يلعن الساعة اللي ما تشابه لأهلها كنز يسكّوه منك يا منصور.. كنز يتقاسموه هالملاعين وعينك تشبح.. لكن وديني ما نضلّ الاجائب الشيخ سحنون.. يسلّط جنونه عليهم واللي بيصير يصير..

أصوات : (من بعيد غناء وتصفيق.. أغنية شعبية قديمة) إنس الطمع ينساك فقر الدنيا.. الخ

منصور : تّوا بيانلهم اذا كان أنى منصور إنبان...

تنطفئ الأنوار...

المشهد الثالث..

الوقت صباحاً..

منصور.. زينب.. زكية...

- منصور : (جالسا يتناول الفطور) ..
- زكية : رقله ما شاء الله .. (مداعبة) .. وجيهك نائر الحمد الله ..
- منصور : (في تهكم) .. تَوَّا انقولوله ..
- زكية : الحمد لله اصبحت لا بأس عليك .. أمس وقت مرضت حيرتنا وخفنا عليك .. قعدت .. إنظير كيف المروحة من الرعشة ..
- منصور : (نظرة سخرية) ما جاء حَدْ دَوْرني ..
- زكية : لا .. ما جاء حَدْ الا رحمة ربِّي .. اليوم جمعة .. الشمس ما شاء الله مطروحة .. طياب .. الجَو صافي يا سلام عليه ..
- زينب : زينب قاعده ..
- زكية : قاعده وين عندها تمشى في المطبخ من الصبح أنى واياها نغسلوا في الصواني ما هو زَرْدَة آمس ..
- منصور : (يقاطعها) فتحي وين ..
- زكية : طلع مع عمى وخالد ..
- منصور : وين إمشوا؟ ..
- زكية : جَاهُهم واحد اسماء الحاج عمر من الصبح بكرى جاب معاه شوية خضرة وليم لعمى شربوا قهوة قعدوا مشوار في دار خالد وامشوا ...
- منصور : (يزوم) ناديلي زينب ..

زكية : حاضر ..
منصور : قوليلها بينك وبينها بوى يبيك وبس ..
زكية : حاضر .. (تنسحب) ..
منصور : (وحده يتأكد من إبتعادها) ملاعين .. تّوا نوريهم اللّحم المشوى ..
شنوا معناه .. اليوم يومهم .. خضوني زي شكوة اللبن .. ليلة
البارح مش ممكن نساها .. لكن أنى منصور مش من الساهل
يعدّوا عليه (باصرار) الكنز ما زال موجود .. مستحيل طلّعوه
وتقاسموه .. مش ممكن إلّقه .. اليوم يومهم غير يحى .. (زينب
داخله) ..

زينب .. منصور ..

زينب : (تقاطعه) صباح الخير يا عمى ..
منصور : نهارك مبروك يا بنتى ...
زينب : الحمد لله .. الحمد لله .. اللّى أصبحت لا سَو ولا سويّة ..
منصور : بغيتى حاجة
زينب : مش انت ناديت عليا؟ ..
منصور : (يتجاهل) أنى؟ ناديت عليك؟ (يستدرك) ها ها .. صَحّ هيا تفضلى
أفطرى معاى ..
زينب : بالشفاء فطرت ..
منصور : الله يشفيك ويخلّيك (فترة صمت وتبادل نظرات) بُوْك .. قاعد ...
زينب : لا طلع مع فتحي وخالد الحاج عمر شربوا قهوة جميع وامشوا ..
منصور : تعرفى يا زينب علاش ناديت عليك؟ ..
زينب : لا ما نعرفش ...
منصور : أنت يا زينب عندى فيك ثقة قويّه ونشبح فيك زى الشمس بين
حيطين انت نواره البيت زى الهواء .. زى الأكسجين .. الحوش
من غيرك ما يساوى شىء ..

- زينب : صحّيت يا عمى . .
- منصور : أنت يا زينب أعقل انسانة في العيلة . . معزتك عندي كل يوم
تزيد بيني وبينك زكية وفتحي ما يصلحوا شىء . .
- زينب : معقولا ما يصلحوا شىء . . لا يا عمى هذا كلام ما نقبلش . .
- منصور : قتلك ما يصلحوا شىء ما يصلحوا شىء . . أنت في كفة والعيلة
كلها في كفة . . أنت بنية أمينة . . صادقة . . مخلصه . . نعرفك ما
تكديش . . يا زينب ما ناديت عليك . . الا بعد ما وصلت
للهاية . . نبيك تساعدني . . توقفي معاى . . ما يصح يا بنتي
رزقي ورزقكم يقعد مدفون وتفرجوا عليه وتخاصموا .
- زينب : تقصد الكنز يا عمى . .
- منصور : أيوه الكنز . . ما إندرقش عليك محروق من يلاه . . الكنز يا زينب
كبدق حارقها . . لو ما نتحصلش عليه نتحصرم . . ننجن . .
- زينب : بعيد السوء عليك يا عمى . . رزق الدنيا شنوا قيمته قدام
صحتك . .
- منصور : دمى حرقوه يا زينب . . هذا رزق الحدود معقولا يجرمون منه . .
- زينب : لا يا عمى ما عندهمش حق يجرموك . . كل واحد وحقه . .
المفروض حسبوك . .
- منصور : قوليلي يا زينب . . الكنز صحيح إلقوه وتقاسموه . .
- زينب : نعم إلقوه . . لكن ما تقاسموشى . . بوى تنازل قال الله يسأحكم
ما نبى شىء منه .
- منصور : أنت الكنز ريتيه
- زينب : (تهز رأسها بنعم وتبتسم) . .
- منصور : كنز كبير؟ قصدي خابية والا زير . .
- زينب : أكبر يا عمى ما نقدرش نوصفهلوك . .
- منصور : وين إلقوه؟ في أي جهة إلقوه؟ الجهة اللى يسكن فيها بوك والا
الجهة اللى نسكن فيها أنى . .

- زينب : في النصف .. بيناتنا يا عمى ..
- منصور : بيناتنا؟ في النصف؟ .. تقدريش توريني مكانه وين ..
- زينب : نقدر .. بس فيه شوية شروط ..
- منصور : شروط؟ ..
- زينب : شروط بسيطة .. ساهلة .. مافيش منها ضرر ولا خوف ..
- منصور : مادام ما فيش منها ضرر ولا خوف مقبولة ..
- زينب : الشرط الأول الكلام اللي يصير بيني وبينك يقعد سر بيناتنا ..
- حتى واحد ما يسمع بيه .. تعرف علاش يا عمى ..
- منصور : لا ما نعرفش .. !
- زينب : وقت اللي إلقوه بوى حلفنا ما نقولوش لحد وين إلقيناه واللى يطلع الكلام يحرموه وانت ما ترضاش يحرموني ..
- منصور : عليك الأمان يا بنتي هذا السر يندفن إهني .. قوليلي يا بنتي ..
- زينب : (نحو الباب تتأكد وراجعة) الشرط الثاني تنفذ الكلام اللي نقولك عليه ..
- منصور : وشنوا هو الكلام اللي بتقوليلي عليه ..
- زينب : بعدين تعرفه .. أنت قول إنفذ وبس ..
- منصور : حاضر .. إنفذ اللي تبيه ..
- زينب : الشرط الثالث مربوط بالشرط الأول والثاني يعني مربوطين ببعضهم
- منصور : وشنوا هو الشرط الثالث؟! ..
- زينب : تحلفي يمين واعر ما تولّيش في كلمتك ..
- منصور : وشنوا هو اليمين الواعر اللي بنحلف بيه .. وشنوا هو اللي تبيني إنفذه ..
- زينب : نبيك تحلف يمين واعر وبس .. تحلف واتقول إنفذ اللي تبيه ..
- منصور : يمين واعر؟ .. زعمه نطلع بنتيجة؟ .. يا ولادى مش بعيد بيخوخوني صار تبيني نحلف يمين واعر ..

زينب : الشروط ثلاثة مربوطة ببعضها . . ينقص واحد ما يصير شيء . .
منصور : يا شينك مطب . . زعمه نحلف البنت صادقة نعرفها ما تكذبش
نحلف وعلاش ما نحلفش (زكية داخله تقاطعه) . .

زكية . . منصور . . زينب . .

زكية : سامحنى يا بوى . .
منصور : خيرك . . شنوا فيه . .
زكية : محمود ولد عمى رمضان . . .
منصور : خيره أشبى بلاه . .
زكية : قالك بوى مريض ما يقدرش يحبك والراجل اللّى بعته ليه إمشاله
واتفق معاه لكن فيه شيء مهم بيقلهولك بعد صلاة الجمعة بيبك
إطق فيه . .
منصور : محمود قاعد والّا امشى . . .
زكية : إمشى . . قالّى قولى لعمى منصور ما ينساش يجيب معاه الحمص
على خاطر رشيد ما أعطاه شيء وعده وما صار شيء . .
منصور : رشيد ما أعطاه شيء؟ . . غريبه . . .
زكية : هكّى قال . .
منصور : حتى هذا رأى . . باهى . . توا انشوفوا . .
زكية : زينب . . ما تعطليش بنطيووا الغداء . .
زينب : حاضر . . أبدى قرضى الخضرة توّا إنجيك . . (تنسحب) ، ،

منصور . . زينب . .

منصور : (حائراً) غريبة . . وين امشى زعمه سافر . .
زينب : عمى لا باس . . فيه شيء حيرّ عليك . .
منصور : لا . . لا . . أبدا ما فيه شيء صار تبينى نحلف . .
زينب : يمين واعر وتنغذ اللّى نقولك عليه . .

- منصور : حاضر .. نحلف .. والله .. والله وحق سيدي بوجيلة والشيخة
الملوية وسيدي ..
- زينب : لا .. لا ياعمى .. قلت يمين واعر والأ ما صار شيء ..
- منصور : شنوا تبيني نحلف براس سالمة ..
- زينب : (مبتسمة) الأستاذة سالمة ..
- منصور : صار تبيني نحلف بالطلاق ..
- زينب : قتلك يمين واعر بعدها نعرفك ما تولّيش في كلمتك ..
- منصور : يكونش يا بنية ناصبة فخ بتورطيني ..
- زينب : ما صار شيء مادام ما عندكش ثقة فيا بلاش ..
- منصور : معقولا ما عندكش ثقة فيك .. إنما نخاف نحلف نتورط وما يصير
شيء ..
- زينب : ما صار شيء .. أنى ماشية ..
- منصور : لا .. لا ما تمشيش .. ما تخلّيش قلبي معلق .. نبّي نعرف كل
شيء ..
- زينب : ما دام تبّي تعرف إحلف الليّ تنفذ الليّ نقولك عليه ..
- منصور : أنى نحلف .. لكن وديني ..
- زينب : عمي .. نترجاك .. اذا كان عندك شك فيا ما تحلفش ..
- منصور : شك؟ حاش لله .. انت الوحيدة في الدنيا كلّها الليّ ما عندكش
فيها شك انت نوّارتهم .. حاضر .. نحلف وعلاش ما
نحلفش .. على اليمين ثلاثة ..
- زينب : لا لا يا عمي ..
- منصور : شنوا مش عاجبك ..
- زينب : قتلك .. إحلف يمين واعر وتقول إنفذ الليّ تبيه وبس ..
- منصور : حاضر .. أمرى لله .. عليا اليمين والطلاق ثلاثة إنفذ الشروط
الليّ تبيهم ..
- الجميع : (يدخلون ويصفقون) ..

الطيب .. خالد .. فتحي .. زكية .. منصور .. زينب ...

- الجميع : (يهتزون زينب .. عبارات مختلفة) ..
- منصور : (مذهولا) هاذوا وين كانوا ..
- الطيب : وين كانوا جوا .. ما هو يا منصور وقت يكثر فيها البل والعجن يصير فيها الرفس . ما يصح تقعد العيلة مرفوسة في جرائك .. لا بدّ من حل واذا كان قعدنا على هالحال وجودنا في الدنيا ماليش وزن وانت اختار بين الاثنين يا إما الطريق اللي إحنا ماشيين فيه ويا إما تستمر في طريقك لين يضربك الحيط ..
- منصور : (مذهولا) ..
- زينب : (مداعبة) .. عمى تبني إنقولك على الكنز وين مدفون ..
- الطيب : لا .. انت ما تقولى شيء .. اللي كلفناك بيه قمتي بيه ونجحتي وهنوك الأولاد على نجاحك .. وإنزید إنهنك اللي قدرق تضحكي على عقل منصور .. منصور المسكين اللي غاطس في الوحل لودنه ..
- منصور : زينب .. هذا عمل يديروه ..
- الطيب : إسمع بنتي ردّ بالك تقرها .. إنزید نعاود هالكلام اللي قلته السابق قدامك طريقين وانت اختار من الاثنين .. تخلّص من مشاكلك بعدها زينب تقولك على الكنز مكانه وين ..
- منصور : صار هكي يا طيب .. بديت تشرط وتشرط على خوك لكن أني منصور ما يتعدّاش عليه شيء .. (باصرار) الكنز ما زال موجود ومش ممكن نفرط فيه وإذا كان أني منصور إنبان ... (ينسحب مسرعا) ..
- الجميع : (ضحكات وتصفيق وزغاريد) .. (تنطفئ الأنوار) ...

المشهد الرابع..

الوقت بعد الزوال...

منصور.. الشيخ سحنون...

سحنون : (بيده كتاب يقرأ ويتمتم.. صارخا) حَيَّ.. (مُسَبِّحًا) يا لطيف.. يا لطيف..

منصور : (خوف ولهف).. خبرني سيدي الشيخ..

سحنون : مشكشكة.. أمورك مخبلة في بعضها.. هالحوش.. هالحوش..

منصور : خيره هالحوش...

سحنون : سكانه كلهم ضدك ما همش راضيين عليك..

منصور : نعرفهم..

سحنون : حاسدينك.. يكرهوك.. لو يقدرُوا برّا من الحوش لوحوك..

قول يا لطيف.. (يسبح يا لطيف) يا لطيف.. يا لطيف..

(صارخا) قول يا ابن المفعوص رجلى العروس.. حَيَّ.. (مبتسم)

من هالحوش رفعوا زوز شناطى كبار بالذهب والفلوس

مرصوصين.. حَيَّ.. وَى رفعوا فلوس من خزنة حديد وانداروا

في زوز شناطى ثانيين.. لكن من الحوش ما طلعهوش..

قاعدين..

منصور : فلوس؟.. خزنة حديد؟ شنطتين؟.. (مسرعًا يريد الخروج)..

سحنون : لا.. لا ماتتحرّكش.. خلّينا نكملوا.. فتحنا الكتاب بعدها

الحساب..

منصور : (راجا!) حاضر.. حاضر.. (قلقا)
سحنون : (يقرأ ويتمتم) وَيَّ وَيَّ .. شنوا هذا..
منصور : شنوا فيه.. خبرني يا شيخ..
سحنون : عصابة يا منصور لادت بيك.. لعبت عليك.. انت حلفت يمين
واعز وما حصلت على شيء.. صار والا ما صارش..
منصور : (مرتبكا) .. صار.. صار..
سحنون : وَيَّ وَيَّ .. تخطيط رهيب اتفقوا على شيء بيدبروه ضد رغبتك
وانت على غير طريق بيرموك..
منصور : أشكون هم سيدي الشيخ..
سحنون : معروفين يا منصور.. معروفين.. لكن معاك سحنون يقطر لهم
الثوم رصدنا النجوم وخشنا الغيوم.. كتابنا فيه مسطور خشنا
بيه سبعة بحور صارعنا الأهوال وما نعرفوش المحال.. قول يا
ابن الملوية خفف عليا البلية.. قول..
منصور : (خائفا مرتبكا) .. يا ابن الملوية خفف عليا البلية.
سحنون : انت منصور يا منصور.. ديمه منصور ولو أنك على الفلوس
راسك مغروس (يقرأ ويتمتم) وَيَّ وَيَّ .. فيه فخ نصبوه زوز
نسوان وثالثتهم تلعب مكار.. لعبوا لعبتهم لموا اللي هناك قاموه
ويسبيوك.. قول يا ابن المفصوص انتقم من العروس (صارخا)
قول..
منصور : (مرتبكا) يا .. يا ابن المفصوص انتقم من العروس..
سحنون : (يقرأ ويتمتم) وَيَّ وَيَّ اللي في الكتاب نلقوه عليك ما إندسوه الولية
اللي لمت عليك ضربت ضربتها.. خدت منك أكثر من حقها..
ثلاثة مغفلين سبقوك وانت رابعهم وماكش الأخير.. اللي علينا
نبهناك وانت حط ידיك قدامك والا وراك.. (يقف ويحوم ويسزوم
لمنصور) هات يدك ومد رجلك..
منصور : (خائفا) حاضر.. (يمد يده ورجليه)..

- سحنون : (يتأمل في يده ويتركها صارخا) حَيَّ ..
 أصوات : (مسجلة تسمع .. صوت طيور) ...
 سحنون : (مخاطبا الأصوات) حاضر .. مفهوم ..
 منصور : (يرتجف خوفا) ..
 أصوات : مسجلة .. رعد مدافع .. رشاشات .. قنابل) ..
 صوت : (صدى) منصور .. منصور .. حضروك اللي ما يرقدوش الليل ..
 ما تخافش .. إحنا معاك .. بنخدموك .. ما إنخلوا شيء مدرق عليك ..
 سحنون : (مخاطبا الأصوات) نبوا الكنز المدفون .. طلّعه وقدامنا إرموه ..
 صوت : الكنز؟ .. (ضحكات صدى) الكنز قاموه ومن الحوش نظفوه تقاسموه بيناتهم ... اللي قاموه ناسه ما همش بعاد عليه ..
 سحنون : (صارخا) .. حَيَّ ..
 منصور : (حائرا) قاموه وتقاسموه؟ .. وأنى سيدي الشيخ ...
 أصوات : (وراء الكواليس) ..
 الطيب : زوّد يا حاج منصور موجود ..
 منصور : (مذهولا) ..
- الطبيب .. عمر .. فتحي .. خالد .. محمود .. احمد ...
- الطيب : (داخلا) السلام على من إتبع الهدى ...
 سحنون : (صارخا) حَيَّ ..
 الطيب : سامحنا يا شيخ قطعنا على أحبالك بعدين نربطوهم
 منصور : حاج عمر .. أهلا بيك ..
 عمر : مصيبة يا منصور .. رشيد لعب بيّا ..
 منصور : لعب بيك؟ ..
 عمر : فخ يا منصور .. عشرين ألف دينار ..
 سحنون : حَيَّ ...

- الطبيب : ساحنا يا شيخ مش وقته .. بعدين تستمر في اللعب ..
- عمر : الراجل اللي نعتنى عليه دارلى موعد معاه يوم الخميس الصبح ..
- أمس جاني وامشيت معاه .. وصلنا قدام عمارة .. وقفت السيارة قالي هات الفلوس نركب نسلّمهم لصاحبهم .. صاحب الأرض وانجيلك التنازل موقّع عليه .. وقفت قدام السيارة واركب العمارة صاحبنا ساعتين قعدت نستنى فيه بعدها ركبتى نار شعرت بخوف .. سكرت سيارق وخشيت العمارة شقة شقة فتشت حتى وصلت السطوح الراجل طار. خش من باب العمارة وطلع من فوق السطوح روح في حالة يعلم الله بيها .. البارح ما قدرتش إنجيك .. جيت اليوم الصبح الجماعة تلقوني ونصحوني إندوروا على رشيد .. لكن رشيد وينه ما فيه حدّ يعرف وين إمشى وهذا ما نحكيك ..
- سحنون : (صارخا) حيّ ..
- الطبيب : ريّضنا يا شيخ وفكنا من قطافك ..
- منصور : (حائثا) غريبة .. انت تعرف الراجل اللي أخذ منك الفلوس ..
- عمر : بالشكل نعرفه ونطلعه من مليون .. لكن ..
- منصور : وتوّا شنوا ناوى إدير ..
- عمر : كنت ناوى نشكى لكن الجماعة قالوا لا .. فيه مشاكل ثانية خائفين عليك تنضر ..
- منصور : غريبة وين إمشى رشيد ..
- الطبيب : بعدين تعرف وين إمشى .. عندك رجال يا منصور .. فتحي ..
- فتحي : نعم ..
- الطبيب : جيب الشناطى ..
- فتحي : حاضر .. (ينسحب) ..
- الطبيب : الشناطى كانوا أربعة يا منصور .. زوز رفعتهم بيديك وزوز

قمتهم أنى وعندك بخت ذهبك وفلوسك قعدوا أهنى .. أما
الشيخ سحنون ..

سحنون : حَيَّ ..

الطيب : تعال يا محمود قول لعمك منصور حكاية سحنون ..

محمود : يقولوا الصدفة أحيانا خير ميعاد .. والدي كلّفه عمى منصور
يحبيله الشيخ سحنون لأن رشيد اختفى وما عادش بان باختصار
الوالد راكبه الشك في سحنون إتصلت بعمى الطيب والأولاد
واتفقنا على خطة إنفدها أنى .. الى صار الراحل خبلته وبديت
ندرب فيه على الدور اللّى بيقوم بيه .. جميع أسرار عمى منصور
حفظهم بعدها حدّدنا الموعد واللّى بيحصله كلّ ليه ..

الطيب : (سحنون) إنهنيك يا شاب فعلا أنت ممثل قدير .. آش ما ظنك يا
منصور قدر يمثل عليك .

الجميع : (نحو سحنون يباركون ويصفقون) ..

فتحى : (داخلا بالحقائب) ..

الطيب : تعال يا فتحى بارك للشاب بنجاحه في تمثيل الدور ..

فتحى : (سحنون) نهنيك يا شاب .. (يتصافحان) ..

سحنون : تسمحولى إنروح ...

الطيب : تروح .. لا .. أنت اللّية معزوم عندنا .. تّوّا تنحى المكياج
وتغسل وجهك وأطرفك وتستريح ..

سحنون : أرجوك يا عمى الطيب ما نقدرش ..

الطيب : مادام يا يقدرش زودوله يا أولاد .. (الأولاد نحوه) ..

سحنون : لا لا .. حاضر .. إنحيه .. (يزيل المكياج) ..

عمر : (صارخا) هو .. هو .. هو .. هو يا منصور .. هذا صاحبي .. أيوه هو
اللّى إخذى منى آمس الفلوس هو ..

الطيب : أنت متأكد يا حاج ..

عمر : أيوه متأكد .. نادوا الشرطة ..

- محمود : كلنا شرطة يا حاج . . زيد تأكد منه . .
- عمر : مائة في المائة . .
- محمود : الهدوء يا حاج . . وحده وحده تَوَّا يقوللنا وين حط الفلوس والّا لمنوا أعطاهم ونوعدوه نرخواه واذا كان قال لا . . والّا انكر نعرفوا حسابنا معاه . .
- الطيب : قاعد تسمع يا منصور . .
- محمود : قول يا سحنون ما عندكش مفر . . الحاج عرفك وعمى منصور زلبحته ومثلت عليه . . خديت فلوس باش جنبناك ووعدناك بمبلغ بعد ما تمثل الدور . . قول الفلوس اللي خديتهم من الحاج عمر وين درتهم . . رشيد ما أظنش خداهم منك لأنه محبوس . .
- منصور : رشيد محبوس؟ . .
- محمود : محبوس يا عمى منصور . . أربعة أيام فاتوا شدّوه في المطار مهرب فلوس . .
- منصور : رشيد محبوس . . مش معقول . .
- محمود : قول يا سحنون ما تجربناش نحضروا الشرطة ويقيموك . .
- منصور : الشرّطة؟ . . لا . . أرجوك . . (متوسلا) قول يا ولدى من جيّهتي مسامح ما نبّى منك شيء . . إسترنا الله يستر عليك . .
- محمود : قول يا سحنون . . قول قبل لا نعضب عليك . .
- سحنون : الفلوس قاعدين . . .
- محمود : وين . .
- سحنون : عندي في الحوش . .
- محمود : الواه قعدوا عندك في الحوش . . مش كنت متفق انت ورشيد . .
- سحنون : أيوه . . اتفقت أنى ورشيد لكن ما جانيش . .
- محمود : كيف إتفقت معاه قصدى قداش بيعطيك . .
- سحنون : الثلث ليّا والثلثين ليه . .
- محمود : هذا أول مرة؟ قصدى أول عملية درتوها بهالشكل . .

- سحنون : هُوَ . هُوَ . . .
- محمود : قول ما تخافش نعاهدوك انت تروح لبيتك وكل شىء يندفن
إهني . .
- سحنون : هذه الثالثة عملية . .
- محمود : حوشك منوا قاعد فيه . . قصدى فيه ناس فيه ناس معاك . .
- سحنون : لا . . ما فيه حد . . عزّاب . . .
- محمود : هات مفتاح الحوش . .
- سحنون : مفتاح الحوش . .
- محمود : أيوه بنجيبيوا الفلوس وانسكروا الموضوع . .
- سحنون : حاضر (يسلمه المفتاح) . .
- محمود : وين حاطّهم . .
- سحنون : في السقيفة في شكاراة القيامة . . شكاراة الكناسة . . .
- محمود : نوض يا حاج . . (الأولاد) ما ترخوشى لين نرجع . .
- عمر : الله يبارك فيكم يا شباب . . الحمد لله . . الحمد لله . . .
- الطيب : زرة وتفوت يا حاج . . إنس الطمع ينسك فقر الدنيا . .
- عمر : الله غالب . . غلطة وربنا علينا يثوب . . (يودع الجميع)

الطيب . . خالد . . منصور . . أحمد . . سحنون . . فتحي . .

- الطيب : شفت يا منصور الموقف اللي انت فيه . . قلنا لك من زمان قيم
عليك انت عاصى ما تبيش تفهم . . .
- فتحي : بوى . . رانا أولادك معاك في الخير والشر . . حكاية الكنز قيمها
من دماغك إحنا الكنز . . بلادنا الكنز . . أرضنا الكنز . . كل اللي
لائد بينا كنز واجبنا إنصوفوه . . إندافعوا عليه . . نحافظوا
عليه . .
- منصور : (ينظر فيه ولا يجيب) . .

- خالد : عمى .. يلزمك تفيق .. عجلة الزمن والتطوير إدور .. قيم ..
 من دماغك الدواوى الفارغة .. معقولا تصدّق الدجالين ..
 معقولا تصدق الشعودة معقولا تصدق واحد زي هذا وتحلّيه يخش
 بيتك ويلعب عليك عمى .. فيق العبرة اليوم بالعمل والانتاج ..
 رزق الحلال يرق ولا ينقطع .. شباب اليوم داس على الماضى
 البغيض اللّى قدامك كنوز .. كنوز تبني وتشيد المستقبل السعيد ..
 صوت : (رمضان ينادى من بعيد) ..
 رمضان : (ينادى) ياسى الطيب .. أحمد .. محمود ..
 الطيب : زود يا فتحي .. هاذوا الجماعة جوا تفضل بيهم ..
 فتحي : حاضر .. (ينسحب مسرعا) ..
 الطيب : (نحو الباب) .. حضروا الشرابات يا بنات ..
 منصور : جماعة؟ .. فهمونى شنوا فيه ..
 الطيب : الخير وصل .. كل الخير .. اللّى داره رمضان والأولاد مهما إدير يا
 منصور ما تخلصاش .. متتهى الاخلاص .. متتهى الانسانية
 والوجدان .. هذا الشيطان اللّى قدامك .. (مشيرا الى سحنون) تبعوه
 خطوة خطوة .. ليل مع نهار .. ناصب فخ لكن .. كانوا أشطر
 منه نصبوله فخ ووقعوه فيه ..
 سحنون : أنى متأسف للّى صار .. مش منى .. رشيد هو اللّى غرّ بيّا وخلانى
 نمشى هذا الطريق ..
 الطيب : وأنت وين عقلك حتى يغريك رشيد ..
 سحنون : عقلى؟ ..
 الطيب : أيوه عقلك .. لو ما كنتش شرير ما تبعتش الشر .. ميادين العمل
 الشريف موجودة ومتوفرة في طول البلاد وعرضها ..
 سحنون : أنى آسف .. خلاص أنى تُبّت اللّى صار إن شاء الله ماعادش
 يعود .. (رمضان داخلا) ..

رمضان .. الطيب .. منصور .. سحنون .. خالد .. فتحي ..

رمضان : السلام عليكم .. (يتبادلون التحية) الجماعة جبتهم قاعدين في الجامع قتلهم استنوني إنطق في الجماعة إنشوف الجو كيف ..

الطيب : الجو مليح يا رمضان .. كل شيء على ما يرام ..

رمضان : صار نمشي إناديهم ..

الطيب : فورا ..

منصور : جماعة شنوا يا رمضان؟ ..

رمضان : الجماعة اللي بيحضروا الاحتفال ..

منصور : إحتفال .. إحتفال شنوا ..

فتحي : بوى فيه شيء قررناه ويلزم نصارحوك بيه ..

خالد : عمى .. من مدة واحنا نعملوا باش نبني مستقبلنا ونزواج والزواج حق مفروض وكل انسان يختار الانسانة اللي تناسبه وتتعاشر معا ..

منصور : صار بيتزوج يا سى فتحي اللي في راسك ..

خالد : عمى فتحي رجل زواجه ما فيه حد يدخل فيه الا بالخير .. طاعة الوالدين واجبة لكن ليها حدود ..

منصور : صار ليها حدود .. ما زال تسمع الودن ..

خالد : عمى إحنا قررنا مستقبلنا واخترنا الزواج اللي نبوه ..

منصور : ما فهمتش الزواج اللي تبوه ..

خالد : الصراحة يا عمى انت فاهم ولكن ما تبش تقنع .. خداتك الدنيا وغراتك نفسك عمى إحنا عيلة واحدة ما فيش لزوم نطول الخيط ..

الطيب : مبروك يا أولاد .. الله يهنيكم ..

منصور : كيف هكي يا طيب صغارى ما عنديش رأى معاهم ..

الطيب : رأيك ماك قلتاه يا منصور .. خيرك .. إنسيت؟ .. إنسيت اللي

حلفت يمين تنفذ اللى يقولوك عليه ..

- الجميع : (يصفقون) .. (يتبادلون التهاني مع منصور وهو مذهول) ..
الطيب : يا لله يا رمضان جيب الجماعة .. هاتوا الشرابات ..
الجميع : (يصفقون ويباركون لبعضهم ...) ..

ستارة...

عيسى يوسف البرقي

كلام بيني وبينك

7 الفصل الأول
41 الفصل الثاني
69 الفصل الثالث

حلم الجعّانين - الجزء الأول

103 الفصل الأول
125 الفصل الثاني
155 الفصل الثالث

حلم الجعّانين - الجزء الثاني

193 الفصل الأول
233 الفصل الثاني
269 الفصل الثالث
271 المشهد الأول
289 المشهد الثاني
305 المشهد الثالث
313 المشهد الرابع

سويلمه
ما يصحّ إلا الصحيح
بين يوم وليله
العسل المر
شهرزاد
إلى وإمشي لقدّام
كلام بيني وبينك
حلم الجعّانين - الجزء الأول
حلم الجعّانين - الجزء الثاني

مركز الجامعة

3.000

